EP 光 法 EF 刘 下册



印光法 師 文鈔 下册



三十二祖傳讚序 六三三	龍舒淨土文序五八九
辨異錄石印序 六三一	護法錄序五八四
辨異錄重刻序 六二七	募設千僧齋序五八三
地藏懺願儀序 六二六	何閬仙家慶圖序五七九
金剛經綫說序 六二二	石印普陀山志序五七六
金剛經次詁序 六一九	刻隨自意三味序五七三
行願品疏鈔擷序 六一六	刻彌陀圓中鈔序五七一
法華入疏序 六一三	刻阿彌陀經序五六九
四書蕅益解序 六一〇	印施極樂圖序五六七
了凡四訓序 六〇五	卷三 序
安士全書序 五九八	F子名的了金目グラ
佛學指南等總序 五九二	它去币之少目欠

净業良導序六三五	│立山派下公堂序 六六〇
佛學初階序 六三六	募建藥王篷序六六二
釋教三字經序 六三七	法雨寺萬年簿序六六三
劉圓照摸象詩序六三九	化聞老人公堂序六六六
佛學述要序 六四一	白華庵法譜序六六七
格言聯璧序 六四三	香積會規約序六六八
不可錄序 六四五	圓通庵萬年簿序六七〇
不可錄敦倫理序 六四七	永悟和尙公堂序六七三
普濟寺萬年簿序六五〇	初機淨業指南序六七五
別庵新公堂序 六五二	藥師本願經序六七八
眠雲公堂序 六五四	管理寺廟條例序六八○
通智法師公堂序六五五	放生殺生現報序 六八四

教觀綱宗序七五二	佛化隨刊序 七八一
佛學研究叢書序七五四	佛川敦本學校序 七八四
金剛經功德頌序七五六	千佛圖頌并序 七八八
儒釋一貫序 七五七	佛法要論序 七八九
近代往生傳序七六二	普陀施棺會序 七九二
懺法隨聞錄序七六四	三聖堂萬年簿序七九三
因果錄序七六七	蔡伯倫嚶鳴集序 七九五
生西金鑑序七六九	教誨淺說序 七九六
棲真長年念佛序七七一	横超蓮社序七九九
歸宗同修淨業序七七三	觀音頌刻木板序八〇〇
臺灣佛教會序 七七五	彌陀經白話解序 八〇二
吳淞居士林序七七九	欲海回狂流通序⋯⋯⋯ 八○五

普陀建牌坊記 八五一	管理寺廟條例跋 八二八
修太子塔記 八四九	往生論註跋 八二六
書華嚴經訟過記 八四七	監獄參觀記跋 八二四
南五臺茅篷記八四二	心歸淨處跋 八二三
釋迦玉像來儀記⋯⋯⋯⋯ 八四○	一 六度室跋 八二二
釋迦舍利來儀記八三七	御製法雨碑文跋 八二一
卷四 記	石印心經跋 八二〇
鄧璞君義莊跋 八三六	梵網經心地品跋八一七
蓮榮堂跋 八三四	歸心堂跋八一五
往生淺說跋八三三	跋
聞經室跋八三三	闢自由結婚序八一三
藥師經重刻跋 八三一	壽康寶鑑序八〇八

烏尤山普同塔記九一七	李夫人燃燈記八八一
烏尤山藏經閣記九一四	法雨寺化身塔記 八八○
西林居士感應記九一二	普濟寺化身塔記 八七八
楊太夫人往生記九○八	常明庵念佛會記 八七六
汪夫人往生記九○四	齊南淨居寺記 八七二
岳運生往生記九○二	佛頂山鐵欄杆記 八七一
	循陔小築發隱記 八六八
九江念佛林碑記八九八	周夢坡放生碑記 八六五
甲壽徑碑記八九五	陳聖性淨業記 八六〇
妙悟律院垂裕記八九二	貞節淨土院記 八五七
小白嶺鎮蟒塔記八八七	普陀仙人井記 八五六
百丈大智塔院記八八三	創建常明庵記 八五四

菩提精舍碑記……………九一九

勸愛惜物命說…………… 九五二

一〇四八	示某比邱尼	啓建水陸小参一○二七
	三歸五戒十善義	寧波功德林廣告一○二四
一〇三七	淨土問答并序	請淨權法師啓一〇二三
一〇三七		│ 柳市淨土堂緣起 ○二
一〇三六	觀音菩薩像讚	常齋會緣起一〇一八
一 三 五	阿彌陀佛像讚	佛學編輯社緣起一〇一四
一〇三四	胡嘉科祭祖母文	高州佛學會緣起一〇一〇
	祭韓山曦文	唐孝子祠校發隱一〇〇七
<u> </u>	祭盛寅懷文	唐塋附尼塔發隱・・・・・・・・・・・・一○○四
0=-	張總戎薦親小參	慈悲鏡發隱 ○○二
	水陸對靈小參	孫夫人往生發隱一〇〇〇
一 〇 二 八	鞀齫小參	林夫人事實發隱九九七

金書繪像普門品頌一〇八九	一〇七一	東瀛佛教歡迎詞
罪福報應經題詞一〇八七	一〇七〇	大雲月刊祝詞
嘉言錄題詞一〇八六	一〇六九	爲梨園會首上堂
三十二應發隱一〇八三	一〇六六	爲心佛閣等三題
金剛經勸持發隱一〇八一	一〇六五	題憨山六詠手卷
龔圓常瑞應頌一〇七九	一〇六四	募刻華嚴回向頌
楊太夫人懿行頌 一○七九	一〇六三	居士林落成頌
張夫人西歸頌一〇七八	一〇六一	昭文會辯訛
蔣太夫人西歸頌 一○七八	一 <u>五</u> 五	一示淨土對治等義
王欣甫懿行頌一〇七七	一 <u>五</u> 三	示陳生
潘對鳧大慶頌一〇七六	一 <u>五</u> 一	
黄太夫人墓誌銘 一〇七二	一〇五〇	戒堂小食榜

附錄
觀音示迹記一〇九一
念佛三味摸象記一〇九五
勸燬淫書說一〇九八
戒煙神方一○九九
徐文霨跋語一一一一
印造經像文一一〇二
念佛伽陀教義百偈一一三〇
普回向頌一一三六
補遺
啓信雜說附記一一三七
壽康寶鑑回向頌一一三八

印光法師文鈔卷第三

序

印施極樂圖序代撰

勝方便之行 能普利羣萌。是以華嚴海眾・盡遵十大願王。法華一稱・悉證諸法實相。最 生・圓滿菩提・九界眾生離是門・上不能圓成佛道。十方諸佛捨此法・下不 奇特。即念念佛・即念成佛・ 法界流。大小權實一切行・無不還歸此法界。不斷惑業・得預補處。即此 統攝律教禪宗。如時雨之潤物・如大海之納川 大矣哉・淨土法門之爲教也。是心作佛・是心是佛・直指人心者・猶當遜其 說十疑論而專志西方。彌陀示現之永明 ・馬鳴示于起信。易行疾至之道 歴劫修證者・益宜挹其高風 ・龍樹闡于婆沙。釋迦後身之智 著四料簡而終身念佛。匯三乘 。偏圓頓漸一切法・無不從此 0 普被上中下根

果地覺 生淨邦 起止儀 五性 之要道 叶 穢土而生蓮邦 之力・頗有己立立人之心。欲令貴賤智愚・僧俗男女・迴客途以歸本國 歷劫難逢。既獲見聞·當勤修習。 <a>不慧 併闡 圖像・交光相映・一際無痕。遂依原本・錄于其下。庶見聞禮誦者・ 文理兼暢・今古絕倫。其極樂依正篇・揭示樂邦妙境・包括淨土諸經・與上 徹悟禪宗・深通教理・自行化他・專主淨宗。所著寶王三昧念佛直指 萬論均宣 總證真常 ・及十念法門・令隨分隨力・逐日修持 修成佛之真因。信願任運發生· 爲因地心・ 同侍彌陀于九蓮 。因繪極樂世界依正莊嚴圖 。誠可謂一代時教之極談 。導上聖下凡・同登彼岸。故得九界咸歸・十方共讚・千經 故得因該果海 同圓種智於 果徹因源也。 二念 生植末世・幸遇斯門。愧無自利利他 佛號執持不已。 • ・明示淨境・用生信向 o 如斯 乘無上之大教也。不植德本· 0 明初鄞江有大禪師 利益 石印萬張 · 何可名言 從茲同離穢 用結淨緣 。傍書念佛 ・厥名妙 良由 知出苦 土 · 捨 以 同

祈善信展轉流通・俾十方法界一切有情・齊還本有之家郷・常住寂光之淨土

云爾。

重刻佛說阿彌陀經序代撰

壽命・横編豎窮 若・則心淨土淨・情空境空。如一月普印於千江・若萬籟咸鳴於一 舌以讚揚 竊惟淨土之爲教也・肇始於彌陀導師・演暢於釋迦世尊。十方諸佛・出廣長 何行非淨土之行。約而言之・唯淨土三經・專明其致。大啓願輪・深明緣起 無非令人由文字般若而起觀照般若 其唯無量壽經 諦理精微 。兩土聖賢・發金剛心而流布。總而論之・一代時教・百千法門 末世鈍根 。直與彌陀世尊・同一廣大悠久。如是則何經非淨土之經 0 專闡觀法・兼示生因・其唯十六觀經。如上二經・法門廣 誠難得益 · 由觀照般若而證實相般若 。求其文簡義豐 詞約理富 0 既證實相般 風 一根普被 0 光明

語 淨 宗 眾生。 洪名・念茲在茲・以至一心不亂。能如是・則現生已預聖流・臨終隨佛往生 令因心・即契果覺者・其唯佛說阿彌陀經歟。良由一聞依正莊嚴 爲實行 讀者各各執持名號・咸歸一心。迥出塵世・倏登極樂。以法藏之願輪・攝取 如蟻子上於高山。念佛往生・似風帆揚於順水。良有以也。 因該果海 ・則真信生而切願發・有若決江河而莫禦之勢焉。從茲拳拳服膺・執持萬德 九界同遵・下手易而成功高・用力少而得效速・篤修一行・圓成萬德・ 開佛知見・同佛受用。是知持名一法・括囊萬行。全事即理・全妄即真 仗淨土之境緣・直趨佛果。庶無問自說・不付空談 。實無自利利他之力・頗有己立立人之心。重刊此經・廣爲流通。俾 。遂稽首謹勸而說頌曰。見聞隨喜者・悉發菩提心。盡此一報身 '・果徹因源。誠可謂歸元之捷徑・入道之要門。古德謂餘門學道 。而有聞斯行 某宿業深重 ・上善俱會 同 頓 罔 0

生極樂國

重刻彌陀略解圓中鈔勸持序

十惡 說十大願王・勸進善財・併華藏海眾・回向往生西方極樂世界。而觀經五逆 普賢所・普賢以威神加被・即時善財所證・與普賢等・與諸佛等。普賢乃爲 參知識 謂不若教海之宏深・禪宗之直捷。每揚宗教而抑淨土・尚自力而惡佛加。當 念佛求生淨土一法・乃十方諸佛普度眾生之要道・九界眾生速證佛果之妙門 仁固讓・見義不爲。致如來徹底悲心・鬱而不暢。眾生出苦捷徑・塞而罔通 。今不避罪責・略引證據。冀見聞隨喜・同生蓮邦。如來初成正覺 位法身大士・演大華嚴。及至入法界品・善財以十信滿心・受文殊教 諸大乘經 地獄相現 。初見德雲・一聞念佛法門・即證初住。從茲隨參隨證 ·皆啓斯要 十稱佛名 |。淨土三經・專明其致。世多習矣不察・視爲淺近 ・即得往生 。夫法身大士・悉願往生・ 。及五十三至 阿鼻罪人 ・爲四十 徧

不二之印・著略解圓融中道之鈔。理高深而初機可入・文暢達而久修咸欽 大士・註疏讚揚。自古及今・多不勝數。於中求其至廣大精微者・莫過於 舉世咸修 其閫奧。自此圓發三心・執持聖號。期出五濁之惡世・冀證四德之玄猷 蓮池之疏鈔。極直捷要妙者・莫過於蕅益之要解。幽溪法師・握台宗諦觀 文殊・普賢 北極。一切諸法・無不從此法界流。河沙妙義・無不還歸此法界。以故西天 普賢說行願品`或註經而造論。莫不以此法門自行化他・普利含識。而古人欲令文殊有發願經`或註經而造論。莫不以此法門自行化他・普利含識。而古人欲令 奈流通既久・錯訛甚多 尙預末品·法門之宏深直捷·孰有過於此者。誠可謂教海之南針·禪宗之 法 無不備 ·故以阿彌陀經列爲日課 ・馬鳴・龍樹。東土遠公・智者・善導・永明。或發願而說經 機無不收 0 。因校訂重刻 隨研一 種・亦可知其指歸 。以其言約而義豐・行簡而效速。宏法 ·俾復舊觀。 彌陀一 **編閱三書** 經 ・得此三疏 ・方堪徹 如如

是則臨命終時・定蒙彌陀接引・聖眾偕迎。託質蓮胎・

離險道以安居寶所

聞法受記・由同居而頓證寂光。撩起便行・阿誰無分。書此愚忱・敢告同人

隨自意三昧校正重刻序

佛法廣大如法界・究竟如虚空。欲修習者不得其要・必致望洋興歎・生退屈 想。若得其要,則雖有無量法門・無邊行相・一以貫之。愈博而愈見其約

愈繁而愈見其簡。雖其理性廣大高深・如天如地・如山如海。而博地凡夫

道。况登住行向地之聖人哉。其要唯何・曰根塵識等一切諸法・其實體實性 亦可坐進此道。由茲斷煩惑以獲三昧・圓福慧以證四德・直趣果覺・成無上

悉皆空無所有。了此則四相原無・三輪體空。萬法森羅・一道清淨。凡夫迷

生死業。聖人悟之・故法法頭頭・總是真如。於五陰六入十二處十八界七大

之・故法法頭頭・皆成障礙。於五陰六入十二處十八界七大・各起煩惑・造

印光法師文鈔卷三 序 刻彌陀圓中鈔序 隨自意三昧序

皆能上求下化 夫發大心者 此而修 皆脗合。 心・不住色聲香味觸法而行布施・度脱一切眾生・而不見能度所度之義 各得親見實相 大師憫之・因著隨自意三昧。於行住坐臥食語六威儀中・處處點示諸法實相 0 0 所謂根塵識性・空無所有・及三輪體空・四相叵得等。令人於一機一境 法華治世語言資生業等・皆順正法・皆與實相不相違背。金剛無所住而 各證圓通 乃將自己所悟所證之法・徹底掀翻 以期同悟同證而已 · 成菩提道 • 咸了自心 即圓教初發心住 自利利他。 。迷悟雖異・性本無二。性雖無二・苦樂迥殊。南嶽 0 其所點示 處處點示六波羅蜜殊勝妙行 。又所言初發心菩薩者・具有二義。一 • 初破無明見法性者 ・與楞嚴陰入界大・皆如來藏妙真如性 ・和盤托出・普施後世。俾得依 。其所謂根塵識性 。令人於一 即博 動 靜 : 悉 地凡 生

無所有等。在凡夫地・欲趣佛果・必須先悟此理・方有實證。否則縱有修持

。其所謂於一念中・徧於十方佛前・普興供養

皆屬有漏

· 不成菩提

期普利 於幼時 本寄與徐君 義・略事修治。則直同雲開月露・光體具呈。文理俱暢・悅人心目 籠月・不見真相。竊念此書流傳至今・經千三百餘年・安得無訛 息心研究 得失因緣・具於初刻序跋中。茲不復贅。蔚如徐君浙西世家・十世奉佛。君 自處凡愚之過。若不知大體大用・初住方得。必有未得謂得・ 唯圓教初住菩薩・乃能爲之。若不知其理其修・通於凡夫。必有高推聖境 法化。徧於十方眾生前・隨類現身・應機說法・普令三根 0 速到寶所 了此則上慕諸聖・下重己靈 ·即禀庭訓 以 ・見其錯訛甚多・ 扯 ・若操左券而取故物・夫何難之有。因此流通徧於中外。其後之 深蒙贊許 屬同志 ·兼學佛乘。近於公暇 • 遂贈數本 即事重刻 因取日藏校對 0 既無安愚之失 0 因焚香敬閱 。又令作序以述緣起 · 編閱 • 改正者有數十 ·又無濫聖之咎。 ・見其文義・多有不安 內典 。得東瀛此書流通本 處 tit · 咸得利益 雖 固陋 隨即刻板 以凡濫聖之愆 其直趣覺路 。乃按文按 。隨以其 義不容 ٥ · 此則 如雲 以

。須知此刻・雖有修治 ・實無更改。不過正其傳寫之訛・俾還南嶽本來面

的可據 。豈不能知其贅脫錯訛者乎。其大方家・必不以畢之修治爲失慎・而

目而已・世有病人・醫爲診脈・臟腑之虚實・尙能知之。况此文義顯露・的

深見罪責也已

石印普陀山志序

觀世音菩薩於無量劫前・久成佛道・號正法明。但以度生念切・救苦心殷・

不離寂光 ・垂形六道。徧於十方微塵佛國 。普現色身・度脱眾生。非獨 止現

爲說法 菩薩之身 而世人據迹而論・止云菩薩而已。以其徹證唯心・圓彰自性・故得悲運同 。 雖則徧入十方佛國 ・而二乘六道・無身不現。法華所謂應以何身得度者 ·而於娑婆因緣 ・甚深甚深。雖則普現十法界身 • 即現何身而

體

慈起無緣

由本高而體大・故迹廣而用宏

。其隨類逐形・尋聲救苦・有

五七六

感即 感冥應・亦冥亦顯感而 非月不現 而合 應道交・無少差殊。與此一月普現眾水・隨人隨地各見全月・了無有異 其月與己 月 由菩薩心 月則隨之而 一人乃至百千萬人・悉皆如是。菩薩於一念中・徧法界感 o 今逢 生凶 應 即 無緣 小 雖化 相對 無願不從之迹・喻如月麗中天・影現眾水。不但江湖河海・各現全 未吉 包太虚 丽 ・是昏盲咎 《修習、由 。 。 遇難成 丽 一勺一滴・無不各各皆現全月。又江湖河海中月・一人觀之・則 應 東 0 即百千萬人於百千萬處觀之・亦皆各各與己相對 ·量周沙界 0 0 宿祥 豈世智凡情所能 人若西行 0 等、亦寫 根、得蒙 以 類 類 其感應之迹・ 顯應・亦冥亦顯感而冥應之不同。蟲感 · 冥亦願感| | 感冥應者 0 • 加盡 以眾生之心爲心・以眾生之境爲境 月則隨之而西 被、 、不知不覺、禍福增慧朗等、冥 測度者哉 顯現 應生 有顯感顯應 誠 。至若水昏而目盲 诸私 世念 宿禮 0 佰世曾種善根、合檀念、不見加被克楠滅福臻、業消廢兵感実應者、過去 人若安住不動 • 冥感冥應・ 今之 生迹 障去 盡生 • 等、冥感中曾修竭 • 一竭、 誠冥 禮類 冥感顯 月 徧法界應 • 念應 供者 則不 則不離當 。人若 o 茂 養 現 即生 故得不謀 顯誠 能 應 應禮 東行 見 0 蒙竭 良 感 處 加誠

ΕD

光法師文鈔卷三

序

普陀山志序

五七八

諦信 思途 不廢 肸蠁 劣 明二年・慧鍔大師由五臺請銅觀音像・欲歸日本・至此舟膠不動・方始開 眾生恃怙 顯 歷代皇帝勅 獲、種轉 固非一 迄今千有餘年・ 固 0 • 不 於 盲人雖不能親見月光 · 致誠未極 書梗概、以勖來哲、 其應之大小人、感應之道、微妙難 其應之大小種益也、了此則知功不虛棄、果無調爲福等、亦冥亦顯感而冥應者、 唯 能 此 處。如陝西南五臺山・大香山・浙江天竺山等。其感應昭著・香火 南 山經劫常住 。由茲舉國人民・各皆信奉・故有家家觀世音之常談。其應化道 如竭誠盡敬者蒙益之殊勝超絕耳 建 海普陀山最爲第一 0 故致舉世欽崇 。但能一念投誠・亦必皆蒙利益。但隨己一念之誠・而分優 其事迹詩文・錄之成帙・名曰普陀山志。余嘗病其於菩薩 其應之大小優劣・在其誠之至與未至而已。縱令心不 何止天長地久 • 又何嘗不蒙其照燭也。菩薩大慈大悲 。以其名載華嚴・昔年善財親參。恩周庶類 • 各國 :浪得、縱令畢生不見加被之迹、亦不至心生怨望宿世曾種善根、今生竭誠禮念、冥冥之中、承其 景仰 · 至於凡夫所見之迹· 。如昏水中・亦有月影 0 緬 維菩薩應化三乘天仙 乃於五代朱梁貞 • • 普爲 但晦 一類大機 法 而不 、慈 半力 場 Щ

不思議感應事理・殊欠發揮。擬欲徧閱大藏・博覽羣書・凡屬菩薩隨機赴感

之迹・悉備錄之・刊板流通。一 以闡菩薩度生之妙道・一以啓眾生出苦之良

緣。但以目疾未愈・未能如願。會稽何廉臣居士者・儒得聖心・醫稱國手 志行高潔 ・信心純真。曾邀同人結桑榆社 。以其暮景無多・擬作歸計 同修

淨業 應化事迹・爲救生船。泛於其中・振臂疾呼。俾諸溺者・相引登舟。庶可同 ・企生安養。又以一切眾生久沈苦海・不仗法力・莫由得出。 擬將菩薩

登彼岸・直達家郷・永離眾苦・但受諸樂矣。因石印山志以廣其傳。用酬大 士度生之恩・用開眾生投誠之路。令余作序。遂不勝歡喜・頓忘固陋 · 乃將

菩薩感應之妙・略爲發揮。其餘事迹・固有全書在也。 何須多贅

紹興何閬仙家慶圖序

詳夫春回大地・百卉各遂其生成 印光法師文鈔卷三 序 普陀山志序 。風起長空・萬籟咸爲之鳴嘯。世無無因之 何閩仙家慶圖序

八〇

現生・ 果・亦無無果之因。喻如種瓜得瓜・種豆得豆。聲和則響順・形直則影端 多矛盾 之家・必有餘殃。箕子之陳洪範也。末後方明嚮用五福・威用六極。二者若 骸而已。其至於死・則形既朽滅・魂亦飄散。無因無果・成斷滅見。其負聖教 此舉世親知親見・諦信無疑者也。因果二字・徧攝世出世間一切諸法・罄無 自在逍遙也。人徒見何君之一門慈孝・四世同堂爲慶。而不知其致此者・由 逆境・不怨不尤。只慚己德之未孚・不見人天之或失。樂天知命・無往而不 不併過去現在未來三世而論・則上天之畀與 而昧己靈也甚矣。孔子之贊周易也。最初即曰積善之家・必有餘慶。積不善 。後之學者不能深體聖人之意・遂謂人物之生・特天地之氣・偶爾湊泊其形 0 及先代後代。而不詳其生之以前・死之以後・及前自無始 世間聖人・非不明示因果。以其專主經世・欲其可繼可傳 顏淵短命、盜蹠長賽等、如奸黨榮貴、忠蘯誅戮、 若知前後因果・則窮通得喪・皆我自取 • 聖人之言論 ・明王之政令・ 。因只局在 ・後盡未來 。縱遇

多生之培植來也。須知娑婆世界・壽命短促・百年即爲上壽・而能得者有幾 智慧徳相。喻如水結成冰・冰融成水。亦如醉見屋轉・屋實不轉。迷謂方移 妄想・一切智・自然智・ 之故。致令原無遷變增減者・常受遷變增減之厄。了無一念常住不動之時矣 觴。可謂篤於事親・以身設教者也。又須知其窮三際而不遷不變・歷萬古而 奇哉奇哉・一切眾生・皆具如來智慧德相・但因妄想執著・不能證得。若離 眾生・背塵合覺・復本心性。滅元無之幻業・了本有之真心。故華嚴經云 明洞徹・湛寂常恆・直下與三世諸佛・無二無別。但以背覺合塵・迷心取境 無減無増者・方是老夫人即心本具之真實壽量也。蓋吾人現前一念・本自靈 ・原非二物・迷之則全智慧德相・便成妄想執著。悟之則全妄想執著・即爲 。我大覺世尊愍之・示生世間・成等正覺。隨順機宜・廣垂言教。普令一切 。今何君幸慈親之壽・已滿六旬。特啓華筵・承歡上壽。廣徴詩文・用佐壽 即得現前。須知智慧德相・與妄想執著・唯是一心

印光法師文鈔卷三 序

何閬仙家慶圖序

特垂方便・立一信願念佛求生淨土法門。無論若聖若凡・或愚或智・與夫天 幻苦・享常住之真樂。承事彌陀・參隨海眾 則帶業往生。既得往生・則惑不期斷而自斷・德不期證而自證。譬如洪鑪片 仙修羅之輩 性・普作苦海度人之慈航。是所謂見小而忘大・得近而遺遠。乃中人之局見 四智圓明。不違安養・徧入十方。上求下化・廣作佛事。徹證即心本具之佛 無生之道・念佛往生之法・諭令修持。使其生念佛號・死生佛國 養其體而導其神。倘唯知服勞奉養以安之・立身行道以榮之・而不知以常住 雪・未至而化。德人覿面・鄙念全消。夫孝子之於親・宜先乎本而次乎末・ ・方實不移。所謂萬境本閒・唯心自鬧・一心不生・萬法俱息者。此之謂也 然此理悟之雖易・證之實難。若非宿根成熟・孰能親證親到。故我世尊・ 非達士之大觀也。若能令慈親與己・併及家眷・ ・地獄鬼畜之儔 。但能至誠發願・持佛名號。聖則頓成佛道 。聞圓音而三惑淨盡 同出娑婆 同生安養・同 。辭生死之 ·睹妙境而 · 餘

證無量光壽・同享寂滅法樂・同作彌陀法王子・同爲人天大導師。方可盡其

孝慈之心・與夫教育之誼。其所謂孝慈教育・非世之所謂孝慈教育也。此家 慶圖原始要終之極致。倘不以予言為非・待至同生淨土之後・用大圓智鏡

攝彼蓮池海會之影・普贈沈溺苦海之同胞。予亦當竭其愚誠・序而讚之。

募設千僧齋序 代在家善人作

幾滿二千。其中凡聖交參・行位難辨。可不念大士恩・培出世因・以至誠心 舉世尊崇 况觀音大士現身塵剎・尋聲救苦・其應化之迹・在乎普陀。是以歷朝欽敬 泥龍雖不能致雨・禱雨者必祭泥龍。凡僧雖不能降福・求福者須供凡僧。而 平等供養乎。心若真切・不但住世大阿羅漢如賓頭盧尊者等・定來應供 其山僧眾・及十方來者・皆屬如來弟子・大士兒孫・當香會時

即大士或亦現凡僧身・俯臨法會。其功德利益・何可名言

。某擬於來年二月

八匹

間・於法雨禪寺虔設千僧大齋・廣結良緣。非但自力微弱・實欲與人爲善。 因募善信・隨心樂助。入寶山者切勿空手・沐法澤者各報佛恩。

重刻明宋文憲公護法錄序

歲在己未・奉化玉仙孫君・刻宋文憲公全集成。又將專闡佛學諸作・依蓮池 博・圓融直捷・發明儒佛之心宗 ・ 永爲人天之眼目處 。直同杲日當空 ・有 既蒙見委・敢以陋辭。因略論其舉世疑議之大關節而已。至於其文之雄渾辨 孫君擬另刻護法錄板・祈諦師作序。師以日與學徒講演台教・不暇命筆。孫君 送觀宗諦閑法師一部。兆往觀宗見之・不勝歡喜・祈爲代請護法錄一部。初 牧齋所訂之護法錄・于全集中挑印之。有不相接續者・則另刻之。以二集各 因光之請·遂託諦師命光勉作。光心被茅塞·見等面牆。何能發揮乘願再來 現文雄宰官之身・即身口意三業・寫華嚴大經・以宏佛祖心要之道乎

宜假 哉 作 宿願耶 生死猶未了耶。既以寫經借室・考之文集・未有題跋・得無虛受此身・莫償 相居士・立憲 出離二種生死而後已。所謂善根未種未熟未脫者・令其即種即熟即脫 入十方無盡世界。普現色身·度脫眾生 土・常享寂滅法樂。但以眾生無盡・我願無盡之故・不離寂光自受用土・徧 目咸睹。正不須光之管窺預告也。序曰・阿彌陀佛・久證菩提・安住常寂光 何身得度者・即現何身而爲說法。其道大事廣・罄海墨而莫書。姑以文憲公 事・以明其概。按文憲與釋幻滅作血書華嚴經贊序・末後自敍宿因曰・無 • 亦輒敍述 極欲發揮 室 。予謂此正所謂以凡情測聖智・不但不知文憲・又何嘗知永明與彌陀 • 以終此卷 未出母胎。母夢異僧・手寫是經・來謂母曰・吾乃永明延壽 0 愧 而世之拘墟者多疑之・謂永明乃彌陀化身・ 無妙筆 0 母夢覺已・居士即生。今逢勝因 然詞取達意 0 或顯或密 何妨直談 • **夫彌陀既已證窮法界** 或折或攝 頓憶前事 豈彌陀化身者 ・必期於究竟 餘諸 0 應以

五八六

純儒 光横徧豎窮・無時無處不周徧也。永明之假室以寫華嚴者・乃以身寫 山所謂疾疫世而現爲藥草・飢饉時而化作稻粱。以常寂光土・身土不二・ 舉凡法界中事 鶴孔雀等奇妙雜色之鳥・尚肯變化。豈雅思淵才文中王 不俯順機宜・示生世間・和光同事・以行教化。則凡聖異趣・教莫由施 謂永明生死未了・復隨業力以受生乎。眾生病故・菩薩亦病。欲度眾生・若 土交現 智一如 類備現・以行教化。依報則樓臺殿閣・飲食衣服・但有利益・無不化現。怡 皆是阿彌陀佛變化所作 其無量壽經等・謂光中化佛及諸菩薩 便有所妨乎 ・何妨現永明而復現文憲。宜永明之現文憲者・乃乘悲願以示生・ 。身能現土。土能現身。身復現身 ・無不隨意化現。正報則佛身・菩薩身・二乘身・六道身 永明 乃彌陀所現・文憲乃永明所現 0 維摩詰云 ・以一切眾生病 ・無量無邊・乃徧該橫豎二義 ·土復現土。彌陀經云 • 是故我病 ・即身復現身之豎證 ・制禮作樂輔聖主之 ・是諸眾 夫彌陀身 。以佛 將 理 隨 鳥

妄濫聖・適足取辱。如刻人糞爲栴檀形・豈能與栴檀相混哉。或曰・如來智 君豈不見傅大士之自稱彌勒現身乎。彼既不以爲非・此何獨以爲非乎。且狂 而啓後世狂妄之徒・以凡濫聖之端乎。予曰 其證也。或曰 或邊咒語說四諦・或善密語說四諦・或人直語說四諦・或天密語說四諦・是 企出生死之樊籠乎。况其中發揮佛法者・有一百七十餘篇之多乎。華嚴所謂 文之洪闊 塗藥于乳 雖不專說佛法 文之傳於世者・唯全集・及此集耳。閱之・則其道德操持・可想見矣。全集 華嚴經也。其至德懿行・雖載明史・然亦略示一二而已。其遺軼者固多。其 寫 非拘拘然按文字語言論也。凡文憲畢世所作所爲 ・又服其理之高深。能不斷疑生信・愈入愈深・大明儒佛之心法 則不服而服・病即痊愈矣。彼不知佛法者・讀文憲公集 ・楞嚴戒洩佛密因。文憲自說永明後身・得無違佛清淨明誨 ・即世諦文字・未嘗不含佛法宗要・如小兒有病・不肯服藥 ・出格之人・不可以常格律之。 ・併所撰述・皆所寫之 ·既欽其

印光法師文鈔卷三

序

護法錄序

八八八

之流・因言解了。以大慈悲・偶一現此即迹顯本之事。俾淺見之人・備知法 其爲細作 乎。予曰・君亦知皇帝微行之事乎。智者知是皇帝・愚人視作平民・更有疑 斷究竟・其功德智慧・神通道力・不可思議。永明雖高・去佛甚遠・况文憲 夫情見所能測度 惡遷善・亦嘗攝陽人以入陰・示陰獄于陽世。上帝教人之權巧方便・尙非凡 身大士・普現色身之不思議事。如陰間之事・陽間不知。然上帝亟欲世人改 刻板之一番至意。夫希驥之馬・亦驥之乘。希顏之人・亦顏之徒。孫君之面 密示即生即佛・即權即實・即生滅而寂滅・即同居而寂光・治世語言資生 予初未識 ・同生淨土・以慰彌陀展轉現身之大慈悲心・亦不孤負文憲寫經 皆順正法 ・爲盜賊者。何獨於如來內祕外現而疑之。須知此正如來權巧設化 。若非宿承佛囑・便是深沐宋恩。以故乘願再來・極力流通 • • 皆與實相不相違背之微旨也。上根之士・目擊道存 况菩薩神變無方者乎。予故表而出之・企人各遵行 ・孫君 ·同出 。中下

現未有情・同沾法利于無既也。猗歟懿哉

重刻龍舒淨土文題詞并序代王弘願作

眾生心性・與佛同儔。由迷背故・輪迴不休。如來慈愍・隨機說法。普令含

土一門。普攝一切・上中下根。五逆十惡・地獄相現。一念投誠・即登彼岸 識・就路還家。無奈根性・萬有不齊。非出格人・決難出離。因茲特開・淨

等覺菩薩・德與佛齊。尚須往生・方證菩提。博地凡夫・具足煩惱。不肯 如何是好。寄語世人・同生信願。執持佛號・始終莫變。待至臨終

念佛

情 蒙佛接引 。頓出五濁・直登九品。見佛聞法・親證無生。乘大願輪・普度有

淨土法門者・如來徹底悲心・普度眾生之法門也。令彼無力斷惑・具縛凡夫 信願持名・ 印光法師文鈔卷三 序 現生了脫 。與觀音勢至同爲伴侶。上而至於等覺菩薩・位鄰佛 護法錄序 龍舒淨土文序

五九〇

情不信 是佛 敍宿因 果 身大士 情空之聲聞緣覺・猶或疑之。不但小聖不信・即權位菩薩・猶或疑之。 德一切諸佛所護念經。又謂我釋迦世尊・能爲甚難希有之事。 是爲 0 深難 尚須往生· 方成正 境 以故當佛說彌陀經時・六方諸佛出廣長舌・一音讚歎・稱爲不可思議功 依 界 甚 ・即深通宗教之知識 謂我 教 雖能諦信 難 測 唯佛與 奉行 0 0 令其聞者 於五濁惡世・行此難事 雖經諸佛本師交相勸信 自獲實益。若得聞 佛 · 尚不能窮源徹底 • 乃能 躉 • 信受奉行 。至頓至圓 究盡 ・猶或疑之。不但知識不信・即已證真諦 非彼諸 ·以究竟暢己出世之本懷 此不思議法門・便是多劫深種善根 。良以此之法門・ • 0 ・徹上徹 得證菩提 而世之疑者·猶復甚多。不但世 人智所能知故 ·爲一切世閒說 0 超越一代時教所說一方法 以果覺爲因心 也 0 我輩 而已 而我世尊・自 此 凡 0 然此法 難信之法 夫 • 業盡 即法 智凡 仰 全體 况

信受奉行乎哉。

溯自大教東來・

遠公創開蓮社。

嗣後宗教高人・無不弘贊

宋時 願 雖在 後一 佛 境逢緣·便能提起如陳企被所殺之怨鬼見逼·由念佛而鬼遂不現。因茲畢世念 願・絕不修持。 爲 俯順劣機・循循善誘。曲盡婆心・無所不至。恐其畏難不入・故以晨朝十念 子弟。又欲同人・咸生淨土。作爲此書・普徧倡導。言淺而典・理深而著 如智者・慈恩・清涼・永明等。以其爲初機入道之第一要門・華嚴成佛之末 • 作普攝羣機之最勝方便 • 塵俗 著也。由是具縛凡夫・仗佛力以了生死者・非算數譬喻所能知也。當南 臨終往生且能歸而敍述前因 畢生堅持十念・決定往生 自能拳拳服膺 • 吾宗先德・ ,不納妻室。雖入國學 知有彌陀聖號・亦爲不可思議善根。何以故・以由知故・遇 有龍舒居士・名日休・字虚中者。 唯佛是念 。待其漸入漸深・如得嘉肴・既知其味・則日用云 0 • 非限於一茶之頃・以爲定章也。 况更能加功用行者乎。 ·不履仕途 親現生西本身妙相使先未預聞 。發揮儒佛之心宗 乘願再來 不但此也。即絕無信 • • 教授具信之 倘能具真信 以身說法 則便被鬼

印光法師文鈔卷三

序

龍舒淨土文序

九二

大慈悲心于剎塵海滴云耳。 矣。爰付剞劂・普徧流通企酬釋迦說法・諸佛證明・列祖傳燈・居士著書之 居士一生所行・末後所現・則上中下三根・無根不被。信願行三法・無法不彰 生決定往生爲宗。詳觀斷疑生信・普勸修持・往生事迹・特爲勸諭等・以及 土法門・普攝羣機・了無棄物・猗歟大哉。其書以真信切願・持佛名號・即 尙獲往生。至于一心不亂・妙觀圓成・證三昧而往生者・更不須言矣。是知淨 奪命・永劫沈淪矣。所以觀經三福・初則世善皆堪回向。及至九品・末則獄現

佛學指南佛學起信編六道輪迴錄總序

得。若離妄想・一切智・自然智・無礙智・則得現前。須知智慧與妄想執著・原 故華嚴經如來出現品云・一切眾生・具有如來智慧・但以妄想執著・而不證 切眾生·一念心性·直下與一世諸佛·無二無別·但以從未悟故·不得受用

聞果 惡・了無定相。致所受生處・輾轉遷移・如輪無端・忽上忽下。以既具煩惑 之善惡夾雜道 雖有性德・了無修德・只為六道輪迴之凡夫而己。用隨緣故・則有四聖六凡 迴 **縁體不變故・在凡不減** 非二物。迷之・則全智慧・以成妄想執著。悟之・則全妄想執著・以成智慧 0 o 皆被業縛・隨業受生・不能自主故也。由斷證有淺深・故斷見思者・證聲 苦樂升沈之殊。而緣有染淨・必隨其一。隨染緣・則起惑造業 常自如如・了無凡聖生佛之異。悟之名賢・證之名聖・若但具而未悟・則 隨淨緣 喻如握拳舒掌・原是一手。結冰融泮・原是一水。良由心體不變・用常隨 證涅槃而不屬寂滅 侵習氣者 ·則斷惑證真 ·并畜生餓鬼地獄之三惡道 證緣覺果 ·常住涅槃由惑業有輕重 • 無象而爲萬象之主・ 在聖不增・居塵不染・離垢不淨・在生死而不受輪 破無明者 證菩薩果 。而由惑起惑 非法而爲諸法之宗・從本以來 · 故有人天善道 若無明淨盡 · 由業造業 • ・輪迴六道 福慧圓 及阿修羅 ·或善或

印光法師文鈔卷三 序

佛學指南等總序

安隱 間耳 由宿福 福樂 緣覺菩薩·雖則所證高下不同·然皆未能全體受用性具功德。而一切凡夫 界無安・猶如火宅・眾苦充滿 永劫沈淪者・比比皆是・可不哀哉 夫地本具心性功德力用·親得全體受用而己·實未加一絲毫於其初也。若聲聞 法界因果修證・不出自心。固當發大菩提・力修定慧・以期斷惑證真 之人・若無正念修持淨業・唯得人天福報者・名爲第三世怨。法華經云・三 反承此不思議心性之力・於六塵境・起貪瞋癡・造殺盜淫・以致墮三惡道 修德功極 ·爲上計也。大丈夫生於世間 。况有由天命終・承宿世惡業已熟之力・直墮惡道者乎。故古德以修行 ・乃墮落之根本。天上雖不比人間煩惑猛利・然天福一 未盡 ·故享福 ・性德全彰者・則證佛果。證佛果者・亦不過徹底究竟證其在凡 0 由享福・故造業 · 甚可怖畏。知好歹者·當以急求出離 。縱令恪修五戒十善・得人天身。然人間 既知自己一念心性・ 。既造業已・則墮落惡道・直在瞬息 與佛無二。又知十 盡・決定下生 ・企得

印光法師文鈔卷三 0 序 佛學指南等總序 0 五九五

條陳 IE 堂堂丈夫・表表懿範者哉。若不知此義 雖則志在利人・而化功實歸自己。由是現生福慧增崇・臨終直登上品・豈不 契機之書 化他 迨至證無生忍 理契機・易於領會者・編輯成書・垂示將來。舉凡三世因果・六道輪迴・及 或根機陋劣・未能如是。必須以深信願・篤修淨業・仗佛慈力・往生西方 佛道。普令法界眾生・同出迷途・共登覺岸・畢竟親證本具心性而後已。 了生死 三寶功德・佛法利益・與夫三根普被之道・凡聖共修之法・分門別類・縷析 有大把持 0 俾閱者一目了然。 縱不能出廣長舌・震海潮音 或作未來得度因緣 刊印流布 • 恐 再乘願來・度脫眾生。 經轉世 ·俾輾轉傳揚 自知取捨 0 便致迷惑 如其無此手眼 。從茲斷疑生信 。亦當於佛祖經論 ・永用舟航・實屬莫大功德。如上所說 然於未生以前 • 唯依世諦而爲操修 則被業所縛 · 不可冒昧從事 ・歸心大覺。 ・先賢遺書中・採其契 ・尤宜發菩提心 隨業受報 0 0 當取古人契理 縱此生意誠心 或於現生即 如風 飄葉 如

五九六

非拔本塞源究竟之道。于是研究佛學・箋註各經。欲令初機易入・故用漢儒 六道升沈之若理若事・與夫幽冥之景象・鬼神之情狀。兼顯欲脱冥途之苦・ 賢遺書中·所有因果報應顯著事迹·錄成三冊。 一曰六道輪迴錄。蓋以發明 無忌憚・安於爲惡。致世道人心・日趨日下。因將佛祖經論・及古今緇素羣 焉者・則謂既無因果・一死永滅・何不隨意所作・以取此生快樂乎。從茲肆 不必守此以爲究竟也。又以世儒狃于見聞・不信人死神明不滅・及三世因果 多重提綱闡妙。字句之間・不甚詳釋。致令初機・殊難領會。若由訓詁入門 訓詁之法・俾若文若義・悉皆了了。良以佛經深奧・意義無窮。古德註疏 專精醫學・歷有年所。繼思病從身生・身從業生・業從心生・但只治身・實 ・六道輪迴之事。上焉者・只可作自了漢。斷不能移風易俗・覺世牖民。下 ・自可登堂入室。然後進而研究古德之註疏・則如杲日當空・無微不照。正 不能自主。或墮茵褥之上・或墮溷廁之中。思之誠可畏也。福保丁居士・ 代佛祖羣賢・出廣長舌・震海潮音於無既也。將見風移俗易・遄臻大同之治 功德 果報應 世道之人・爲之輾轉流通・多方傳播。如是・則豈但慰丁君纂輯之心・實爲 昏・亦不過略加翻閱 慈力 之初步。次則名爲佛學起信編。次則名爲佛學指南。二書大旨相同。初說因 捨如來大法・則絕無依怙。實爲改惡修善・捨迷歸悟・欽崇佛法・企慕真乘 有目如盲。濫廁僧倫・虚消信施。愧不能力修定慧・斷惑證真。唯期以仗佛 止而不進哉。其事雖述・其心誠溥・其利益實非思議所能及。光宿業深重 具有大藏經論及羣賢諸書在。此不過爲引人入佛法之前導・豈宜以此自限 ・帶業往生。叨蒙丁君不以無狀見棄 ・亦皆抄錄高人軼士成言 ·次說佛法功德 ・以結隨喜之緣而已。近得見此三冊・不禁有感於中 。但起信初義居多・指南次義居多爲異耳。所說佛法 。但以限於篇幅 ・凡所著述・皆爲郵寄。 序其大略。企在在處處・有心 · 不免疏漏 0 然信根既生・ 然字小目 則

五九八

文字所能形容。倘不以人微而竟廢其言・則幸甚幸甚 民和時雍 ・共享無爲之樂。其功德利益・當與十方虛空同其壽量 ・豈語言

重刻安士全書序一

情・不生不滅。謂之爲有而不有・不有而有。謂之爲空而不空・不空而空。 之道・立不生不滅之宗・雖淺深大小不同・世出世間有異。要皆不外即吾心 道德之經・陳長生久視之術。大覺世尊・稱法界性・示真如心・演背塵合覺 性・各垂教迹・廣導羣萌。由是尼山抉誠明之奧・作修齊治平之軌 諸法。乃如來所證之無上覺道・亦眾生所迷之常住真心。三教聖人・依此心 之遠離諸相・不妨日照雲屯。正所謂實際理地・不受一塵。本覺心中・圓具 生佛皆由此出・聖凡俱莫能名。類明鏡之了無一物。而復胡來漢現。猶太虛 大矣哉吾心本具之道・妙矣哉吾心固有之法。寂照不二・真俗圓融。離念離 。柱史說

牖民 慈願莫窮。欲使斯民推忠恕以篤胞與。息刀兵而享天年。守禮義以敍彝倫 俾千古之上・千古之下・垂訓受訓・悉皆釋然・毫無遺憾。而又悲心無既 所仿效。心心念念・有所警懲。直將帝君一片婆心・徹底掀翻・和盤托出 徴引事實・袪迷雲於意地。闡揚義旨・揭慧日於性天。使閱者法法頭頭・有 心法・就帝君隨機說法之文・著斯民雅俗同觀之註。理本於心・詞得其要。 盡・誰測淵源。註解縱多・莫窺堂奧。致令上下千古・垂訓受訓・皆有遺憾 恐末學無知・昧己永劫常住之性。因作文廣訓・示吾一十七世之言。妙義無 敦五常・躬奉三教。自行化他・惟欲止於至善。功高德著・遂得職掌文衡 本具之理・以發揮演暢之。普令含識・稱性起修・即修顯性。消原無之幻妄 ・復本有之天真。永出迷途・誕登覺岸而後已也。文昌帝君・於宿世中・心 不能釋然。安士先生・宿植德本・乘願再來。博極羣書・深入經藏。覺世 ・引爲己任。淑身變俗・用示嘉謨。以奇才妙悟之學識・取靈山泗水之 0 0

印光法師文鈔卷三

序

安士全書序

傳 獲人天之福 好令德而遠美色。因著戒殺之書・曰萬善先資。戒淫之書・曰欲海回狂 本願輪・現居士身・說法度生者・吾不信也。 ஈ慧 少讀儒書・罔知孔孟之心 震聾發瞶之情・有更切於拯溺救焚之勢。誠可以建天地・質鬼神・羽翼六經 法・而亦須修行世善。至於惠吉逆凶・縷析條陳。決疑辨難・ 吾心固有之樂。前三種雖明修行世善・而亦具了生死法。後一種雖明了生死 同念阿彌陀佛・求生極樂世界。迴出輪迴・直登不退。謝妄業所感之苦・享 爲一書・名曰西歸直指。普使富貴貧賤・老幼男女・或智或愚・若緇若素・ 由世人殺業最多・淫業易犯。以故不憚煩勞・諄諄告誡。又以泛修世善 毫 扶持名教。允爲善世第一奇書・與尋常善書不可同日而語。不謂之菩薩乘 。長學佛乘・未悟如來之性體。迄今年臨知命・見等面牆 無利人之力。 ・福盡墮落・苦毒何所底極 欲將此書 ・刊刻流布 。乃宗淨土經論・採其逗機語言 0 無奈貧無卓錐 兼以懶於募緣 0 理圓詞妙 徒有樂善之心 正 止 。良 。 其

印光法師文鈔卷三 序 安士全書序 安士全書序二

是多年・未償所願。西蜀居士李天桂・夙具靈根・篤修善行企得無上佛法・

屈膝問法・詢求出要。余因示以力敦倫常・精修淨業・自利利他・唯此爲要 朝禮普陀名山。於法雨禪寺・偶然會遇。若非宿緣有在・何以邂逅如斯。乃

之德不加修・而善不力遷者・非無修德遷善之資・乃無良師益友以身率之故 若能躬行無玷・方可感化同人。倘所行不符所言・乃奉法反以壞法 。彼世

也。即贈以此書・令詳悉披閱。務使己之動作云爲・與書之指示訓誨・相契 相合・無少參差・庶幾可耳。彼遂若獲至寶・慶幸無已・發願刊板・用廣流

齊家・教子孫以希聖賢・悟心性以了生死者。請熟讀而力行之・當不以吾言 通。又祈作序・普告同人。因不揣固陋・略述顛末。其有欲致君澤民 ・修身

爲謬妄也。

重刻安士全書序二

六〇

淫殺二業・乃一切眾生生死根本。最難斷者唯淫・最易犯者唯殺。二者之中 殺。徴引事實・詳示因果。切企舉世之人・同懷乾父坤母・民胞物與之真心 畏也。安士先生恭稟佛敕·特垂哀愍。因著欲海回狂以戒淫·萬善先資以戒 世間刀兵劫・須聽屠門半夜聲。既有其因・必招其果。不思則已・思之大可 俱生・窮未來際。古德云・欲得天下無兵劫・除非眾生不食肉。又云・欲知 羊・羊死爲人・人死爲羊・如是乃至十生之類・死死生生・互來相噉・惡業 心識之中・從劫至劫・莫能解脱。殺則世皆視爲固然。以我之強・陵彼之弱 惑證真之阿羅漢方能之耳。餘則愛染習氣・雖有厚薄不同。要皆纏綿固結於 。永斷傷風亂倫・以強陵弱之惡念。又欲同人諸惡莫作・眾善奉行。因將文 。以彼之肉・充我之腹。只顧一時適口・誰信歷劫酬償。楞嚴經云・以人食 ・淫則稍知自愛者猶能制而不犯。然欲其意地清淨・了無絲毫蔕芥者・唯斷

昌帝君陰騭文詳加註釋。俾日用云爲・居心行事・大而治國安民・小而一言

印光法師文鈔卷三 序 安士全書序二

輯爲一書・名曰西歸直指。若能一閱是書・諦信不疑・生信發願・求生西方 之所輪轉耳。因是特依如來仗佛慈力・帶業往生之法・薈萃淨土經論要義 豈易言乎。唯力修定慧・斷惑證真者・方能究竟自由。餘則縱令尊爲天帝 戒殺・諸惡莫作・眾善奉行。若不了生脫死・安能保其生生世世不失操持 則恆生善道・廣修福慧・不墮惡趣・彼此酬償者・有幾人哉。而了生脫死 上而至於非非想天・福壽八萬大劫。皆屬被善惡業力之所縛著・隨善惡業力 妙悟・取佛祖聖賢之心法・而以雅俗同觀之筆墨發揮之故也。雖然已能戒淫 存空談而已。如上三種・文詞理致・莫不冠古超今・翼經輔治。以其以奇才 念・咸備法戒・悉存龜鑑。由茲古聖先賢之主敬慎獨・正心誠意・不致徒 無論根機之利鈍・罪業之輕重・與夫工夫之淺深・但能信願真切・持佛名 無不臨命終時· 悟自心於當念・ 證覺道於將來· 蒙佛慈力・接引往生。既往生已・則超凡入聖・ 其義理利益 唯證方知 固非筆舌所能 了生脫 0

生者 災・頻迭見告。統計中外所傷亡者・不下萬萬。痛心疾首・慘不忍聞 形容也。 袁了凡四訓 全書示之・企其刊板廣傳・普令見聞・同登覺岸。先生不勝歡喜・即令其甥 景 濫廁僧倫 始因意見不同・竟成南北相攻。加以數年以來・水風旱潦・地震土匪瘟疫等 真 祈余作序 趙步雲出資七百元・祈余代任刊事。憶昔戊申・曾勸李天桂刊板於蜀 須令斷因 。慼然日 ・了生脱死者・其難易奚啻天地懸隔而已。現今外洋各國大戰數年 ・清介之士也。世德相承・篤信佛法 此係以己信願・感佛慈悲・感應道交・獲斯巨益。較仗自力斷惑證 。後以因緣不具・事竟未行。今蒙劉公毅然贊成 ・未證道果。徒存傷世之心・毫無濟人之力。有同鄉芹浦劉在霄先 。因斷則果無從生矣。故經云・菩薩畏因・眾生畏果。遂將安士 · 有何妙法 爲改過遷善之嘉言。俞淨意一記・爲至誠格天之懿行。 ·能爲救護。余曰 ・此是苦果・果必有因。若欲救苦 。今夏來山見訪 ·談及近來中外情 · 殆非小緣 其發揮 · 我國 彼即 竊 不 慧

事理・操持工夫・最爲嚴厲純篤・精詳曲盡。因分附於陰騭文廣義三卷之後

・蓮池戒殺放生文・爲滅殘忍魔軍之慈悲主帥。省庵不淨觀等頌・爲滅貪欲

魔軍之淨行猛將。省庵勸發菩提心文・爲沈淪苦海眾生之普度慈航。爰附於

三種法門之後。譬如添花錦上・置燈鏡旁・光華燦爛・悅人心目。果能讀之

漸入漸深。不知不覺・即凡情而成聖智矣。庶可了生脫死・永出輪迴。面禮 則不忠不恕之念・忽爾冰消。自利利他之心・油然雲起。從茲步步入勝

命覺皇 彌陀・親蒙授記。謹爲閱此書者賀曰・久沈業海・忽遇慈航。遵行忠恕・歸 。信真願切・執謝情亡。感應道交・覲無量光。餘詳戊申序中・茲不

復贅

袁了凡四訓鑄板流通序

聖賢之道・唯誠與明。聖狂之分・在乎一念。聖罔念則作狂・狂克念則作聖 印光法師文鈔卷三 序 安士全書序二 了凡四訓序

六〇六

旗 即當嚴以攻治 轉 徹底顯現 明德・須從格物致知下手。倘人欲之物・不能極力格除。則本有真知・決難 察・從凡至聖之達道。然在凡夫地・日用之間・萬境交集。一不覺察・難免 任也。須知誠之一字・乃聖凡同具・一如不二之真心。明之一字・乃存養省 暫萌於心 作聖之心・永淪下愚之隊。可不哀哉。然作聖不難・在自明其明德。欲明其 其中正矣 種種違理情想・瞥爾而生。此想既生・則真心遂受錮蔽。而凡所作爲 其操縦得失之象・喻如逆水行舟・不進則退。不可不勉力操持 . **剿滅餘黨** 妍媸自彼 。欲令真知顯現・當於日用云爲・常起覺照。不使一切違理情想 。若不加一番切實工夫・克除淨盡 常使其心・虚明洞徹 。其制軍之法・必須嚴以自治・毋怠毋忽。克己復禮・主敬存 ・勦除令盡。如與賊軍對敵・不但不使侵我封疆・尙須斬將搴 ・于我何干。 來不預計・去不留戀。若或違理情想稍有萌動 。如鏡當臺・隨境映現。但照前境・不隨境 。則愈趨愈下・莫知底極 · 而稍生縱 ・咸失 0 徒 具

賢之域 所言所行 所爲 明德 清寧。不動干戈・坐致太平矣。如上所説・則由格物而致知・由致知而克明 將不出戶 極戮 誠 無惡。故能轉無福爲有福·轉不壽爲長壽·轉無子孫爲多子孫。現生優入聖 命自我立 兢 |輕而 。其器仗須用顏子之四勿・曾子之三省・蓬伯玉之寡過知非。加以戰戰兢 如臨深淵 0 退屈 誠明一致・即凡成聖矣。其或根器陋劣・未能收效。當效趙閱道日之 冀沾安撫之洪恩。從茲相率投降 夜必焚香告帝 報盡高登極樂之鄉 、・兵不血刃。舉寇仇皆爲赤子・即叛逆悉作良民。上行下效・率土 ·善惡纖悉皆記 福自我求 或問 • 如履薄冰・與之相對。 格物 俾造物不能獨擅其權 不敢告者 ・以期善日增而惡日減。初則善惡參雜・久則唯善 乃窮盡天下事物之理 。行爲世則 ·即不敢爲 則軍威遠振 • ·言爲世法。彼既丈夫我亦爾 歸順至化 。受持功過格・凡舉心動念・ o 袁了凡諸惡莫作 ٥ 致知 0 盡革先心 賊黨寒心 乃推極吾之知識 • 0 眾善奉行 聿修後德 懼罹滅種之 : 何 及 可

八八八

心知識悉皆明了・方能誠意者。則唯博覽羣書徧遊天下之人・方能誠意正心 修身正心誠意致知·皆所以明明德也。倘自心本有之真知爲物欲所蔽 存誠返妄歸真而言。其檢點省察造詣工夫・明爲總綱・格致誠正乃別目耳 自心之體用而言。實則即三而一也。格致誠正明‧明‧與誠明之明‧ 五者皆約閑邪 誠與明德 必使一一曉了也。何得以人欲爲物・真知爲知・克治顯現爲格致乎。答曰 多皆高推聖境 其下焉哉 以明其明德。未能博覽閱歷者・縱有純厚天姿・於誠意正心・皆無其分・况 不誠而心不正矣。若能格而除之・則是慧風掃蕩障雲盡・心月孤圓朗中天矣 三世因果・ 0 此聖人示人從泛至切從疏至親之決定次序也。若窮盡天下事物之理 ・皆約自心之本體而言 。有是理乎。然一切不深窮理之士・與無知無識之人・若聞理性 或善或惡・ 自處凡愚。 各有其報 不肯奮發勉勵 。名雖有二·體本唯 則必畏惡果而斷惡因 • 遵循從事。若告以過去現在未來 也。 修善因而冀善果 知與意心 ・則意 · 俾吾 兼約

哀哉 人心目。讀之自有欣欣向榮・亟欲取法之勢。洵淑世良謨也。永嘉周羣錚居 親得受用耳 須知從凡夫地乃至圓證佛果・悉不出因果之外。有不信因果者・皆自棄其善 者・必不棄離於因果。而深信因果者・終必大明夫心性。此理勢所必然也。 中・常如面對帝天・不敢稍萌匪鄙之心・以自干罪戾也已。此大覺世尊普令 善惡不出身口意三。既知因果・自可防護身口・洗心滌慮。雖在暗室屋漏之 因善果 愚者防己愧怍・謂爲渺茫。除此二種人・有誰不信受。故夢東云・善談心性 不以希聖希賢爲事・因茲當面錯過。袁了凡先生訓子四篇・文理俱暢・豁 切上中下根 聖賢千言萬語· 。而常造惡因・常受惡果・經塵點劫・輪轉惡道・末由出離之流也 。但人由不知因果・每每肆意縱情。縱畢生讀之・亦只學其詞章 • 致知誠意正心修身之大法也。然狂者畏其拘束·謂爲著相 無非欲人反省克念・俾吾心本具之明徳・不致埋沒

感佩之極

。祈上海商務印書館鑄鉛爲板

・以公同志・又印送若干

· 以結

法緣。祈予爲序。因撮取聖賢克己復禮閑邪存誠之意・以塞其責云

四書蕅益解重刻序

水喻吾心固有之明德 道在人心・如水在地。雖高原平地・了不見水。苟穴土而求之・無不得者。 ·土喻吾心幻現之物欲。果能格物致知·無有不能明其

明德者。然穴土取水・人無不施工求之・以非水不能生活故也。而道本心具

繼往聖・下開來學・俾由格物致知以自明其明德・然後推而至於家國天下・ 法身以失慧命・生作走肉行屍・死與草木同腐・可不哀哉。四書者・孔門上 ・人多不肯施工。致物欲錮蔽真知・不知希聖希賢・甘心自暴自棄。由茲喪

俾家國天下之人·各皆明其明德之大經大法也。前乎此者·雖其說之詳略不

同 ・而其旨同。後乎此者・雖其機之利鈍有異・而其效無異。誠可謂先天而

天弗違・後天而奉天時・萬世師表・百代儒宗也。其大綱在於明明德修道

未知佛之所以爲佛。後讀佛經·始悔前愆。隨即殫精研究 豈無見過於師之人。適見其心量狹小・而誠意正心之不無罅漏也。深可痛惜 則是傚。故有功深力極・臨終豫知時至・談笑坐逝者甚多。其誠意正心・固 稱三才。可不自勉乎哉 皆向自己身心體究。雖一介匹夫・其經天緯地參贊化育之道・何難得自本心 其下手最親切處・在於格物慎獨・克己復禮・主敬存誠。學者果能一言一字 足爲儒門師表 儒宗・俾孔顔心法・絶而復續。其用靜坐參究・以期開悟者・莫不以佛法是 。高人林立・隨機接物。由是濂洛關閩以迄元明諸儒・各取佛法要義以發揮 明末蕅益大師・係法身大士・乘願示生。初讀儒書・即效先儒闢佛・而實 俾聖賢垂訓一番苦心・不成徒設・而爲乾坤大父大母增光・不愧與天地並 以企後學尊己之道・不入佛法 。但欲自護門庭・於所取法者・不唯不加表彰・或反故爲闢駁 0 如來大法・自漢東傳 。然亦徒爲是舉 。至唐而各宗悉備 。不思己既陰取陽排 ・方知佛法乃一切 · 禪道大興 ・後學

印光法師文鈔卷三

序

四書蕅益解序

諸法之本 0 其有闢駁者・非掩耳盜鈴・即未見顏色之瞽論也。 遂發心出家

焉者習詞章以自足・多造謗法惡業。中心痛傷・欲爲救援。因取四書周易 如走盤珠・利益無盡。又念儒宗・上焉者取佛法以自益・終難究竟貫通。下 弘揚法化。一生註述經論四十餘種・卷盈數百。莫不言言見諦・語語超宗

知佛法廣大・不易測度。亦當頓息邪見・漸生正信。知格除物欲・自能明其 露・了無餘蘊。其取佛法以自益者・即得究竟實益。即專習詞章之流・由茲 法華開權顯實之義・以圓頓教理・釋治世語言。俾靈山泗水之心法 以佛法釋之。 解論語孟子・則略示大義 0 解中庸大學・則直指心源 ٥ 徹底顯 蓋以秉

0 近來各界 眼界大開。天姿高者・無不研究佛法 。一唱百和 • 靡然風從 。 見

明 德

。由是而力求之・當直接孔顏心傳。

其利益豈能讓宋元明諸儒獨得也已

義不爲·高推聖境·自處凡愚乎哉。以故偉人名士·率多吃素念佛·篤修淨業 既知即心本具佛性・無始無終・具足常樂我淨真實功德。豈肯當仁固讓

企其生見佛性・死生佛國而已。郁九齡施調梅二居士・宿具靈根・篤信佛

世出世法 法。一見四書蕅益解・不勝歡喜。謂此書直指當人一念・大明儒釋心法。于 融通貫徹。 俾上中下根・隨機受益。深則見深・不妨直契菩提

淺則見淺 · 亦可漸種善根 。即欲刊板 · 用廣流通 。以此功德· 恭祝現在椿萱

淨土。祈序於光・企告來哲。光自愧昔作闡提・毀謗佛法。以致業障覆心・ ・壽登期頤・百年報盡・神歸安養。過去父母・宿業消除・蒙佛接引・往生

心光俱皆發現矣 悟證無由 。喜彼之請・企一切人・於佛法中・咸生正信。庶可業障同消・而 。周易禪解・金陵已刻。孟子擇乳・兵燹後失傳 0 楊仁山居

士求之東瀛・亦不可得・惜哉 0

法華入疏序

如來一代所說大小權實 印光法師文鈔卷三 序 偏圓頓漸 四書蕅益解序 法華入疏序 種種法門· 無非隨機施教 對病發藥

PY PY

測度 取文句及記・揉而錄于經文之下・名爲入疏。俾學者不勞徧翻・即得明了・ 記 理深邃・不便初機。乃于玄義・文句・止觀 了無餘蘊 義不顯・無機不被矣。又以止觀・發明行相。俾法華教行理三・徹底圓彰 義 示悟入佛之知見・究竟暢佛出世本懷。猗歟妙哉。故其義理深固幽遠 成佛道。治世語言・皆順正法。即一切法・顯示實相。即所迷心・示覺道體 及至法華會上・開權顯實・會三歸 。凡一代時教之所以然・皆悉顯闡讚導・徹了無疑。普令上中下根・悉得開 。昔者經疏記三・悉皆各行。 總釋經題 0 傳至震旦・千餘年來・註者雖多 。以故在昔依之而修者・得道如林。至唐而荊谿尊者・以三大部文 。以因緣 ・約教・本迹・觀心 初學閱之・頗費心力。宋四明道威法師 一。開迹顯本・示本壽量。舉手低頭 · 唯天台智者爲得其宗 • ・各撰註釋・註文句者・名文句 消釋經文・名爲文句。可謂無 。故以五重玄 ・不易 · 皆 · 撮

其利大矣。因茲流通中外。元明以來·中國失傳

。清光緒末・式定大師・請

其成就 欲續成 其刻板 之改正。其中每有字句不甚圓潤・似欠似贅・而于大意無所妨礙者任之。以 意謂滅師校過・當無大訛。及刻出再校・方知遺漏甚多。因按文句及記・爲 板已刻成 利利他 于戒殺放生之文・則多方流通。以及種種勸善格言・皆不惜巨資・刊刻傳布 閣置數年 得東洋宏教書院新印藏經・內有此書。因交金陵淨戒寺滅盡師洋數百圓・令 唯欲同人・共推乾父坤母之心・各懷民胞物與之念。必期于己立立人・自 日趨日下。謂非如來大法・莫能挽回。故于戒殺放生之事・則實力奉行 ・苦無財力。有張瑞曾居士者・宿植德本・篤信佛乘 。彼欣然允許 。滅師分作二十卷・樣本通皆寫完校訖。只刻成六卷・而滅師謝世因 同登壽域・咸沐佛恩而後已 · 不便修治耳 0 光于民國八年・ ・令光任其校對 0 所願閱是書者・各于自己一念心中・ 因刻安士全書等・自普陀來維揚 。聞 。奈其書傳久・錯訛甚多。初未詳視 光至揚 ·頻來見訪。 • 0 方知其事 直下開示悟 因以此告・ 頗傷世道人心 0 企 意

六一六

佛之知見 威師匯入・以及式定大師・瑞曾居士等流通也。刻既竣・遂敍其緣起云。 。則不負自己本具佛性。亦不負如來說經・智者造疏・荊谿述記

普賢行願品疏鈔擷序

種不一 利益宏深。固宜一切佛子・悉皆奉行。何近見愚夫愚婦・率多竭誠歸命。而 謝三界・高登九品者・唯淨土一門爲然也。噫。如來大慈・普度眾生。唯此 流・無不還歸此法界也。夫如來爲一大事因緣・出現于世。雖隨機設教・種 浄土法門・其大無外。一切諸佛・及諸佛阿耨多羅三藐三菩提法・皆從此出 法・堪暢本懷 切菩薩・及菩薩上求下化稱性所修之道・皆從此入。所謂無不從此法界 。求其若聖若凡・上中下根・乃至逆惡之流・同于現生了生脫死 。眾生修行・冀出生死・唯此一 法·決遂所願。法門廣大

通宗通教之士・反漠然置之・若不聞知者然。其故何在。

以研教者按常途教

究竟實義 覺·爲界外四十一位法身大士·所說一生成佛之法。其一生成佛之歸宗結頂 死大事 致一 他。 世 者・又多多也。五祖戒・草堂清・海印信・真如詰等・乃其確證 見性者多多也。 可謂大矣・惜乎不知其所謂大也。不觀華嚴一經・王于三藏。乃如來初成正 亦大矣・何可以專仗自力而不仗佛力耶 之人。不知坯器未燒・經雨即化。 理以論斷證 大而 此皆不諒己德・以博地凡夫・ 誤永誤也。 創業 乃雖 在于以十大願王 ・不信有帶業往生之事。矜常處生死以度眾生・不願爲速出生死 垂統 有佛力而不肯倚仗 即使已得明心見性・而惑業未斷・仍舊輪迴生死 参宗者 専主 参究・ ・小而 一衣 回向往生西方極樂世界 食 0 稍具慧性 以期明心見性 欲顯出格之作略· 煩惑未斷 • 莫不仗眾人之力・以成自 。抑或自力果愈于佛力耶 • ·轉生即迷。自利尚難 便以法身大士之作略自擬 0 不知其機稍劣 恐墮愚夫之窠臼 以期圓滿佛果 事 不能出 。夫人之處 。噫。死生 • 0 不能明心 至於了 • 焉能 其 志 · 以 離 利 生

已得與普賢等· 與諸佛等 所謂等覺菩薩也。等覺去佛 学特一 閒耳

財所證 婦耶 歸。往聖前賢・人人趣向。豈此諸經論・皆不足遵依。此諸聖賢・皆愚夫愚 通教者・其根性之利・證入之深・悉能超過此等菩薩乎。千經萬論・處處指 尚須回向往生 言以蔽之・ 0 舉華藏世界海諸菩薩・同稟此教 曰・業深障重・未應解脱。故致日用不知・習矣不察而 • 同修此法。豈今之通宗

0 普賢行願品者 ·即八十卷華嚴經 ・末後之入法界品 0 善財徧參五十三員

知識 十卷。前之三十九卷 道 讚如來勝妙功德。以文來未盡・故未結而終。清涼國師特著疏鈔・以大宏其 至德宗貞元閒。南印度烏茶國王・方貢普賢行願品之梵本全文・譯成四 · 至普賢所 ・承普賢開示・及威神之力・即證等覺。普賢乃爲說偈 ・即八十華嚴經之入法界品 • 而文義加詳 。第四十 . 稱 卷

十卷之全疏・中國久已失傳。幸東洋藏中

尚有其書

北京刻經處

・專刻古

乃現所流通之普賢行願品也

。時清涼亦預譯場

極爲讚揚

奉命撰疏

四

六---

德佚書・不久當可流通也。此一卷經・又復重爲別行疏・以備樂簡略・ 及修

浄土者之研窮。其徒圭峯・爲之造鈔・固已中外流通矣。但以文富義繁・不

便初機。范古農居士・以世以淨土三經并行願品一卷・爲淨土四經。三經註

即疏鈔 者頗多・不妨隨機取閱。此經唯有疏鈔・雖發揮盡致・而初機每多茫然。遂 · 擷其要義 ・刊板流通。文雖簡略・義仍具足・可謂觀機逗教。 有益

法門· 隨華藏海會諸菩薩・及諸愚夫愚婦之班・一致進行・同往西方。庶可不孤佛 悉知。而普賢勸發・如來出世之心・亦可以悉知矣。敢請通宗通教之士・共 殊非淺鮮。學者果能先閱擷本・後讀全文・不但清涼宏讚之心・可以

化・不負己靈也已

金剛經次詁序

金剛經者・ 印光法師文鈔卷三 即有談空・不墮空邊。即空論有・不墮有邊。空有兩泯・真俗不 序 行願品疏鈔擷序 金剛經次詁序

經・爲他人說。雖四句三句二句一句・其福勝彼三千大千世界滿中七寶布施 三世諸佛・依此而證果。乃如來一代時教之綱要・實菩薩上宏下化之準繩 二。生佛一致・事理圓融。行起解絕・直趣覺海。一切菩薩・依此而修因 浄。如如不動實相妙理・徹底圓彰。故得福德等彼十方虛空也。至于受持此 起之道 至六度・及與萬行。以無我人眾生壽者・修一切善法。無所住而生心。雖說 示如如之本體・機理雙契。證空空之三昧・解行俱圓。妙而又妙・玄之又玄 不見有所證之無餘涅槃之壽者相。自他見亡・凡聖情盡。三輪體空・ 法而無法可說。雖成佛而無菩提可得。是則雲騰行海・波湧度門。乃稱性緣 0 夫度盡一切眾生・不見能度所度之相。不住色聲香味觸法・而行布施・以 猗歟懿哉 ・行所無事。以故內不見有能度之我・外不見有所度之人與眾生・中 ・何可得而思議也已。世多不察・謂爲空宗・其孤負佛恩也甚矣 一道清

及無量

百千萬億劫・日日三時・以恆河沙等身命布施之福。良以一切諸

之文宗・具超格之學識。然以志樹儒宗・未暇殫精內典。迨歲周華甲以滄桑 彰矣。馬通白居士者・宿植德本・篤信佛乘。品行清高 所說法門・悉以此智照了而修。則水到渠成・雲開月露・一塵不立・萬德圓 當得菩提也。以自行化他・心不住相。則以如如智・契如如理。直下與菩提 嚴・并以莊嚴一切眾生。此其自行化他真實功德・名之爲空・豈有當哉。是 佛・及諸佛無上覺道之法・皆從此經出故。故說法者・即是以佛莊嚴而自莊 見・註爲次詁 本有衣珠・幾致忘卻。慶幸之極・轉爲悲感。後閱此經・心華頓發・因隨所 迭遷・悟身世無常・遂屏除一切・專閱佛經 涅槃・混而爲一。如水投水・似空合空。雖有聖智・莫能分別也。如來一代 持經之人・心與道合・心與佛合。故能轉最重之後報・作最輕之現報 故隨說此經・雖止四三二一句等・而一切天人・皆應如佛塔廟而供養之。以 。 渾融之文・以章段顯之。玄妙之義・以平實明之。 契理契機 。 始知如來所說 ・ 皆示吾心 ·著述宏富。實當代 ・而復

印光法師文鈔卷三 序

金剛經次詁序

徹上徹下。固初機之良導・實入佛之要門。諸門人欲爲刊板・永用流通

庶通方儒士・悉皆景仰而效法焉。其爲利益・唯佛能知。勉抒愚懷・用爲序

引。 。

金剛經綫說鑄板流通序

奇哉 有世尊 此一卷經。人人具足・個個不無。但由迷真逐妄・背覺合塵・不知返觀內照 上菩提心・云何應住・云何降伏其心。此二句・乃護念付囑之要旨也。而如 · 則 致使不能親得受用耳。故華嚴如來出現品云・如來成正覺時・歎曰・奇哉 ・一切眾生・皆具如來智慧德相。但以妄想執著・而不證得。若離妄想 切智・自然智・無礙智・則得現前。此經由須菩提見佛威儀・歎爲希 ・善護念付囑諸菩薩。欲令護念付囑之法・大明于世。故問菩薩發無

來以所有一切九類眾生・悉皆令入無餘涅槃而滅度之・不見眾生得滅度相

者相哉 妄想執著之所從來處 大・皆如來藏妙真如性・即是其證。是知如來智慧德相・本自具足・無欠無 餘。但以迷背之故・無端幻起妄想執著・致智慧德相隱而不現。若肯窮究此 失。菩薩爲指示之・令其了知衣裏之珠・項上之頭。既了知已・豈復有得 答其降伏。以菩薩于法・應無所住・不住色聲香味觸法而行布施・答其應住 萬行雲興 不過眾生自性自度・豈有能度之我・所度之人與眾生・并所入無餘涅槃之壽 其不住相布施之福德 曰實無眾生得滅度者 實相 又謂不應住色生心・不應住聲香味觸法生心。應無所住而生其心。且深歎 。故得山河及大地・全露法王身。而楞嚴以五陰六入十二處十八界七 四相既無・則三輪體空・一道清淨矣。由其三輪體空一道清淨。故 ·心無所住。雖復萬行雲興 。以無餘涅槃・即眾生本具性體 ・與十方虚空・同一不可思量 則彌空雲霧 徹底消滅 ·實則一法不立。凡所見情與無情 。本有天日 0 何以度盡一切眾生・ 。由迷背不知・初非有 ·全體顯現矣 · 同 而

霧封時・天日亦不曾失 。雲霧散時・天日又豈是得。度盡一切眾生・不見一

眾生得度者・此之謂也。其能見此理以行此行者・以無所住而生心・悉見諸 德雖滿大千世界七寶布施・尙不能及。以一句染神・永爲道種 相非相也。如是之人・受持此經・乃至四句三句二句一句・爲人演說。其福

世閒天人阿修羅・皆應供養也。以說者能不取于相・如如不動。以如如智 報在人天故也。以故說是經處 ·即爲塔廟 ٥ 經所在處 · 即三寶具足 0 住相 故一 布 施 切

嘗不說 契如如理。佛如眾生如・一如無二如。終日說而實未嘗說・即杜默不說亦未 。以其人行住坐臥・周旋俯仰。著衣吃飯・揚拳豎指。無不是不生不

止。 滅無餘涅槃・ |輕而退屈。則受持之人・宜何如發大菩提心・宜何如生無所住心也。清道 以故賣柴翁聞一句・即得嗣祖傳燈 無住心之全體大用。劫外田地·故鄉風月。任人自得 · 騰輝宇宙 。彼既丈夫我亦爾 ·有誰 ·不應 阻

有無住老人陳柱者。宿有慧根

・弱冠即誦此經。至七旬外・廣閱諸註

印光法師文鈔卷三 序 金剛經綫說序

謂與淨土不相融通乎。夫度生之法・唯淨土最爲第一。欲生淨土・當淨其心 眾生之規矩準繩也。徧與一代時教一切法門而爲綱要。蓋是即相離相·何得 定智慧 觸法而行布施。 布施乃六度萬行之首 友善根增長。誠所謂孝子不匱・永錫爾類者矣。或疑金剛無相・淨土有相 千卷。與哀思錄同贈弔奠親友・以酬嘉貺。一以冀母氏蓮品高升・一以冀親 而刻之・名哀思錄。又欲藉母氏之故・普利一 初機。倘由是而得其旨歸・則古德之註・如來之經・如開寶藏・隨意受用矣 二法如何相融。予曰・金剛經令度盡一切眾生・而不見度相。不住色聲香味 。粤東簡照南玉階二昆弟。以母氏逝世・諸親友弔奠者・各送誄詞挽聯。彙 折衷其義而爲綫說。以不住相一綫。直貫到底。其語句頗平實顯豁·有益 隨其心淨・則佛土淨。以不住相之清淨心念佛・則是心作佛・是心是佛 ・以及萬行・莫不皆然。然則金剛經乃令人徧行六度萬行・普度一切 。既令不住相布施・則持戒忍辱精進禪 切。因鑄金剛經綫說板・印數

八二六

其往生西方・證無生忍・乃決定不易之理事也・又何疑乎

讚禮地藏菩薩懺願儀重刻序

罪霧 塵劫數 之力・反作昏動之緣。于常住之中・妄受生死之苦。執著五陰・不知畢竟皆 法之輪 空。障蔽一心・曷了本不可得。耽染六塵之幻境・墜墮三惡之苦途。縱經微 心體本淨・因根塵而濁念斯興。佛性常存・由迷背而凡情孔熾・于是承寂照 圓證三身。 ・具足一切有依行。然欲得無生法忍・須懺宿世愆尤。若能不著五陰 ·徹底消滅 ・莫出六道輪迴。故我世尊・特垂哀愍。因地藏菩薩之問・說十力佛 摧碾煩惑・成就道器。由茲棄捨惡法・斷除一切無依行。修持善法 外承佛力法力菩薩誓願力・內仗誠力悔力自性功德力 本有性天・全體顯現 。是知十輪本願占察三經 0 同由 故得彌空 ・自可 地藏

大悲願力・令末世孤露無依眾生・悉皆得大恃怙也。蕅益大師・

已證法身

乘願再來。初現闡提之迹・後爲如來之使。一生行解・事理圓融。畢世著述

妙法。即心作佛之達道也。弘一上人・宿欽大師著述。特爲刻板・用廣流通 而明讚悔。寶鏡既磨・光明自發。摩尼既濯・珍寶斯雨。誠可謂反本還元之 。俾有志于滅幻妄之惑業・證本有之真心・上續如來之慧命・下作末世之典 ・性修雙備。欲令濁智成淨智・依三經而製懺儀。冀使凡心作佛心・即十輪

型者・咸得受持云。

揀魔辨異錄重刻序

曲・則如秤之定盤不准・稱諸物而輕重咸差。如鏡之體質不淨・照諸像而妍 媸莫辨。差之毫釐・失之千里。展轉淆訛・莫之能止。故楞嚴經云・十方如 學道之人・居心立行・必須質直中正・不可有絲毫偏私委曲之相。倘稍有偏

印光法師文鈔卷三 序 地藏懺願儀序 辨異錄重刻序

來・同一道故・出離生死・皆以直心。心言直故・如是乃至終始地位・中間

當慚愧懺悔・知非改過・以期實悟實證。則臨濟法脈・如來慧命・豈不直接 世・固有靈根。即現生之悟與見地・亦非卑淺。但以我慢根深・欲爲千古第 永無諸委曲相 倍。盲引盲眾 其傳。何得慢幢高豎・護短飾非。引起其徒宏忍等・更加狂妄。逞己臆見・ 知見。使當日直心直行・允執厥中。將見密雲會下・無人能敵。道風之振 著五宗救 遂致密雲七闢三闢・以正其非。然人非聖賢・孰能無過。果是英烈漢子・自 何難超越諸方。惜乎不以實悟實證爲事・而預先設法・以爲超越一切之計 高人。特意妄立種種宗旨名相・著五宗原。以企後學推尊于己・竟成魔外 。挽正作邪・以邪爲正。謗法謗僧・自誤誤人。較之法藏・更深十 ·相牽入火。噫。可哀也已 。書曰・人心惟危・道心惟微 。藏忍平生・刻意文飾。致令門庭 ・惟精惟一・允執厥中。法藏宿

悉皆續入大藏。至雍正十一年・世宗欲選語錄。徧閱彼等著作・知其意見僻

甚盛・士大夫多爲外護。故彼父子之語錄・併五宗原・五宗救之僻謬邪說

印光法師文鈔卷三 序 辨異錄重刻序

宗繼立・方始刊板。只因未委通人・凡草書替代之字・許多竟作本字。如以 謬・必至瞎人正眼。著令盡燬其板。又勅天下叢林・凡有此書及板・盡行燬 素・以法藏徒黨甚盛。恐其一經提倡・或致招禍・因皆置之不論・以故未入 命入藏流通。而竟未入者・以高宗御極未久・殫精政治・無暇提倡 多。故知的係賓天之後所刻。又雍正十三年春·開工刊大藏板。此書上諭 謂作爲。多至百餘。世宗所刻書冊經板・悉皆校對精嚴。唯此一書・錯訛甚 佛祖恩 救中狂悖甚者・摘錄八十餘條・逐條駁正。命續入大藏・以企開人正眼 除。倘有私藏者·發覺以違律論。又恐或有深受其毒·莫能盡吐。因將五宗 0 必有神物守護。令其久祕復出・得廣流通。其因緣具于石印序中。茲擬重 書冊殿板・存於大內。除皇帝有勅・無由刷印・因茲不傳于世。然此法寶 ・因息心校閱 但以萬幾無暇・至十三年春・方始脫稿。未及謄清・龍馭上賓 ・俾還世宗本來面目 。 應季中居士・願任刻資 0 0 其餘緇 高高

至

須努力 凡入聖 情 顛末・以告來哲。夫欲了生死・必須實證。若唯悟而未證 成佛而後已 佛 个平侍者之身分。可不哀哉。如來深知末世眾生・煩惑難斷。特開一信願念 欲爲續佛慧命之第一高人。以致一錯永錯 藏忍父子 大悟之人 以煩惑未斷 迷・在所難免。如人睡惺不起・久復睡著。古人謂大事已明・如喪考妣 ・求生淨土法門。令其于臨終時・蒙佛接引 無由而起。若不加覺照・依舊凡情熾然。功行愈高・情見愈重。由悟入 · 了生脱死 。 倘能兢兢業業・歷緣煅煉。 則覺照存心・冥符聖智 · 雖則悟處高深 · 其悟縱與佛同 ・或恐復迷。須知斷惑之人・便無凡情。既無凡情・何有生死 。使藏忍知此 承侍彌陀 0 • ・當即上品往生證無生忍。普現色身・廣度羣迷 只因我慢過甚 其惑猶未斷除 追隨海眾 ・而莫之能反。盡其智力・只做得 。從茲圓破無明 ・全體埋沒于人我情見之中・ 0 必須念念覺照 · 往生西方 ・則煩惑尙在・大 · 庶免凡情用事 。既得往生 徹證自心 。人我是非之凡 直至 則超 而 . Œ 猶

又何至妝點文飾・欲得超師越祖之虛名・企其流芳百世。 一經明眼人看破

竟落得個邪魔外道之實號・而遺臭萬年。嗚呼哀哉

揀魔辨異錄石印序 代企學居士趙希伊作

之暇 自佛法入中國・歴代皇帝・無不崇奉。其唯結緣種・與有所悟證者・種種不 我慢根深。大悟之後・欲爲千古獨一無侶之高人。從茲妄立主見・著五宗原 悉皆妙契佛心・冥符祖意。言言見諦・語語歸宗。如走盤珠・似摩尼寶 再來。握權實不二之道柄・度輪迴無依之眾生者・其能如是也耶。其所著述 具眼者・無不佩服。當明季時・密雲悟會下・有法藏字漢月者。天姿聰敏 藏內有圓明居士語錄三卷。 。求其深入經藏・直達禪源。證涅槃之妙心・具金剛之正眼。于修齊治平 ・闡拈華直指之宗者・其唯清世宗皇帝爲第一也。若非法身大士・乘願 世宗道號 其他序跋傳記・散見於經論語錄 中 。 凡

印光法師文鈔卷三 序

辨異錄重刻序

辨異錄石印序

巧成拙 駕密雲 性 ·猶太虚空。 擬己超邁一切。不知如來心印・如清涼月 。密雲則闢而又闢・彼與其徒弘忍・執迷不返・則救而又救。反欲陵 謂己無師自悟 慢塵既颺 ·密雲強以源流懇付之。所有言說 ・即汙空體 。種種塗飾・翻形狂悖。求升反墜・弄 。慢雲一 起・便掩月光。 真如妙 ・少有

密雲 外護 實情 0 0 法藏 當時. 恐其 知識 • 弘忍等錄 經闢 雖知其非。 駮 。見彼知見紕謬・錄其臆見邪說數十條・逐一辨正 難免招禍 以其師尙不奈何 ·故皆不敢置論 兼彼門庭甚盛 。 至雍正十一年· ・士大夫多爲 世宗徧閱

通計十萬餘言・名曰御製揀魔辨異錄。即刊書冊殿板・又令續入大藏。企其

除邪說以正人心・振宗風而明祖道耳 0 高宗繼立 ・以日親萬幾 · 不暇提倡 。至十三年・開工刊藏・而龍馭旋即賓 · 遂致竟未入藏 • 存於

甲辰・于京師書肆中得二部。以一 送諦閑法師 ・企彼倡募流通。以一託楊仁

光緒

內

不易流通

0 而 ・類多妄造 。吾友子任 書冊 殿板

余曰・公好流通古迹・何不取弘教藏中揀魔辨異錄・刊板印行。此世宗以靈 山寄東洋・入于弘教書院新印藏中。今春余欲朝海至滬上・遇楚青狄居士。

錯過。即付印刷所・俾照式石印一千部。命余作序。余喜極・遂忘其固陋 岸也。居士曰・余昔於京師爛貨攤得一部・藏書笥有年矣。不因子說・幾致 參禪者直下知歸。即宗孔孟而探誠明之極賾者・亦如乘輪遇順風・速得到彼 山泗水之心法・爲儒釋兩教・作開金剛正眼之大光明藏也。若得流通・不但

爲序其隱顯機緣如此

三十二祖傳讚序

粤自世尊拈華・迦葉微笑。正法眼藏・涅槃妙心・遂得普播寰區。及至大教 東布・達磨西來。其圓悟佛性・徹證自心。續如來之慧命・作人天之導師者

實繁有徒 印光法師文鈔卷三 序 若傳燈錄 ・高僧傳所載・乃存十一于千百耳。 辨異錄石印序 卅二祖傳讚序 其隱而弗彰

三四四

平・俗美風醇。然後宣布法化。則易得其益。如器除毒・堪貯甘露。至十 取靈山泗水之心法・述傳薪續燄之綸音。空有不二・真俗圓融。直欲普天人 年・則以人王身・行法王事。佛法世法・一肩擔荷。儒教釋教・一道齊行 二月起・至十三年三月止。共繪三十二尊。至四月中・ 讚・以發其奧義 規・精修梵行。真參實悟・明心見性。以期光揚法道・翼贊皇猷。又于朔望 不至徒具佛性・枉受生死輪迴之悲。或敕天下叢林・一切僧眾。令其恪守清 或面訓廷臣・或傳諭疆臣・以迄士庶。令其咸了自心・悉趣背塵合覺之道 民・同爲如來真子。現未有情・共獲本地風光。每於朔望・及佛菩薩誕辰 而不顯著・又何可勝數耶。清世宗憲皇帝・久證法身・乘願再來。若宗若教 ・無不窮源徹底。御極以來・十年之內・專理政治・不提佛法。以期天下太 必親運睿筆・恭繪一古徳道像 。親筆書於像首。刻石大內・以備摹搨而企流布。自十一年 。取彼本傳・提綱摘要・作一小傳。又作 龍馭上賓 · 致無量古 0

娑婆 德・未蒙一發幽光・爲可惜耳。至乾隆九年・高宗以裝潢所搨祖像三十二軸 破塵離著・出大千之經卷。從茲心心相印・燈燈相傳俾自他以共證真常・令 現。其光明皎潔・豁人心目。自可頓開心地・徹見性天。又得世宗睿筆發揮 賜武林理安寺。後修寺志・即以此傳讚・載于首冊・以志恩寵。然此傳讚 未刻書板 凡聖以同登覺岸。席不負世宗述傳一番至意矣。因募應季中居士・出資刻板 ・與古德交光相映・一際無痕。若得一覽・當即達本逢源・獲衣裏之明珠。 以公同志。于每傳前・列其題目・以期一目了然。併書緣起・以告來哲 ・生死險道也。極樂・常住家郷也。眾生由一念不覺・入此險道・莫之 淨業良導序 ・故世不獲見聞。竊念古德道風・人天景仰 0 如皓月當空・萬 Ш 俱

能出

縱欲出此險道

0

歸彼家鄉

。而生無慧目

·不知所趣

若無良導・不但

たこか

誤入歧途・竟成背馳・且有墮坑落壍・喪身失命之憂。淨土一經一論・以及 切大乘經論・皆導師也。但以文深義奧・初機不易領會。雖則無邊妙義・

集中之合時機者。錄數十篇・以應初入法門之士。待其門徑已得・然後徧閱 士・自雖未度・志切度人。因將樂邦文類。及蓮池・紫柏・憨山 代古德各垂言教・以逗時機。由是法流無壅・而羣機悉蒙其利濟矣。無名居 具足無遺。而以暗鈍心識當之・每致有疑而不能決・有信而不能生。因茲歷 ·蕅益

題之曰淨業良導云。 浄土一法・方能究竟暢佛本懷也。無名居士・撝謙不敢自專・命光鑑定。因 全書・則知一滴之味・與大海之味・無二無別。而如來出世一大事因緣 唯

佛學初階序

佛法廣大・不易窺測。欲使同人盡沐法澤・必由耳目見聞因果報應・生死輪

迴之淺近事迹·啓迪而引誘之。令其捨拘墟之固執·見天地之廣大。庶可斷疑

生信・愈入愈深必期于徹悟自心・復還本有。及與仗佛慈力・往生西方。而

又以化諸人人。決不肯上辜佛化・下負己靈。長劫甘受生死輪迴之苦毒也已 福保丁居士・誓願宏深・慈悲廣大。欲令斯民同登覺岸・因將緇素名賢遺

簡不同 可親得而實有諸己矣。又伊先所輯佛學指南·佛學起信編·六道輪迴錄·雖繁 爲佛學初階。企閱者因是而求・舉凡斷惑證真・即凡成聖之不思議大法・皆 集・及佛祖經論中・因果輪迴之事・及三寶功德・淨土利益・輯之成帙・名 ・要皆爲初機學佛之階梯而已。若是決烈丈夫・當必登峯造極。決不

至畫地自限・以卑自安而不復上進耳。

人同此心・心同此理。凡聖不二・生佛一如。由迷悟之或殊・致升沈之迥別 釋教三字經序 雲寺、吹萬老人釋廣真作

印光法師文鈔卷三 序

佛學初階序 釋教三字經序

三八

諦 教三字經 法度生。列祖續佛慧命・隨機施教。及與古德自利利他・嘉言懿行。題曰釋 與歷朝治亂之迹。使學者先知其約・後涉其博。幼而學之・壯而行之・立身 梗概 廣流通。由是列宗諸祖・相繼而興。宏宗演教・代佛揚化。迄今世遠年深 筏。普欲未來・咸登道岸。故以五時所說・及教外別傳之旨・付諸弟子・命 行道・致君澤民・以復其人性本有之善。遂仿其意・略敍如來降生成道・說 事多義廣 而徧閱三藏 博之則盡十虛而莫容・約之則覓一字不可得。然後乘大願輪・闡揚法化 大覺世尊・愍而哀之。示成正覺・轉大法輪。本一心以建立・作迷津之寶 。鴉鳴鵲噪 · 開示: 。俾爲沙彌時・誦而習之。知佛經之要義・明祖道之綱宗。及其壯 。若非讀破大藏・妙悟自心。無以測其端倪・得其綱要。每欲撮略 後進 • 歷參五宗 共談無上心宗。非同非異 0 因念宋儒王伯厚先生・作三字經。以紀夫倫常日用之道 0 妙悟自心・ 冥符佛意 ・非有非空。即權即實 。方知山色溪聲・咸示第一義 ·即俗即真

普令法界眾生・歸依一體三寶。復本來之面目・傳無盡之心燈。是在後進之

發心造修焉・予日望之。

劉圓照居士摸象詩序開端畫一圓相

成正覺 智・ 其各各徹證此之心光・究竟成佛而已。所謂粗言及細語・皆歸第一義 所説・或漸或頓・或實或權・種種不同。雖則設諸方便・無非曲誘眾生・令 受困。反承此照天照地之光・起惑造業・輪迴六道。于是世尊欲施濟度・示 具有如來智慧德相。但以妄想執著・而不證得。若離妄想・則一切智・ 天照地。佛未出世・祖未西來。人人具足・無餘無欠。無奈眾生在迷・懷寶 〇此一段光明・非因非果・非聖非凡・非斷非常・非生非滅・亙古亙今 無礙智 。當其夜覩明星・豁然大悟時。乃浩然歎曰・奇哉奇哉・一切眾生・ 則得現前。于是隨機施化・對病發藥。由眾生根器不等 ?・故其 自然 照

印光法師文鈔卷三 序

釋教三字經序

劉囚照摸象詩序

六四〇

千機並育・終則一道同歸也。又以鈍根眾生・現生不能了脫。則輪迴生死 非心非佛之法・徧布寰區。天機深者・于一機一 佛性而言。令人先識其本・則一切修證等法・自可依之進趣・以至于修無可 傳佛心印。直指人心・見性成佛。然此所見所成・乃指吾人即心本具之天真 預蓮池海會・親炙彌陀世尊・及觀音勢至・諸上善人故也。自後達摩西來 登彼岸。極暢如來出世之本懷・徹獲眾生本具之佛性。猗歟佛恩・窮劫莫讚 已斷惑者・仗佛慈力・速證法身。普使上中下根・若聖若凡・同證真常・誕 了無底止。以故特開一信願念佛法門・俾未斷惑者・仗佛慈力・帶業往生。 如畫龍點睛 及至大教東流 自離窠臼。入死入生・了無罣礙。得大解脱・得大自在矣。倘根機稍劣・ 證無可證而後已。非謂一悟即成福慧兩足·圓滿菩提之究竟佛道也。喻 · 令其親得受用耳 ・遂以此法・目爲蓮宗 。由是騰輝震旦· 。以其念佛求生西方・蓮華化生・得 境・識其端倪。則出詞吐語 炳煥赫奕。即心即佛之道

縦得大悟・而煩惱習氣未能淨盡・依然還是生死中人。出胎隔陰・多致迷失

萬當之計也。圓照劉居士・宿根深厚・現行精純。于禪淨兩宗・各得其旨 大悟者尙如是・况未悟乎。固宜專心致志于仗佛慈力之淨土法門・方爲千穩

而尤以念佛法門・爲究竟自利利人之道 。每有所感・輒形諸詩歌。筆而錄之

過取其意之所適而已。其子及族人・欲後世咸所稟承・擬列諸家譜。令光敍 ・得一百零八首。題其名曰摸象。蓋以道大無方・豈凡庸一言可以道盡。不

佛學述要鑄板流通序

其大旨・用告來者云。

者・何可勝數。良以真如佛性・人人本具・但以迷而不覺・初非有失。及聞 自佛法入中國・千八百餘年來。若緇若素・若男若女・深入經藏・徹悟心源 知識指示。則知珠在衣裏 ・佛性恆存。不離當處・得大自在

印光法師文鈔卷三 序 劉圓照摸象詩序 佛學述要序

能傳 心・共證本具佛性。委光鑑訂 詞不達意之處。足見此道・須自有善根・方可優入。否則雖母子至親・亦不 宜節者而妄節之・則有意義不明・文法不合之弊。而且錯訛滿紙・致有許多 行者勇往直前・亦不可謂無功也。惜其子袁授荀・根性弗類。于其母所述 文・然如一屋散錢・一一上串・俾用者現成持取。三叉歧路・條條標示・令 鞞跋致。亦可謂于博得約・宏法知要矣。其所發揮・機理雙契。雖則多錄成 悉知壼奧。而且偏讚淨土・冀一切不能徹悟自心・斷惑證真者・即生便登阿 利利他・受用無盡矣。天台陳勤先女士・宿有慧根。于台禪性相淨土諸宗 了無所知。抄錄而欲流通・其注概節略之。不知有宜節者・有不宜節者。不 。 奉化孫玉仙居士・欲鑄板流通。冀鬚眉丈夫・閨閣英賢 。因正其錯訛・離其句讀・遂題之爲佛學述要 ・同發思齊之

格言聯璧重刻序

獨善其身矣。若得位行道・以先覺覺後覺・則兼善天下矣。吾人未能人欲淨 爲格物致知者。乃枝末・非根本也。雖聖人亦有所不能焉。能明其明德・則 修矣。此匹夫匹婦皆能爲之事也。若以推極吾之知識・窮盡天下事物之理・ 知 外境而生。必須格除淨盡・而吾心固有之良知・自可全體顯現矣。固有之良 禽獸或相埒・或不如矣。格物致知・乃羣聖傳授之心法。以人欲之物・乃由 庶民去之・君子存之。是知任心縱意・胡作非爲者・不過名之爲人・實則與 止于至善也。去此・則但一血氣之倫而已・何可以與天地並立爲三而稱之乎 人之所以與天地並名三才者・以其能格物致知・克己復禮・以明其明德・而 。孟子以夜氣不足以存者・爲違禽獸不遠。又謂人之所以異于禽獸者幾希・ 即明德也。格之與致・皆所以明其明德也。明德既明・則意誠心正而身

年之非 得親切下手之工夫・而進德不息・以致與天地參而後已也。其具眼者・當不 法當戒者 士・少即奉爲圭臬。繼欲普餉同倫・乃詳爲校訂。兼用褒貶圈法・標示其當 格致工夫・自強不息・了無已時也。山陰金蘭生先生・輯先賢警策身心語句 如臨深淵・如履薄冰。而今而後・吾知免夫。蘧伯玉行年五十・而知四十九 于過日寡而德日崇・以至于德純過無而後已。然曾子臨終・尚曰戰戰兢兢 盡・天理流行。必須多識前言往行・以爲前途導師・日讀誦而繹思之。必期 爲格言聯璧。令學者如入寶山·隨取而得。其功誠非淺鮮。維揚張瑞曾居 尙欲天假數年・以期學易而免大過、雖曰以身說法・勉勵後進。 因略述三才名義 。孔子以德不修・學不講。聞義不能徙・不善不能改爲憂。行年七十 俾閱者省心力而知去取·其用志可謂誠且摯矣。 ・與聖賢格致工夫・以期與本集所說・互相發明。令學者 刻成・ 實屬聖賢 問序于余

以余言爲背謬也。

不可錄重刻序

讀之・當必怵然驚・憬然悟・遏人欲于横流・復天良于將滅。從茲一切同倫 語。直欲福善禍淫之理・舉世咸知。而又徵諸事實・以爲法戒。企知自愛者 衣冠禽獸・死墮三途惡道者・又何能悉知之而悉見之耶。噫。女色之禍・一 即未至此 女色之禍・極其酷烈。自古至今・由茲亡國敗家・殞身絕嗣者・何可勝數。 何酷烈至于此極也。由是諸聖諸賢・特垂悲愍。或告之以法言・或勸之以巽 ・悉享富壽康寧之福・永離貧病夭折之禍。此不可錄所由輯也。張瑞曾居士 ・致成碌碌庸人・無所樹立之輩者・又復何限。况乎逆天理・亂人倫・生爲 欲重刻印施・命余作序・暢演窒欲要義。須知美色當前・欲心熾盛・法言 因果報應·皆難斷其愛心。若能作不淨觀 ・其閒頹其剛健之軀・昏其清明之志。以頂天履地・希聖希賢之姿 ・則一腔欲火・當下冰消矣

間。忽見一少婦・姿色絕倫・遂同往捉之。其婦變臉・七竅流血・舌拕尺餘 所惑耳。若揭去此之薄皮・則不但皮裏之物・不堪愛戀。即此薄皮・亦絕無 其女貌嬌美・令人生愛心而行欲事者・不過外面一張薄皮・光華豔麗 迷・生不能盡其天年・死必至永墮惡道耶。以故如來令貪欲重者・作不淨觀 見一切天姿國色・皆當作七竅流血・舌拕尺餘之釣頸鬼想矣。又何至被色所 始無血與舌也。何含而藏之・則生愛心。流而拕之・則生畏心。了此・則凡 則不可。及既變臉・則一嚇至死・愛心便成烏有。然當其羣相追逐時 吾秦長安子弟・多玩促織。有兄弟三人・年皆成童 其家子孫・不許夜捉促織。夫此少婦・未變臉時・則愛入骨髓 觀之久久 三人同時嚇死。次日其家尋得・救活者一・方知其事。活者大病數月方愈 則尙能斷惑證真・超凡入聖。豈止不犯邪淫・窒欲衞生而已 ・于月夜捉促織于墳墓 ·非遂所欲 ·爲其 固未

。再進而剖其身驅・則唯見膿血淋漓

・骨肉縱横・臟腑屎尿・狼藉

滿地。臭穢腥臊・不忍見聞。校前少婦所變之相・其可畏懼厭惡・過百千倍

縱傾城傾國之絕世佳人・薄皮裏面之物・有一不如是乎。人何唯觀其外相

而察內容・厭多惡以棄少美。則同出欲海・共登覺岸矣。又當淫欲熾盛 而不察其內容・愛其少分之美・遂不計其多分之惡乎。余願世人・遺外相 情

不能制之時。但將女陰作毒蛇口・如以陽納蛇口中。則心神驚悸・毛骨悚然

無邊熱惱·當下清涼矣。此又窒欲之最簡便法也。

不可錄敦倫理序

當盡友愛・保護扶持・以期各得其所。如是・則爲天地之肖子・無忝所生矣 天爲大父・地爲大母。 既能保護扶持天地之子女・則天地必常保護扶持于其人・令其福深壽永・ 一切男女・皆天地之子女・皆吾之同胞。既是同胞

印光法師文鈔卷三 序 不可錄序 不可錄敦倫理序

諸凡如意也

倘或肆意横行・欺陵天地之子女・則其折福減壽

滅門絕嗣

也。餘且勿論。即如妻女姊妹・人各共有。人若熟視己之妻女姊妹・己則憤 淨想 倫也。人若行蔑理亂倫之事・則是以人身行禽獸事。身雖爲人・實則禽獸不 老者如母 發揮・冀諸閱者・同敦天倫・毋懷惡念。四十二章經・示人見諸女云・想其 下矣 如也。何也・以禽獸不知倫理・人知倫理。知倫理而復蔑倫理・斯居禽獸之 道・與乎三綱五常。男女居室・人之大倫。人之所以異于禽獸者・以其有人 辱乎哉 氣不來・永墮惡道・經百千劫・莫復人身者。乃自取其禍・非天地之不慈 。庶可息滅邪念・而淳全正念矣。怨與不浄・前序已明。茲特約親而爲 然一切眾生・由淫欲生・故其習偏濃。須深隄防・作親・作怨 ・即欲毆擊。何見人之妻女姊妹・稍有姿色・心即妄起淫念・意欲汙 欺侮同胞。其人尙得自立于天地之閒・而猶謂之爲人乎。况夫婦之 夫同為天地之子女・是吾同胞。若于同胞起不正念・則是汙辱天地 ・長者如姊・少者如妹・幼者如女。生度脱心・息滅惡念。梵網經 · 作不

云・一切男子是我父・一切女人是我母・我生生無不從之受生。當生孝順心

・慈悲心。如是則尙保護扶持之不暇・何可以起惡劣心・而欲汙辱乎。明有 生患淫・不能自制・問于王龍溪。龍溪曰・譬如有人謂汝曰・此中有名妓

錄一書。法語巽言之訓・福善禍淫之案・與夫戒忌之日期處所・一一畢示 女姊妹視之・則不但淫欲惡念無由而生・而生死輪迴・亦當由茲頓出矣。不可 曰息矣。龍溪曰・然則淫本是空・汝自認做真耳。人果肯將一切女人・作母 汝可搴幃就之。汝從其言・則汝母女姊妹也。汝此時一片淫心・還息否

命光發揮窒欲之要・因以怨・以不淨。而敍其大旨。 其覺世醒迷之心・可謂誠且摯矣。維揚張瑞曾居士・利人心切・即爲刻行 繼因其堂兄正勛逝世·

邦。因居士孝友之情・故復撰敦倫之序。祈見聞者・各詳察焉・則幸甚幸甚 擬以此功德薦其靈識。俾罪障消滅・福智崇朗。出五濁之欲界・生九品之蓮

印光法師文鈔卷三 序 不可錄敦倫理序

普濟禪寺打交盤萬年簿序 代了餘和尚作但

宗風 哉 用 禪師開宗于宋。以及元之孚中・清之潮音。悉皆道高一世・德感九重。丕振 隨緣起 豈有敗 圓通道場・彌三際而不增不減。普門風範・即萬法而無欠無餘。亙古亙今・ 如如不變。有情無情・法法圓融。雖千佛齊出・了無有興。縱三災迭起・又 。凡住持進院・自所置者・退時仍復搬回本庵。縱有留者・皆作昂價交盤 髮匪肇亂 何其盛也。爰自潮音以來・兩蒙勅修。世守成規・家風不墜。至咸豐初 ・廣布玄化。普使四海內外・同被慈雲。六道眾生・共霑法雨。猗歟休 ・道在人宏。興廢通塞・各有由致。溯自慧鍔始祖・開山于梁。 ・此觀音大士補怛名山・真如實際之究竟景象也・至于應化門頭 ・人民塗炭。香火多年斷絕・用度由茲缺乏。法器什物・皆不舒 ・則法 真歇

甚至破敗不堪・一文不值之物・

體照新價交。總計洋一千若干元。如市

常住體屬十方・非住持一人私有。所有財政理宜全歸常住。凡錢財穀米・莊 院務・詳知其由。今于文蓮老和尙退院之時・蒙諸位老和尙・并諸房法眷 燹・亦無足怪至後世道太平・香火鼎盛。仍復安于故習・毫未改革。餘曾理 之打店鋪者・貨物器具・悉賣新主。所謂常住者・只空屋經像而已 舊名色・登此打交盤萬年簿。後所置者・ 道亦隨之隆盛矣 住持進院花費 嚴什物。 勉力籌度興利除弊・培植常住元氣・以仰副諸公爲法爲人一番至意。因言 天下名山菩薩道場 委此重任 筆勾消 無論常住舊有・即本人所置辦者・亦不得退時攜去及作價交盤 0 自愧人微德薄・不敢承當 ・須彼本人自任・不得耗費常住 0 。 文蓮老 人聞之 ・ 其什物有破敗不堪者提出・同眾棄去。有可用者・按其新 0 由梁至民 ·世經十紀 踴躍歡喜 。而再三逼勒 ・年滿一千。今既忝膺此任・ 體登簿 • 發菩提心 э 如是則常住日見豐足 · 不許推辭 其住持・并常住財政規 0 願將交盤洋一 0 竊念普濟乃 。弊由兵 • 千若 敢不 而法 0 而

六五一

印光法師文鈔卷三

序

普濟寺萬年簿序

俱妙 矩・悉仿諸方叢林。唯選舉住持・仍須本寺各房子孫。是之謂子孫十方。所 恩・豎窮三際・横徧十方。而各人現在則福慧雙隆・人天敬仰。臨終則形神 願自茲以後・凡爲住持・及膺職事者・各各發菩提心・培植常住。庶大士慈 ・佛聖來迎。如是則ஈ慧一念愚誠・與文老一番婆心。皆悉不落空亡

別庵統祖新公堂序代茂量師作

咸有實益矣。因略敍源委・以冠簿首。俾後之來哲・悉各知其緣起耳

倒昏迷之心。 如來所證之阿耨多羅三藐三菩提道・即我與一切眾生・現前一念煩惱結業顛 能識此煩惱結業顛倒昏迷之心・便可以上續如來慧命・下作人

眾生・三無差別。迷悟雖殊・體本不二・一條蕩蕩長安路・從來絕不禁人行 天導師。普令一切眾生・同識此心・同證阿耨多羅三藐三菩提道。所謂心佛

自是不歸歸便得

故鄉風月有誰爭。

自世尊示成正覺・四十九年・

廣說經

祖德 播寰區 真出家 家・ 法・指大經于塵中・示明珠于衣裏。三千年來・沐法澤而悟自心・證覺道而 來・尙未成立。今田已成熟。租課照常。因于今春・起立公堂。十柱輪流 後因外界侵佔一半・只得三十一畝而已。然田屬新開 聊效追遠之誠・糾立公堂之會。緣舊立公堂・過于淡薄。不足以昭虔恭而報 即後世莫不尊崇。昔先師戒文老人與開如和尚。每念忝爲法裔・莫續徽猷 紫・屢施九道之雨露 度有情者。數逾恆沙・何可勝論。若我別庵統祖・宿植德本。乘願再來。童 周而復始 或任 ・起觀感而裕後昆。以光緒十八年・闔山共築朱家尖眾香塘。因糾十餘 。六坐道場 。弱冠悟道。闢普門以重興法雨・傳心印而丕振宗風。身居海島・道 二股 。 在如公與吾師之本心・實欲後世子孫・登堂薦獻・禮像投誠時 • 或任數股 ・廣垂言教。不特萬民傾誠・真使一人注意。由茲賜帑賜 。唯期祝國祝民・同沐大覺之恩光。在當時固皆景仰 。共湊洋若干圓・買田百畝・ **猶是斥鹵。故二十年** 以爲新起公堂之備

印光法師文鈔卷三

序

別庵統祖新公堂序

五四四

心自思曰・祖師與人同耳。彼既丈夫・我亦宜然。豈可高推聖境・自處凡流

。由是奮發大心・追蹤先覺。破無明以證法性・續佛慧以度眾生。俾圓通道

場 ・經劫常住。大慧宗統・徧界流行・庶不愧爲祖師兒孫・如來弟子矣。凡

我同倫・尚勉之哉。時在民國二年

眠雲公堂序 代法爾哲記僧作

家・做體面・遺子孫而已。推其病根・只因執著有我・不肯放下。其念慮固 人生世間・幻住數十年。從有知識以來・日夜營謀・忙忙碌碌。無非爲養身

結 雖佛與之說法・亦莫之能解。而于自已主人公本來面目・則反置之不問

懼殺業・不樂從軍。聞化聞老人說法・遂投身座下・剃髮爲僧數十年來・專 任其隨業流轉・永劫沈淪可不哀哉 。開然和尙 ・夙因深厚・託質將門・

主參究。但恨未得覿面・一敍機緣。其所悟處・深淺莫測。至光緒末年・

持法雨。因自立公堂·以作遺念。題其名曰眠雲。夫雲之爲物·來無所從

去無所至・幻生幻滅・了無定相。而能降注甘雨・普潤大地。俾有情無情

公通身放下・ 安住其中 。其殆示其所悟乎・抑令後世子孫以此爲法乎。其義

絶似證無我相者之無所住而生心・度脱一切眾生而無有度相

然

玄妙・可以深長思矣。

各得其所

通智法師公堂序代悟開大師作

門身・離塵脫俗。高豎法幢・丕振宗風。流通法化・續佛慧命。此爲法身大 順機宜・皆令度脱。此不可思議神通妙行・唯聖能爲・非凡所及。若夫現沙 粤自世尊入滅・四依宏法 士・大心凡夫・傳揚佛法・通途妙行。由斯二行・故得横徧十方・豎窮三際 。現普門身・垂形六道・逆順隱顯・種種方便・隨

無一處不蒙佛光

無一人不沐佛恩。

至于法傳震旦・二千年來宏法大士

懷 及長 京都人。迨至元公逝世・嫡子忌刻過甚。其母遂攜之以歸京都・寄居舅舍 公法師其人焉。師諱尋源・字通智・別號憶蓮沙門。俗姓阮・系揚州儀徵 等臂・普接三根。即凡心以示佛心・統萬行而歸一行者。其唯我先法師・通 高僧傳 茲王臣歸命・士庶傾誠。廣布玄猷・輔弼政治。其宏功偉迹・多難盡述。即 廣布法化。宗說兼通・定慧均等。現身說法・以德服人。扇真風于火宅・注 深入寶王三昧。總禪淨而同修・會宗教爲一致。出廣長舌・宏演圓宗。垂平 宿植德本 中堂元公之幼子也。于道光二十二年癸卯・三月初八日未時示生。母氏某 法雨于情田 優游蓬島。每以不遇真人為憾。至同治十二年・年二十一。偶至龍泉寺 ・相貌瓌瑋・語音洪暢。性好道術・不求仕進。欲爲長生神仙・放曠襟 ・傳燈錄・百餘卷書所載者・乃千萬分中之一二耳。近世以來・其有 ・示生巨族。隻眼覰穿浮世界。一肩荷起大津梁。宴坐圓通道場 。普被三根・總攝眾機。各復本有之天真・共證即心之覺道。因

遇首座本然和尙。洞明教理・透徹禪宗。億必得道高僧・與之談己所懷

本公笑曰・汝本有之天真佛性・無端背棄・而求不可必得不出七趣之神仙 •

受業師・研究教典・勵志修持。至光緒四年・受具戒于京西雲居寺。因念教 棄金擔麻 即求攝受。本公因爲薙髮于本京七塔寺・乃石佛寺之支派也。從茲常親本 認奴爲主。汝具如此相貌 ・而其志何若是之下劣也。遂頓棄所懷

年· 于普陀佛頂山信真老人會下·師資道合·得受心印。是爲傳臨濟正宗第

理粗明・本分未了。説食數寶・有何利益。乃發足遊方・徧參宗匠。至十四

四十二世。 師于楞嚴 是年宏楞嚴于法雨寺。 ・獨有心得・因爲註釋 此後十有餘年・ 。欲使大佛頂理・圓通常性・全體顯現 常應講聘· 每期眾皆數百

措詞立言 真・唯究根本・不事支末。但欲發揮理性・令其徹底全彰・和盤托出。至于 毫無隱覆・述成開蒙十卷。現蒙維揚萬壽寂公・爲之刊板流通。所惜賦性率 或失詳審 0 故致間有參差疏漏之弊 0 倘蒙具眼作家 稍事修治

則成法苑完璧・楞嚴寶鏡矣。師平生志在楞嚴行在淨土。日課佛號三萬

六五八

誓

六根 等煩惑未斷 求往生。晨持大悲呪一尺香・以爲助行。欲令現未有情・同生淨土。故于彌 不知淨土・楞嚴乃破淨土之元勳。深明淨土・楞嚴實宏淨土之善導 墜墮五魔處 不畏哉。其講楞嚴也・于七處徵心・十番顯見處。必詳明此土開悟之難・淨 無從倚託 命終時 名為教外別傳・淨土實為教內真傳。須知即此真傳・乃別傳外之別傳也。汝 陀疏鈔・及演義・要解・便蒙鈔・勢至圓通疏鈔・皆爲刊布謂學者曰・禪宗 土證道之易。至勢至章・則殷勤勸導・不遺餘力。直欲法會大眾・人各都攝 · 淨念相繼 業識茫茫・無本可據 。依舊乘惡業力・輪迴惡道 ?。尤復極陳得失・痛示利害 • 道業未成。切不可錯認定盤星 0 即隨勢至・ 親證圓通 (。雖有不可思議大慈大悲之佛力・由不信故 [。從劫至劫・了無出期。可不哀哉・可 0 0 每每淚隨聲出 其至由惡業而沈淪四趣· ー 高推禪宗 ·藐視淨土。 ·語音哽噎 乏定慧而 常日 致令臨 看經不

悉知 燕窩岡 彼抗 佛 經兩月餘 息。以二處主人・悉皆尊德重道。且與普慧庵主覺公・法稟同門・交稱莫逆 無定所· 故也。至三十二年丙午冬・示疾育王。丁未春・覺公即接至庵 雲行鳥飛・杳無定處。于天童小白嶺・維揚萬壽寺・及本山普慧庵・嘗多憩 尚須以十大願王 法・薄浄土而不屑修持。須知華嚴會上・華藏海眾。同破無明・ 具 擇 法 眼・ 泊爾 。上孤佛化· 恐招彼此親疏之譏 故無剃度。嗣法門人・本山唯源通・與不肖悟開。外方雖有・不能 神逝 乃佛頂文正和尚等・預爲營造之歸宿所也。以平生性好寂靜・而住 0 臨終前數日 其孤負佛恩處・類多如是。汝等切不可將禪宗機鋒轉語・認做實 。世壽六十五歲 • 回向往生西方極樂世界・以期圓滿佛果。 下負己靈 • 神氣清爽 故概不書 。諸佛名爲可憐愍者。 ·僧臘三十五年。 · 奮勵念佛 嗚呼 開于昔年 0 全身入棺 至四月初三日未時 師十餘年來・各處宏經 頻預法會 • **瘞于佛頂** 汝何人哉 0 備極照應 同證法身 ・合掌念 屢聆! 山後之 • 敢與 0

六六〇

音・未明自性。師以孺子可教・遂爲預行付囑。當時雖極慚惶・猶期悟于後 堂。略敍大端・以垂永久。俾後世法裔・仰先德之徽猷・而勵志效法云爾 險道而頓登寶所。即我心識・了煩惑而徹證真常矣。茲以先師遺資 開上品。忍證無生・位登不退。速乘本願・垂慈濟度。庶可以仗師威神・出 來慧命・將何所託・從何所寄耶。寧可自殞・不忍師逝。唯冀承佛慈力・蓮 日。豈料諸魔未殄・法將云亡。毒藥未消・慈父見背。悲夫。眾生津梁・如 · 肇立公

立山老人派下子孫公堂序代開如和尚作

能解脱。大覺世尊・愍茲劇苦。施大法藥・令修四念處觀。 背覺合塵 不了真如妙性妄認四大爲自身相・六塵緣影爲自心相。既已認賊爲子・ 切眾生・具有如來智慧德相。但因妄想執著・不能證得。究其原由 。從此根塵互黏・人我敵立。起惑造業・輪迴六道。經塵點劫 觀身不淨・二 ・總因 · 逐致 · 莫

塔中 見主翁 妙性 亦多仰遵佛制・而用此法・不獨唯僧爲然。僧既焚化・拾其餘骨・置于普同 聖凡・舉皆焚化。而天下叢林・無不遵行也。當唐宋佛法盛時・士大夫家 骸者・一則恐彼亡者所作未辦・身見未泯。令其豁悟真空・當下解脫。二則 觀受是苦・三觀心無常・四觀法無我。及餘正勤・如意足・根・力・覺・道 情 正欲存者了知此身・全體虚妄。力修聖道・復本心源。務於動作云爲處・親 在。凡情聖見・兩俱消亡。尚無涅槃・何有生死。至于世壽若盡・則焚其形 觀若成・則我執即破。 三十七品法門・雖根有利鈍・乘有大小。莫不皆以四念處而爲根本・良以四 即此苦無常無我不淨之幻妄身心・徹證常樂我淨之真如佛性 0 亦如叢林之海眾同居。其中凡聖莫測 譬如垢盡鏡明・雲開日朗 。則能自作主宰・不被此臭皮袋多方驅使。庶可以上繼佛慧・下化有 我執既破 。 日即本具 ・ 明非外來。 ・則五蘊皆空・六塵即覺。返本還原 行位難辨 。凡既附聖・亦易解 得無所得 0 以故無論 · 獲大自 ·親證

印光法師文鈔卷三 序

立山老人子孫公堂序

六六二

脱。 伴山 法徒 持・法道由是重興。而剃度法嗣・實繁有徒。化開師伯・謀諸本派法眷・各 久經兵荒・香火斷絕・遂致一敗塗地。至同治十年・眾挽先師公立山老人住 值當辦。使亡者時受祭薦・蒙法利而超極樂之天・存者識破幻妄・修淨業而 出淨資若干圓・修一子孫普同塔・於海會橋東。凡立山老人派下子孫・及諸 如蒼蠅附于驥尾・不勞而得至千里也已。法雨常住・當前清咸同閒 常明 ・皆可入焉。又買眾香塘田五十畝・以歲所收租・充春冬祭薦之費 ・長生・楊枝・寶稱・五庵。及化恆師派下子孫。六柱輪流 · 承 。俾 · 以

募建藥王篷序代撰

預蓮池之會・爰書緣起・以告同倫

大覺世尊・名大醫王。普治眾生身心等病。所用之藥・其數無量。戒定慧三 攝盡無遺。以故此三・名爲藥王。若能服之・即凡成聖。然藥雖美妙・修

竭誠致敬・孜孜修持乎。擬建茅篷一所・名爲藥王。安住其中・篤修淨業 合實難。而信願念佛求生西方・名爲阿伽陀藥・萬病總治。下手易而成功高 即心即佛 之涓滴・俾成安身之陋室。由茲夙夜翹勤・禮拜憶念。既能念茲在茲・何難 以期普愈自他身心生死等大病。懇祈檀越·發菩提心·行方便事。略分寶海 足。是知信願念佛一 用力少而得效速。上中下三根・即生皆出苦輪。戒定慧三法・當念悉得具 。則無邊利益・皆所成就 法·乃藥王中之藥王也。某幸承宿因·得聞此法。敢不 。以如是因 ·感如是果。現生必得蒙佛接

引 虚棄矣 高預海會 。將來必作藥樹王身・普治眾病。若能鑑此愚誠 ·則此語當不

法雨寺萬年簿序 代開如和尙作

得最勝之地・方可宏最勝之道 印光法師文鈔卷三 序 募建藥王篷序 。建非常之事・必須待非常之人。宗匠出 法雨寺萬年簿序 ・則

賴人爲 後 欲轉法輪 廣大心。凡師公力未暇及之工・一切殿堂寮舍・或創或修・無一處不使一新 師公立山老人住持。荒垣破屋 隆 本立道生。哲人亡・則法殘教弛。雖否極泰來・屬于天運。而革故鼎新 0 • 存。 其規模制度 至光緒十一年・以老病退隱・命先師聞老人繼席住持。先師纘承舊緒 至藏經閣 ・住持不得其人・遂致一敗塗地。殿堂寮舍・坍塌破壞。法器莊嚴・百無 。嗣後歷代住持・雖則無大樹立。然皆恪守成規・家風不墜。及至兵燹之 下至桌凳牀榻 諸房法眷 。法雨常住 須仗莊嚴法器 ・悉皆重新。其餘工程・雖未盡復當日舊制 ·不亞中興 ・見此景象。咸皆束手・不肯承當。於同治十一年 凡所需用 ・肇始於大智老人・中興於別庵統祖・規模宏敞・法道興 。 十餘年來・ 宏宗闡教 。凡咸豐年間 般般具足。然老人大願雲興 ・竭力修葺 · 壓出桃花莊稻田 0 兢兢業業 0 所置什物 ·十有餘年。 ・而大局已有可觀矣 • ・恨不得十方僧眾 盡行贖回 上自龍藏佛像 自天王殿 ·眾強先 。又以 實 發

盡瘁 師命 法眷・公舉定公・繼席住持。如仍居舊職・監理院務。及至定公退隱・荷蒙 也。由是夙夜經營・莫敢或遑。拌此身心・謹成師志。三年之內・所有事宜 法眷・委此重任。雖知弗克擔荷・而不容推卻者。以先師公案・尚未了畢故 而老人竟賷志西逝矣。如自愧涼德・兼無作略。因廁門牆・委理院務 喪考妣・如救頭然。日夜焦思・憂勞成疾。至二十三年冬・修建尙未畢工・ • 番苦心・大不容易。各加愛惜・無或暴殄。使守成之功・媲美創業。纘緒 一一登記 咸萃一堂。往昔祇園・復現今日。爲法・爲人・爲常住・爲大眾之心・如 悉皆清楚 • 追蹤開山 罄竭愚忱矣。承此未了公案・只得竭力擔當。於是奉先師遺命・邀諸 極力輔弼 。俾後之莅住持位・膺職事職者 。可以交代・不累他人。故今謹同法眷 。億萬斯年・永無替廢。 0 雖輕塵墜露·不足添江益嶽。然于自分論之·亦可謂鞠躬 庶可法輪與願輪而常轉・千古恆守 。知前人爲轉法輪・置辦什物 · 備將常住所有鉅細什物 0 勉承

印光法師文鈔卷三 序

法雨寺萬年簿序

六六六

舊家風 。國恩共佛恩以並報・奕世常霑新雨露。則法門幸甚・常住幸甚

化聞老人公堂序代開如和尚作

歸 築眾香塘田·撥一百畝·以作法眷春冬公堂祭祀之資。使後之登堂薦獻 之所。惟欲恢宏祖道 若己・急公猶私。住持法雨・十有餘年 庵之嫡子。去舊更新・梵宇復輝煌之制。宏宗演教・法源得流通之祥。視人 島・佛法以通肩而擔當布濩慈雲・興隆法雨。不愧爲普門之功臣・直可作別 乘願再來・特整大士門庭。生雖示迹都城・世榮以隻眼而覰破。身遂棲遲海 追遠之事 竊以春秋祭祀・儒禮所重。歲時追薦・釋教尤崇。念水源木本之恩・修慎終 徳 月 嗣德未能・報恩無地。欲崇追薦之儀・兼使後人感發。故將老人所 。世出世閒・又何閒然。先師聞老人・多劫熏修・堪爲人天福田 ・利益將來。日夜焦思・憂勞成疾。功圓果滿 。未曾買一畦養老之田・蓋一椽棲身 撒手西

像投誠者。誠惶誠恐・自愧自慚。各各取則・人人效法。以老人之心爲心・ 以老人之事爲事・庶可不愧爲老人兒孫矣。凡我同倫・尙勉之哉。

白華庵法譜序 此係懸敍下敍事不錄

歸真 荷法道 潤・四眾均霑。而宏揚流通・惟僧是賴 殊・苦樂迥異。大覺世尊愍之・示生世閒・成等正覺 隨緣・歷九界而不減。隨緣不變・證佛道而不增。光明洞徹・受用自在。直 吾人一念心性・不生不滅・非色非空。豎無初後之迹・横絕邊表之形。不變 人殊。爲實施權・備設五乘之階位。開權顯實・同歸三德之法門。雖一 下與十方三世一切諸佛・無二無別。但由迷真逐妄・背覺合塵。致使生佛懸 ・背塵合覺。復還本有之天真・親證無上之覺道。由是教隨機異 ·必須洞徹心源 。故自教啓西乾 。良由割愛辭親・方能精修淨行。負 法傳東震 律教揚鐮 ・廣演言教。令其返妄 禪淨建幟 ・法以 一雨普

印光法師文鈔卷三 序

二千年來・蒙剃度而飲法乳・以斯道而覺斯民者。其世系師承・源源本本・

凡夫知見之迹・則自五代梁貞明閒・始建道場。歷宋元明・以迄昭代。高人 屢出・天章頻頒。其閒法運・不無否塞。而賴有負荷法道之人・爲之調停施 何可得而勝數也。普陀爲觀音大士應化之地・歷劫常然・無遷無變。而世閒

゚。得以轉否爲泰・即塞成通。以故圓通道場・振古如斯・不墜厥初也

香積會齋僧規約序

設

德之身 則近除饑饉之因・遠獲應供之果。由助道故・受之則堪修六度之行・用彰三 竊以僧名福田・普利四生九有。齋能助道・均資三乘六和。由福田故・供之 經所云於食等者・於法亦等財法二施・等無差別者 。此之謂也 0 鍾

芳大師 生少息。 以備每年臘月二十五・設齋之費。 有見於此。遂邀淨友若干眾·人各出洋若干圓。永存普濟庫房 日持所立規約過予・祈作 略

者 得 圓音・ 心之幻穢頓消・自性之真淨圓顯。當念親見彌陀・臨終定蒙攝受。從茲常聆 也・香飯也。 是何等香飯 沙・求彼所餘・飽此大眾・然後爲得也。當知此齋・師等以實心備辦・大眾 真實圓通耳 香國 是何等神通 以虚心納受。辦者受者・各具眼耳鼻舌身意。而眼耳鼻舌身意・當體本空・ 冀垂永久。且曰・昔維摩居士・以神通力・過上方四十二恆沙佛土・於眾 切大眾 |・香積如來所・乞取香飯。於丈室中・普供大眾・以作佛事。令其未得 ・未證者證。芳等愧無如是神力・謹具疏齋・用表微忱。欲與十方三世 恆炙休光。當必速滿果海 同仗彌陀六八洪願 。予曰・神通人各本具・香飯娑婆豈無。何須更顯神通・高越恆 0 不離當處・任運徧達於十方。不越一念・法爾普熏於三際。即 所辦所受・復具色聲香味觸法 而况根塵既亡・我人豈有 · 共離五濁 ・入大涅槃。豈第得三摩地・ 0 則三輪空寂 ・咸登九品。 0 而色聲香味觸法 永侍普門大士・親證 道清淨 證真圓通而已 直下如幻 0 其爲神 蓪

六七〇

哉 德・當與十方虛空・同其壽量・非筆墨文字・所能形容者也。如或不識因果 。由是觀之。師等此舉・乃與維摩老居士・並鑣齊驅・無或軒輊。其爲功

廢弛侵沒。則昔人以齋僧錢・蓋安僧屋者・尙墮火枷地獄。况入私囊・以

肥己者乎。殷鑑早懸・各宜洞照

圓通庵萬年簿序 代永悟和尚作

實際理地・不受一塵。佛事門中・不捨一法。昔世尊以五時八教・普應羣機

毫善弗遺。應大・則包括法界。迨至法華・則開權顯實・會三歸一 隨彼根器・各令得益。其在前之四時・具說六度萬行種種法門。攝小・則 0 普授作

常住之總帳簿子也。溯吾師祖普信老和尚・欲攝心禪寂・於同治三年・歲在 所以然之線索。如家業之有總帳簿・天子之有九鼎也。茲萬年簿者・亦圓通 佛之記 ·大暢出世之懷。說者謂法華一經 · 乃如來究竟極譚 · 具明一 代時教

者創之・宜修者修之。 址之高者鏧・卑者砌。必使地得其平・人得其用而後已。而殿堂屋廬之宜創 逝 遂開拓基宇・改爲禪庵。至明年春・先師示寂。吾承師祖慈命・力任院事 老人・攝吾與永慶師兄。幸蒙大士冥加・二三年來・香火漸興・檀施屢至 谷遷喬・直登大涅槃山・常觀大寂滅海者之先兆歟。越五年戊辰・吾師山靜 甲子・創建三椽茅篷・於西天門上・不二石側・額之曰圓通。僅足以蔽風雨 及爲精藍也。按山志・圓通庵・在西天門上。萬曆五年・僧圓獻結庵於谷內 而慶兄專修淨業・凡九歷寒暑・三掩禪關 庇身心而已。而老人入修禪觀・出睹滄溟。怡情適志・以法爲樂。初未億 |。其局勢雖未若現今之恢廓宏敞・然已頗有可觀矣。 後以年深遂廢 香火愈盛 加以徒某孫某・繼任其事。尤復不惜心力・經之營之。舉凡基 。昔處谷內・今踞山巔。其名雖同 陿小鄙陋者・廣大壯麗之。咸使煥然一新・ ・以輔翼之。 · 而其基稍異 從茲以後・剃度益多 迄同治癸酉 0 成就大觀 殆後有出 師祖 西 ٥

圓通庵萬年簿序

印光法師文鈔卷三 序

六七二

轉法輪 敢暴棄 簿・以垂久遠。夫此庵・非天造地設 視卓錐無地者・猶少勝焉。噫。吾老矣。來日無多・欲後之人有所承守・不 事所應用・日常所必需者・罔弗備焉。田產雖無幾許・而亦可供一季之糧 痛念生死事大・無常迅速 圓成耳 以及大而佛像尊經· 自利利他而設。愛之如身上肉・護之如眼中珠。孳孳修持・惟日不足。 而徒與孫・亦預有力焉 。以冀報答四恩於萬 。而濟濟後昆・安住其中。無飢寒困苦之憂・有閒適逍遙之樂。可不 ・須仗眾緣。今幸眾緣略具・當須常轉法輪・備修萬行・以期萬德之 。勉效前人・光揚法道。今將常住所有鉅細什物・分門別類 中而莊嚴法器・與種種什物 。體檀越之誠懇・思建立之艱難。發菩提心・篤修 一乎。凡見庵中一針一草・則曰此爲我等續佛慧命 。然亦豈徒設云哉。良以欲成佛果・須圓萬德 。乃吾與慶兄・及十方檀越・心血所成 0 即小而一匙一筯 · 一 登 ?·凡佛 能 欲

如是者・不愧爲如來弟子・大士兒孫。則人敬之・神護之。現在福慧雙隆

將來成佛有分。否則袈裟之下・失卻人身。三途一報百千劫・出得頭來是幾

時。莫言不道。

永悟和尚公堂序代本人作

肯一照。六塵無性・人皆認真。致令萬苦俱集・一靈永昧者・幻身與妄心也 香味觸法之荊棘林。由是起貪瞋癡之無明・滅戒定慧之正智。五蘊本空・誰 蝨星羅 風之身・乃筋骨血肉之聚。方生即滅・纔榮便悴。眾骨支撐・如以木爲屋 恆。無生無滅・離相離名。在有非有・居空不空者・真性也。至於攬地水火 夫前之無始・後之無終。包太虛而無外・入微塵而無內。清淨光潔・湛寂常 皮包裹 圓覺所謂一切眾生・ 。假名爲人・實我焉在。而且以眼耳鼻舌身意之閑家具・奔馳于色聲 ・猶以泥糊壁。裏面盡屎尿膿血・外頭生垢汗髮毛。蛆蟲棊布 種種顛倒 。妄認四大爲自身相・六塵緣影爲自心相者 蚤

六七匹

茅篷・意謂有此把茅蓋頭・斗室容膝 滅・毫無實義。又何必留鳥迹于空中・繫清風於江上也哉。但以本山恆規 記其年月・陳其薦獻。若論幻身・則生同傀儡・死作塵土。妄心・則隨境生 當頭棒喝 固請不已 告退只住四年。緬想古人・慚惶無地・又何敢引以爲例哉。諸法子徒弟輩 眷・以予篤厚老成・強攀之爲法雨主人。然自愧德薄・何足光揚法道。屢次 信日眾。輸粟布金。年久月深・不知不覺遂變之為梵宇精藍矣。而又闔山法 凡為住持・及有名德僧・皆立公堂・以為後人遺念。予自弱冠・出家于圓通 於今又經幾許年月。因知人命無常・速如電光・一息不來・便成後世。從 此也。若論真性・則非聖非凡・無朕無兆。亙古亙今・恆自如如。從何 。 令彼春冬二季・ 懸影祭祀時。 忽念曰 。因幡然曰・吾生不能宏闡宗風・利益彼等。若設公堂・亦可以作 ・足矣。豈知世相無常・隨時遷變 ・此老某某年生・某某年歿 檀 以

茲發憤修持・求生西方。由是拌除幻妄身心・還復本有真性。與彌陀老子

桃花莊田若干畝・使其輪流經管・以充兩季祭祀之資。乃援筆而爲之序 共優游於清淨寂滅之域・以永享夫常樂我淨之樂・則亦不無小補云。遂令撥

初機淨業指南序

法。又曰・彼土何故名爲極樂・其國眾生・無有眾苦・但受諸樂・故名極樂 從是西方過十萬億佛土・有世界名曰極樂。其土有佛・號阿彌陀・今現在說 生死輪迴之苦矣。既是志同道合・何妨助其勸導。乃爲序曰・阿彌陀經云 取浄・信願念佛・求生西方。當必一超直入如來地・不復在此世界中 會稽道尹涵之黃公・篤信佛法・精修淨業。欲令同人・咸修淨業・離苦得樂 。以淨土諸書・文深義奧・不便初機・及無學問人。因編作白話・縷析條陳 其無有眾苦但受諸樂者・由阿隬陀佛福德智慧・神通道力・所莊嚴故。吾 以示要義・名曰初機淨業指南。生死海中・得此指南・則背東向西・捨穢 ·長受

印光法師文鈔卷三 序

永悟和尙公堂序

初機淨業指南序

久。如父母具存・兄弟無故・此事何能常恆。故樂境一過・悲心續起。則謂 娑婆・此云堪忍。謂其中眾生・堪能忍受此諸苦故。然此世界・非無有樂 人所居之世界・則具足三苦・八苦・無量諸苦・了無有樂・故名娑婆。梵語 間何事 者・一苦是苦苦・二樂是壞苦・三不苦不樂是行苦。苦苦者・謂此五陰身心 了無有樂・非過論也。此世界苦・說不能盡。以三苦八苦・包括無遺。三苦 何嘗是樂。一班愚夫・耽著不捨・樂以忘疲・誠堪憐愍。即屬真樂・亦難長 以所有樂事・多皆是苦。眾生迷昧・反以爲樂。如嗜酒耽色・畋獵摴蒱等 雖不苦不樂・似乎適宜。而其性遷流・何能常住・故名之爲行苦也。舉此 苦境即臨。當樂境壞滅之時・其苦有不堪言者・故名樂爲壞苦也。行苦者 體性逼迫・故名爲苦。又加以恆受生老病死等苦・故名苦苦。壞苦者・世 ・能得久長。日中則昃・月盈則食。天道尙然・何况人事。樂境甫現

無苦不攝。八苦之義・書中備述。若知此界之苦・則厭離娑婆之心

居極樂 此娑婆 現・水濁而動則隱。月固無取捨・其不現者・由水昏濁奔騰・無由受其影現 百千萬億人 勺一滴水中・無不各現全月。且江河之月・一人看之・則有一月當乎其人 汝何得以凡夫知見・推測佛境。姑以喻明・ 佛 自油然而生。若知彼界之樂・則欣求極樂之念・必勃然而起。由是諸惡莫作 。若百千萬億人・安住不動・則月亦安住不動・常當其人也。唯水清而靜則 眾善奉行・以培其基址。再加以至誠懇切・持佛名號・求生西方。則可出 各向東西南北而行・則月亦于所行之處・常當其人。相去之處・了無遠近 月何容心哉。夫天只一月・而大海大江・大河小溪・悉現全月。即小而 何能以一身・ 0 ・生彼樂極 十方世界・ ・于百千萬億處看之・則無不各有一月當乎其人。若百千萬億人 。爲彌陀之真子・作海會之良朋矣。或曰・阿彌陀佛・安 時普徧接引十方無量無邊世界之一切念佛眾生乎 無量無邊 。一世界中念佛眾生・亦復無量無邊 使汝惑滅 0 一月麗天 · 萬川影現 0 阿彌陀 答

ハ七八

耳。眾生之心如水・阿彌陀佛如月。眾生信願具足・至誠感佛・則佛應之・ 如水清月現也。若心不清淨・不至誠・與貪瞋癡相應・與佛相背・如水濁而

動

・月雖不遺照臨・而不能昭彰影現也。月乃世間色法・尙有如此之妙。况

佛身充滿于法界・普現一切羣生前 見其來此接引以往西方也。懷此疑者・固非一二。因示大意・令生正信云 知徧法界感・徧法界應。佛實未曾起心動念・有來去相。而能令緣熟眾生 阿彌陀佛 煩惑淨盡・福慧具足。心包太虚・量周法界者乎。 。隨緣赴感靡不周・而恆處此菩提座。 故華嚴經云 故

藥師如來本願功德經重刻序

同體悲· 相所感之受用・亦悉懸殊矣。佛愍其體同而相用懸殊也・由是運無緣慈・興 佛與眾生之心體・了無少異。眾生與佛之心相・天淵懸殊 種種方便· 以施濟度 。眾生若知其相用雖殊而本體原同也・固當 0 相既懸殊 則由

初機 之藥師琉璃光七佛本願功德經・有說呪一段文・凡四百二十八字。三經實本 知見者謂與藏本不同 舉·可謂契理契機。故數百年來·依之流通。張瑞曾居士·發心重刻 世受持 令文義周足 頂神呪經 文理暢 璃世界藥師琉璃光如來・因行果德・顯密攝化之功德也。此經係唐玄奘譯 慕諸聖・下重己靈・依教奉行・以期復本也。藥師經者・世尊敍述東方淨琉 經 華嚴之普賢行願品 ・呪力居多。以故前人取帛尸譯本八菩薩名・義淨譯本說呪一段添之・ ・以流通已久・致貝葉脱簡・各據所得之梵本以譯耳。而藥師如來拯拔 順 。若不添入 M 第十二灌頂章句拔除過罪生死得度經 0 而藥師如來救度眾生之心 八菩薩名· ·則誦經者不蒙密呪利益 。合之則稱悅佛心 致生疑慮 與說呪一段 因略述源委 · 二皆闕 ·亦無遺憾 離之則有闕化導 · 持呪者不知出自何經 如 以期共知所以耳 0 東晉帛尸 有八菩薩名 。亦如法華之普門品重頌 0 况此經此呪 ,梨蜜所譯之大灌 0 唐義 。前人此 淨所 舉 譯

印光法師文鈔卷三 序

樂師本願經序

修正管理寺廟條例并護教文稿序

造經像爲始 者・多由學佛得力而來。即宋之周程張朱・發明聖學心法・亦曾取資于佛學 佛法者・心法也。此之心法・乃十法界之根本。不明此法・非但無由親證本 殊爲欠缺 以未得根本 有真如佛性・即世間格致誠正・修齊治平之道・亦不能究竟圓滿 是以一切諸佛・莫不以流通法道爲囑 但其門庭知見過甚・不唯不事表彰・反從而闢駁之。則于誠意正心之道 ・可歎也。此法雖人人本具・若未聞佛說・則珠在衣裏・莫由自知 0 ・唯事所發之迹象故。是以古今來凡立大功・建大業 以若無塔廟經像 • 則無由奉尊儀而修淨行・闡佛道以導羣迷 。流通之法・最初須以建立塔廟 0 何以: 輝煌宇宙 故 印

而一切含識

須真修實踐之僧・及有勢力財力之王臣紳商

。一名內護・一曰外護

・俱無由瞻禮聖容・培植善根。聞法修持・開發心地也。流通之

有人故 等西天 種福 僧佔產 **遂致一敗塗地。** 遭 國土・流通佛法・普利含識。由是二千餘年・化被各國者・以內護外護・ 則師表未立 使自他得益・幽顯蒙庥。陰翼治道・潛淑民情而後已。外護則不惜資財・廣 護則嚴持禁戒・篤修淨業。于禪教律密淨土・或專主一 如來將入涅槃・以法付囑國王大臣 便謂僧皆如是。從茲一唱百和・以爲佛法無益于國・有害于世。莫不以逐 哲人日稀 田 0 。我國自東漢時・方蒙法化。至晉而蒸蒸日上・至唐則諸宗悉備 。 普令同人・發起信心。內外相資 改廟爲學是務 由宋元明・以至清初 ・人將安仰 0 凡未閱佛經・未遇知識之人・見此遊行人間・造種種業之僧 國家不暇提倡 ・若無有勢力之外護・則資斧無出 但此事者 • · 庸人濫收徒眾 佛日恆輝 ·并及諸天善神。令於後世乘願示生一 雖未必全昧心理 ·法遂流通 ·法輪常轉 0 多有無賴惡人・混入法門 。若無有道德之內護 0 門·或兼修各宗 由 至咸同閒 不知佛法之所以然 • 外侮莫禦。 • 以兵歉迭 以故 幾 。 必 皆 切

印光法師文鈔卷三

序

管理寺廟條例序

但以己見妄測。致令一 |班假公濟私者・視爲奇貨・欲飽己囊。彼此效尤・

保護章程三十一條。猶有詞意含渾・易生弊端處・恐爲後患。九年・程雪樓 勢如燎原。民國初立・屢經緇素高人呈部・祈大總統下令保護。四年・規定 居士・面見大總統・祈其修改。因詳加商酌・規定二十四條。十年五月・公

飭各縣遵照辦理。此令一出・隨即退任。江蘇僧界・大爲震驚。鹽城各廟・

布各省。今夏江蘇教育期成會・復援清末民初之例。以借廟開學・呈王前省

長。遂蒙讚許・謂爲無戾于法・實衷諸情・審慎周妥・良堪欽佩。令教育廳

設法挽救 多被侵奪。僉謂去歲大總統教令公布・王前省長竟若罔聞・極口讚美。若不 表三十人・以浩淨退居爲首。懇于魏剛長王愚僧二居士。祈其轉達當軸・陳 仗辦學校之名・以滅佛法而佔僧産・爲最有名譽利益之義務乎。于是公舉代 ・不但江蘇一省之寺廟・不能保存。而各省同此性質之人・誰不欲

述利害。冀陰翼治道・潛淑民情之法・不至速滅。而江蘇韓省長・固通達政

體 者。 敢爲 其失言乎。雖然。總因僧界無人・故致拘墟者妄生侵侮。倘能各各勵志潛修 榮。雖孔孟老莊齊出・亦莫能止。自佛法入中國以來・縱南面稱朕者・亦不 無窮之痛苦。當春秋時・諸侯大夫士死・各隨其力・殺人殉葬・而且以多爲 果報應・生死輪迴之事理。 此滅法之禍・遂得消滅。當此世道人心・陷溺已極。正宜提倡佛法 啻取銷矣。又以事已達部・復呈文于內務部。部咨江蘇省長・依法辦理。由 公・毫無偏倚。僧學兩界・均翕然無事。雖未明言取銷王省長前令・而已不 大明佛法。彼排擊侵侮者·當復護持流通之不暇矣。孟子所謂夫人必自侮 作善則永世受樂。自可少戢惡心・漸發善念。決不敢取快一時・以貽身後 徒以忌妒之心・發此未見顏色之瞽論。使詳審其故・能不痛哭流涕 深知佛法者。眾僧具文上呈・旋奉批詞・尊重法律・嚴防弊端 。千餘年來・得壽終而死者・何可勝數。彼謂佛法無益于國 俾瞞心味理 ・肆無忌憚之人・知造惡則長劫受苦 · 有害于世 ・昌明因 。一秉大 悔

印光法師文鈔卷三 序

管理寺廟條例序

僧界宜如何竭誠精修・以期上續慧命・下度迷情乎哉。此事始終所有文字・ 而後人侮之・家必自毀而後人毀之・國必自伐而後人伐之者・此之謂也。我

剛長愚僧二居士・令錄而刊之。并將大總統修正管理寺廟條例・冠之于首

發生・愚僧每令其奔走・不辭勞苦。予素知其志向高潔・頗通教理。又喜其 妙蓮和尙寄予・祈爲序引。妙蓮之人・性情純篤・爲剛長愚僧所器重。此事 徧布僧界。庶知有公令・不致復有此種情事發生・一時措手無策耳。刻成

江慎修先生放生殺生現報錄序

能代人之勞・成人之美・遂爲敍其大致云。

聞・無書不讀。而且一一皆悉探其精微・入其閫奧。唯以教育英才爲樂・不 以富貴利達爲事 江慎修先生者・乃前清一代之經學大家・婺源明道潛修之隱君子也。博學多 。當六歲時・甫受庭訓 日記數千言。父奇其敏・以十三經

餘卷。 卷。當時國家・及名人著述・多皆取爲依據。至乾隆三十七年・先生沒已十 之人傑焉。殆漢鄭康成・宋周濂溪・邵康節之流歟。世之博學多聞・不講躬 切之學・無不融會貫通。遂以著述發明義蘊爲己任。所著近二十種・幾二百 信而獲實益耶。然以事關劫運・義不容辭。勉爲序曰・天地之大德曰生・如 唯學愚夫愚婦之老實念佛。何能發揮道妙・令拘墟者徹見天日・因茲以生正 易園居士・擬欲鑄板廣布・冀挽殺劫・囑光作序。光心如背鏡 信因果 行實踐・唯以詞章進取爲事者。聞先生之風・能不愧死。而且愛惜物命・深 令遺佚而不得也。噫・先生可謂學研天人・功參造化・窮理盡性・優入聖域 注疏徧授之。先生自是精心研究數十年。舉凡經史百家・天文地理・音韻翻 一年。國家開四庫全書館・凡先生所著・悉皆采入。共一十三種・一百五十 其餘數種未入者・或撮取綱要於他書中・或其稿甚多・彼此借觀・致 。故于放生吃素善報・殺生食肉惡報。隨所見聞・錄以勸世。其裔孫 ・學等面牆

印光法師文鈔卷三 序

放生殺生現報錄序

八八六

能無生生世世・圖報此怨之念乎。人縱不念諸物被殺之苦・獨不懼怨業深結 知借威權以培德· 刀砧烹煮之苦哉 同生于天地之間・同受天地之化育。而且同知貪生・同知畏死。仁人于枯骨 委曲設法 便下降。 地獄・雖則高下懸殊・苦樂迥異。總皆未斷惑業・未出生死。天福若盡 來之大道曰慈。人物雖異・心性是同。舉凡三乘六凡・如來視之・皆如一子 。何以故。以其皆具佛性·皆堪成佛故。三乘且置。六凡天人阿修羅畜生鬼 尙且掩而埋之。于草木・尙且方長不折。况肯爲悅我口腹・令水陸諸物受 心無智慮・身無技術・以罹此難。雖弱肉強食・于事則得。而怨恨所結 獄罪若滅 ・護惜物命。體天地好生之德・全吾心惻隱之仁。良以諸物與我 Ó 須知此等諸物・從無始來・亦曾高居尊位 反致仗威權以造業 ·仍復上昇。 猶如車輪・互爲高下。我今幸得人身・理宜 。竟使惡業叢集・墮于異類。口不能言 · 威權赫奕 不 即

常被彼殺乎。

又不懼殘害天物

天將奪我福壽乎

。人惟欲眷屬團聚

壽命

若墮落・尙當望彼垂慈救援・以期離苦得樂・親證佛性。豈可恃一時之強力 矣乎 法・ 延長・身心安樂・諸緣如意。正應發大悲心・行放生業。使天地鬼神・悉皆 萬一彼罪已滅・復生人道。善根發生・聞法修行。斷惑證真・得成佛道 殺。靜言思之・愧不欲生。急急改圖・尙悔其遲。况肯蹈常襲故・仍執迷情・ 愍我愛物之誠。則向之所欲・當可即得。若仗我有錢財・我有智力・設種種 以爲天生異類・原爲供人食料乎。然我尙具足惑業・固無由出于輪迴之外。 子女・我亦各各皆爲彼之父母兄弟妻妾子女。彼固各各或于人中・或于異類 ・俾長劫以無救乎哉。古有高僧・行步不跨蟲蟻。人問其故。答曰・彼此同 ・皆被我殺。我亦各各或于人中・或于異類・皆被彼殺。爲親爲怨・相生相 掩取諸物・以取悦我口腹・不計彼之痛苦。尚得謂與天地並立爲三之人 然我與彼等·同在生死。從無始來·彼固各各皆爲我之父母兄弟妻妾 或彼先成佛道 ・尙望其垂慈度我・ 何敢輕慢乎。是知佛視眾生 ~ 我

印光法師文鈔卷三 序

放生殺生現報錄序

八八八八

荊璧 皆是佛・眾生視佛皆是眾生。佛視眾生皆是佛・故多方化導之・種種折攝之 令各各得所・常得飛走游泳于自所行境。以各樂天真・各盡天年。則此書所 或生棄捨也。然佛尙不輕眾生・眾生何可輕眾生乎。故凡一切水陸眾生・必 真佛性・仍復絲毫不失。如焦模中金像・敝衣中寶珠・蒙塵之秦鏡・在璞之 何以故。愍其惑業深重・失本心故。以雖則現時背逆於佛・而即心本具之天 比皆是。須知父母於逆子・尚生棄捨之心。佛于逆惡不信之流・愈生憐愍。 殆至正智稍開 之邪知謬見・多方毀謗。甚至拆毀塔寺・焚燒經典。固結魔黨 生增長・依教奉行耳。眾生視佛皆是眾生・故聞佛之言・不生感激・反以己 縱令絕無信心・亦不棄捨。曲垂方便・令種善根。待其因緣時至・自然發 。愚人但見其外相・而不知其內容。佛則遺外相而論內容・故無一眾生 ・則便愧悔無及。由茲遂復歸命如來・興崇佛法者・古今來比 • 破壞清修

說之種種善報・當可具得矣。人既如是・物尙不欲令其失所・何况于人。則

清國泰者乎。又祈凡我同人・切勿自輕。當思我與如來・同一心性。彼何以 互相親愛・互相扶持。自然俗美人和・必致風調雨順。其有不物阜民康・時

惑業淨盡・福慧圓滿・安住寂光・常享法樂乎。我何以起貪瞋癡・造殺盜淫 輪迴六道・莫由出離乎。心性是一 ·若樂天淵。若猶以佛性功德 • 獨讓如

來親得受用者・尚得名爲大丈夫哉。

厦門流通佛經緣起序

彌綸法界。而復三輪體空・了無自他能所之相。小根則示以三歸・作反邪歸 如來說法・各隨機宜 一心昭彰 本來無有世界眾生。常寂常照・不生不滅。五蘊空而六根清淨・ 0 從茲稱性起修・由修證性。雲布慈門・波騰行海。雖慈悲行願 。大根則直示真如妙性・令其了知妙性圓明・離諸名相 四相亡而

印光法師文鈔卷三 序 放生殺生現報錄序 廈門流通佛經序

正之本。示以五戒十善・作得生人天之因。遇父言慈・遇子言孝・兄友弟恭

六九〇

乘 輪迴六道・相生相殺・盡未來際・了無止息。雖則示以人天聲聞緣覺菩薩等 眾善奉行。根器稍勝者・則示之以四諦十二因緣・令其斷惑證真・了生脫死 復平等沐澤。如大海普納百川・大江大河亦入・小溝小渠・乃至一勺一滴亦 萬無一得。是知如來大法 漏一。 未斷惑者・帶業往生。但具真信切願・懇切至誠持佛名號。能如是者・萬不 脱。于是特開一仗佛慈力・横超三界之淨土法門。俾已證聖者・速圓佛果 。又以一切眾生・由身口意・起貪瞋癡。由貪瞋癡・造殺盜淫。以是因緣 一能出其外・ 夫倡婦隨。恪守倫常 而自力斷惑・實非易易 。如時雨普潤萬卉・大根大莖・小枝小葉・悉皆向榮。縱焦芽敗種・亦 如人墮海・乘救船力・速得到岸。末世眾生・捨此一法・欲出生死 不在其中者 ・各盡其分。兼以戒殺放生・吃素念佛。諸惡莫作 · 撫育羣萌 。如日月麗天・普照萬國 。况復末世眾生・根機陋劣・不仗佛力・決難 。如天普蓋・似地均擎。森羅萬象・無 。雖生盲不見光相 ・亦蒙

入。既入大海・則與大海同一鹹味・同一深廣。失彼故名・得此海號。故知 所近・隨人所樂・以爲研窮。或徧研各宗・或專主一門。如城四門・就近而 西竺所譯之經律論・并此土禪教律密淨等諸宗古德之著述・浩如烟海。隨機 故作此掩耳盜鈴之計 見重 發。即宋之周程張朱・發明聖人心法・亦由學佛而得。以其器量狹小・門庭 賢 佛法鈞陶化育・了無棄物。爲諸法之本源・作眾生之恃怙。世出世間一切諸 知佛法如太虛之無不包容。如陽春之無不化育。聖以之而爲聖。賢以之而爲 法 法 致起罅隙 0 0 故古之建大功・立大業・勳名動天地・精誠貫日月者・皆自學佛得力而 唯見其捨俗出家之一端・謂爲廢棄倫理 無不從此法界流・無不還歸此法界。拘墟者不知佛法・乃十法界公共之 。不惟不肯表揚 ・不能究竟圓滿・可不哀哉。佛法傳入中國・將二千年。其間由 。得人之善・認爲己功・反謂人不我若 ・反從而闢駮之。欲以關閉後之學者・悉皆不入佛法 ・沈空滯寂・與世教相乖戾 。其於正心誠意 豈

入。所入之門雖異・所入之城則同。如大海之一滴・味具百川。如帝網之一 珠・影現千粒。一門深入・諸法悉通。以迄無明淨盡・寂照圓融・三際坐斷 世界。尚有互相戕害・競謀殺戮・各欲滅彼種族・以愜己心乎哉。廈門蔡吉 貪瞋癡・斷殺盜淫。諸惡莫作・眾善奉行。漸積功德・增長福慧。敦倫盡誼 ・十界平沈・復還本有之天真・以證無上之覺道・固屬上上根人。其次則息 愛眾親仁。戒殺放生・習成慈善。物尙慈憫・何況乎人。推此風化・以徧

堂・林鴻猷・陳得祿・愍劫運之慘悽・欲爲挽救。冀同人之開悟・流通佛經 。乃按本及繳用以出售・絕不求利。欲啓人耳目・祈予爲序。予嘉其誠・用

述顛末。須知佛法・以因果報應爲下學上達・原始要終之道。今之上無道揆 下無法守・彼此相戕・以殺爲樂。只圖自己快意・不顧國之滅亡・民之塗

炭者・皆由不知因果報應之所釀成也。予常曰・因果者・世出世間聖人平治 天下・度脱眾生之大權也。當今之世・若不提倡因果報應・生死輪迴之事理

欲令天下太平・人民安樂・雖佛祖聖賢齊出・亦末如之何也已矣。

法如庵萬年簿序節錄懸敍

佛法廣大如法界・究竟如虚空。難議難思・莫名莫狀。剋論大綱・不出二諦

真如法門・盡來際而無替無興。約俗諦論・則法隨緣起・道在人宏。得其人 。約真諦論・則有佛無佛・性相常住。是以圓通道場・歷塵劫而不遷不變

則闢荊榛而爲梵宇・滅狐迹而作師林 :。直教佛日增輝 法輪常轉 。失其人

法・稱爲三寶者。以其續佛慧命・流通法道・非人莫從・唯僧是賴故也 則即佛地而成業叢・ **泯經聲而宣塵事** 0 致使普門局戶 覺路封途。 僧與佛

傅大士傳錄序

眾生一念心性・ 與佛無一 。雖在迷不覺・起惑造業・ 備作眾罪。 其本具佛性

印光法師文鈔卷三 序 厦門流通佛經序 法如庵萬年簿序 傅大士傳錄序 六九三

六九四

盡情空 無已時 寶・便與糞穢一目視之。智者知是無價妙寶・不以汙穢爲嫌・必於廁中取出 加被 備作五逆十惡・永墮三途惡道之人・佛無一念棄捨之心。必伺其機緣・冥顯 寶。愚人由是・始知寶貴。大覺世尊・視諸眾生・亦復如是。縱昏迷倒惑 後已。於罪大惡極之人尚如是・其罪業小者・其戒善具修禪定力深者・亦無 福報一盡 不如是也。以凡在三界之中・雖有執身攝心伏諸煩惑之人。而情種尙在・ 用種種法・洗滌令潔。然後懸之高幢・即得放大光明・隨人所求・普雨眾 原無損失。譬如摩尼寶珠。墮於圊廁。直與糞穢・了無有異。愚人不知是 持佛名號・即可仗佛慈力・往生西方。 · 與之說法 ·斷惑證真 故法華經云・三界無安・猶如火宅。眾苦充滿 ・降生下界。遇境逢緣・猶復起惑造業・由業感苦。輪迴六道・了 。俾了幻妄之惑業・悟真常之佛性・以至於圓證無上菩提而 · 則無出此三界之望 。此則唯有淨土法門・但具真信切願 既得往生・則入佛境界・ ·基可怖畏 同佛受用 。若非業

凡情聖見・二皆不生。乃千穩萬當・萬不漏一之特別法門也。時當末法・

業・唯以上求下化爲事。故於十方法界・隨類現身・隨機說法・和光同事 捨此無術矣。如來以自力他力・通途特別二種法門・普利一切。菩薩荷佛家

導豐干・觀音之爲寶誌僧伽・文殊普賢之爲寒山拾得・彌勒之爲布袋和尙 方便引導。或隱或顯・了無定相。其有內祕聖德・外現異迹・如彌陀之爲善 0

迹而隱其本 其言其行・非凡情可測・渺不知其爲何如人。及至臨終發露・或由歿後徵驗 ・方得了知 。亦有隱顯相即・本迹俱示者・如彌勒之爲傅大士也。有時據其 自謂凡夫。有時據其本而拂其迹・自稱彌勒 。良以眾生心量

當爲之猛省也。大士一生所行之事・所說之法・悉皆直指向上一著・而復不 過於狹小。 以身表率・俾知已證等覺者・尙自謂爲凡夫。而妄自尊大・甘處凡愚者・皆 。六度齊修 若非稍有所得・妄擬聖位・便是高推聖境・甘處凡愚。是故大士 法不著 。至其受法弟子・莫不深契真常

印光法師文鈔卷三 序 傅大士傳錄序

六九五

頓空蘊界。

六九六

除・而天真徹現。光勉竭愚誠・息心正訂。雖未能一無遺漏・庶可還本來面 禮謁大士・得其書歸・即欲重刻・以廣布大士之道。祈光校訂・以冀蕪穢盡 鈔錄刊刻 令見聞・同種善根。義烏雙林寺・乃大士潛修之所。向有傳錄木板・以屢經 捨身命財・作大法施。故得道震兩朝・德被異世。由陳至今・千數百年。普 索・悉知大士之本迹事理・以爲龍華三會・得蒙度脫之先導云 目矣。玉仙又以大士碑記・文深義奥。若無註釋・實難引人入勝・啓人景仰 。乃祈黃無言居士・爲之詳註。俾若文若義・一一如指諸掌。庶閱者不勞思 ・未經明眼人校訂・遂致錯訛不勝其多。奉化孫玉仙居士・至雙林

觀河集重刻序

流露。觀一切生滅遷變境界・悉是常住寂滅真如實相。楞嚴所謂觀河之見・ 夫心者・世出世間諸法之本也。若能徹悟自心・則觀一切法・悉是自心之所 印光法師文鈔卷三 序 觀河集重刻序

相同 普度迷流・故爾和光同事。致有述懷紀事唱和諸作。雖屬文字・實寓深心 士・便悟苦空。視富貴如浮雲・不樂仕進。了心性之實際・力修淨業。亟欲 致令苦樂升沈天淵懸殊也。長洲彭際清居士 成・而亦未嘗不蒙煦嫗以受潤澤也。天機深者・見其高堅前後而不可模倣 譬如陽春。陽春一到・舉凡大樹小草・無不發榮暢茂。縱焦芽敗種・不能生 其淑世善民 廣大精微而不可擬議 三子以我爲隱乎・ 爲人解黏去縛 真常之微旨也。果能了此 無有童耄。肇公所謂旋嵐偃嶽而不動・江河競注而不流・皆示此即生滅而見 0 如來圓滿菩提・眾生永輪六道・皆不離於此心。但以迷悟逆順因緣 導迷詮真之意 · 令人起死回生 吾無隱乎爾 。實則了無奇特・不過日用云爲而已。此心之妙・凡聖 ・則可謂了事凡夫・達本道人。縱譏誚怒罵・皆能 具發揮顯示於隨機隨境之吟詠閒 。吾無行而不與二三子者是丘也。聖人之道 。豈必登座豎義 · 宿根深厚 · 然後爲說法哉。 學問淵博 0 孔子曰・二 可謂不據位 0 甫登進

六九八

既了・河自不流矣。此彭君命名之大意也。劉君朝侍・以其有益於世・爲之 觀河驗見不遷之義。又冀觀此集者・勿在文字義理閒推測・但觀觀者。觀者 整。而元氣毫無。如畫壁之鏡・剪綵之華。形雖逼肖・欲令現其光相・舒其 有得・則盡十方世界森羅萬象 彭君之道。其道唯何。曰・妙悟自心・信願念佛・求生西方而已。倘能於此 刊板流通・實爲方便導引之勝舉也。祈令爲序。予願觀彭君之詩者・當先學 而行政・不陞座而說法者。裒輯諸作・分爲四卷。乃題爲觀河集・蓋取楞嚴 ・皆是現成新詩。否則縱令聲韻鏗鏘・對仗工

觀無量壽佛經石印流通序

芬芳・則斷斷乎不可得也。

心非色・ 法身本體 四智從何以宣。寂照虚通・真如淨妙。萬德具備・ ・圓離名相。寂光真境・不屬根塵 。非有非空・五眼莫之能覰。非 一法不形。 佛淨

法門 閒光 逆十惡之人 來說此十六依正妙觀 以爲發起。致其母韋提希・請佛降臨。願離娑婆・願生淨土。于是世尊放眉 根・皆得臨終往生之不思議奇特大法門。特示病行・作大逆惡。囚父禁母 有大士・名阿闍世。以大慈悲・欲佛開示仗佛慈力・捨穢取淨。普令上中下 妄受生死 常住・尙不可稱。生穢輪迴・豈復能立。此實生佛本具之理體・無上菩提之 法源也。此理生佛平等・無有高下。但以眾生在迷・日用不知。雖具法身 聲。亦得蒙佛慈力・帶業往生。誠可謂轉凡成聖之大鑪韛・暢佛本懷之大 返妄歸真 徧示諸佛淨妙國土。其母唯願生極樂國·又請眾生得生方法 其力用超出一代時教之上。若如來不開此法 。雖處寂光・妄見穢惡。以故如來垂慈・廣說諸經。 臨命終時 ・復本心性 0 但能依教修行 0 ・地獄相現。受知識教・稱念佛名。或滿十聲・或止 然自力斷惑 · 無一不滿所願 現生證道 。中下根人・ 則末法芸芸眾生 0 非但善人如是 普令一切眾 末由成辦 0 因茲如 ・誰能 0 即 。 爱 生

持佛號 于非道 其母神超淨域· 妙 久客。未生極樂・已是極樂之嘉賓。智海居士劉朝侍・宿有靈根・篤修淨業 相濟 闍世王・交相贊助。特現惡逆・成就厭離。殆與兩土世尊・砧錘相成・鍛淬 土・以穢以苦・折伏而發遣。一 出離苦海乎。是知釋迦彌陀・乘大願輪・興慈運悲・度脱眾生。一則示居穢 身作閨範 0 因讀此經・觸發孝思。念母夫人張氏・守節撫孤・孝事翁姑。德鎮坤維 生佛究竟不二爲體。若能於此直下信去・則其人雖未出娑婆・已非娑婆之 堪追鍾王・因請恭寫・石印施送。普令見聞 0 ・以求往生・未極致力。由是發心・流布此經。 通達佛道 逆一順・以爲末世眾生究竟得度之化儀。其爲利益・難盡讚揚 。篤信因果・長持十齋。淨業正因・頗已具足。惜於生信發願 業謝塵勞。蓮開九品之花・佛授一生之記。須知此經 。非久證法身者・孰能爲之。此經以是心作佛・是心是佛 則示居淨土・以淨以樂・攝受而鈞陶。而阿 ·同植淨因。以此功德 陶玉耕居士・筆法超 。 行 · 專

彌陀・無量壽二經。乃如來於一代通途教理以外・所立之特別法門。如阿 伽

陀藥・萬病總治。故無論業之輕重・惑之厚薄。但能信願念佛・無一不獲往

生。如摩尼珠・隨意雨寶。故但能都攝六根・淨念相繼

。待至業盡情空

妙如是。其有欲上薦先亡・下濟羣品。令一切人・不廢本分職業・各得現生 佛雙亡時 則一切法門· 河沙妙義 ・無不融會貫通於自心矣。淨土法門 其

出離生死輪迴者・可不汲汲從事於此法門乎哉。

佛光月報序

佛光者・十法界凡聖生佛・即心本具之智體也。 此體靈明洞徹 • 湛寂常恆

不生不滅・無始無終。豎窮三際・而三際由之坐斷。横徧十方・而十方以之

相 消融。謂之爲空・則萬德圓彰。謂之爲有・則一塵不立。即一切法・離一切 在凡不減 在聖不增 雖則五眼莫能覰 四辯莫能宣 而復法法承他力

七〇二

指示眾生本具心性・令其返迷歸悟・復本還元而已。然眾生機有淺深・迷有 字。心性無染 界眾生。因妄有生・因生有滅。生滅名妄・滅妄名真。是稱如來無上菩提 眾生・皆具如來智慧德相。但以妄想執著・不能證得。若離妄想・ 造業・由業感苦・致令生死輪迴・了無已時。以常住之真心・受生滅之幻報 厚薄。不假種種言教開導・種種法門對治。則迷雲障于性空・何由令其一一 及大涅槃・二轉依號。盤山云・心月孤圓・光吞萬象。光非照境・境亦不存 法可得。以故我釋迦世尊・示成佛道・徹證佛光時。歎曰・奇哉奇哉・ 。心境俱亡・復是何物。潙山云・靈光獨耀 0 譬如醉見屋轉・屋實不轉。迷謂方移・方實不移。全屬妄業所現・了無實 處處得逢渠。但由眾生從未悟故。不但不得受用・反承此不思議力・起惑 自然智 ・無礙智・則得現前。楞嚴云・妙性圓明・離諸名相・本來無有世 · 本自圓成 0 但離妄念・即如如佛。是知佛祖種種言教 ・迥脱根塵。體露真常・不拘文 則一 無非 切智 切

之勝因 慈大悲・實屬至極無加矣。及至大教東來・宏法大士・各專一門。或禪或講 根・若聖若凡 末世眾生 人天權小・皆是一乘。客作賤人・實長者子。普授三根之記・大暢出世本懷 道之近緣 共。俾宿根成熟一類大機・同證真常・誕登覺岸。復以鈍根眾生・未能得益 徹見心月也哉。以故如來最初成道・演大華嚴。直談界外大法・不與權小所 ・就路還家。佛之本懷・祕而不宣。迨至法華會上・開權顯實・開迹顯本 與最初華嚴・始終互暎。可謂一 或律或密 遂爲循循善誘・隨機演説。或以五戒十善・攝彼人天二乘・令其種入佛道 0 或以四諦十二因緣六度萬行・ ・根機陋劣・斷惑證真 。始自阿含・以迄般若。莫不曲順根性・而爲宣說。令其漸次增進 如城四門・就近而入。 ・同于現生・出此娑婆・生彼極樂・以漸證夫無量光壽。其深 ・實乏其人。 大事因緣 如藥萬品 攝彼聲聞緣覺菩薩三乘・令其得證佛 · 全體咐囑 以故特開淨土一門・俾上中下 對證方服 ·了無餘蘊矣 0 如諸部之各司其 。又以 0

印光法師文鈔卷三 序

佛光月報序

七〇四

地覺 陀藥 講演 通・法法悉備。不過從入手處論・有如是名目耳。至於淨土一法・則如阿伽 著迹者甚多 四十八名。又思此段不思議光明 而護法居士 國 一摩地 有能 |八年・由性蓮退居・委令住持。因念華嚴一經・乃如來根本法輪。遂竭力 然此光明・人人本具・個個不無。而衣裏之珠・模中之像・達本者雖有 贊襄郅治 ・以冀若幽若顯一切眾生・同得發起一乘善根。時經三年・講圓 ・爲因 萬病總治 :遇者・何勝慶幸。維揚長生寺可端和尙・宿植德本・久參禪講 親證圓通 地心 • 忍令同具此光者・多皆長處暗室・不得受用。反承此普照法界 感其至誠 。如六根之互相爲用・輔弼一身。雖則各宗一法・實則法法咸 。及至其極 。如摩尼寶珠・隨意雨寶 0 切功徳・ 0 又祈續講 ·則因該果海 河沙妙義 • **徧照法界** ・以培人才。 · 果徹因源 。不假外求 。若能都攝六根・淨念相繼 0 固屬如來神通道力・ 因開華嚴大學院 0 法門之妙 悉現自心 0 0 窮劫難宣 良由以果 學生額定 福慧莊嚴 。則得 —部 。于民

印光法師文鈔卷三 序 佛光月報序

凡我同倫・幸各諦信。

隨緣記載・以資觀感。雖則真俗並詮・淺深俱備。而粗言及細語・皆歸第 業。生死輪迴之苦・因果報應之微。與夫高人哲士之嘉言懿行・著述講章 固一切人之所同具。無量光壽之實證・須待往生西方・面見彌陀・蒙佛授記 義。固當仁者見之謂之仁・智者見之謂之智。以爲入佛封疆之前導・豁發心 名曰佛光者・以一念心性・佛如眾生如・一如無二如故。凡如來施化之因緣 圓融。寂而常照・故為無量光。照而常寂・故為無量壽。無量光壽之理體 光之勝緣。倘閱者能知自心原是佛心・則知佛光即是心光。而此心光・寂照 ・圓滿菩提以後・方能徹得。此華嚴歸宗・以十大願王・導歸極樂之深旨也 ・心性真常之實際。五戒十善之因果・戒殺放生之感應。世間善行・出世淨 不思議真常圓滿之光・而爲生死結業之本乎。於是擬於每月・出報一冊

募修雲谷禪師塔院序

儒釋 オ・ 期遠追宏猷 瞻仰其閟藏之塔。皆能令人生慚愧心・生景慕心。奮發大志・力修淨業。以 緬維得道高僧・於千百年後。或有見其肖像・讀其著述・經歷其棲遲之地・ 人也。 而於性相諸宗 三年・示生嘉善胥山懷氏。幼入法門・徹悟自性。平生所修・雖注重於禪 俾宗風丕振 僧與佛法同名三寶者・明雲谷禪師・即其人也。師乘宿願力・於弘治十 師滅於萬曆三年・建塔棲真寺側。至四十五年・憨山來禮其塔 使靈山泗水心法俱彰者・僧則憨山大師・俗則了凡袁公・爲最顯著之 ·振興法道 ·心法昭明 ・儒道心要・無不融會貫通。故能於禪教衰頹・儒道晦昧之際 。俾如來慧命 0 其於世道人心・裨益良非淺鮮。 ·相續不斷。不致有負人與天地並稱三 其得其傳而融通 。見其

塔院岑寂・一僧獨奉香火。因屬沈定凡居士・修葺莊嚴・并置長生田

久遠之計。迄今已三百餘年矣。今則基址尚在・垣屋無存。致令古德遺跡

人無知者。近來世道人心・日趨日下。邪見熾盛・正法衰微。若不表彰古德

懿範・何由使宗風丕振・魔外歸降乎哉。嘉興郿般音居士憂之・擬重建塔院

自我立 刊布行實。庶出家在家一切人等・咸知古德芳風。從茲挽回造化之權 。斷除煩惱之障・佛從心現。則可繼憨山了凡之志・以慰雲谷禪師之 命

命自我立・福自己求之訓・篤實做去。則五福三多・悉萃厥身。天災人禍 心也。但以工程浩大・獨力難成。不得不求助于諸大檀越。果能人各依雲谷

絕聞于世。 有幸之福也。因述所以・祈共贊襄云爾 功勳罔測・利益莫名。諒不至惜彼五家所共之財・而不作此三生

西方公據重刻序

浄土法門・乃如來普度眾生之特別法門也。如來愍念眾生・示成正覺 印光法師文鈔卷三 序 雲谷塔院序 西方公據序 俯順

羣機・循循善誘。大根則令其悟一心之具造・斷惑證真・以直趣菩提 皆須斷盡見思二惑·方可出離分段生死。倘惑業未盡·道果未成 則令其明三世之因果・趨吉避凶・為入道方便。雖則大小不同・權實各異 不能自主 雨則化 0 0 久經生死・進少退多。以道不勝習・業能縛心。譬如坯器未燒 雖有前功・了無所益。以是之故・特開一信願念佛 。縱有修持 求生淨 1、小器

界。此則以己信願・感佛慈悲。感應道交・必蒙攝受。迨至臨欲命終・即得 法門。俾若凡若聖・或智或愚・同以深信切願・持佛名號・求生西方極樂世

茲親炙彌陀 隨佛往生也。 既往生已 參隨海眾 ・則已斷惑者・速證無生。具業縛者・亦登不退 熏陶化育・染如來之妙香 0 障盡智圓・復本具之佛 。從

諸應驗 天地父母 性。俯提劣機 以爲一書・名之爲西方公據。公據者 ・莫能喻其萬一也。昔人欲令同人・各修淨業。因輯經呪文說 ・曲護初心 ・唯此法門・最爲第一。如來之恩・廣大周至 ・即把柄 與左券之謂也 雖

應驗 德。阿彌陀佛・現在說法。光壽無量・誓願洪深。諸上善人・俱會一處。皆 緣之一日在。翹冀何極 佛 能受持阿彌陀經 彼孝思・敍其大致。倘閱者果不以余言爲非・當必有親證此無上甚深大事因 廣爲流布 來大暢本懷之圓詮也。有緣遇者・即是多善根因緣。爲防疑退・更輯諸圖說 因該果海・果徹因源。法門之妙・妙無以加。乃華嚴末後歸宗之一著・實如 切眾生・皆具佛性。是心作佛・是心是佛。由其以果地覺・爲因地心 以修此信願念佛之多善根福德因緣妙行而生。其有不真爲生死・發菩提心 以深信願 普利眾生。 。徐子肇珩・宿具靈根 ・持佛名號。以期近則登不退地・遠則圓成佛道者乎。 以期現生父母 釋迦本師・得無上道 ・則知極樂世界・無有眾苦・但受諸樂。依正莊嚴 • 歷劫怨親 。痛二親之早逝・冀九蓮以同登。因發心 。無不資始乎此 。 普及法界眾生・ 共入彌陀願海 。而歸極乎此 而况六方諸 種種功 0 良以 重 0 余嘉 故得 刻

樂淸虹橋淨土堂序

則可即了 教即是七信。初果初信・尚有生死。四果七信・方能了脱。而天台智者大師 以一切法門· 浄土法門者・乃如來普度眾生・最圓頓直捷廣大簡易之法門也。何以言之。 東坡・草堂清復爲魯公・尙未至甚。而海印信爲朱防禦女・已屬不堪。雁蕩僧 明心見性爲究竟也。夫明心見性・乃大徹大悟也。若最上上根・ 本地・實不可測。而臨終只說登五品者・深慮末世不致力于斷惑證真 惑乎。斷見惑・即證初果。若約圓教・則是初信。斷思惑盡・即證四果。圓 ・示居五品 。否則縱悉知未來如圓澤者・尙不免重復受生耳。至于五祖戒再作 ・雖則所悟與佛同儔・圓伏五住煩惱・而見惑尚未曾斷。然大師 皆須斷盡見思二惑·方了生死。而斷見惑如斷四十里流 即悟即證 ·唯以 ・况思

爲秦檜

則誠堪憐憫矣。甚矣・自力斷惑證真了生脫死之難也。如來一代所

有狂人 所說 眾生・普令現生頓出輪迴之特別法門也。須知淨土法門・正攝上上根人。 生脱死 門・但具真信切願・以至誠心・持佛名號・求生西方。無論惑業之厚薄。工 說通途修證教理・雖法門種種不一・絕無具足惑業・能了生死者。唯淨土一 薄・業力深厚 爲華嚴 以此普勸華藏海眾。是知回向往生淨土一法・乃圓滿佛果之末後一著也。世 以善財已證等覺・普賢菩薩猶令以十大願王・回向往生・以期圓滿佛果。且 夫之淺深・皆于臨終・仗佛慈力・帶業往生。既往生已・即已超凡入聖・了 遇善知識· 何可不信 · 不審教理 。從茲漸次進修 生成佛之成始成終第一法門也。 教以念佛。或滿十聲・或止數聲・隨即命終・尚得往生。觀經 ・何能即生。不知眾生心性・與佛無二 0 彼尙往生・况吾人雖有罪業 0 以愚夫愚婦皆能修習・遂謂之爲小乘而藐視之。不知其 • 即得親證無生・ 亦有愚人 以至圓滿佛果耳 雖少工夫 知見狹劣。謂己工夫淺 。五逆十惡・將墮地獄 0 校彼五逆十惡 此如來悲愍劣機 是

印光法師文鈔卷三 序

虹橋淨土堂序

萌。 常日 從。居士因自捨地基 小災・亦三小災之現象耳。况復邪說縱橫・知識稀少。欲聞正法・頗不易得 十聲數聲・當復高超多多矣。何可自暴自棄・以致失此無上利益也。如來稱 聞其說法 倡而勸導焉。其殆以贊天地之化育・代佛揚化・以爲天職歟。而一方之人・ 直捷廣大簡易・超出一代通途教理之上。非宿有善根・決難信受奉行也。吾 此淨土法門爲難信之法者・以其下手易而成功高・用力少而得效速。其圓頓 。有胡天僕居士者・發菩提心・篤修淨業。又欲同人・各得此益・遂極力提 香積廚・應供堂・居然從地涌出一大道場 蓋紀實也。今之時・是何時也・乃刀兵飢饉疾疫俱集之時也。 ・九界眾生離斯門・上不能圓成佛道。十方諸佛捨此法・下不能普利羣 ・感此時世・不禁厭苦欣樂之心・油然而生。遂一 ·兼募善信。建念佛堂 。念佛堂甚寬大・中供西方三聖 ・開放生池・及藏經樓 倡眾和 雖未至三 ·功德堂 靡不服

立像

・以冀行人平時注目・臨終即蒙接引也。正中設說法座・聽者周圍坐

印光法師文鈔卷三 序 虹橋淨土堂序

日夕馨香以禱祝者。願諸上善人・各垂慈憫・則幸甚幸甚。

佛號資彼慧命。其所建設・皆極周至・約用一萬六千餘圓・已得落成。擬于 雖至千人・亦不迫窄。俾四遠來者・不至有向隅之歎。藏經樓則備請各處所 者同發此心・則俗美風淳・民康物阜・轉五濁惡世・爲清淨蓮邦矣。此光之 祈爲序引 堯曆八月十五日開講・實爲末法不得多見之事。令其友張雲雷・致書于光・ 而後已 斷難經久不歸。故特設香積廚・應供堂・以令念佛聽法之人・各得心滿意足 其位・以期存則福增壽永・歿則直登蓮邦。而既轉法輪・若不輔以食輪・則 刻之經・以供發心者受持而研究焉。功德堂則備書所出功德之數目・又統設 并胡居士之心行・及各種之布置・大概書之・以期閱者咸效法焉 。放生池則取彼將烹之輩・畜之法堂之前。不獨活彼色身・兼以經聲 ・冀發起信心而擴充焉。因將如來所說通途特別兩種法門之所以然 。倘見聞

阿彌陀經直解序

生西方 此 劫前 常沈溺于生死苦海中・莫之能出。靜言思之・能不愧死。釋迦彌陀・有鑑于 何所底止。縱令往劫曾聞佛法・依教修行。但以自力劣弱・不能斷惑・依舊 吾人一念心性・直下與釋迦彌陀・無二無別。而釋迦彌陀・已成佛道于塵點 以煩惱惑業 三經 咸沐法澤也。由是諸善知識・各為註釋・若揭日月于中天・固已無義不顯 特開一信願念佛法門・令其仗佛慈力・横超三界。俾上中下根 而 。 又復數數示生・ 數數示滅 。可謂真慈大悲・至極無加矣 阿彌陀經・言簡義周 ·無力斷除。直至今日 ·易于受持 ・以行化導 ·尚在生死輪迴中 。其教起因緣・修持法則・具見于淨土 0 故古人列爲日誦 。欲令吾人・繼其芳蹤。而吾人 ·頭出頭沒 欲其家喻戶曉 ・渺不知其 ·同得往

無機不攝矣

但初機之人・或以文深義奥・難于領會。王顯江居士・特爲

作一方便・取要解等註之義・以顯淺之語言述之・名爲直解・兼附淨土種種 疑問。其己立立人・自利利他之心・可謂誠且摯矣。顯蔭法師序之・欲令一

切同人・各生真信・老實念佛。因命光再序・遂書此以告閱者云。

十三經讀本序

地無私之至理・吾人本具之良知。初非有奇特玄妙・不可企及者。雖夫婦之 萬邦・豎傳萬世・有識皆遵・無思不服。雖有聖人復生・不能另立一法。亦 天地以陰陽二氣・化生萬物。聖人以誠明一致・教育羣萌・其爲道也・橫布 舜耳。若能遵而行之・則人入聖域・世復大同矣。其世道陵夷・人心澆瀉者 愚・可以與知與能。以人同此心・心同此理。堯舜與人同・而人皆可以爲堯 周公孔孟・繼天立極・教化萬世・格致誠正修齊治平之大經大法也。悉本天 不過發揮誠明之道・令其徹底圓彰・和盤托出而已。十三經者・二帝三王・

印光法師文鈔卷三

序

彌陀經直解序 十三經讀本序

七一六

說一起 同志 博取名利之藝。其誣衊聖人・悖逆天地也至矣。由是讀書之人・心不知書義 行廢舟・欲不隕越沈溺・其可得乎。施子肇曾・懼斯道之滅沒也。乃與二三 倡共妻共産・而欲實行之。唯恐斯民之不與禽獸相同・而綱常倫理之有礙于 爲狂妄 己也。致令天災人禍・相繼降作。國運危岌・民不聊生。譬如夜行廢燭・海 ・由于儒者不知道在躬行・一向逐末。舉凡克己復禮・閑邪存誠之義・置之 而考其居心行事・則絕無此等氣分。直同優人演劇・苦樂悲歡・做得逼真 實則毫與自己不相干涉也。此弊一肇·漸至變本加厲。于是有天姿者·習 而身不行書道。其作文也・則發揮孝弟忠信禮義廉恥之道・直使一絲不漏 。唯以記誦詞章・擬爲進取應世之資。是殆以聖人參贊化育之道・作爲 特立國學專修館 ・恥循堯舜周孔之迹・而欲駕而上之。竟至廢棄聖經・競作新書。邪 羣相附和。遂致一班惡劣小人。欲逞自己劫掠姦淫之心·汲汲然提 聚有志斯道者・ 俾其專精研究・身體力行

孝 經 • 地載之功相等。彼廢經者・是何異欲廢天地覆載而自立乎。其不知事務也甚 之本心・羣聖之薪傳・俱得大明・以之繼往聖而開來學。其爲功也・與天覆 循序而說耳。是知四書者・乃易書詩周禮儀禮禮記之注疏。而俾其道大明 唯大學則次第言之・而曲盡其致。中庸論語孟子・俱皆發揮此義・但不次第 三經所發明之道・乃格致誠正修齊治平之道。闡發格致誠正修齊治平之要・ 殊。不妨以己之所見・爲諸仁智者告。亦未必非窮經希聖之一助也。竊謂十 麗天・有目皆睹。何待粥飯庸僧・特爲標指乎哉。雖然・道固無二・仁智見 成・己與唐子各爲序・述其所以。又令予序。予惟十三經之在世・如日月之 心可謂誠且摯矣。施子遂即刻之・以期布之學宮・俾各讀誦而修習焉。刻既 之簡當者・彙而集之。而復一一抉其微言・標其大義・附于諸經之後・其用 得・而廣傳焉。唐子文治・十餘年來・殫精斯道。搜集十三經善本・擇其注 乃推其實行之效。春秋三傳・乃示其遵違得失之證驗也。由是而吾人

印光法師文鈔卷三 序

十三經讀本序

步 · 矣。循是而求之・舉凡希聖希賢・治國親民之道・無不一一若指諸掌。不欲 之所訓釋・乃諸經之總注・俾若文若義・悉得解了也。是則爾雅爲解義之初 子·以予言爲然也否乎。然此且就世間法論·切勿謬謂併出世間法論也。至 此理故也。 徹底圓彰。而讀書之能事・只在此幾希間了耳。何等直捷・何等痛快。方知 矣。然欲明其明德・必須格去人欲之物・令淨盡無餘。庶即心本具之真知 其明徳・又爲從凡至聖・以人合天之關鍵 希聖希賢則已・若欲希聖希賢・則聖賢之道・自備具于吾心與吾身矣。爾雅 人皆可以爲堯舜・夫婦之愚可以與知與能・乃真語實語。以人同此心・心同 而四書乃成始成終之總持法門也。再進而談其要義 欲世道人心・ 轉亂爲治・反澆爲淳 。能明其明德・則內聖外王之道備 · 捨此則無術矣 ·則明德爲本。 。不知施子唐 而明

屬至屬

以大乘入楞伽經斷食肉品誠神勿享肉食序 / 鷹智容居士生代 安 徽 黟 縣 作縣

出離 楞伽經斷食肉品・敬化尊鑪 以肉 謹按佛説・一切眾生・皆有佛性。由罪福因緣 惑・圓成佛道。以故如來勅諸弟子・戒殺放生・勿食諸肉。然世俗迷情・皆 父母兄弟妻妾兒女朋友親戚。無不各于未來・得聞佛法・修戒定慧・斷盡煩 人與尊神將來之惡報更深更大·而不易消滅也。是故特將如來所說之大乘入 又恐尊神未能詳知所以・或生瞋怒・降以災禍 肉過患 以期斷盡貪瞋癡 ·食爲敬。而不知其爲自他同種惡因·致使將來必受惡報也。我今已知食 是則我與水陸飛行・及六道一切眾生・從無始來・無不各各彼此互爲 豈忍任彼一鄉之人 。及生信發願 。庶得上體佛慈・下憫愚誠 · 猶執迷情 ・念阿彌陀佛 • 以罪業因緣之肉食 ·輪迴六道。若不力修戒定慧 0 求生西方極樂世界 則郷人之迷情更甚・致令郷 愛惜物命・不享肉 ·累及尊神乎 則無 由

t

感尊神聰明正直・好生惡殺之德。庶可普扇慈風・以培菩提之道本。挽回劫 食之祭。凡用素者・則錫之福祉。若用葷者・即示以禍殃。俾一鄉之人・同

運・共樂太平于無既也。懇祈明察・則郷人幸甚・國家幸甚。

揚州普照寺同戒錄序

戒生定・因定發慧・是則名爲三無漏學。此之三法・如鼎三足・若缺其一 慧破惑。由是得以斷五住之煩惑・證三德之秘藏・故楞嚴云・攝心為戒・因 舉大綱・維戒定慧。良以入道之要・初則以戒執身・次則以定靜慮・次則以 如來大法・普被九界。上聖下凡・咸資鈞陶。雖法門無量・不易悉說。而總 便難安立。說雖有三・修在一心。以無定慧之戒・非出世之戒。無戒慧之定

非出世之定。無戒定之慧・非出世之慧。是知三法・原是一法。其言三者

以宏揚者注重爲名・及修證者獲益判義耳。梵網經云・我是已成佛・汝是

未成佛 止。 年已八十有四矣。因示寂以歸極樂・與海會聖眾・親炙彌陀・ 幸。即于是冬・開壇傳戒 緒元年也。于是徧募十方・開拓基址・佛殿經樓・傑出雲表。凡叢林所應有 持該處之太陽宮小廟。老人察知可建道場・宿緣有在・故允許之・係前清光 弱冠・即厭塵勞・遂詣峨眉山華嚴頂出家・隨即受戒乃窮參力究 大覺已・真是諸佛子。可知戒之一法・統攝諸法。以故知識宏揚・學人修持 ・三啓講筵。而常時修持・雖則禪淨並行・而尤注重于淨土焉。迨至八年・ 欲徧參諸方・開擴心地。經過揚州・爲徐凝門外永鎮鄉紳士所識 莫不以戒爲先務焉 行道所必需者・ 至二十二年・ · 常作如是信 入都請經・得蒙俞允・及勅賜普照禪寺之額 無不備足。從茲冬禪夏講・大啓度門。善士達人 · 普照寺者·道清老人所開建也·老人示生四川 ・戒品已具足。又云・眾生受佛戒・即入諸佛位・位同 • 以報國恩而祈民福·迄至民國五年· 以證無量光壽 • 實爲莫大之 凡五開戒壇 ・發明心要 ·悉相依 ·遂請住 ・年方

印光法師文鈔卷三 序

耳。其得法剃度弟子甚多。爰有高足・厥名稻香・與光誼屬莫逆。欲于今冬

・出龕起塔。乃于九月十五日開壇傳戒。至冬月初八日圓滿・以報佛恩而資

師冥福・命光序之。光惟佛教以孝爲本。故梵網經云・孝名爲戒・亦名制止 ・孝順至道之法。夫依教奉行・方名爲孝。能依教奉行・則凡佛所得者・己

爲出格之丈夫・作如來之真子矣。若不依教奉行・則袈裟之下・失卻人身・ 悉得之。則即煩惱以成菩提・即生死以證涅槃。方可不辜佛化・不負己靈

三途惡道之苦・窮劫未能盡說也。願受戒諸佛子・各各勉旃。

重刻水陸儀軌序

甚矣佛恩之廣大周徧・而靡有孑遺也。初成正覺・說所證法。唯法身大士・

循善誘。待其已斷煩惑・已證真諦。然後種種彈斥・多方淘汰。俾其發大心 方能與會。人天凡小・不見不聞。于是爲實施權・寢大用小。隨順機宜・循

諸法 始 成佛道・莫不由此以普度羣萌也。迨至法流震旦・梁武御極。由高僧以示夢 其偏顯業繫凡夫・頓獲勝益・作如是說。實則十方三世諸佛・莫不由此以圓 其仗佛慈力・往生西方。 作佛之記・大暢出世本懷。從茲了知一切法皆是佛法・一切人皆是佛子・而 使彼承三密力 無復自甘退屈矣。又復憫彼自力劣弱 而冀佛果・不住法而修萬行。迨至根機已熟・則會三歸一 頓脫業縛 俾普度夫含靈 則以無量威德陀羅尼而爲發起 與作法諸師・各皆竭誠盡敬・則其利益・非言所宣 無不備舉而讀誦修持焉 。亦兼令三乘聖人・速證菩提。然人能宏道・誠堪契真。若請法 滅盡無餘 。因茲備覽大藏 其有罪障深重 。然此二法・乃凡聖同修之道・成始成終之法 0 故其法門廣大 ・製斯儀軌。自是流通・以至今日。 。究其纂述 ・現在斷難了脫者・ ・定業不易轉移者・大啓秘密觀道 • • 利益宏深。不但使六道凡夫 與其修設 特開淨土法門・令 開權顯實。普授 • 譬如春回大地 則 代時教 溯其原 。以以 切

印光法師文鈔卷三

序

重刻水陸儀軌序

七二四

草木悉荷生成。月麗中天・江河各現影象。故得當人業消智朗・障盡福崇 先亡咸生淨土・所求無不遂意・並令歷劫怨親・法界含識。同沐三寶恩光・

共結菩提緣種。若齋主不誠・則出錢之功德有限・慢法之罪過無窮。僧眾不 誠・則是鼓橐籥以爲經・交杵碓以成禮。于三寶龍天降臨之際・作鹵莽滅裂

塞責之行。其不至罪山聳峙・福海乾枯・生罹災禍・死受譴謫者・

何可得也

輪裕公等。募資重刻・以冀廣傳。令光紀其年月・故略述原委・與其利弊。 此書杭垣之板・模糊不堪。天童雖刻・亦難普及。以故維揚萬壽寂公・ 寶

俾從事此法者・唯得其益・不受其損。則佛聖歡喜・而福慧二俱增崇矣。願

修法者・其各勉旃

新昌大佛寺修築放生池募綠序

儒者以忠恕胞與爲懷・必須推己及人・以至于物・方有實際。釋氏以慈悲濟

物類 眾生・從無始來・在生死中・輪迴不息。靡不曾作父母兄弟男女眷屬・乃至 業俱生・窮未來際。又况多劫以來・更互相生。既無道力以行救濟・忍使彼 朋友親愛侍使。易生而受鳥獸等身・云何于中取之而食 受刀砧極苦・我享口舌滋味乎。入楞伽經・世尊種種呵斥食肉。有云・一切 食肉之人・爲真羅剎。雖欲不令人殺而食之・不可得也。故楞嚴經云・以人 戮時。則身不能敵・口不能言。中心憂懼痛楚・方知食肉之事・爲大罪過。 不同 食羊・羊死爲人・人死爲羊。如是乃至十生之類・死死生生・互來相噉 風・不知其非。致使生生世世・展轉互殺・了無已時・可不哀哉。須知人與 度爲事・是故憫諸物類・皆具佛性・欲行救援。無奈世人殺生食肉・相習成 0 快心樂意・謂爲福報。而不知其福力一盡・業報現前。墮彼異類・受人殺 ・致使今生形質靈蠢各異 ・同此血肉之軀・同此靈知之性・同生于天地之間。但以彼此宿世罪福 。以我之強 ・陵彼之弱。以彼之肉・充我之腹 。 凡諸殺生食肉之人 惡

表前繼 龍華三會 禮佛者 業漁捕 所造者。相好莊嚴・妙無倫媲。其寺爲天台西門・智者大師入滅于此。蓋欲 須外築圍牆 外之池・亦爲漁捕之所矣。馬契慈居士・景仰僧護僧淑僧祐智者之懿德殊勛 有偷捕者・則立即得禍・至唐時尙然。而世遠人亡・法殘禁弛。遂致大佛寺 名曰石城 若念及此 欲使同人・以及水陸空行一切物類・各得同盡天年・同生極樂・將來同預 皆好生去殺 震山 ・乃以襯施・買漁簄一所・ 觸境舒懷・上契佛心。庶可消除天災人禍・于不知不覺中。但以工 特呈憲嚴禁 即 ·當即怵然驚 ・以防盜捕。又須造橋修閘・建亭鋪路 ・後輔龍華也。大師一生・隨機說法・尤加意于放生。以台民多 。遂各捨江溪簄梁・六十三所・周三百餘里・俱作放生法 山鑿龕・及彌勒百尺大像。乃齊僧護・僧淑・梁僧祐・三師 ・勒其示文・冀垂永久 憬然悟。寧可自殺·不能殺一切物矣。新昌有山 爲放生池 0 兼爲彼講金光明經。 。然池久未濬 。豈特徒壯觀瞻 淤泥 充滿 漁者聞法 · 實欲來 池

物我不二之心。共出淨資・俾觀厥成。則其功德・當與十方虛空同一壽量矣 程浩大・不得不募諸十方官紳士商・以及一切善信也。懇祈各發生佛同體

金山江天禪寺傳戒序

束縛 生定・因定發慧・是則名爲三無漏學。須知此三・全三即一・全一即三。切 眾生一向背覺合塵・輪迴六道。今欲令其背塵合覺・趣證涅槃。非戒則無所 執心不起。道共戒 勿謂戒但爲定慧之初基而已。夫律儀戒・執身不作・可云初基。而定共戒 本具之真心何由徹證・幻起之妄惑何由頓滅。故楞嚴經云・攝心爲戒・因戒 如來以三事故・令正法久住于世・眾生悉蒙度脱。三事者何・曰戒定慧。以 ・必至隨逐塵境・起惑造業。非定則識波奔湧 ・業盡情空・真窮智朗。豈非定慧之全體大用 ·何能心無所住。非慧則 何得唯以

印光法師文鈔卷三 序

大佛寺修放生池序 金山傳戒序

初基視之。 然定共道共・仍以律儀而爲本體。但以持戒功用淺深・而立此二

或藐視之。而真戒真定真慧・無從聞熏而冀及・爲可歎也。然如來法道・弘 名・初非另有所說之戒本也。世人每以律儀爲論・致不知如來制戒大意者・ 主于止作持犯 範十界。雖宏法大士・各皆三學圓明・而門庭建立・不能不各有專主。或專 ・則爲律・或專主于修觀講演 ·則爲教 。或專主于參究本來

外見本體也。非謂宗迥出于教理之外也。試觀世尊拈華・迦葉微笑。本地風 以期徹悟 ・則爲宗。宗名教外別傳・律教乃教內真傳 。言別傳者・欲人于言

人徹見自己父母未生前本來面目。况如來金口所說之無上妙法·便非此華

光・徹底顯露。了此・則盡世間所有形形色色・無非世尊所拈之華・無不令

騎牛覓牛・了不可得。若知直下便是・則多少現成・多少省力。 便不能令人親見本來面目耶。而人天百萬 如演若之頭・無端狂走。衣裏之珠・枉受貧窮。爲可哀也。須知律也教 ・縦見世尊拈華・悉皆罔措 由其迷不知 :。亦如 印光法師文鈔卷三 序 金山傳戒序

揮其義 若我住世 德・而鄙見所領會者・撮略言之・以塞其責 古今來于此大徹大悟者・不勝其多。每間數年・必傳一次戒。一以繼先佛之 也宗也・此三者全・方可以續佛慧命・傳佛法道。若或有缺・則便不足以上 後・當尊重珍敬波羅提木叉。如闇遇明・貧人得寶。當知此則是汝等大師 洪規・一以作後學之懿範 無不圓名滿 證無上菩提・下度一切含識矣。盧舍那佛・以戒爲體。以惡無不盡名淨・善 至山觀光・二公款留信宿 0 心語身三 便難如願矣。金山・乃千餘年來著名道場。雖圓修三法・而注重于宗。故 。光于宗于教于律・皆無心得 無異此也。 ·決難分裂 0 斷惡修善 梵網經云 • 決難互缺。否則隻翼難飛・單輪莫運。 乃止作二持也。是律爲佛身・教爲佛語・宗爲佛心 0 。退居青公・住持融公・乃數十年前之故友 因言此間常住・明年擬欲傳戒 ・我是已成佛 · 何能不負所囑 。遺教經云・汝等比邱・于我滅 ·汝是未成佛 。但以平日聞于佛祖古 。命光作序・ 若能如是信 欲自利利他 ?。今秋 以發

戒品已具足。又云・眾生受佛戒・即入諸佛位・位同大覺已・真是諸佛子

願受戒諸佛子・各各自知自己本來是佛。以迷背故・反承此佛性功德力・輪

王體 迴六道・受諸極苦。如轉輪聖王・夢作蟻子・尋羶階下・自顧藐小。而牀上 ・依舊不失。及至于醒・方知幻作蟻形・了無實體。一切眾生・亦復如

爲一 是 0 佛本是而未成・業原無而妄造。高推聖境 雄猛丈夫・豈不大可哀哉。倘受戒諸佛子・各各勉旃 · 甘處凡愚 。則不但不負融公 o 獨讓釋迦世尊

傳戒一番婆心・亦可慰如來出世制戒一番聖意也已。

鄞縣至邱隘鎭修諸橋梁徵信錄序

如矢。書有王道蕩蕩。王道平平之說。或謂此喻王政・非指道路。試思道路 隨之斷絕矣 民生日用 ・事務多端。若不假往來交通・彼此酬酢・ 。以故平治道路·爲治國平天下之急務。故詩有周道如砥 則一事無成・而生計將 ・其直

復舊觀 閱即成廢物 誠信。又欲閱者知其利益・祈光發揮其義・以冀人各注意也。然此種書冊・ 得證圓通。是知三教聖賢・莫不注重于此也。鄞縣以東・至邱隘鎮・二十餘 不修・不但發號施令・有所阻滯。而農工商賈之往來・與夫供職效力之諸務 里。所過大小各橋・共有二十三道。修建日久・漸見殘傷。邑人馬元培先生 與修數百年崎嶇之路・造千萬人往來之橋乎。而且持地菩薩・以平治道路 護國佑民之正神 與譏誹王政相同乎。故周禮設司險候人之職・而月令有修治道路之令。至于 二千有奇。今工已告竣・擬將橋工・并諸捐欵・備錄一冊・排印奉送・以昭 ・皆不能速得遂意也。况既無如矢如砥・蕩蕩平平之事・而用喻王政・不幾 于去年發心重修 間有水大河深者・則傍設石欄・以防昏夜及無目者之顛墜 乃附以陸廷爕先生所註之朱柏廬先生治家格言 • 如東嶽文昌二帝・則皆示之。不觀修橋補路・行人有益 。因募諸善信・各出淨資。乃親董其役・俾一一 并老申報所載 橋樑· 。共用洋 各

印光法師文鈔卷三 序

修橋梁徴信錄序

1 = -

之常識精華。此二種・皆可以作渉身處世治家教子・與夫小而泛應曲當 ・大

而希聖希賢之法。其用心可謂誠且摯矣。願諸閱者·同以此心爲心則其利益

·豈思議可能及哉。

淨土釋疑序

佛法深廣 末世眾生・業障深厚・善根淺薄・心智狹劣・壽命短促。加以知識希少 各取飽腹而已。如來出世・隨順眾生・爲其說法・各令得益・亦復如是 正信心・自可隨己分量・各得其益。譬如修羅香象・及諸蚊蝱・飲于大海 · 猶如大海 ・博地凡夫・孰能窮源徹底・一 口吸盡・ 雖然・倘能生 . 魔 。 mi

外縱橫 將墮阿鼻地獄之流・尚可以仗十念之力・徑蒙佛慈・接引往生。噫。如來大 淨土一法 。修餘法門・欲于現生斷惑證真・了生脫死・誠爲甚難希有之事 ・專仗佛力。以故不論斷證・唯恃信願。信願若具・雖罪大惡極 。 唯

有所出 也。 慈普度・一物不遺。唯此一法・最爲周摯。由是西天東土・菩薩祖師 法則易・以其智能明理・無復疑惑。如良馬見鞭影而馳・嘉禾得甘霖而茂也 之所說。其入人深而感人切・比專用己語・當不啻相倍蓰矣 段・復用己意・纂集成文。何不直用己文而爲發揮。蓋欲閱者知此所說 疑。詞約而精・理深而著。俾閱者無疑不釋・有義咸服。從茲欲不生信發願 以成裘・猶采華而作蜜 普引同 鉅儒・莫不以此自利利他。所有著述・極其廣博。欲探究原委者・固非易易 ・持佛名號・求生西方・不可得也。然居士既能集前人之單詞隻句・一節 爲下愚說法亦易 渭漁居士林師尚者・宿根深厚・篤修淨業。殫精研究・歷有年所。擬欲 0 雖是己所纂集 悉生淨土。故于淨土經論著述中・摘其要義 以其心無成見・直下信行 · 實爲經論語錄 。確對時機· 特申妙辯 • 及諸著述中 。如甘之可以受和・白之可以 。共成五十七篇・名爲淨土釋 ·佛菩薩祖師諸善知識 · 湊集成文 。竊謂爲上智說 。若集腋 ·高僧 · 皆

受采也。唯爲中人說法・實爲不易。以其知識繁雜・邪正不分。每每以凡情

殫精竭誠・勦滅疑惑之健將矣。然羣疑既釋・尙須奮發大志・一念單提 測聖智·以俗見會真理。雖說者種種開導·彼仍復展轉懷疑。是故設爲問答 ・至五十七次之多。直使狐疑淨盡・佛理昭彰。知好歹者・悉皆遵行。可謂 。則

嘉賓 劫賊 阿彌陀佛于寂光淨土之中・豈非所謂雄猛大丈夫哉。願見聞者・咸皆勉旃 心王由佛力而常時惺惺・煩惱劫賊・容身無地・欲不歸降・不可得也。 (。如是則上不孤于佛化・下不負于己靈。盡未來際・與海會大眾・親炙 既歸佛化。則雖未出娑婆・已非娑婆之久客。未生極樂・即爲極樂之 煩惱

觀無量壽佛經善導疏重刻序

佛愍自己與一切眾生・爲三苦八苦無量諸苦之所逼惱。因思所受苦報・由于 人生世閒 ・禍福吉凶・相爲倚伏。其所得損益・唯在人之善用心與否耳 印光法師文鈔卷三 序 觀經善導疏序

導師 瞋癡 嚴 極樂。并爲未來眾生・求往生法。世尊乃爲說此觀想西方依報國土・種種莊 闍世王・乘大願輪・示爲惡逆・囚父禁母・而爲發起。其母厭離娑婆・願生 逆十惡 從茲漸修・必至圓滿菩提而後已。此經中品戒善世福 海眾・同願往生也。凡則仗佛慈力・帶業往生・即已超凡入聖・證不退位 道之大法也。以聖則自力具足・兼仗佛力・故所證入・最爲直捷・以故華藏 令一切若凡若聖・同于現生・往生極樂・或頓或漸・證無生忍・以至圓成佛 之所致也。是知貪瞋癡之煩惑・乃一切眾生之大怨家。從茲以戒定慧・斷貪 過去惡業所感。而所造惡業・由于當六塵境・不了如幻如化・妄起貪瞋癡心 。正報佛及觀音勢至· 。復還本具之天真・以成無上之覺道。然則三苦八苦等・實三世諸佛之 而一切眾生永離眾苦·常享諸樂之無上良緣也。觀無量壽佛經者 ·將墮地獄 ·由稱佛名 相好威德。以及九品往生·若因若果之十六觀 遂得往生也。如是力用 · 下品作眾惡業 最爲洪深。蓋由 • 及五 普 ЗП

故汝等心想佛時・是心即是三十二相・八十隨形好。是心作佛・是心是佛 第八像觀之首・發明宗要云・諸佛如來・是法界身・入一切眾生心想中 。 是 0

諸佛正徧知海・從心想生。是故應當一心繫念・諦觀彼佛。須知法身入想

理實甚深 。心作心是・事本平常。平常非常・甚深非深。能圓悟者・方名達

・特爲劣機眾生・開方便門・令觀丈六八尺之相

。第十六觀

人。于第十三觀

又令惡業重者

·直稱名號。由稱名故

・即得往生。是知相有大小・

佛本是

。觀不能作・稱即獲益。于此諦思・知持名一法・最爲第一。末世行人 •

清涼 欲得現生決定往生者・可弗寶此持名一行哉。溯自經傳此方・智者・善導

・靈芝・各爲著疏 由東瀛請來此經善導疏 。後唯智者一疏獨傳 ·無量壽經慧遠疏 ・餘三皆佚。清光緒間 ・往生論曇鸞註。皆久佚之 ·楊仁山

居士

法寶 趣人。及其趣入・不言諦觀・而諦觀自然了了矣。可謂契理契機・善說法要 ·俱爲刻行 。善導疏不用諦觀等深意・但直釋經文・俾中下根人・易于

彌陀化身・殆非虛傳。蓮宗二祖・萬代景仰。奈傳之久遠・錯訛甚多・因

息心詳校而重刻焉

京師第 監獄於甲子元旦普說三歸五戒序

子謂人皆可以爲堯舜・堯舜之道・孝弟而已矣。是知不能行孝弟爲堯舜 則誰不願斷幻妄之惑業・復本具之心性。而高推聖境・甘處凡愚。執性廢修 著・復成智慧德相 唯在一心・初非二物。迷之則全智慧德相・變成妄想執著。悟之則全妄想執 想・則一切智・自然智・無礙智・則得現前。須知智慧德相・與妄想執著 哉奇哉・一切眾生・具有如來智慧德相。但以妄想執著・而不證得。若離妄 眾生心性・與佛無異。但以迷而未悟・故長作眾生。華嚴如來出現品云・奇 以凡濫聖之謬見・皆無由生矣。書云・唯聖罔念作狂・唯狂克念作聖 。喻如水結成冰· 冰融成水。相雖有殊・體本無二。了此 · 孟

印光法師文鈔卷三 序

觀經善導疏序

京師監獄說歸戒序

蚩之氓・誤干憲網・繫閉監獄。豈徒拘束以苦其身心・實欲改過自新 能克念作聖・與不能復智慧德相作佛者。皆自暴自棄・不肯勉力而爲之流也 證之菩提道本。 耳。京師爲天下首區・故監獄之囚犯甚多 再進而爲受菩薩大戒・令其理事圓融 飲酒之五戒。則日用云爲・無諸罪咎・而身心清淨矣。其有發大菩提心者・ 自可返妄歸真・背塵合覺。次則令受不殺生・不偷盜・不邪淫・不妄語・不 霧以障蔽乎哉。又以循循善誘・俾小機者先受三歸・以身心歸依佛法僧寶 同大覺已・真是諸佛子。其要全在令人徹了自己介爾一念心性・即是如來所 是已成佛・常作如是信・戒品已具足。又曰・眾生受佛戒・即入諸佛位。位 如來初成正覺・普爲一切凡聖・說梵網經菩薩戒。有曰・汝是當成佛・我 既知是已・孰肯隨煩惱染緣・使畢竟清淨之性天・被迷雲惑 ・福慧并進・以期上求佛道・下化眾生 /。乃以世風日下・兵歉迭遭 ·仍作 致蚩

循法之良民也。又以近來佛學昌明・政府特請通法高僧・常至監獄・開示佛

器。以惡因緣 質直同糞穢 冀其以歸戒制伏身心。以致妄想執著・復歸烏有。而智慧德相 法無益于國・有害于世者・皆未見顏色之瞽論・以自誤誤人也。而本監獄官 鏡・妍醜自知 佛行。欲了生脱死・非信願念佛・求生西方・決難如願。彼等一 法要義・并生死輪迴之因・與了生脱死之法 ٥ 0 能隨人意・普雨眾寶 因發大心・特請具德法師。于甲子元旦・普與監獄諸佛子・說三歸五戒 即 汝諸佛子 無論若何之頑金鈍鐵・一入其中・悉皆鑄成微妙莊嚴之佛菩薩像。彼謂佛 囚犯爲法侶 幸遇智人 初以干犯國法 。如遇慈母・慶幸莫喻。經聲佛號・無閒晨昏。即監獄爲道場 成善因緣 o 實爲從古未聞之奇事 (。由其不識・擲之圊廁。不但無雨寶之功能。而且體 知是至寶 。非多劫深種善根 • 致囚監獄 0 從廁取出 0 0 繼由得聞佛法 足徵佛法實爲烹凡鑄聖之大冶洪鑪 · 萬無如此儌倖。譬如摩尼寶珠 。俾彼各知心是佛心・自當行遵 種 種洗滌 便染佛香 兼用香熏 。徹體圓彰矣 聞·如臨 • 成佛法 俾還 明

印光法師文鈔卷三 序 京師監獄說歸戒序 金剛經石刻序

原質。然後懸之高幢・便可放大光明・隨人所需・而雨眾寶。佛視一切眾生

棄捨之心。而復常伺其機・爲之啓迪・令得度脱。以其所重在佛性・一切惡 ・亦復如是。以故縱令迷之及極・行諸惡逆。如歌利王割截身體・終無一念

不負己靈 。而政府・監獄官・說法說戒僧之一番厚意・亦不虛設矣。尙期

逆罪垢・皆不暇計慮故也。汝等若能了知如上所說若法若喻・自可不孤佛化

努力進修・則幸甚幸甚。

金剛經石刻序

滅度者。以眾生心性・當體即是無餘涅槃・但以迷故・幻成生死輪迴之相 類・我皆令入無餘涅槃而滅度之・如是滅度無量無數無邊眾生・實無眾生得 金剛經者・發菩提心・行菩薩道・上求下化之標準也。其曰所有一切眾生之

如醉見屋轉・屋實不轉・迷謂方移・方實不移・不過特爲點示・俾復本原而

印光法師文鈔卷三 序 金剛經石刻序 佛遺教經解序

持者・福德果報不可思議也。由是古今名人・多皆受持及以書寫・蓋欲以自 實爲三世諸佛上成佛道・下化眾生・萬行圓修・一法不立之無上妙法・故受 令不住色聲香味觸法而行布施・布施乃六度萬行之首・經文簡略・但舉布施 公之志事 地高超 覺之道 之凡情聖見・徹證常樂我淨之真如妙心・無所住而生心・無所得而作佛矣 爲例耳 所謂但盡凡情・別無聖解・但有去翳法。別無與明法者・此之謂也。又 。若能不住相而行六度萬行・則三輪體空・一道清淨・圓離我人眾壽 。展轉以普覺斯民也。唐烋子居士天爵者・宿有慧根・篤信佛法・見 書法精妙・特寫此經・刻石流通・以續歐陽詢・趙孟頫 其爲功德・唯佛能知。因不揣固陋・略述經義 ・以告閱者・ · 董其昌諸 庶可

佛遺教經解刊布流通序

同登覺岸云

往劫 提道 迦如· 甚矣佛恩之廣大周徧而無有窮盡也。何以言之・以一切眾生・皆有佛性 智慧・以及四攝・萬行乎哉。及至惑業淨盡・福慧圓滿・徹證自心・成無上 千世界 忍能忍。其行施也・國城妻子・頭目髓腦・悉無吝惜。故法華經云・我見釋 劫・行菩薩道・但有利益・無不興崇・六度齊修・一法不著・難行能行・難 同出生死輪迴 可作佛。但以迷而未悟・遂致反以佛性功德之力・妄於六塵境中・起貪瞋癡 造殺盜淫・由惑造業・由業受報・久經常劫・輪迴六道・了無出期 來 知此事已 只此布施一行・尚非劫壽能宣 ・乃至無有如芥子許 ・於無量劫・難行苦行・積功累德・求菩提道・未曾止息・觀三千大 · 同成無上覺道 ・即發大願・欲令盡虚空徧法界一切眾生・ • 非是菩薩捨身命處 ・同入無餘涅槃。從茲普爲法界眾生・久經長 ・况其餘之持戒・忍辱 · 爲眾生故 同悟本具佛性 • 精進 然後乃得成菩 禪定 。佛於 皆

道・普為眾生・說所證法・直欲同皆得己所得。但以上根者少・中下者多・

蒙佛接引也 帶業往生。如船拯溺・無所揀擇。唯信願不真・而心行與佛相背者・則不能 達道 故復隨機施教・令其隨分得益耳。及其一期事畢・即入涅槃・猶復不捨大悲 求往生西方極樂世界。無論工夫之淺深・惑業之輕重・無不蒙佛攝受・令其 往生西方。則上根者速成佛道・中下者永出輪迴・實爲三世諸佛普度眾生之 因茲特開一信願念佛求生淨土法門・俾彼若聖若凡・或愚或智・同於現生・ 劣弱・不能現生即出生死。縱有修持・而煩惑未斷・再一受生・迷失者多。 十九年・談經三百餘會・固已無機不被・無法不周矣。又以中下根人・自力 所能及。譬如杲日・爲照世故・出沒無住。亦如船師・爲渡人故・往來不停 於他方世界・示成正覺・以行濟度。如是示生此界他方・固非算數譬喻之 且據此番出世・實爲周昭王二十六年。及至十九出家・三十成道 九界眾生速證佛果之妙法 佛之愍念眾生・前自無始 。以但具真信切願・志誠懇切持佛名號 後盡未來・上自等覺菩薩 ・下及六 · 說法四

道凡夫・無一人不在大悲誓願彌綸之中。譬如虚空・普含一切・森羅萬象 乃至天地・悉所包容。亦如日光・普照萬方・縱令生盲・畢世不見光相・然

誣民 亦承其光照・得以爲人。使無日光照燭・便無生活之緣・豈必親見光相者・ 方爲蒙恩乎 ·與生盲罵日 。彼世智辯聰者・以己拘墟之見・闢駁佛法 ·謂無光明者· 了無有異 一切外道 • 咸皆竊取佛經之義 謂其害聖道而惑世

0

•

也。猶如大海・潛行地中・其滋潤流露・則爲萬川・而萬川無一不歸大海 ・以爲己有。更有竊取佛法之名・以行邪法。是知佛法・乃世出世閒之道本

說法教化 彼謗佛者 ・故佛不惜如是之勤勞・即不信受・亦不忍棄捨耳 ・非謗佛也・乃自謗耳。以彼一念心性・全體是佛・佛始如是種種 冀彼捨迷歸悟・親證自己本具佛性而已 。以佛性最爲尊重 。使眾生不具佛性 · 最

人・彼天龍八部・三乘賢聖・ 不堪作佛・佛徒爲如是施設・則佛便是世閒第一癡人・亦是世間第一大妄語 尚肯護衞依止乎哉。佛遺教經者・佛 期事畢

戒相 遺教 遺 爲佛弟子者・宜何如努力修持・以不負所望。未知佛法者・宜何如感激依行 慈親將欲去世・爲兒女計・亦不能如是周到・誠可謂吐心吐膽・一字一血 博 心光・竟局爲出家小乘之訓誨・可不痛哉。陳沅蓀居士・宿根深厚 加勉勖乎。以向來論者・多以爲小機所見・及偏誡比邱・遂致普照九法界之 尊重珍敬波羅提木叉・如尊重珍敬世尊・若能如是尊重佛戒・則是常在佛側 以不孤深恩。其語雖似專指比邱・其意固已彌綸九法界一切聖凡・靡有孑 臨入涅槃・誡勖弟子・及一切眾生之遺囑也。其文雖略・其義甚周 無少間隔也 0 初 以圓人受法 ・及持戒之益・不持之損 · 不被三賢十聖 以未見佛經 0 故曰當知此則是汝等大師・若我住世・無異此也。次下所說 無法不圓・佛以一音演說法 亦復追隨韓歐程朱之迹 。而佛視一 · 及制心節食等法 切眾生・猶如一子・當此入滅之時 近數年來 ·眾生隨類各得解 • 反復叮嚀・ 翻閱佛經 無微不入 • 豈此煌煌 ·學問淵 始知 何忍不 。其令 0 雖

印光法師文鈔卷三

序

佛遺教經解序

往生西方一法・以爲恃怙・豈必盡人捨俗出家・方爲佛弟子乎。彼謂佛爲棄 即已 若欲出世・亦不須另起鑪竈・但依佛之言教・對治煩惱習氣・俾其淨盡無餘 心・殘忍已極・使無如來三世因果之說・則人之得正命而死者・蓋亦鮮矣。 之 爲聖中之聖・天中之天・所有言教・與儒教無不符合。用之於治世・則格致 倫理・背聖教者・皆因未讀佛經・不知佛之所以爲佛・而妄以己之凡夫臆見 居士・及此土之傅大士・李長者・龐居士等。即力有不及・又有仗佛慈力 而心非・陽爲善而陰作惡者・皆由不知心通法界・與三世因果之故耳。使知 知三世因果・雖日撻而求其不格物致知誠意正心修身・不可得也。世之口是 誠正修齊治平之道・方能究竟圓滿。以儒教只言現生・佛教圓談三世・倘真 故致爲己之安富尊榮・直使殺人盈城盈野・而毫不憫恤・噫嘻痛哉末世人 縱極下劣・亦不肯於明鏡之前・現諸醜相・以自貽伊戚也。惜世多不知 。雖身在俗境・不妨斷惑證真・了生脫死・以進趣佛果。 如西天之維摩

武斷耳。由是言之・欲究竟挽回世道人心・非提倡昌明佛法不可。 而感佛之

之・以期政學商農各界人士・同得沐佛慈恩。不致所具佛性・常相迷失・而 恩・至深且切・又欲一切同人・同知佛恩・取佛遺教經・以普通註釋之法解

永劫沈淪生死苦海・莫之能出也。將欲刊行・ **祈光作序。光以佛之深恩厚德**

自知之・故不詳述 ·人多未知·以故略爲敍述。至於經中所說 。吾固昔受韓歐之毒・而作一闡提者・幸未生陷・而入佛法。唯恐與我相 。嗚乎・佛之爲眾生・雖天地父母・不能喻其恆河沙數之 一番大慈悲爲眾生心・ 関者當

同之人・未必如我幸遇佛法・故作此剖心瀝血之語・以期各各上不孤於佛恩

下不負於己靈也已

心經淺解序

詳夫心佛眾生・三無差別 。此無差別之心・虚靈洞徹・澄湛常恆 · 即寂即照

印光法師文鈔卷三 序

佛遺教經解序 心經淺解序

隨學 義不可思議 法圓彰 蘊皆空・度一切苦厄二句・復爲全經樞鈕。再約而言之・只一照字・便可法 十法界因果事理・無不畢具。以約攝博・了無遺義。若約而言之・則照見五 法・有六百卷之多 離言之道 超文字關・故語言未可形容。然如來智慧廣大・於法自在・善以語言 非有非空・絕凡聖之名稱・無生滅之幻象。離心緣相・故情識莫能測度 誠可謂如來之心印・大藏之綱宗 法法圓泯・彰泯俱寂・一真徹露 ・而且廣略適宜・各臻圓妙 功德亦不可思議 0 此經略約心法 。故古今受持讀誦者・徧於宇中 ・以明佛法眾生法。文僅二百六十字・而 。是以大般若廣約佛法眾生法 ・九法界之指南 ・觀自在菩薩先得我心・ ・大般若之關鍵 · 著述宏揚者 我等可不 ・以明心 · 顯示

詞唯

取通方

大雲先載

悅可眾心

書冊續刊

永傳徧界

光庸劣無能

· 措 多難勝數也。然理雖甚深・詞須逗機・否則契理而不契機矣。季和駱居士

知見圓融・文字活潑・欲令初機易知・故爲白話淺解・說理極其透徹

勝景仰・謹爲序引・以助流通云。

觀世音菩薩本迹感應頌緣起序

證・ 事理 世出世閒一切諸法・皆由時節因緣而爲發起・故古德云・時節若至・其理自 景仰・何可久撤講筵・忍令法道寂寞乎。祈師發心講經・我等當爲籌備道糧 周孝懷・陳錫周・三居士來山見訪。王周謂普陀爲觀音大士聖道場地・中外 志・見其所載・皆屬道場廢興・以及種種尋常等事。至于觀音大士往劫本迹 光曰・此事頗不容易・若照舊例・則文人皆能爲之。若將大士往劫本迹修 誠然誠然。光以庸劣百無一能·寄食普陀山法雨寺三十二年。昔閱普陀 及此方感應事迹・ 以固陋力辭。錫周則曰・山志久未修・板已模糊・師若肯修・我當刊刻 ・以及此方感應因緣・悉皆闕略・不禁令人長歎。民國六年・王采臣 略敍大端。令閱者咸知大士恩周沙界・慈濟無疆

心之根本要務・急宜重修。光以陶公護法心切・救世情殷・即令普濟法雨兩 公來山・謂山志流通・令人由信向而改惡遷善・返妄歸真・實爲挽回世道 案。此公學貫儒釋・筆超儕伍・必能發揮大士之慈悲心迹也。次年徐蔚如居 識・目等盲瞽・尙須懺悔一二年・待其業消智朗・障盡目明時・當不惜身命 眾生之大慈悲父母・而與娑婆眾生・因緣最深也。然光以宿業 0 從茲發起正信・身心歸依・近獲人天之福・遠證菩提之果者・非徧閱大藏 八年春間 與尋常山經水志何異。何以顯普陀爲大士應化道場・又何以顯大士爲法界 備考羣籍不可。若不發揮大士本迹感應諸事理・則成遺主志賓・捨本逐末 勉令成就。如其業重・不能感格・當往江西・求黎端甫居士・代爲了此公 以文鈔印行・致不加詳察者・謬謂之爲知識・從茲信札來往・日不暇給 ・端甫歸西・先所發心・竟成空談。十一年春・定海知事陶在東 · 致令心無知

·懇請陶公親任其事

陶公以公事無暇

乃託邑紳王雅三君任之。

深慈大悲者・略知梗概。從茲赧然愧怍・勃然奮發曰・吾人之心・與大士之 本迹感應・非佛莫知。此數卷頌・不過大地一塵・大海一滴・令不知大士之 天下後世・倘與志合行・則不易廣播矣。然大士從無量劫來・分身塵剎 頌文三卷・經證一卷・共三百七十餘頁・於夏初寄來。頌中義意 近二萬言・而復逐聯注其義意・俾閱者悉知所以・又節錄各經・以爲明證 此之際遇乎。許君乃備搜藏典・及諸羣籍・時經二載・稿方告竣。述成頌文 逆 耶 陶公升於杭縣・猶復魚雁往還・商酌其事・若非宿受大士付囑・其能如是也 茲不復贅 • 0 初於修志議成之後・未及一月・江西彭澤許止淨居士來訪・一 無二無別 光敍昔衷曲・遂以大士頌見託・彼即允許・若非大士冥垂加被 0 光昔本欲冠於山志之首・今以卷帙繁多・特爲別行 而大士圓成佛道 ・久經長劫・又以悲心無盡 ・不離寂光・垂 ·許序已陳 兼欲徧布 見即成莫 何 有 · 其

切事宜・外有陶公・山有開如退居・商酌料理。光以無暇・絶不過問。次年

如

印光法師文鈔卷三

序

形九界・普現色身・度脱眾生。我輩從無量劫來・輪迴六道・其親蒙拔苦與

樂之恩者・不知凡幾。直至今日・尙爲凡夫・上負大士拯拔深恩・下負自己

本具佛性・靜言思之・能不愧死・彼既丈夫我亦爾・不應自輕而退屈。由是 翻轉凡情・追隨聖迹・克己復禮 ・閑邪存誠・敦行世善・兼修淨業・久而久

之・與之俱化。上焉者・即於現生斷惑證真・了生脫死・下焉者迨至臨終 在斯乎。所願見者聞者・同發景仰大士之心・而勉力修習・則幸甚幸甚 人禍永滅・雨暘時而天眷常臨矣。陶公所謂挽回世道人心之根本要務者・其 仗佛慈力・往生西方。能如是・則人人敦禮義・各各識因果・自然干戈息而

教觀綱宗釋義紀重刻序

教海汪洋・莫測深廣・不有指歸・則茫無所趣。故陳隋智者大師・以五時八 判釋如來一代所說之法・具顯如來出世本懷・唯欲一切眾生同成覺道

印光法師文鈔卷三字 教觀綱宗釋義紀序

權益・則開權顯實・同歸祕藏・方知心佛眾生・三無差別・佛如眾生如・一 但以機器不一・故復隨順機宜・循循善誘・爲實施權・以接引之。待其既得 然。學者得此・既省心力・又易領會・何幸如之。維揚寶輪寺法裕長老・欲 爲如來心印。喻如畫龍點睛・立刻飛騰・以法無自性・轉變由心・圓人受法 如無二如之所以然。可謂揭佛日於中天・普照大地・授窮子以果覺・令紹法 重刻廣布・命光校其訛字・兼爲敍其緣起云。 來心印。即人天權小等法・與治世語言・資生業等・無不皆是第一義諦・皆 王。但以文繁・不便初機・蕅益大師・撮取要義・述爲綱宗・有意義隱晦者 ・直授摩尼寶珠・從茲不但了知不生不滅・非有非空之圓妙第一義諦・爲如 ・復爲略釋。俾學者悉知如來說教之意・與夫稟教修觀之法・有如導歸寶山 無法不圓故也。默庵法師・以釋義分註各條之下・又爲之紀・以期一目了

上海世界居士林佛學研究叢書序

生死者 爲之者。故古今首出庶物之出格高人・莫不以此自行化他・以期天下太平・ 槃者・何可勝數。其緒餘尙能移風易俗・勝殘去殺・使民日遷善而不知所以 矣。自後諸菩薩祖師善知識 滅度之・實無眾生得滅度者。噫・如來度生之心・可謂慈悲至極 方復本具佛性・方離凡聖生佛之差別名相・所謂令一切眾生悉入無餘涅槃而 下開示悟入佛之知見・其有鈍根・亦得漸次熏陶而得悟入。待其悟證及極 作佛也・ 眾生與佛・心性一如・了無優劣・及與增減。而佛則安住寂光・眾生則輪迴 下作眾生津梁。自法流東震・千數百年・其悟自性而斷煩惑 是故示生世間 以悟與未悟·及順修逆修之所致也。 ・示成正覺・隨機演說一切權實法門。俾彼利根・直 ・各各潛修密證・宏闡發揮・以上續如來慧命 如來知眾生之皆具佛性 ・出生死以證 ·無以復加 ・皆堪 涅

指見月之益。從茲相續刊布・以揚佛日之光・俾一切同人・同悟本具之天真 萬國咸寧也。及清咸同間・屢遭兵劫・法運遂衰。自後罷除舉業・天姿高者 藏海眾・等覺菩薩・尚以十大願王・回向往生・况末世之學者乎。是知淨土 極・欲為救援・捨昌明佛學・莫能為力・故咸以提倡佛學為急務。而研究會 以淺顯之語言發揮之・俾初機之人・易於領會・庶無扞格不入之苦・悉獲因 以期推廣。今又繼出佛學研究叢書・若起信論・楞嚴經指要・取深經奧論 全國樞要之地・其居士林諸居士・欲普布佛化・於講經念佛外・季出林刊 法門・乃十方三世一切諸佛・上成佛道・下化眾生之成始成終法門。上海爲 迴也。良以末法眾生・自力微弱・匪仗佛力・決難即生解脱。華嚴會上・華 持・及與發揮。而又注重於淨土法門・以期悟與未悟・同於現生出離生死輪 於各種科學外・兼研佛學・知爲世間唯一無二之道。當此世道人心陷溺已 居士林・隨處建立。法不執一 ・隨人之機・或禪或教・或顯或密・而爲修

印光法師文鈔卷三

序

佛學研究叢書序

七五六

佛性・庶不負如來出世之一大事因緣・而挽回世道人心・亦以是爲根據。凡

金剛經功德頌序

我同倫・各宜資助以期徧界流通云。

行布施等・故能度脱一切眾生・而不見能度之我・與所度之法・并受度之眾 修六度萬行之軌範也。以經文簡略·但舉布施爲例耳。若不住色聲香味觸法 究竟到彼岸・皆得稱爲波羅蜜也。金剛一經・乃發菩提心・行菩薩道者・徧 無般若・不能究竟到彼岸・不得稱爲波羅蜜。而般若如心・五度如身・般若 六度者・菩薩上求佛道・下化眾生之要法也。然五度如盲・般若如導・五度 無五度・亦不能究竟到彼岸・不得稱爲波羅蜜。若二者具足・則一一度皆可

生相。則四相不生・三心叵得・無所住而生心・無所得而作佛矣。以故受持

四三二一句者・功德難宣・持全經者・又何待言。是以自古至今・人多讀誦

今載籍中感應事迹・分類述頌・其友劉契淨・又爲之注。庶閱者咸知義理淵 云・一切諸佛・及諸佛阿耨多羅三藐三菩提法・皆從此經出。倘能發至誠恭 深・功德廣大・生正信心・勉效前修・隨其功行淺深・亦得種種利益也。經 罪業・增長善根・轉禍爲福・即愚成智者・更加多多也。許止淨居士・取古 其頓悟自性・徹證唯心・生預聖流・沒歸安養者・何可勝數。其次則消除

儒釋一貫序

敬心受持・便墮未來諸佛數中・願各勉旃。

溯流窮源 順各別也。由是儒釋聖人・各出於世・爲之倡導・俾一切眾生・返迷歸悟 性而得建立故。然復生佛迥殊・凡聖各異者・以因地之迷悟不同・修德之逆 儒釋無二道・生佛無兩心。以人同此心・心同此理・一切有情・皆稟真如佛 以復其固有之本性而已。其發揮雖有權實淺深·方便究竟之不同

七五八

本覺 覺者 分證 依本覺理・起真實修・對治煩惱習氣・令其消滅無餘之妙智・乃修德也。不 尊・方證始本合一之最上乘極致・方了修因證果之大丈夫事業。故華嚴云・ 功極・性德圓彰・福慧具足・煩惑淨盡・圓滿菩提・歸無所得・方爲大覺世 本覺凡聖平等 承佛性力・造生死業・一切在迷眾生・與不依正覺・錯亂修習者・皆是也。 而其所宗之理體 切眾生 無礙智 **省而不證得者・逆本覺而起惑造業・輪迴六道也。離妄想則智慧現前者・** ・迷背本覺・隨境生著・起貪瞋癡・造殺盜淫・認苦爲樂・以迷爲德 ・始覺・不覺。本覺者・即生佛同具之天真佛性 ・歴外凡以至等覺・皆在始覺範圍之內。由等覺再破一分無明・則修德 ・皆具如來智慧・但因妄想執著・而不證得 則得現前。所言一切眾生皆具如來智慧者・ 無有高下。始覺工夫淺深不一 ・所修之工夫・其大端固無二致也。佛以覺爲體・而覺有 ・悟證地位各別・由名字以至 ・乃性德也。始覺者・ ・若離妄想・則 本覺理性也。因妄想 一切智

欲之物・自能徹底顯現吾心固有之良知與真知也。故曰其發揮淺深雖有不同 物・即妄想執著。格物・即離妄想執著。離妄想執著・則得如來智慧・格人 對釋・則誠也・ 人之大經大法 念・心之所思・皆歸於真誠無妄・中正不偏矣。此孔子上承二帝三王修己治 必須主敬存誠・克己復禮・則人欲之物・自無容身之地・而本有真知・全體 顯露・如浮雲去而天日昭彰矣。真知既顯・則主權得而使者聽命・故意之所 人欲之物 明即明明徳之明・實則誠明・即明明徳也。明徳乃吾心固有之真知 其理體 印光法師文鈔卷三 序 工夫固無二致也。是以古今聰明睿智之人・多皆學佛・因得佛之心 ・遂錮蔽而不能顯現・如雲遮天日・了不見其光相。欲明其明德 ・撮要述此・以作天下後世希聖希賢之洪範焉。若與佛法互證 明徳也・乃本覺性徳也。明也・ 儒釋一貫序 明明德也·乃始覺修德也 ・由有

順本覺而修・漸至圓成佛果也。了此性修理致・則不肯自甘下愚・亦不敢以

凡濫聖・而必以實修實悟・以期於實證而後已。儒者以誠明爲本・誠即明德

明心性・若不得佛法爲之先導・則自己之心・尙非所知・况聖人之心法乎。 法・而儒先聖人之心法・方得悉其底裏。以儒者多主於事相・而不致力於悟 間聖人・只教人盡義盡分・佛則詳示其盡與不盡之善惡果報。盡義盡分・只 法。舉凡倫常修齊之道・固已極力宏闡・毫善弗遺・遇父言慈・遇子言孝・ 離因果。欲迥超乎因果之外・非圓成佛道不可・未成佛而輒撥因果・則永失 道・眾生常淪生死・皆不出因果之外・唯當人一念心性・不屬因果・而復不 善報而懼惡果・雖不欲盡義盡分・亦必勉力盡義盡分矣。此如來普被上中下 能教於上智・不能普攝下愚。若知盡與不盡之善惡果報・縱屬下愚・亦必歆 兄友弟恭・夫倡婦隨・隨己職分・各盡其義・固與世間聖人所說無異 以故泥迹之儒・多闢佛教・以不知佛法雖爲出世間法・亦復具足世間一切善 三根之法 ・每有徒矜知解・不務真修・妄謂因果爲小乘者・不知如來圓成佛 。然世

其善因善果・常造惡因・常受惡果・盡未來際・了無止期・可不哀哉。世固

之謬・輯彼古人破斥謬見・合會儒釋・種種言論・以成一書・名之曰儒釋 矣・此儒釋一貫之大旨也。弘道居士・宿植德本・篤信佛乘・ 決可明自本心。既得明自本心・則儒先聖人之心・如來之心・亦可因之俱知 先聖之法・幾於無可救藥・凡屬憂世之士・莫不以提倡佛學爲急務。以佛學 且大有發明儒教・輔弼儒教之至理極功焉。近來世道人心・陷溺已極・廢棄 者・與受其說之毒者・悉皆深知吾佛教人之所以然・不但與儒教不相悖戾 皆足以瞎眾生之智眼・斷如來之慧命。古大人憂之・乘機破斥・使彼作此說 門庭知見太重・不能著實格物致知・以致意有所不誠・心有所不正也。其言 貫。將欲排印流通・以光最初曾受韓歐之毒・而作|闡提者・因命作序・ 注重明心・與因果報應。果能明自本心・決不至於錯因果。果能不錯因果 以冀其自愍愍他 ・自傷傷他 以冀其仗此因緣・以消滅其謗法之罪咎・以 **憫拘墟者所見**

有不知佛而妄闢佛者・亦有頗知佛而陰服膺以陽爲闢駁者・此種行爲・皆由

七六二

克遂夫往生之素志也。以故不揣固陋・勉述所知・雖文不足觀・而意有所本 。則古人垂訓之至意・弘道輯錄之深心・皆可大暢本懷・不至徒設。而世道 。願見聞者・同皆格物致知・以自明其明德・棄離妄想執著・同證如來智慧

近代往生傳序

人心之轉迴・於茲可以預斷矣・何幸如之。

甚深・喻如寶鏡・經劫蒙塵・欲令即復本體・徹現照天照地之光・固非一日 得・如取家寶・受用現成・故其證也・乃極易事。無奈眾生久居生死・迷惑 如來調御眾生・隨機說法・雖權實頓漸不同・大小偏圓有異・要皆爲令眾生 二日揩磨之功所能得也。如來悲心真切・知眾生自力親證之難・縱有修持・ ・親證即心本具之真如佛性而已。然此佛性・即心本具・非從外來・不自他

以煩惑未斷・再一受生・不免復迷・從茲墮落者多・超昇者少・故特開一信

修飾· 來・修此法者・又復何限。况近世人士・眼界大開・密修顯化者・實繁有徒 專持佛號以求生・至於臨終正念昭彰・現諸瑞相以往生者・又何能悉知之而 山・當時羣賢畢集・後世眾哲咸宗・從茲緇素四眾・或圓修萬行以回向 經萬論 死・超凡入聖者・其難易蓋天淵懸殊也。故自華嚴導歸・祇園演說以來・千 願念佛法門・俾彼若聖若凡・同於現生・仗佛慈力・往生西方。則已證聖者 加紀錄・而令其湮沒乎哉。餘姚楊慧鏡居士・特爲搜輯・命名爲近代往生傳 悉見之也。彼往生集・淨土聖賢錄所載・特千萬分中之一二耳。而百數十年 ・其意蓋欲爲後之輯往生傳者・備底稿耳・故其稱呼名字・悉本原文・不加 ・速登上地・未斷惑者・永出輪迴、校彼唯仗自力・修戒定慧・以迄了生脱 其中以煩惑心・契如來智・出娑婆苦・預蓮池會者・當比前更多。豈可不 以歸畫一・但取傳信・不任撰修之功。已得若干傳・將欲刊布・祈予 ·處處指歸 ・往聖前賢・人人趣向 。迨法流東震・遠公大師・倡於廬 · 或

印光法師文鈔卷三 序

往生傳序

作序。竊維修持法門・有二種不同・若仗自力修戒定慧・以迄斷惑證真・了

生脱死者・名爲通途法門。若具真信切願・持佛名號・以期仗佛慈力・往生 西方者・名爲特別法門。通途全仗自力・特別則自力佛力兼而有之。即有深

山水・必一筆一畫而漸成・特別如照山水・雖數十重蓊蔚峰巒・一 照俱了

修定慧斷惑之功・而無真信切願念佛求生・亦屬自力。今以喻明

· 通途如畫

徧達四大部洲。吾人既無立地成佛之資格·又無斷見惑任運不造惡業之實證 又通途如步行登程・強者日不過百十里・特別如乘轉輪聖王輪寶・一日即可 若不專修淨業・以期仗佛慈力・帶業往生・則恐盡未來際仍在三途六道中

受生受死・莫由出離也・可不哀哉。願我同人・咸生正信

慈悲道場懺法隨聞錄序俗稱梁皇懺

體本明淨・ 由無明故・煩惑遂生。煩惑既生・便成昏濁・而明淨

生佛心融・感應道交・消除歴劫之罪垢・開發本具之心光・其爲利益・莫能 懺以大菩提心爲本・從茲竭誠盡敬・外慕諸聖・披陳罪咎 竟以生天結其局哉 故於述成之時・郗氏特現天人妙莊嚴身・而爲致謝。使帝詳知淨宗・則其夫 僧・檢閱經文 之體・遂爲隱沒・實未嘗減損一絲毫也。欲令復本還元・非竭誠盡敬・恭對 人當必仗佛慈力・往生西方・高預海會・登不退地・又何得資此大法大心・ 如法華・光明 三寶・懺悔業障不可。諸大乘經・具有令懺悔之文・隨人所宗・述爲懺法 具宣。文雖顯淺・校比台宗注重理觀・不詳披陳罪相諸懺・爲能普被三根也 元配郗氏夫人 自昔以來 ・未有講與註者・蓋以文義顯豁 • ・淨土・大悲等。此之懺法・詳於披陳罪相者・以梁武帝爲度 ・述爲懺法・帝亦時運睿筆・發揮意致。惜帝未悉淨土法門・ 墮於蟒蛇之苦・兼欲一切人民同沾法利。特請誌公・并諸高 。後之禮懺者・悉當注意於回向往生・方獲究竟實益 無須講註 須知法無淺深・ · 內重己靈 ·故得 此

六六

希聖希賢之念・如飢如渴・油然而生。上慕諸聖・下重己靈・痛念我與諸佛 循委靡之習氣 遠凡 印・祈余作序。余惟修行之要・敬爲第一・人能主敬存誠・則一切凡情無由 講筵・躬爲繕寫・可謂見其子即知其父母・非是父母不生是子也。方子欲排 而起・本具聖智自然發現・凡一切人我是非・無明貢高・以及懶惰懈怠・ 隨爲記錄・又經寶靜・誠一・常靜・三師爲之輔弼・遂得成帙。其父母同預 所不睹 致所行與所學相悖。因發心講演・以期人各主敬存誠・洗心滌慮・戒慎乎其 不厭其詳・何獨於此法而忽之。觀宗諦公・以時當末法・人多不知自省・遂 取利人・律無玄義・以道宣律師之上根利智・尙須十次聽講・及其爲註 ・宿具靈根・雖出富室 ・恐懼乎其所不聞。學行相顧・必期於自立於無過之地而後已。方子 皆悉消滅 。而况恭對三寶・披陳往罪 一・頗好清修・每聆妙義 ·悉能領會 ・則慚愧・恐懼之心 0 此次聽講 則 因

同一心性・彼何以圓證三覺・我何以久輪六道。從茲改往修來・返迷歸悟

譬如摩尼寶珠・墮於圊廁・直下取出・屢次洗濯・俾復本淨。待至淨極

或有不得實益者・此隨聞錄之所宜普徧流通也。 則懸之高幢・必能隨意雨寶。此種大事因緣・若不發揮若文若義之意致・則

因果錄序

恤災賑饑・濟難扶危・戒殺放生・護惜物命・持齋吃素・誦經念佛・以期自 內而家庭・恪盡己分・外而交際・務益於人。以及種種善舉・悉皆奉行。若 神奪魄殛誅・及死後靈魂永墮三途惡道・受諸極苦・經百千劫・莫之能出者 影響。人雖至愚・斷無幸災樂禍・避吉趨凶・願一切同人斥名唾罵・天地鬼 因果報應者乃人事與天理或順或逆之影響也。故書曰・惠迪吉・從逆凶・惟 然其所作所為·多皆反其所願者何也。由世少通人·不提倡因果報應之道 而家襲陋習・唯知以自私自利相傳之所致也。間有所作所爲・順乎天理・

 六 六

他兼利・幽顯均益者・無不家門清吉・子孫興隆・富貴尊榮・令人景仰。歷 相攻撃・成千古未聞之殺劫。被殺者人固知其可慘・而殺人者之慘・當更酷 倡。致使賢者莫由樹淑世善民之極功・愚者悉皆懷弱肉強食之惡念・由茲互 世・及與子孫・未能詳言過去現在未來・輪迴六道三途之事・若不深研精思 積不善之家必有餘殃。莫不皆以因果報應之理示人。但以其言簡略・只說現 百祥・作不善降之百殃。與洪範五福六極之說。及易之積善之家必有餘慶・ 耶。因果之理・大發明實維佛經・而儒教經書・亦屢宣說。若書之作善降之 其人之神識・或上生天宮・或高超佛國・世間凡夫・又何能悉知之而悉見之 先代皆有利人利物・資幽資顯之懿行陰德焉。然此特凡眼所見之緒餘耳・而 觀傳記・凡賢哲挺生・功業傑出・或道傳羣聖之心・或德爲萬民之望者・其 或致當面錯過。兼以俗儒每欲各豎門庭・與佛競異・縱令知之・亦不肯提 惜世人不能悉知悉見。其可見者・若被人殺・若滅門絕祀・乃千萬

分之一二耳・其在三途所受之苦・則罄竹難書矣・可不悲夫。吾常曰・因果 者・世出世間聖人・平治天下・度脱眾生之大權也。即聖教昌明之世・若不

提倡因果・尙不能普令愚民潛息隱惡・悉使智者・大積陰功。况今世道人心

莫如之何・况其下焉者乎。無錫金居士昌・有見於此・特記錄近世・及現時 欲挽回狂瀾・若不以因果報應爲震聾發瞶之資・雖佛菩薩聖賢悉出於世・亦 ・壞至其極・廢棄聖經・推翻倫理・邪說橫流・載胥其溺。有心世道者・思

尙正而風俗淳淑・人禍息而天眷常臨。舉此競爭士類・同作羲皇上人。因序 各因果事・排印流布。冀人人各懷自利利人之心・以行己立立人之道。則習

其大意・以貢閱者。

生西金鑑序 後改作淨土清鐘

娑婆世界・以音聲作佛事・生死苦海・非念佛莫出離。而芸芸眾生・迷真逐

印光法師文鈔卷三 序

因果錄序 生西金鑑序

妄

錄中 賢錄 就大機・頓證法身・俯提劣機・速出生死・一代時教・皆莫能及。以故西天 寶鑑也。但以卷帙浩繁・不利初機。對鳧居士欲令初機易生信向・於彼正續 類・念佛往生之事迹・兼錄其宏揚淨土之切要言句・以成一 東土之出格高人・莫不以此自行化他・由其爲入道之妙門・成佛之捷徑故也 願念佛求生西方一門・俾上中下根・若聖若凡・同於現生・往生西方 中同唱楚歌 而懷景仰 。二林居士・取佛菩薩立法度生之因緣・與歷代古德僧尼王臣士女・下及物 ・背覺合塵・久經長劫 民不聊生・ • 蓮歸居士・又爲續錄・皆所以爲迷背家鄉者作指南・爲不識自己者作 ・略錄事迹顯著者・二百餘條・附之以讚・名曰生西金鑑。冀閱者鑑古 ¢ 詠歎而悉興起焉・其意固甚深且遠也。昔子房欲破楚軍 加以邪說縱橫・魔侶熾盛・邪正莫辨・無所適從之時。 楚軍聞之・皆動歸思。况當此天災人禍・相繼降作・ ・輪迴生死。於是動我釋迦世尊同體悲心・特開信 帙・名爲淨土聖 國運危岌 ?。其成 編令軍 聞極

樂世界之劫外風光・本有莊嚴・能不同賦歸歟・以期樂我天真乎哉。倘閱者 洞鑑夫娑婆極樂之利害・而反復詠歎之・吾知其求生西方之心・若決江河・

沛然莫之能禦矣。

棲眞常住長年念佛序

念佛法門・其來尙矣。以吾人一念心性・猶如虛空・常恆不變・雖常不變・ 同年而語也。如來以是義故・普令眾生緣念于佛・故曰若眾生心・憶佛念佛 屯則暗・雖虚空之本體・不因雲日而爲增減・而其顯現障蔽之相・固不可以 緣・不隨人天之緣・便隨三途之緣。由其緣之染淨不同・致其報之苦樂迥異 而復念念隨緣。不隨佛界之緣・便隨九界之緣・不隨三乘之緣・便隨六道之 雖于本體了無改變・而其相用固已天淵懸殊矣。譬如虛空・日照則明・雲 現前當來・必定見佛・去佛不遠。又曰諸佛如來・是法界身・入一切眾生

印光法師文鈔卷三 序

生西金鑑序 棲真常住長年念佛序

七二

心想中・是故汝等心想佛時・此心即是三十二相・八十隨形好・是心作佛 染香人・身有香氣・如蜾蠃之祝螟蛉・久則化之。即生作佛・轉凡成聖・其 未之有也。念佛一法・乃以如來萬德洪名爲緣・即此萬德洪名・乃如來果地 矣・若隨眾生各界之緣・則是心作眾生・是心是眾生矣。了此而不念佛者 是心是佛・諸佛正徧知海・從心想生。夫隨佛界之緣・則是心作佛是心是佛 不能修。下手易而成功高・用力少而得效速・實爲如來一代時教中之特別法 法身・具足惑業者・帶業往生。其法極其平常・雖愚夫愚婦・亦能得其利益 功能力用・超過一代時教一切法門之上。以一切法門・皆仗自力・斷惑證真 所證之無上覺道。由其以果地覺・爲因地心・故得因該果海・果徹因源 方得了生脱死。念佛法門・自力佛力・二皆具足。故得已斷惑業者・速證 而復極其玄妙・縱等覺菩薩・不能出其範圍。故無一人不堪修・亦無一人 如

固不可以通途教理而爲論判也。

末法眾生・福薄慧淺・障厚業深・不修

見于此・特于三聖殿・立長年念佛道場・祈余序其意致・以期見聞發心・故 此法・欲仗自力斷惑證真・以了生死・則萬難萬難。棲真住持蓮仁和尙 ・有

歸宗精舍同修淨業序

爲書其大綱如此。

惑證真・了生脱死・圓彰本有・直成佛道而已。但以眾生根機不一・故致如 如來一代時教・所說一切法門・雖則大小不同・權實各異・無非欲令眾生斷 定慧・以斷煩惑而證涅槃・其難如是。致如來普度眾生之懷・鬱而不暢・眾 厚・障蔽妙明・非宿根成熟者・欲于一生取辦・實乏其人。既不能一生取辦 來隨順機宜・作偏圓頓漸・種種說耳。然眾生輪轉生死・久經長劫・惑業深 則再一 受生・其迷而退者・萬有十千・悟而進者・億無三四。仗自力修戒

七七三

生速出生死之道・塞而罔通。然如來大慈・必欲令一切眾生・同于現生了生

精純 講演浄土法門之所以然・及修持之法則 之上。末世眾生・欲了生死・不修此法・泛修其他仗自力之法門・則但可作未 經將墮阿鼻之逆惡罪人・猶得以十稱洪名・預諸末品。三根普被・利鈍全收 帶業往生 已斷煩惑者 令現生度脱・乃以己信願念佛・感佛慈悲攝受・感應道交・故獲斯益。其有 脱死・超凡入聖・遂開一信願念佛求生西方之淨土法門・無論上中下根・悉 來得度之因・斷難獲現生了脫之果矣。 精舍・以期同志隨己身分・來此念佛・種往生因。于星期日・特請通人 盡法界一切眾生・但有信願・無一不被其澤・其圓頓直捷・超出一切法門 ・諦信因果・篤修淨業 以故華嚴證齊諸佛之等覺菩薩 ・即可頓證法身・速成佛道・縱令惑業深厚者・亦可仗佛慈力 。普欲同倫 厦門王拯邦居士者 ・與夫現生沒後之種種利益・亦可謂 ・咸生淨土・遂于本埠太平巖左・建 ・尙須以十大願王・導歸極樂 • 宿根深厚 現行 觀

具大悲心

有擇法眼者矣。

乃致書祈余題額

兼爲敍述大意

。余惟淨土一

乃三世諸佛下度眾生・九界眾生上成佛道・成始成終之殊勝法門。高超

其終極・無不還歸此法界・因顏之曰歸宗。取一切法門・究竟悉歸此法 切禪教律・統攝一切禪教律・以一切諸法・溯其原始・無不從此法界流・要 如如

菩薩 江漢朝宗于海之義 。又凡修淨業· 0 此義于華嚴末後歸宗處明之・有信不及者・請質之普賢 一切善信・必須力敦倫常・恪守己分・戒殺吃素・清心

寡欲・諸惡莫作・眾善奉行。以己所行・化導一切・內而父母眷屬・外而鄉 黨朋友 以期盡此報身・往生西方・脫幻妄之輪迴・證本具之佛性而已 ・俾一切同倫・咸知心是佛心・固當行學佛行・同修佛慈・同念佛名

臺灣佛教會緣起序

佛教者・一切諸法・一 切諸教之大本也。何以言之・一切諸法・由心建立

切凡聖 印光法師文鈔卷三 序 由心出生。 世間一切諸教 歸宗精舍同修淨業序 臺灣佛教會緣起序 ・雖皆說心・然其所說 ·皆屬心之作用

至於不變隨緣・隨緣不變之體・是心作佛・是心是佛・心作三乘・心是三

乘・心作六道・心是六道・所以然之極致・悉皆未能發揮。唯我釋迦世尊・

眾生。故曰一切眾生・皆具如來智慧・但因妄想執著・而不證得・若離妄想 徹悟自心・知一切眾生之心・與如來之心・無二無別・但以迷而未悟・枉作 ·則一切智 ・無礙智・則得現前。又曰一切眾生・皆有佛性・我是已成佛

汝是未成佛。此皆最初成佛・於華嚴梵網所說者。由是大根眾生・頓悟自心 ・入佛知見・小機未能即入・以故俯順機宜・而成熟之。又欲一切若凡若聖

同於現生・出離生死・特開一信願念佛・往生西方法門・普令一切無力斷

炙彌陀之休光・以迄於究竟徹證自心而後已。如來撫育劣機・其真慈大悲・

惑・不能超出輪迴之外者・悉皆仗佛慈力・帶業往生・高預九品之嘉會・親

可謂至極無加矣。然佛法雖名出世間法・實於世間倫常孝弟之道・與夫格致

誠正修齊治平之法・悉皆發揮罄盡・毫善弗遺。故古今立大功・建大業・浩

然即出家一法・亦非蔑倫・以其稟親出家・精修梵行・以己修持功徳・爲親 氣充天地・精誠貫日月・言爲世法・行爲世則者・多由學佛得力而來。而聰 回向 許多大惡元凶而息陰毒・以故舉行佛法・天地鬼神悉示休徴・而况於人乎。 如來發明心具佛性之理・三世因果之事・不知令許多愚夫愚婦以成賢智・令 切人果能依之而修・自可近得出離三界之樂・遠證福慧二嚴之果矣。須知由 貴貧賤智愚賢否之老幼男女・無不皆堪依之而修・豈獨爲出家者立乎。倘 教教人・力敦倫常・恪盡己分・主敬存誠・克己復禮・諸惡莫作・眾善奉行 肆闢駁 民情・使民日遷善而不知所以爲之者之實效故也・拘墟之儒・無此智眼・每 明睿智・首出庶物之人・莫不恭敬崇奉・護持流通・以其有陰翼世道・顯淑 ・戒殺護生・信願念佛・以期生入聖賢之域・沒歸極樂之邦・盡世間一切富 以冀親之神識・出三界以登九品・ 謂佛法蔑倫理而無益於國家・是徒執捨俗出家一機之迹・而不知佛 悟無生而證本性· 校彼徒能奉養

生・皆作過去父母親屬想・以慈悲心・行放生業・豈但現生之親・不忍漠然 與親長劫輪迴於三塗六道而無所恃怙者・不亦多乎。而况佛令弟子視一切眾 以期風行全境・庶可家家觀世音・處處彌陀佛矣。兼復流通各處所刊之經典 死業・永墮惡道乎哉。臺灣騰照大師愍世之不知者多・誓欲普利同人・擬立 人一念心性・與佛無二之妙道・誰肯以是心作佛・是心是佛之資・以之作生 為救援・乃以提倡佛學為急務。人果知三世因果・六道輪迴之實事・與夫吾 氣・復召天災・水旱風震・相繼降作・世運危岌・民不聊生・憂世之士・思 佛法而行・則勝殘去殺・世道太平矣。近十餘年來・殺劫徧於中外・由茲戾 善念・爲之念佛・以冀彼速出惡道・速生西方而後已。由是言之・人果皆依 置之・即一切水陸空行諸生物・亦不忍漠然置之。縱令力有不及・猶以悲心 一佛教會・爲之提倡講說・俾大眾悉知。初於本會・按期修持・用作表率

俾有信心識文義者・咸得讀誦受持・以實行力敦倫常・恪盡已分・主敬存

誠・克己復禮・諸惡莫作・眾善奉行・戒殺護生・信願念佛・以期生入聖賢

之域・沒歸極樂之邦・其為利益・莫能名焉。 知光具有同心・函祈作序・乃

爲述其佛教普利一切有情之大致云。

吳淞佛教居士林發隱序

間無一人不堪修・亦無一人不能修・以人同此心・心同此理故也。須知無量 復一法不著。若以不認真行爲不著、其誤大矣、唯其不著・故其行得至究竟・古今 宜而說法・雖則名爲出世間法・實則圓具世間一切善法。雖則毫善弗遺・而 佛法廣大如法界・究竟如虚空・大無不包・細無不舉・本一心以建立・隨機 悉能達本窮源・親證實相。雖則理致幽深・而復隨根大小・悉皆能入・ 凡懿行過人者・多由學佛得力而致。由是即凡夫心・契如來藏・於一 皆須自力斷惑證真・方出生死。求其攝生普徧・利濟無方・上中下三 法· 盡世

七七九

八〇

淳・人心丕變・災消福萃・天眷常臨・其爲功德・莫能名焉。若或徒竊學佛 爲善人・即俗修真・居廛爲政・化殘暴於已著・消禍亂於未萌 戒殺護生・愛惜物命・信願念佛・求生西方。如是之人・世間之寶・生獲令 子孝・兄友弟恭・夫倡婦隨・主仁僕忠・唯其無愧天職・方立學佛基址。進 皆爲淨土法門所攝之機。以其至簡至易・至頓至圓・故能如大地之普載萬象 者・唯淨土法門爲然也。以故上根如文殊普賢之儔・下根如五逆十惡之輩 根同修・初中後始本不二・不斷煩惑・不歷異生・即得了生脱死・超凡入聖 之名・不務學佛之實・則成佛法之罪人・不但無虛名之可得・且將有實禍 而敬受三歸・謹修十善・諸惡莫作・眾善奉行・莫作奉行、常在起心動念處論、若 大海之普納眾流也。凡學佛修淨業之人・必須力敦倫常・恪盡己分・父慈 沒歸佛國 。又須以此・普化一切・由親及疏・由近及遠・俾一切人・同 。由茲俗美風 以

隨其後

如童子無知

以價值三千大千世界之摩尼寶珠・

換取

一根糖吃

糖不飽腹 ・而失畢生恃怙・欲不飢寒而死・其可得乎。吳淞諸居士・特開佛

為述其大意云。觀此・則知佛法為世間諸法之本・彼拘墟者・由無智眼・不 教居士林・欲令同人・勵志修持・以期各獲實益・祈光著語・以作警策・因

・以不見故・謂之爲無・豈不大可哀哉。

能徹見

·遂謂佛滅倫理

•

無益人國

・是何異生盲承天日覆照之恩・得以爲人

佛化隨刊序

道 唯其徹悟自心・故能建立諸法。知其指歸・縱凡夫皆堪造詣・究其極致・雖 佛法者・世出世間一切諸法之本源也。故其道大無不包・細無不舉・語其廣 ?・格致誠正修齊治平之法・無不詳示無遺。非止談三世因果・明善惡報應 闡發即心本具之佛性・斷惑證真之事理而已。良以一切諸法・悉本於心・ ・則罄海墨而莫書・語其精微・則覓一字而叵得。凡孝弟忠信禮義廉恥之

七八二

聖人有不知能。是以古之聰明睿智・首出庶物之出格高人・莫不護持流通 指心源·發明性體·為挽回世道人心之要道。於是若緇若素·羣起而提倡修 **亂極思治・否極思泰・凡具通方之知見者・莫不以佛法明因果・示報應・直** 置此道於不問 治・顯淑民情・其法道之盛・他處何能相比。自後雖都遷他處・而宏宗演教 及道安至秦 者・唯吾秦最爲第一。以佛法大興・自晉而始・當時苻秦姚秦・皆都長安 密修顯化・而唯恐不及焉。溯自東漢・法傳震旦・求其高人傑出・法道大興 ・以國家極意尊崇・故諸宗之首領・多皆住止京師・以其所學所得・陰翼郅 迄至隋唐・亦都其地・故其宏宣法道・邁越古今。而當唐之世・諸宗悉備 潛修密證者 ・羅什入關・凡緇素之見越等流・識超儕伍者・皆歸趣而師事焉 ・亦代不乏人。至清之末葉・經髮匪回匪之亂 其殆一線之未絕耳。近十數年來・世道人心・ ・人民困難・遂 壞亂已極 而

持之・

以期自他同出迷途・誕登覺岸。由是敦篤倫常

・精修淨業

生入聖賢

屈服 之域・沒歸極樂之邦。以故長安佛教會・蔚然而興・同人以異地而居・非書 晉及唐・五百餘年・震旦法道・莫之能先。從茲以後・代有高人・潛修密證 宗・普令凡夫・同出樊籠。末世眾生・斷惑匪易・唯此一法・堪爲怙恃 各適機宜 同之世・風淳俗美・共作羲皇上人・其爲利益・莫能名焉。爰爲祝曰・如來 永息弱肉強食之惡心・盡分敦倫・同懷仁民愛物之善念。去殺勝殘・上溯大 論之訓誨・朋友之所講習・智照之所發揮・分門別類・錄作隨刊。彼此參觀 報莫能達意。故將隨見隨聞之事・所會所悟之理・潛修密證之方法・格言嘉 大法・爲諸法源・一切諸法・無不包含。敦倫致治・發揮無遺・事理因果・ 率多隱淪。性天理老・攝受蓮池・中興淨土・實啓於茲。若無至德・彼肯 互相灌輸 古德芳蹤 緬維秦川・昔號法窟・賢慈密律・悉肇其域。 ・庶可正智藉眾論以開發・麗澤由互滋而廣潤 惜多遺軼 。至清末葉・兵火頻興 ・人民凋敝 善導法照・特闡蓮 。將見知因識果 幾絕傳宏

七八匹

近時通人・眼界大開・知非佛法・莫挽劫災。由是聚集・緇素同志・隨機提 倡・用建法幟。欲普法利・特出隨刊・麗澤互益・冀悟性天。佛由心作・道

在人弘・竭誠若極・草偃風行。光雖庸劣・亦表同情・聊攄愚悃・以作先聲 願我同倫・各修淨行・庶可即生・超凡入聖

佛川敦本學校緣起序

道・格致誠正修齊治平之法・如來於諸大小乘經中・莫不具說。而世間聖人 憐憫者 理而蠹國政・無益於社會・有害於民生・此等世智辨聰之瞽論・如來稱爲可 儒釋二教・其迹似異・其本原同。有執迹而昧本者・每駁斥佛法・謂爲滅倫 只據現生・但令人盡義盡分・佛則具說過去現在未來三世・并詳示其能盡 。不知佛法具世出世・且以世間法論・凡儒教之孝弟忠信禮義廉恥之

之善報・不盡之惡報。上根之人・但聞義分應爾・自可通身擔荷・中下之人

令其得所・誰忍以口腹之欲・戕害過去父母・未來諸佛乎。況既造殺業・必 經・皆令生孝順心・慈悲心・戒殺放生。以一切眾生・皆有佛性・皆堪作佛 義盡分・以冀善報而懼惡報・亦必勉力盡義盡分矣。此但指其最淺近者而論 能各依佛法・戒殺護生・吃素念佛・不作殺因・自無殺果・何難勝殘去殺 受殺報 何能悉知之而悉見之耶。至於論孝・則徧該六道・窮盡未來・故梵網楞伽等 以成郅治 而食之乎。而況近來刀兵大劫・慘不忍言・其因皆由殺生食肉之所致也。人 ・人縱愚頑・決無幸災樂禍・趨凶避吉之念。由知三世善惡報應・雖不欲盡 皆於無量劫來・輪迴六道・各各互爲父母兄弟妻子朋友。言念及此・理宜 即可化愚頑爲良善・轉澆俗爲淳風・況其深遠者之利益・彼世間凡夫・ 陽奉陰違・則無法可治。若聞三世因果・知能盡則有善報・不盡則有惡報 誰肯以暫時口腹之欲・於未來世・常被彼所殺所食之眾生・一 由世道太平· 而父母兄弟妻子朋友之倫・方得各樂天常・各盡義 又 殺

七八六

分・而無遺憾・方合佛説孝順心・慈悲心之本旨。由是言之・佛之教孝也・ 遠且大矣。真達大師・生於佛川胡氏・弱冠即悟世非常・乃出家於普陀山三 亦施焉。噫嘻懿哉・真達師之心・可謂平等大公・了無自私自利之見・而族 為榮寵而悠久也多矣。又以佛川地屬通衢·每有道路死亡·棺殮無出·特捐 校不廢・其祀長存。較彼有子孫或不肖以遺親之辱・或中絕以斷親之祀者・ 而無戾時不適用之弊。族人感其義・將其父母等神主・於校中設祠祀之・此 本此孝思・推類以及當地苦寒・貧家子弟無力讀書・乃以衣缽餘資七千餘元 聖堂・精修淨業・冀生蓮邦。數十年來・父母兄弟・悉皆謝世・承祀無人。 ・注重躬行孝弟等・其所讀書・注重五經四書等・略兼新法・以期敦本重道 交其族之熱心公益者・立一敦本小學校・俾當地子弟・同得受學。其學規 ・交學校董士置產生息・以其息作棺木掩埋之費・地方貧不能致棺者

人感之・長時奉其親之香火・彼爲子孫謀者・有此利益乎。然光更欲彼族人

益・而本郷之人・亦當仰其芳蹤・各修淨業。校中正廳・當供西方三聖像 凡校中董士教員學生・朝暮咸行禮敬・以期業消智朗・障盡福崇・方爲究竟 得其實益・不妨略攄愚懷。竊謂真達師出家學佛・以衣缽餘資爲本鄉作公

實 益

0

校中固宜永斷葷腥・方不負僧以十方信施開設學校之義

。否則不但不

合真達師之本心・亦非所以敦本自愛・俾自己與諸學子・日在佛法中熏陶 無上法門・凡一切人皆宜修習 而了不得其實益・爲可惜也。須知佛法・乃一切諸法之本・而念佛求生淨土 一法・又爲佛法中至圓至頓・至簡至易・三根普被・利鈍全收・成始成終之 • 况在此校者乎。且勿謂僧出資立校・便逼人

學佛 者・多半皆研究修持念佛法門。若居此校而不修持・則成擔麻棄金・到寶山 入聖・為彌陀之弟子・證本具之佛性而已。不觀今之博學多聞・具深遠知見 此正所謂孝順心慈悲心・欲令在此校之一切人・同皆了生脱死 超凡

印光法師文鈔卷三 序 佛川敦本學校序

而空手歸矣

可不惜哉

七八八

千佛圖頌并序

心現 道矣 凡各異 阿修羅 想佛像・憶念佛德・及與佛號。是佛者・謂當觀想憶念之時・佛之相好莊嚴 有此十種之現相焉 心如工畫師・能畫諸世間。佛・正覺世間也。菩薩・緣覺・聲聞・天・人・ 然則心不作佛 福德智慧・神通道力・悉現於觀想憶念者之心中・如鏡照相・敵體無二。 。 其本體雖同·其造詣迥異。故曰唯聖罔念作狂 。心之本體·如一張白紙。心之作用之善惡因果 ・畜生・餓鬼・地獄・有情世閒也。亦名十法界。此十法界・雖則聖 苦樂懸殊・而其本具之真如佛性・固自一 ・則心不是佛・心作三乘・則心是三乘・心作六道・則心是六 。觀無量壽佛經云・是心作佛・是心是佛。 如。但以用心各別 唯狂克念作聖・吾人 如畫佛畫地獄 作佛者 • ·各隨 故致 謂觀

可不慎於所念所作乎哉。朱曉崖居士・宿具靈根・生即茹素・善繪人物・

法出神。擬以如來萬德莊嚴妙相・普印於一切眾生八識田中・俾其由此善根

之大慈悲心 漸漸擴充增長・以迄實證。庶不負各人本具之真如佛性・與如來多方引導 。乃敬繪千佛・石印流通・祈光作序・用示所以。因略發揮其心

作心是之義・冀見聞者・咸知去取以致力焉 。頌曰・佛由心作・獄由心造

供觀想。既睹聖像・即印識田・由此善根・必證心源。將付石印・用廣流通 士・欲施引導・敬繪千佛・以示法要。俾見聞者・咸生景仰・竭誠盡敬・禮 心之力用・最爲勝妙。既能作佛・何可造獄・由迷所趣・禍因惡積。曉崖居

聊攄所以・表示芹衷

佛法要論序

甚矣眾生之昏迷倒惑・莫能自悟也。背本具之如來智慧・逐幻現之眾生根塵

於空華幻影之聲色貨利・起愛憎執著之貪瞋癡心。貪瞋癡既起之於心・殺 印光法師文鈔卷三 序 千佛圖頌并序 佛法要論序

盜淫便作之於身。自茲久經長劫・互相報復・從苦入苦・無所底止。縱或戒

亦復可畏也。於是大覺世尊・特垂哀憫・示生世間・成等正覺・隨順眾生・ 已時。然得人天者如客居・墮三途者如家郷・如是則不但三途可畏・雖人天 善禪定自修 ・得生人天善道・而惑業未斷・福盡猶復墮落・輪迴六道・了無

之事 說種種法 ・令彼漸次修持。既知此理此事・誰肯懷珠作丐・求樂得苦。其背塵合 。大根則直說一心具造之理・令彼親得證悟・小根則詳示三世因果

覺・返迷歸悟・以期復我本具之天真佛性・不容已也。雖然・煩惱深厚 易消除・非多劫善根成熟者・實難現生即得超出輪迴之外也。故我世尊・以

方・實爲撫育保綏之要道・亦是速證菩提之妙法。以一切諸佛・非此法莫能 大慈悲・特開一仗佛慈力往生淨土法門・俾彼上聖下凡・同於現生・往生西

效速。由其以果地覺・爲因地心・故得因該果海・果徹因源也。近來世道人 圓滿菩提 ・一切眾生・ 非此法莫能即出生死。下手易而成功高 ・用力少而得

心・壞至及極・廢經廢倫・競立新法・昧因昧果・任意妄爲。因茲天災人禍 於佛化・下不負乎己靈・而達庵著論之深心・與諸君流通之至意・亦可暢慰 陀 願 用困苦艱難・危險逼迫。譬如置惡陋之相於明鏡之前・斷無微妙莊嚴之善影 起之惑業。因茲於三途六道中・受生受死・故致其形陋劣・其識暗昧・其受 世之佛法要論 者・宿植德本・篤信佛乘・徹悟自心・深入經藏。憫斯人之迷昧本心・述救 可得。從茲洗心滌慮・篤修戒善・及與禪定・以作出世之因。又復發四宏誓 ・與大菩提心・自行化他・共修淨業。以期一期報盡・徑生西方・親炙彌 屢屢降作・匪盜縱橫・民不聊生・憂世之士・惄焉傷悲。達庵居士馮寶瑛 · 参隨海眾 0 ・速證吾心本具之佛性・普度法界無邊之眾生 種種發揮・契理契機。俾知吾心固有之佛性・錮蔽於幻妄所 0 如是則上不孤

而無遺憾焉

七九二

普陀體仁施棺會緣起序

設法 布・ 濟了信・法雨達圓・海岸蓮曦・紫竹廣德・洪筏願來・洪筏戒如・報本瑩照 山·因與談及此事 或致潰爛・其於恤死衞生之道・皆有遺憾。真達大師遂發心施棺・又念若不 復海中屢有漂來之死屍・兼夫遠方苦行進香者・偶有死亡・即宜殯殮。否則 病人。或有負販鬻力之人・卒遇死亡・無有棺材・殊難妥亡靈而宏慈化。况 法乎。普陀爲觀音大士道場・歷朝欽敬・舉世尊崇。故得三寺鼎立・眾庵棊 掩骼埋胔・政出月令・澤及枯骨・恩施周文・而况身心並濟・存沒咸恤之佛 會 則其數加倍 中外朝謁者・實繁有徒。凡工匠僕使負販鬻力之人・常逾千數・ ・後難永繼。民國五年・楊君叔英・祝君蘭舫・袁君祖懷・曹君振聲等來 。是故山中諸長老・體佛慈懷・特開醫院・以療治一切有疾 諸君共輸洋二千元。真達大師自捐四千元。去年又與普 若至香

同商酌辦法・因起一會・名曰體仁。以仰體佛慈・仁濟亡靈・俾亡者無暴屍 鶴鳴清福 ・普慧坤山・柏子極得諸師・及劉君寄亭・張君宗富二居士・共

之慘・山僧無傷慈之誚。諸公皆各出洋一百元・並上所捐・共七千二百元

場・預有光榮。凡出資及經理置辦之人・同皆消除宿業・增長善根。現生則 福壽雙隆・爲斯世之表率・臨終則形神俱妙・入佛國之封疆。欲後之人悉知 作施棺之費 用置恆產·請示立石。特請本山在會諸師 ・庶可永傳無替。如是則以後之貧窮亡者・咸受其福・而圓通道 ・輪流經理・以歲所收租金・儘數

故爲述其緣起・俾億萬斯年・永用施行・以副大士救度眾生之心・亦不負

諸大師・諸居士・恤亡護教之一番至意云。

三聖堂萬年簿序

法不孤起・道在人弘・勝地名藍・唯人是賴 。得其人・ 則荊棘林便成旃檀林

普陀體仁施棺會緣起序 三聖堂萬年簿序

印光法師文鈔卷三 序

結茅於此・適張隨党禮二太監・奉旨督造藏經閣・閑步其地・飲其泉而甘之 失其人・則獅子窟轉作野狐窟。三聖堂者・創自明萬曆三十年・ 時僧大方

乃詢其由・知其極旱不涸・寺中遇旱祈雨・必取水於此泉・而輒獲膏雨

堂顯法公居此潛修 七寶池中所有也。至清康熙間 遂題之爲八功德泉。因出資命建西方三聖殿 ・改名如意庵・乃數楹小屋而已。光緒初 · 僧海安重建 ・以八功德水・乃西方極樂世界 自後年久傾頹 · 四世孫華德公 。咸豐初 承 恩

通・菩薩香火・日見興盛・庵中工事・略有端倪。華德公欲息心以專修淨業 募諸滬上洪君某・遂建三聖殿・復原名。自後世道太平・兼以輪船火車俱

以庵事交其徒長汀師・令其孫真達師輔之・遂大爲建造。及汀師去世・達 · 宜建者建 · 遂成一大精藍 。後以操勞既久・意欲

靜養 ・因交與明教師監理數年。今明教師又退・達師因念人壽幾何・本庵經 用數十年之心力・方得殿宇巍峨 ・寮舍宏敞・庵僧得以清修

師更不惜心力・宜修者修

業・豈不爲前人之遺憾。而圓通道場・因之削色・致普門大士含悲于常寂光 客得以寄寓。當此之時・不將庵中規矩課程・與夫經像莊嚴・法器什物・書 中也。因令光略敍此庵之緣起・而凡諸規矩什物等・一一詳記・庶後之人有所 前人建立道場一番苦心・悉付東流。徒令後人安住其中・虚消信施・不修道 之於冊・以遺來者。恐年歲既久・來者不知・或至規矩廢弛・什物遺失・致

蔡伯倫居士嚶鳴集序

遵守焉。

作佛之要・在乎力行孝弟・與夫返妄歸真而已。其資之以成始成終者・在於 子云・人皆可以爲堯舜。佛經云・一切眾生皆有佛性・皆堪作佛。其爲堯舜 克己復禮 人生世間・固宜各盡其倫。否則名雖爲人・實與橫行之異類・有何區別。孟 閑邪存誠・諸惡莫作・眾善奉行而已。近世新學派 競學歐風

廢經背倫・以至公然提倡仇孝公妻裸體等・直欲人與禽獸無異・其喪心病狂

氏不欲遠徙・勉留夷邦・服職多年。及母氏服闕・幡然來歸・可謂特立獨行 也甚矣。伯倫居士・寄居臺灣・已三世矣。當弱冠時・即欲歸本祖國・以母

位行政・亦可施行也。因爲易其名曰伯倫・不知北崙居士以爲然否。 及往生極樂之邦・其挽回世道人心也大矣。固知有志於濟世濟人者・雖不居 於三世因果報應・與夫淨土橫超法門・俾一切人由問相而得入聖賢之域・以 夫有心無相・相隨心生・有相無心・相逐心滅等義。而且於議論中・輒諄諄 勉以修德積善・以祈善者益善・不善者亦善。深合命自我作・福自己求・與 敦倫盡分之士也。僑寓滬上・以相爲業・凡遇來者・無論其相之善惡・皆

教誨淺說序

家庭教育・因果報應・乃現今挽救世道人心之至極要務。若不從此著手・則

責 有權力者 賢師友之提攜 皆景仰。無奈世人見識褊淺・每多悖道而馳。幼既無賢父母之善教・長又無 地・清操皎日月者・皆抱己立立人之心・自利利他之願。故得千百年後・人 人盈城盈野・以及國運危岌・民不聊生也。是故建大功・立大業・浩氣塞天 亡・歿而神墮惡道之所致也。使知聲和則響順・形直則影端・種瓜則得瓜 即是利己・害人甚於害己・作善者其家必昌・歿而神超善道・作惡者其家必 **圖暫時之僥倖・不顧後來之禍福者・皆由從小未受賢父母之善教。不知利人** 理・則習與性成・及長而不爲賢人者・無是理也。語云・天下興亡・匹夫有 凡所措置・皆屬枝末・皆可偽為。唯從小便教以敦倫盡分之道・因果報應之 種豆則得豆 ・匹夫身賤名劣・何得有此責任。須知國家天下・由一人一家而積成。彼 ・同室操戈・無權力者・聚黨劫掠・與夫蕩檢踰閑・作奸犯法・只 ・既造如是因・必感如是果・決不至爲求自己安富尊榮・致令殺 ・從茲越理犯分・致墮監獄 ・雖屬自取・實堪憐憫。於是各獄

印光法師文鈔卷三 序

教誨淺說序

犯之稿 行爲乎。 爲宣說因果報應之理・其兒女決定皆成賢人・又何有越理犯分・傷天損德等 而家庭教育・母教最要。使賢母從兒女小時・以身率其敦倫盡分之事・又日 世道人心之要・爲之點出・俾舉世之人・同注重於家庭教育・與因果報應 而依行焉 經援史・據古證今・文雖淺而意旨實深。雖特爲監犯說・而一切人俱宜觀覽 家天下・永享太平之福矣。邵子慧圓・向膺漕河涇監獄教誨師職・其開導監 滌慮・改過遷善・勉爲良民・轉相勸化・俾若自若他・同歸聖賢之域・庶國 皆立一教誨師・日與監犯講說爲人所當盡之道・因果無或爽之理。冀彼洗心 ・有數十篇・約十餘萬言。皆勸其守分安命・敦倫盡分之說。而且引 所願匹夫匹婦・各任其責・庶可賢人傑出而匪徒革心・ 。同志者以其有益・因付排印・祈光作序・以爲嚮導。光因將挽救 禮教興行而

天下太平矣。明理達人・當不以吾言爲謬妄也。

横超蓮社緣起序

唯仗自力者・天淵懸殊。師宏居士之妻師湯・欲與閨閣英賢・常時修持淨業 唯仗自力・是故難得實益。若論橫超・但依淨土法門・生信發願 豎出・非力修戒定慧道・斷盡煩惑不可。倘煩惑稍有未盡・則三界依舊莫出 者 弱肉強食 功夫成熟者 法華經云・三界無安・猶如火宅・眾苦充滿・甚可怖畏。况當此互相鬩爭・ 0 咸得往生 求生西方 况末世眾生・善根淺薄・壽命短促・修者縱有億億・出者難得一二。以其 因茲提倡淨土法門· ・殺人之法・ 0 0 固登上品・臨終方念者・亦預末流。此則全仗佛力・其利益與 兼以敦篤倫常 既往生已・則了生脫死・超凡入聖・永離眾苦・但受諸樂矣 無奇不有・而復種種天災・頻相見告之時乎。 以期一切同倫 ・恪盡己分・諸惡莫作・ ・同得出此三界・登彼九蓮也。若論 眾善奉行・則萬不漏 ・念佛名號 有智識

印光法師文鈔卷三 序 横超蓮社緣起序

以期同于現生・出此火宅。遂于附近・建一蓮社・半由自捐・半由人助

宅・欲出莫由者・同皆依此而修。庶可長揖娑婆・速達極樂・一超直入如來 其工既成・問名于光・因題之曰橫超。冀一切鬚眉丈夫・貞靜坤倫・怖畏火

觀世音菩薩本迹感應頌重刻木板序

地

永作逍遙自在人。故爲敍述所以云

先以欲鉤牽・後令入佛智。由是久成佛道之正法明如來・而復不離寂光 切眾生皆是佛・憫其業障深重・不能直復本體・故以種種方便・令種善根 六道・了無出期・而其寂照真常之本體・仍然如故・毫無損失。以故佛視 眾生之心・與佛無二。雖迷真逐妄・背覺合塵・起貪瞋癡・造殺盜淫・輪迴 · 垂

餘法界種種身・皆屬祕密・現菩薩法界之觀世音身・ 形九界・隨類逐形・尋聲救苦・應以何身得度者・即現何身而爲說法。其現 則屬顯露。以故十方諸

孔之空也。其求大涅槃得大涅槃者・即完全撤去障蔽之物・便與普含萬象之 求大涅槃得大涅槃。所言求妻得妻等者・即穿小孔得小孔之空・穿大孔得大 不生信向・譬如虚空・以物障之・便成隔礙。若穿一小孔・即得一小孔之空 起無緣・徧法界感・徧法界應・隨彼所感之誠之大小・俾彼各得相當之利益 虚空渾合無閒也。金剛經所謂我應滅度一切眾生・滅度一切眾生已・實無眾 也、否則妻何得向菩薩求。 求子得子・求三昧得三昧・求長壽得長壽求妻者、求賢慧貞良之妻。 求子得子・求三昧得三昧・求長壽得長壽 ・穿一大孔・即得一大孔之空・若完全撤去障蔽之物・則與普含萬象之虛空 ・同蒙攝受也。由菩薩證窮法界・圓彰自性・徹悟唯心・故能悲運同體・慈 · 渾合無閒矣 何可得而異議也。良以菩薩之心・猶如虛空・無所不徧 如法華普門品・楞嚴觀音圓通所說 皆讚觀世音菩薩爲大慈大悲施無畏者・以期九法界一切眾生・同生信向 。是以眾生小感則小應・大感則大應・故楞嚴云・求妻得妻 ・及此方種種感應事迹・如本書所頌者 0 但以眾生在迷 ·如是乃至

印光法師文鈔卷三 序

觀世音菩薩感應頌重刻序

八〇二

無已 之徧界流通・人沐慈化・當可做到。但以字小・不便老人・爲一憾事。 菩提心・爲接引初機令其入勝故・隨彼凡情・滿彼所願。待其善根既熟・即 生得滅度者。以眾生心體・即是無餘涅槃・本來無失・又何有得。菩薩特以 華慧可居士・宿植德本・篤信佛法・一見此書・歡喜讚歎・若獲至寶・慶幸 殆宿世曾受菩薩付囑・以布慈化而利有情者・噫嘻懿哉 可直得究竟真實利益・此菩薩隨類現身・隨心滿願之本旨也。本書付排鑄 種種方便・令其消除幻業・復還本體而已。又以眾生迷惑深重・不能頓發大 擬印數十萬部・俾薄海內外之人 。愷出五百圓・命刻木板・冀一切人皆能閱 ・咸得受持 。現已任及七萬多部 ·一切時皆可印可請也。 ・則將來 無錫 板

阿彌陀經白話解釋序

浄土法門・實爲十方三世一 切諸佛 上成佛道・下化眾生之通規 ・亦爲末法

簡義周 事修持 莊嚴 時乎 時代一切眾生· 有阿彌陀經 生也。以故如來于諸大乘經・咸皆帶說・如華嚴法華楞嚴等。其專說者・則 所説仗自力法門・下手易而成功高・用力少而得效速。以佛力法力不可思議 雖在正像・尙不多見・况末法人根陋劣・壽命短促・知識希少・邪外縱橫之 令眾生出生死・成佛道耳。但以上根者少・中下者多・故能於即生了脱者・ 是舉天下之若僧若俗・無不以淨土爲歸者。然雖如是行持・若不諦審佛祖 加以眾生信願行力・則無論功夫淺深・罪業輕重・皆得蒙佛慈力・接引往 ・三輩九品之生因 ・最易受持・由是古人列爲日課・無論若宗若教若律・皆于暮時讀誦 由是如來預鑑機宜 同於現生往生淨土。上根則速成佛道 · 無量壽經 仗佛慈力・即生了脱之要道。良以如來所說一切法門・無非 • • 十方諸佛之讚歎 觀無量壽佛經 ・特開淨土一門・俾一 0 此三經中 · 悉皆顯示無遺 • 切若聖若凡・上中下根・同 下根則亦預聖流 ・凡彌陀之誓願 0 而阿彌陀經 校彼一代 ・淨土之

印光法師文鈔卷三

序

彌陀經白話解釋序

立法之所以然者・猶然不以求生西方爲事 途法門之義 實難即生做到。倘惑業未能淨盡・再一受生・多半迷失・不但所期皆成畫餅 閱 回狂瀾之據 可救藥 0 蓋即指此・若無此執・則誰不信受奉行焉。近來世道人心・陷溺已極・無 代時教中之特別法門・不可以與通途法門並論・若不明此義 即通宗通教之高人・尙多崇尙自力法門・不肯仰仗佛力・其志固高・其事 且有因福造業 由是吃素念佛・改惡修善者・日見其多。所可惜者・普通善信 雖日讀彌陀經・究不知所說者爲何義。縱有疏鈔・要解等注・亦非彼所能 黃智海居士 。凡有具正知見之偉人傑士・莫不以提倡因果報應・生死輪迴・爲挽 ・疑仗佛力特別法門之益。而不肯信受・則其失大矣。佛說難信 ・精修淨業・求生西方・爲究竟安隱之法 ・後生墮落之虞 利人心切 取疏鈔要解之義 ・由是言之・誠堪畏懼 ・殆所謂日用不知・習矣不察者乎 以白話解釋之 ° 0 倡百和 須知淨土法門 ·以仗自力通 俾彼稍識字 ·未嘗學問 無不 -率從

者・亦得了知經義。由是更加精進・竭誠修持・并以轉化有緣・則現生身心

清淨・優入聖賢之域・臨終感應道交・直登極樂之邦・其爲利益・莫能名焉

。爰書大義・以貢閱者。

欲海回狂普勸受持流通序

亦復甚多。故禮記月令・有振鐸布告・令戒容止之政・容ヰ、即動靜、謂房事也 圖快樂・卒致死亡・鰥寡苦况・實多自取・豈全屬命應爾哉。 于惡道者・姑置勿論。即夫婦之倫・儻一沈湎・由茲而死者・何可勝數。本 理亂倫・敗家辱祖・惡名播于郷里・毒氣遺于子孫・生不盡其天年・死永墮 之・雖死不悔者・其唯女色乎。彼狂徒縱情欲事・探花折柳・竊玉偷香・滅 天下有極慘極烈・至大至深之禍・動輒喪身殞命・而人多樂於從事・以身殉 已屬自取其殃・亦有素不狎昵・但以不知忌諱・冒昧從事・致遭死亡者・ 彼昵情牀第者

命。 古聖王愛民之忱・可謂無微不至矣。 則因 皆枉死之人・此禍之烈・世無有二・可不哀哉・可不畏哉。亦有不費一錢 謂之爲命乎。至若依命而生・命盡而死者・不過一二分耳。由是知天下多半 之中・由色欲直接而死者・有其四分。閒接而死者・亦有四分・以由色欲虧 爲莫大之幸福而納之・必致災星莅止・鬼神誅戮。君子則因禍而得福 妖姫獻媚・君子視爲莫大之禍殃而拒之・必致福曜照臨・皇天眷佑・小人視 于邪淫之事 生得貞良之眷屬者 不勞微力・而能成至高之德行・享至大之安樂・遺子孫以無窮之福蔭 損 • 福 本乎命者 受別種感觸而死 m 加 禍 無廉無恥 ・乃居心清貞 故 其唯戒淫乎。夫婦正淫・前已略說利害 [禍福無門 。此諸死者· ・極穢極惡・乃以人身・行畜生事 、・不貪欲事之人・彼貪色者・皆自戕其生 唯人自召 無不推之於命・豈知貪色者之死・皆非其 言之、俱宜購閱、忌諱、壽康寶鑑詳 世人苟于女色關頭 吾常謂世閒人民・十分 。是以豔女來奔 · 今且不論 不能徹底 ・小人 ・俾來 何 至

海回狂 深切矣 倉吳紫翔居士・念世禍之日亟・ 售者・亦近二萬。杭州漢口・俱皆仿排・所印之數・當亦不少。茲有江蘇太 若善爲領會・神而明之・則左右逢源・觸目是道。其憂世救民之心・可謂至 與道・則舉凡經國治世・修身齊家・窮理盡性・了生脫死之法・悉皆圓具 使舉世同倫 條陳・以雅俗同觀之筆・述勸誡俱摯之文。于古今不淫獲福・犯淫致禍之事 屬・斷送于俄頃之歡娛也・哀哉。安士先生欲海回狂一書・分門別類・縷析 破・則是以至高之德行・至大之安樂・以及子孫無窮之福蔭・來生貞良之眷 徧布全國 原原委委 。是以印光于民國七年・特刊安士全書板于揚州藏經院・八年又刻欲 萬善先資・二種單行本。十年又募印縮小本安士全書 ・但以人微德薄・無由感通・只得四萬而已。而中華書局私印出 · 咸享福樂 • 詳悉備書 ・大聲疾呼・不遺餘力・暮鼓晨鐘・發人深省 各盡天年而後已。須知其書・雖爲戒淫而設・其義 彼新學派 提倡廢倫廢節 · 專主自由愛戀 • 擬印數十 直欲 萬 0

八〇八

當仁不讓而樂爲之也。爰述大義・以貢同仁 廣印欲海回狂・施送各社會以期挽回狂瀾。然眾志成城・眾擎易舉・懇祈海 變作禎祥。畢竟不費一錢・不勞微力・而得此美滿之效果・仁人君子・諒皆 富壽康寧・人各悉得・身家由茲清吉・國界于以安寧・穢德轉爲懿德・災殃 如玉・不但不犯邪淫・即夫婦正淫・亦知撙節。將見鰥寡孤獨・從茲日少・ 子・兄勉其弟・師誡其徒・友告其侶・俾得人人知其禍害・立志如山 內仁人君子・大發救世之心・量力印送・并勸有緣・普徧流通。又祈父誨其 如決江隄・任其横流・俾一班青年男女・同陷于無底欲海漩澓之中 。 遂發心 ・守身

壽康寶鑑序

病 人未有不欲長壽康寧・子孫蕃衍・功業卓著・吉曜照臨者。亦未有欲短折疾 後嗣滅絕 家道傾頹 ·凶神莅止者 0 此舉世人之常情 雖三尺孺子・

印光法師文鈔卷三序 壽康寶鑑序

所期・與身之所行・適得其反・卒至所不欲者悉得・而所欲者悉莫由而得・ 不皆然。縱至愚之人・斷無幸災樂禍・厭福惡吉者。而好色貪淫之人・心之 膨脹數月・ 絅之等合辦淨業社。民國十二三年・常欲來山歸依・以事羈未果。十四年病 同・四川人・年四十六歳・ 陳・俾閱者知所警戒・其覺世救民之心・可謂懇切周摯矣。而印光復爲增訂 致喪身殞命 死亡者・ 可不哀哉 ・以名壽康寶鑑・復爲募印廣布者・蓋以有痛于心而不容已也。一弟子羅濟 ・福善禍淫之證案・持戒之方法日期・忌諱之時處人事・不憚繁瑣・縷析條 殊堪憐愍。以故前賢輯不可錄・備明色欲之害・其戒淫窒欲之格言 。彼縱情花柳・唯此是圖者・姑勿論。即夫婦之倫・若一貪湎・必 勢極危險・中西醫均無效。至八月十四・清理藥帳・爲數甚鉅 我從此縱死 。亦有并不過貪 · 亦不再吃藥矣 業船商于上海 (・但由不知忌諱・忠豫種種、詳示 。其妾乃于佛前懇禱 0 其性情頗忠厚· 冒昧從事・以致 深信佛法 願終身吃素念 • 與關

佛・以祈夫愈。即日下午病轉機・大瀉淤水・不藥而愈。光于八月底來申

氣色淳淨光華・無與等者。見光喜曰・師父來矣・當在申歸依・不須上山也 寓太平寺・九月初二・往淨業社會關絅之・濟同在焉・雖身體尙未大健・而

樵 疾之憂・汝病雖好・尚未復原・當慎重・惜未明言所慎重者・謂房事也。至 飯・且曰・師父即弟子等之父母・弟子等即師父之兒女也。光曰・父母唯其 擇于初八・與其妾至太平寺・同受三歸五戒。又請程雪樓 ・歐陽石芝・余峙蓮・任心白等諸居士・陪光吃飯 。初十又請光至其家吃 ・關絅之・丁桂

彼始來 月盡日 ・于功德林開監獄感化會。彼亦在會・眾已散・有十餘人留以吃飯 與司 `帳者交代數語而去・ 其面貌直同死人・光知其犯房事所致 · 切

戒・以冗繁未果。九月初六至山・即寄一信・極陳利害・然已無可救藥・不 悔當時只說父母唯其疾之憂・未曾說其所以然・以致復濱于危也。 欲修書切

數日即死 死時關絅之邀諸居士皆來念佛・ 其得往生西方與否・未可知

不至墮落耳。夫以數月大病・由三寶加被不藥而愈・十餘日閒・氣色光華

也甚矣。光聞訃・心爲之痛・念世之不知忌諱冒昧從事・以致殞命者・其多 遠勝常人・由不知慎重・悞犯房事而死・不但自戕其生・其孤負三寶之慈恩

排印廣布 無數。若不設法預爲防護・殊失如來慈悲救苦之道。擬取不可錄而增訂之・ 以期舉世咸知忌諱·不致誤送性命。一居士以母氏遺資千六百元

・庶可舉世同享長壽康寧・而鰥寡孤獨之苦况・日見其少。如是則由濟同 人之死・令現在未來一切閱此書者・知所戒慎・并由展轉流通・展轉勸誡 擬印善書施送・光令盡數印壽康寶鑑・以拯青年男女于未危・則以羅濟同

人之死・令一切人各得壽康・濟同之死・爲有功德・仗此功德・回向往生

當必俯謝娑婆 焉者寡矣。康健時尚宜節欲・况大病始愈乎。十年前一鉅商之子・學西醫于 者莫善于寡欲 ・其爲人也寡欲・雖有不存焉者寡矣・其爲人也多欲・雖有存 ・高登極樂・爲彌陀之弟子・作海眾之良朋矣。孟子曰 ・養心

東洋・考第一・以坐電車・未駐而跳・跌斷一臂・彼係此種醫生・隨即治好 七百元・頗得意。次日由其妾處・往其妻處・其妻喜極。時值五月・天甚熱 歡樂・殞至重之性命・可哀孰甚。前年一商人・正走好運・先日生意 中・四分由色欲而死・四分雖不由色欲直接而死・因貪色欲虧損・受別種感 試詳考之・十有八九皆不壽・豈非以欲事多・兼以不知忌諱・以自促其壽乎 觸閒接而死 受涼・未三句鐘・腹痛而死。是知世之由不知忌諱・冒昧從事・以至死亡者 。凡傷骨者・必須百數十日不近女色・彼臂好未久・以母壽回國・夜與婦宿 ・開電扇・備盆澡・取冰水加蜜令飲・唯知解熱得涼・不知彼行房事・不可 次日即死。此子頗聰明・尙將醫人・何至此種忌諱・懵然不知・以俄頃之 而世之大聰明人・每多不壽・其殆懵懂于此而致然乎。光常謂世人十分之 初不知其有幾千萬億也。而古今來福最大者・莫過皇帝・福大壽亦當大・ 其本乎命而死者・不過十分之一二而已。茫茫世界 芸芸人民 ·獲六

失・決可成榮親之令器・此光之長時馨香以禱祝者。願閱者共表同心・隨緣 兒女者・以及爲同胞作幸福防禍患者・悉各發心印送・展轉流傳・俾人各悉 子孫之賢否滅昌・明若觀火・倘天良尙未全昧・能不觸目驚心・努力痛戒乎 則深知利害・其所關于祖宗父母之榮寵羞辱・與自己身家之死生成敗・并及 自無正見・被燕朋淫書所誤・以致陷身于欲海之中・莫之能出。若肯詳閱 知忌諱・庶不至誤送性命・及致得廢疾而無所成就也。彼縱情花柳者・多由 。將見從茲以後・各樂夫婦之天倫・不致貪欲損身・則齊眉偕老・既壽且康 十有八九・由色欲死・可不哀哉・此光流通壽康寶鑑之所以也。願世之愛 而寡欲之人恆多子・而且其子必定體質強健・心志貞良・不但無自戕之過

關自由結婚邪說文序代撰

流布・則人民幸甚・國家幸甚

八一四

能一生于世・即自由成立・絕不受父母撫育教導・ 盛倡自由結婚・何不倡初生即不受父母撫育教導・而自由成立爲人乎。彼若 天制禮 外相輔 不能生存于世。及其年長・則父母為之擇配・俾得享男女居室之樂・ 皆須父母撫育。自後雖能自行動・而諸凡事理・皆須父母安排教導・否則便 人稟天地陰陽之氣・受父母精血之質而生。其初生以至三四歲・一舉一動 唯以兩情愛戀而爲夫婦・則與禽獸何異。彼不知好歹者・專效歐洲惡風 。若不能 ・俾人各守彝倫・以盡人道與子道耳。若不依聖人之禮・與父母之命 得以奉父母而盡子職 如此 ・唯年長能以自力致男女愛戀爲標準者・即爲逆天悖理侮 ・綿世系而防老死。此天地固然之道 則自由結婚 · 實爲至當之 聖人法 以期內

聖蔑倫之極重罪人。以其心行・與禽獸無殊焉。無錫楊章甫居士・作文闢之

因爲序引・以發所未發・冀倡此說者・咸覺悟云

歸心堂跋

點劫・長受輪迴。縱欲出離・末由也已。喻如暗室觸寶・不但不得受用・反 彰。凡夫全體迷背・反承此功德力用之力・於六塵境・起貪瞋癡・造殺盜淫 法之本。雖在昏迷倒惑具縛凡夫之地・直下與三世諸佛・敵體相同・了無有 夫心者・即寂即照・不生不滅・廓徹靈通・圓融活潑・而爲世出世間一切諸 返妄歸真 致被彼損傷。迷心逐境・背覺合塵・亦復如是。如來憫之・爲說妙法・令其 異。故曰心佛眾生・三無差別。但以諸佛究竟證得・故其功德力用・徹底全 。因惑造業・因業感苦。惑業苦三・互相引發。因因果果・相續不斷。經塵 ・復本心性。 初則即妄窮真 ・次則全妄即真 。如風息波澄 · 日暖冰

即波冰以成水・波冰與水・原非二物。當其未澄未泮之前・校彼既澄既

心經云 泮之後・體性了無二致・相用實大懸殊。所謂修德有功・性德方顯。若唯仗 性德・不事修德 觀自在菩薩 ・則盡未來際・永作徒具佛性・無所恃怙之眾生矣 ·行深般若波羅蜜多時 ・照見五蘊皆空・度一切苦厄 。故般若

夫五蘊者 全體即是真如妙心・但由一向迷背・遂成幻妄之相 。妄相既成

以甚深般若・則了知迷真成妄・全妄即真 一真即昧・一真既昧・諸苦俱集。如風動則全水成波・天寒則即柔成剛。照 。如風息日煖・復還水之本體耳

故知一切諸 法 ·皆由妄情所現 。若離妄情 ·則當體全空。以故四大咸失本性

眼根佛事。入地如水・履水如地。水火不能焦濡・虚空隨意行住。境無自性 六根悉可 互用 0 所以菩薩不起滅定 ·現諸威儀 o 眼根作耳根佛事 · 耳根作

悉隨心轉。 故楞嚴云・若有一人發真歸元・十方虛空・悉皆消殞 · 乃照見

五蘊皆空之實效也

歸者

歸投

歸還

即返照迴光復本心性之義

然欲返

照迴光復本心性・非先歸心三寶依教奉行不可。既能歸心三寶依教奉行・自 可復本心源徹證佛性。既得復本心源徹證佛性・方知自心至寶・在迷不減

在悟不增。但以順法性故・則得受用・違法性故・反受損傷・而利害天淵迥

師導周居士・欲令子子孫孫・世奉佛法・乃以歸心名堂・請題其意義

·因書此以塞其責云

別耳

梵網經心地品菩薩戒疏注節要跋

說梵網經菩薩戒。俾一切菩薩・並梵釋諸天・與夫王臣士庶・若僧若俗・迨 心為戒・因戒生定・因定發慧・是則名為三無漏學。是以如來初成正覺・即 互攝互融・不容獨立。而初心入道・則持戒一事・尤爲要務 佛法廣大如法界。究竟如虚空。剋論其要・唯戒定慧三法而已・然此三法・ 。 故楞嚴云· 攝

印光法師文鈔卷三 跋 歸心堂跋 梵網經心地品跋

及娼優奴婢・三途惡道一切眾生・同皆受持。

是知此戒・乃如來煉聖烹凡之

大冶洪鑪也。良以六道眾生・雖則尊卑貴賤・種種不同。而一念心性・尚與

迹・以故普勸受持。倘能依教奉行・則宿世惡業・可以頓消。現生福慧・速 三世諸佛・無二無別。但由宿世善惡各異・致使今生果報不同。如來鑑本遺

眾生受佛戒・即入諸佛位。 是已成佛 得圓滿 。初則了妄即真・次則唯真無妄。自可復本心源・親證妙性矣。故云 位同大覺已・真是諸佛子。 又云汝是當成佛 我

奥・不易窺測 切要者・輯爲淨土津要。既而又輯續編・擬以梵網經弁之於首。又以經文深 不信乎。無名居士宿植德本・篤修淨業。欲令自他同出苦輪・選淨土著述之 常作如是信・戒品已具足。此如來金口爲一切眾生所保任者・可 。開遮持犯・難以解了。不有注解・ 實難普益。乃以清陳熙願

所節略之梵網經疏注節要見選 。則若文若義 ・自可一目了然矣。夫宏闡淨

何以首列梵網。良以欲生淨土・當淨其心。隨其心淨・則佛土淨。欲淨其 非持佛淨戒不可。果能持戒 ・則貪瞋癡心・不發現行。戒定慧道

印光法師文鈔卷三 跋 梵網經心地品跋

生親得實益・臨終決定往生者。請從持戒念佛真實行去・自可不虛所望矣 之主人。較彼帶業往生者・尙天地不足以喻其否泰・况上焉者乎。其有欲現 業盡情空者哉。其有自詡高明・藐視戒律・及與淨土・謂自性清淨 帶業往生・固已永脫輪迴・高超三界。常時親炙彌陀・自可速證法身。况已 縱令根機陋劣・未能如是。而以嚴持佛戒之清淨身心・真爲生死・發菩提心 惡持犯自他淨穢 趣戒・是趣不過。况又加以真信切願・執持阿彌陀佛萬德洪名。則能念之心 圓彰。恆沙功德・無量妙義・不求自得・具現心中。所謂戒爲法界・一切法 ・以深信願・持佛名號。迨至臨終・感應道交・蒙佛接引・往生西方。即使 與所念之佛 則高出九天之上。察其行・則卑入九地之下。生爲法門之敗種 ・相冥相契。現生固已心佛不二・臨終不生淨土・將何生乎 但任天真 • 即如如佛。從茲口口談空・步步行有 · 死作泥犂 。聽其言 · 有何善

石印異僧守松草書心經跋 以字迹相連不能割裂故未印

或欠缺 松 此經文雖簡略・理極宏深。性相互融・而真俗雙泯。萬法森羅・而一道清淨 世尊・鑑機說法・智慧自在。或博或約・妙理咸具。譬如月麗中天・影現眾 經也。以故自唐至今・聞人名士・每事書持・多有讀至數千萬徧者 水。不但大江大海・悉現全月。即小而一勺一滴・無不各各皆現全月・而無 爲諸佛之師・菩薩之母。六百卷般若之關鍵・一大藏聖教之綱宗。良由大覺 海墨而莫詮其義。語其精微・覓一字而了不可得。至圓至頓・最妙最玄 。是以觀照一起・頓空五蘊聚落。實相圓彰・誕登四德彼岸。語其廣大・罄 ・擬將此經・普納含識八識田中・以爲將來成佛種子。運不思議絕妙神筆 。猗歟懿哉。由眾生具有生佛平等之妙心・感如來說此真空實相之妙 。異僧守 誠

書寫流通。友人以此帖見贈。擬欲石印・以廣其傳。又恐或未盡識・因離

句楷書經文於後。爰跋數語・以企自他遠離顛倒夢想・究竟涅槃耳。須知此

褻黷・自取罪咎。則度一切苦・成無上道・ 經在處・即佛所在。消除災障・致多吉祥。務須恭敬供養・受持讀誦。毋或 若操左券而取故物矣 o

清世宗御製普陀法雨寺碑文跋乙卯年代趙希伊作

證鄰極 罕譬而喻矣。予昔讀浙江通志・見此碑文・不勝欽佩。定海廳志・亦復具載 非大智慧・莫能形容。清世宗以時雨潤物之義・極力發揮。可謂妙契佛心・ 清世宗憲皇帝・夙植德本・乘願再來。深入經藏・直達禪源。宗說皆通・悟 其能如是也耶 於皇帝中 今春來禮大士・見碑前供一玉佛 。秉靈山泗水之薪傳 ・最爲第一 0 佛法普利眾生・大士隨機赴感。廣大如法界・ 。若非久證法身・現茲末世・ ・闡即心即佛之妙道。自法流震旦・二千年來 而爲龕所蔽 即俗明真 無由觀光 · 廣度含識者 0 究竟如虚空 以玉佛來儀時

權供碑前 。後以建殿無地・遂致常住。査之山志・復失此板・悵何如之。

將來君子・皆得同沾法雨・共證真常云耳。 因秉燭恭錄。乃祈寺主・刻於木榜・懸之亭內。又補刻志板・各述緣起。庶

六度室跋 代唐 然子作

爲波羅蜜也。開如和尚・以此名室・可謂知法。而其志與行・亦可想見。爰 般若無五度・亦不能究竟到彼岸。二者具足・則一一度皆能到彼岸・皆得名 到彼岸。謂由此六法・於生死此岸・度煩惱中流・到涅槃彼岸故也。然五度 布施持戒忍辱精進禪定智慧・名爲六度・亦名六波羅蜜。梵語波羅蜜・華言 如盲・般若如導。五度無般若・不能究竟到彼岸。而般若如目・五度如足。

書此三字・并略述義意而贈之。

心歸淨處跋與劉智空居士作

變成妄想執著。固當唯精唯一・執持彌陀聖號・真信切願・企其往生西方 持之久久・心佛一如。不離當念・徹證蘊空。妄想執著既滅・智慧德相亦泯 爲無心道人 疣贅。若能於此直下契入・則其心之全體大用徹底圓彰・了無餘蘊。即可名 諸法之中。不垢不淨・無一塵之可立。即色即空・具五眼而莫見。處尙不有 夫心者・ ・淨從何來。淨處既無・歸將安寄。實際理地・不受一塵。說個心字・早成 0 隨其心淨 且約生滅門中・指其趣證之方。既由迷心逐境・向外馳求。全智慧德相 月印千江 靈明洞徹・湛寂常恆。有典有則・獨爲萬象之主。無名無相・混融 ・則佛土淨 ・風鳴萬籟・徧法界感・徧法界應矣。設或根機陋劣・未能證入 。即可與蘊空大士・比肩齊立・把手共行。普赴眾感・現身說法 0 不離當處・冥契寂光 。唯此一 處・方是吾人究竟安

身立命之處。願吾徒智空・普與法界眾生・同賦歸歟・則幸甚幸甚

項伯吹先生定海縣監獄講經參觀記跋

失教 矣。大體 爲政貴得大體。得大體則事無大小・皆有成效。否則但具儀文・而難得實益 非疑豫語。定海邑令在東陶公・學道愛民・窮理盡性・於儒釋聖人心法・大 人爲萬物之靈乎哉。故虎不入境・魚徙他方等異徴・載於史冊。而大學釋書 途惡報等事 有所得。其居心行政・唯以己立立人・自利利他為本。甫下車・即痛念愚民 言雖與不遠者・唯恐人致誠未極・乃反激其致誠之心必至其極。係決斷語 如保赤子曰・心誠求之・雖不中不遠矣。以保赤子之心保民・謀無不中。其 犯法囚監之苦。 維何 ・曰唯誠而已。當事者行政・果出於誠。雖異類尙能感化 本利己之野心・不懼害人之惡報 其原在於不知因果報應・福善禍淫 故陷乎此。因擬欲與彼官 。及生死輪迴 · 况

嚴・經教通明僧・爲教誨師。兩寺住持祈選在家通人・以充此任。陶公謂以 茲世道人心・日趨日下・不可救藥。乃命普陀前後兩寺住持・擇山中戒行精 治天下之大權 縱不能即生便與堯舜及佛之道德相齊。然希驥之馬・亦驥之乘。希顏之士・ 只作自了漢・而不能移風易俗。下焉者即便肆意橫行・以期享一時安樂。因 菩薩垂訓教人之真語實語・不付東流・其心方愜。夫因果報應・實儒教聖人 亦顏之徒。當仗佛慈力・帶業往生・以成就超凡入聖之最勝因緣。使聖賢佛 舐刀頭之微蜜 講三世因果・六道輪迴・三途苦楚・佛國安樂等。庶彼怵然驚怖・頓革先心 了無所用 。翕然信從・聿修後德。以知吾人一念心性・與堯舜無二・與佛無二 ・而且常與大糞同其臭穢乎哉。從茲敦行孝友仁慈・及戒定慧道 以身教者從 。但其言約略・遂致儒者習矣不察・漠然置之。致使上焉者 ・而取割舌之禍。以隨意雨寶之摩尼寶珠・俾永沈圊廁 0 教化獄囚 ・不徒在於能宣說也 0 **遂舉智德法師應聘** 一。誰肯 0

不但

0

ナ

當不止一二三四五六七也。雖然・其說法固不必盡用僧人。其所說若不以三 獄爲道場 效。何也・以其無可動於中・而如風過樹・泛泛然與己不相干涉故也。 世因果・六道輪迴・三途苦楚・佛國安樂爲本・縱令妙義能感天華・亦無實 跋蕪語。企閱者知教化獄囚之宗旨・並陶公之誠。想必有踵其事而爲之者 之不才見棄・以項君之參觀記寄示於光。閱之・不勝欣忭・遂忘其固陋・略 作佛之意・而爲此舉。可謂知大體・本赤誠・不愧爲民父母矣。而又不以光 教而犯法・一本格物致知・明明德・止至善・及人皆可以爲堯舜・人皆可以 至開講日 ・以獄囚爲法侶。爲定海立縣以來之所未有。良以陶公知獄囚以失 |・其佈置・與其演説・及所擬之章程・無不一本於誠。居然以監

往生論註跋

生死・吾人第一大事也。淨土法門・了生死無上妙法也。 代時教・浩若淵

冀證 此 法師 觀察門 嚴證齊諸佛之等覺菩薩 得佛心 海 易固日劫相倍 可帶業往生。上聖若肯回向・速得圓成覺道。仗佛慈力・與唯仗自力・其難 龍樹 示五門修法 • 生彼極樂。與觀音勢至等諸上善人·俱會一處。常時親炙阿彌陀佛 無生忍 則唯執自力・不仗佛力者・可以怵然驚・憬然悟。以期現生即得出此 其究竟暢佛普度眾生之本懷者・唯淨土一法而已 ・撰註詳釋。直將彌陀誓願・天親衷懷。徹底圓彰・和盤托出。若非深 ·具無礙辯 ・詳示淨土莊嚴・如來法力・菩薩 智者 圓滿菩提而後已也。 ・慈恩 。天親菩薩廣造諸論 令畢竟得生。 何克臻此。夫淨土一法・爲一切諸法之所歸趣 ・清涼 · 尚須以十大願王 • 具顯禮拜 永明等 吾言不足信 · 宏闡佛乘 ・自行化他 • 讚歎 功德 • 回向往生 。凡見聞者・悉願往生。曇鸞 • 。復宗無量壽經 作願 請質之普賢菩薩 • 同歸淨土者有由來矣 |。以下凡信願念佛 0 • 觀察 則文殊 • • 回向 · 作願生偈 普賢 自可 以故華 • 馬 0 0 以 鳴 論 則 知

大總統教令管理寺廟條例跋

殺盜淫 含識 出家 昔如來將入涅槃・以其法道・付囑國王大臣・令其護持流通。良以僧眾捨俗 得王臣護持・則法化廣被・外侮不生。以其強暴横逆者・息影而匿迹。調柔 惡修善 果。從茲反迷歸悟・兢兢業業。於心・則息貪瞋癡。於身・則戒殺盜淫。改 良善者・起信而投誠。故得大張教網・撈摝苦海之魚。丕振宗風・徹見自心 之月。內護外護 ・精修梵行。既乏資財・又無權勢 同沐法澤 致使長劫輪迴生死· 近則感人天之福樂。斷惑證真 ・相需而行。則如來法化・自可橫徧十方・豎窮三際。普令 。良由因聞佛法 莫由出離 ・方知從無始來・迷背本心 ·遠則成菩提之覺道 • 縱能宏揚法化 • 難免外侮侵陵 。既知此已・便欲滅除苦因・企得樂 。起貪瞋癡 由是恪遵佛教 · 造 。 若

嚴持自心 0 雖在暗室屋漏· 長如面對佛天。人懷善念 國息刑法 0 陰翼治

道 王臣・永遵佛囑・莫不崇奉護持・惟恐流通傳布之不廣也。溯自東漢・法流中 ・消禍亂於未萌。顯輔政猷・敦仁愛而相睦。由斯利益・西竺此土・歴代

臨 國。歷千八百餘年・莫不如是。迨至清末・法道衰微。哲人日希・庸 加以國家多故・不暇提倡 由是 班無信根人・覬覦僧産 0 僧徒率多安愚・不事清修 0 無法可設・遂借開辦學堂・以爲 0 教網既弛 • 外侮自 口實 人日多 0

甫立 每有改佛寺以爲學堂・奪僧產以飽己囊者・紛紛不一。及至民國初年・國基 |・風潮愈甚。同人憂之・遂林立佛教會・屢懇政府保護。故於四年・ 遂

有管理寺廟三十一 種條例頒布 。其意雖善 ・但以未加詳審 0 倘施行之人 稍

挾偏 見書・懇其修改。九年秋・程雪樓居士察其利害・又以意見書面呈大總統 私 0 則弊由是生・便成大碍 。凡屬法門緇素 • 莫不慮其後患 ・故屢有意

0

既蒙俞允・批交內務部集議。十年春・方始修正爲二十四條。 詳審斟酌・有

印光法師文鈔卷三

跋

管理寺廟條例跋

利無弊。 祈同衣 緇素咸知 轉殘忍爲仁慈・兵戈永息。變澆俗爲淳風・世運昇平。如是則上不負國家護 佛慈恩 金城湯池・亦何裨益之有。倘主帥明哲・善得士卒人民之心。仁政所及 近。而內中主帥昏愚・撫民御兵・各失其道。則士卒百姓・皆成叛黨。縱 北京法源寺住持道階法師・護教情重。遂擬急刊流布・以期僻山窮陬之處・ 不頌戴 必須內護有人・始獲實效。譬如外有金城湯池・ 。四遠聞風・悉來歸服。則舉寇讎皆爲赤子・盡叛逆悉作良民矣 仍呈請大總統・以教令公布施行。然政府頒布・不能盡人皆見。而 仰僧懿行 各各發菩提心・力修定慧。以如來無上妙道・自行化他。則人各感 ・無或疑慮。問跋於余・以資鼓勵。余曰・如來法道・雖藉外護之 0 自然無信心者・發起信心・有信心者・力行佛道 雖則堅不可破·熱不敢 0 將見 急懇

持之至意・下不負自己學佛之深心。而佛恩親恩・皆堪報答於萬一。凡我同

尙期勉旃

藥師如來本願經重刻跋

菩提心・受持此經・此呪・及此佛名號・推其功效・尙可以豁破無明・圓成 果上利生之事・實爲究竟離苦得樂之無上妙法也。眾生果能發慈悲喜捨之大 來本願經者 是則唯欲利人者・正成就其自利。而唯欲自利者・乃適所以自害也。 處。但以無大悲心・不能直契菩提。以致福報一盡・仍復墮落・可不哀哉 所感業報・或生貧窮下賤・或墮三途惡道。即令戒善禪定自修・得生人天樂 私自利爲事・雖父母兄弟之親・尙不能無彼此之相・况旁人世人乎哉 佛則唯以無緣大慈・同體大悲・度脫眾生爲懷・了無人我彼此之心。縱度盡 佛與眾生・心體是一。而其所受用・天淵懸殊者・以其用心不同之所致也。 切眾生・ 亦不見能度所度之相。故得福慧具足·爲世間尊。眾生則唯以自 ・乃我釋迦世尊・愍念此界一切罪苦眾生・爲說藥師如來 藥師 (。故其 · 因中 如 0

印光法師文鈔卷三

八三二

授與一 佛道 此經 四百二十八字。依灌頂第十二經・添入八菩薩名。以三經原是一經故也。 又復缺略 師・以心安和尙所書之本 或生極樂世界。待至豁破凡情・圓成聖智・則直契寂光・東西俱泯。而復東 西歷然・隨願往生。則與彌陀藥師・同歸祕藏。是名諸佛甚深行處。聖聰大 三菩提法 0 須知藥師一經・及與佛號・并其神呪 又此經係唐玄奘法師所譯 · 况其餘種種果位 及此 切眾生。而眾生智有淺深・固不得不隨其所樂・令彼所求各各如願也 。凡至誠受持者 後之知識 佛號・ 以是禪教律淨之總持法門。故受持者 ・欲令經義完全・故依七佛本願經・添入說呪一段・ ・種種福樂乎哉。然在佛心・固欲以無上覺道・全體 • ·即是以佛莊嚴而自莊嚴也。 刻板流通 0 其八菩薩 。欲令受持者發起正信 · 但舉其目 。即釋迦藥師 ・未標其名 • 所得之阿耨多羅三藐 故玉琳琇國師 或生淨瑠璃 · 祈簡明以告之 ٥ 說 院一段 世界 常持 須 共

知在昔貝葉・

唯屬鈔寫

· 或有遺亡

以致譯文全缺互異

。 後

人添入

故諸註者・咸皆宗之。恐以藏本對校・致生疑慮。故併書緣起・以慶完

壁云。說呪一段從說呪前復次曼殊室

聞經室跋

四大本無・ 五蘊皆空・根塵迥脱・心境俱寂・何者是經・何者是聞 ·何者是

室。一念不生・前後際斷・靈光獨耀・覿體全真・何者非經・何者非聞 者非室。能如是會・名善聞經。否則當讀誦時・竭誠盡敬・如對聖容・親聆 何

圓音・自可契入深固幽遠之經藏・親見本具之佛性矣。願吾徒契覺・篤信此

語而契悟焉・則幸甚。

信願念佛決定往生淺說跋

浄土法門・爲諸法之歸宿。猶如大海 印光法師文鈔卷三 跋 藥師經重刻跋 聞經室跋 盡世閒所有江河溪澗之水・莫不趣る 往生淺說跋

蓮榮堂跋

其中。然一至其中・則同得海名・同成鹹味。雖深廣之極・莫能窮其邊底 門也。閱者倘不以淺近忽略而依行之・則雖未出娑婆・已非娑婆之久客・未 所說之法・乃九界同歸・十方共讚・千經俱闡・萬論均宣之無上甚深第一 發切願・持佛名號・求生西方。以古德所說・率皆文深義奥・初機不易領會 根者・同得出此娑婆・生彼極樂也。童蓮國居士・欲令同人・同生正信・同 菩薩祖師善知識 法以來・不知幾何恆河沙恆河沙數眾生・依教修行・往生西方也。良由歷代 自淺而易見處論・其名體味性・固與深不可測處・無二無別。自世尊宏開此 。乃宗其義意・而以淺近之語言出之・因名之爲淺說。須知能說之文雖淺 ・上宗佛意・下順機宜・循循善誘・令知所以。故得宿具善 法

蓮榮堂跋

生極樂・即爲極樂之嘉賓矣。

八苦・ 生死 中也 祖宗回向・亦得承斯善利・同生西方。又况既生西方・證無生忍 是・倘能具大慈悲・發大誓願・廣修眾善・普化一切・以此功德・奉爲父母 劫輪轉 尊崇・不足為榮・即令得作天帝・乃至上生非非想天・亦不足為榮。何以故 幾與蓮相似・榮何如之。再進而論之・一切諸法・悉屬生滅。勿道世閒富貴 蓮之爲物 患難・視若幻化・素位而行・自適其適。其淫移屈怨之情念・畢竟不生・庶 現身法界・度脱眾生而已。然在凡夫地・於現生中・斷難如是。固當真爲 以天福 ・發菩提心・以深信願・持佛名號・以期往生西方極樂世界九品寶蓮華 常享四德 果能 · 無有出期 ・雖出淤泥・體常清淨。人能一 盡・復降人閒 如是 ・則臨命終時・感應道交・蒙佛接引 親炙彌陀 ・辱莫斯甚・榮於何有 ・既生人閒・難免造業 • 参隨海眾 ·聞法受記· 切不著・樂我天真 。所可榮者 ・既造惡業・必墮惡道 速證無生。不但自己如 ・断盡煩惑・成菩提道 ・即得往生。 ·富貴貧賤夷狄 則成無上 從茲永離 · 長

印光法師文鈔卷三

跋

蓮榮堂跋

? ブ

道・獲大涅槃・乃決定必得之事・其爲榮也・又何加焉。蓮榮之義如是・祈

自戕 顧名思義而實行焉・則幸甚。 與慧命同襄。其若自若他之福澤·殆與虛空同壽而無央。乃爲發其隱義·俾 其子若孫併族中受贍者・咸念阿彌陀佛・求生西方。是蓋財與法同施・色身 求長生・無不立見其死亡。且令神識永墮惡道・備受禍殃。本欲利己・卒成 福澤綿長。爲己爲私・便如春露秋霜。倘或加以機械變詐・則何異服砒鴆以 人未有不爲自身及與子孫謀者・而謀之之道・固宜參詳・若爲眾爲公・則其 故八九百年・長發其祥。璞君居士・上承父母之志・踵文正之遺芳。且令 鄧璞君義莊跋 。雖屬自取・實可悲傷。宋范文正公置義莊以贍族・欲令族人恆受其利

其子孫與族人・并見聞者・同沐佛光

記

釋迦如來眞身舍利來儀記代概

世界微塵・莫能窮其數量 熟解脫之益。六道四生・三乘五性。聆圓音而悟道 中天調御・釋迦世尊・塵點劫前・早成正覺。泯三際而住寂光・常享四德 愍九界而示受生・頻垂八相。從初出世・乃至涅槃。演偏圓頓漸之法 又以利益未來・悲心無盡。碎定慧所生丈六之金身・成金剛不壞八斛之舍利 于是八國均分・各起寶塔・普令含識・廣種福田。後一百年 。然機薪既盡 ・應火亦息。 晦迹歸真·示現滅度 睹妙相以明心者· 摩竭提國有 ・施種 雖盡

八三六

利 第出現 禮聖迹。遂于光緒三十年乘輪西邁 不聞降魔制外之音 國者・佛法大 得人身 舍利 以人天獲得・悲喜交流・竭盡心力 洲 阿育王 無二無別 凡 • 伽耶王舍 商賈悉皆罷市 或供半身・四分之一・萬分之一・乃至如芥子許・是人福德・與供養佛 役使. ?佛法未至之處・則安置于地中。東震旦國・有十九處。大教西來・ ·法已衰替。昔人履險涉危 ・即今五臺育王等是也。涅槃經云・若人以深信心・供養如來全身舍 統王 鬼神・以七寶眾香爲末・造成八萬四千寶塔・供養舍利・散布 。以佛舍利・即佛色身・ 一閻浮 、興。僧眾雖多・不立 恆河雙林 ・同禮寶塔・共植 但見荒煙蔓草之迹 威德自在 · 顯著聖迹 0 ·煙爨 切鬼神 • • • 來因 觀光暹羅 皆由無作誓願・同體慈悲之所示現 尚多往求正法 恭敬供養 逐一 0 緬 舉國奉佛 0 · 皆爲臣屬 巡禮 佛世芳規 想昔年 。福 · 次及緬 0 惜世遠人亡 如來出世・尚在沈淪 • 。現今水陸俱通 爲之痛息 設食待僧 。啓其祖 0 庶幾髣髴。 甸 • 後至錫蘭 阿闍世王所 0 凡 法替教 次至 至錫 遇禮 · 敢不 0 此 中 拜之 弛 0 巡 是 南 印 藏

城 我同倫 伽經處 中 禮・皆植福壽之因。 而慧日昭彰。三覺圓滿于初心・萬德具足于當念。以如是因・獲如是果。凡 寶光・龍興・廣德・三寺供養。按西域記・僧伽羅國・即古師子國・在大海 觀音之聖道場地 粒 加 我國福田・此塔國王所建・何敢違佛犯法・私與外人。因日日禮塔・冀佛冥 0 此塔乃其創建耳 0 0 近南印度 適值重修寶塔・中藏舍利・百有餘粒 既滿我願 輒痛哭流涕・悲不自勝。如是十有二日・感動彼心・稟明國王・許十二 0 昔阿育王弟摩醯因陀羅出家證道・遊化此國 幸鑑愚忱 ・即錫蘭國也。國東南隅・有楞伽山・巖谷幽峻・乃如來說楞 彌感佛恩 。 因留三粒· 0 供養恭敬 夫如來舍利 0 即回中國 監院靜明 ·併感尊貴之果。迷雲盡而性天朗耀 神變無方 · 相宜安置 ・修木浮圖而供養之。請九粒于四川 0 懇祈數粒 0 濟度幽顯 。普陀山靈石庵 · 建立塔廟 福我東人。彼言舍利 • 覆被 人天 · 大興佛法 · 乃善財參 • 0 罪霧消 見聞

瞻

釋迦如來玉像來儀峨嵋山萬年寺毘盧殿記 代撰

檀雕 高而迹廣 薪盡而應火亡・原無滅而頻頻現滅。如是垂迹・豎窮三際・横徧十方。惟本 悲心莫置 塵點劫前 竊以諸佛出世・各有時節因緣 以金銀銅鐵等物・雕鑄塑畫佛像・乃至極小如一指大。此人現生滅無量罪 汝初爲軌則 如來欲示孝道・升忉利天三月安居 **帰佛形像** ・類源遠而流長。且據此番成道・時當周穆二年。造像功德經云 。方便施化 • 早成正覺 ・造佛形像。令諸眾生・得大利益。汝之功德 • 承事供養 0 住寂光清淨之土・證法報圓融之身 應迹無窮。孺慕深而慈親至・本不生而數數示生 如佛無異 。像教流通・徧周十方三世。 • 0 及至九旬已滿 爲母說法 。優陀延王渴仰于佛 • 佛降人間 。又以愍念眾生 ·無能及者 溯我釋迦世尊 0 乃謂 ·以紫旃 -。若人 王曰 機

獲無量福

後世尊貴豪富

信樂正法

展轉修習

至成佛道

由是各國王臣

賢菩薩聖道 迴中 本・篤修淨業。往遊印度・巡禮聖迹。 身而爲說法 萬 劫 來・涌地裂山而出者・載諸傳記・多難具陳。懿哉世尊・慈隆即世・悲臻末 即空。直須 知 o 卉 相 供大殿內 本殿又爲十方常住 俱造佛像 0 絕攀緣 阈 相 善根 離 0 法體瑩淨・妙相莊嚴。豈良工之能琢・疑古佛以再來。以本寺乃普 相 場地・ 未種未熟未脫者 • 。天覆地載 而赴眾感・ 。至阿育王所造最多。迨夫大教東流·每有金石佛像·浮江漂海 心歸命・畢世投誠。朝斯夕斯・念茲在茲。若能一念冥符・ 普令緇素 其或六根解脫 歷朝敕建 如一月普印于千江。住真際而應羣機·猶一雨徧潤 僧眾雲集 ·恭敬供養 莫喻斯恩。 • ・令其即種即 自可心心印心 四眾歸崇。 0 。當知此像 志精修道品 粉骨碎身 迴至緬甸 熟即 佛殿與拳巒齊峙 從此復本歸元 • 脫 • 罔酬 即佛真身 ・謹選美玉・雕佛三尊・請 0 無時不啓度門 應以像身得度者 此 德 。 非 玉 非 石 ・ 即 色 · 皇文共日月爭光 0 清福大師宿植德 塵消覺淨 0 因送一 即現像 尊 乎

八四二

蘊空而五 · 三惑斷而三德圓 。于是波騰行海 雲布慈門 四攝齊施

0

德圓彰 報恩。 法不著 劫前 願念佛求生淨土一 隨機所說種種法門・雖則大小不同・權實各異。皆仗自力・斷惑證真 機宜・循循善誘。大機則示以五蘊皆空・六塵即覺・畢意一法不立・直下 行・成等正覺。拯彼迷流・同登覺岸。說法四十九年・談經三百餘會。隨順 真如法性・生佛體同。迷悟攸分・苦樂天殊。故我世尊特垂哀愍。雖於塵點 ・早成佛道。又復悲運同體・慈起無緣。不違寂光・示生濁世。出家修 陝西南五臺山大覺巖西林茅篷專修淨業緣起記 故 。小機則曲垂接引・爲實施權・令其漸培佛種・以作得度因緣 於如 盡來際以展轉傳持・俾慧命以永劫常住。是名真佛弟子・可謂知恩 來普度眾生之懷・未能究竟舒暢 門。 指極樂世界 以爲本有家鄉 。由是於諸法外・又復特開信 指阿彌陀佛 以爲無上 (・方出 如如 萬

茲在茲 斷 能一念回光 終時・地獄相現・若能志心念佛・即得蒙佛接引。良以佛視眾生・猶如一子 又復眾生心性 是輪王力・非己力也。畢世修行者・固然如是。即五逆十惡極重罪人・臨命 仗佛力 得迥出凡流 佛乘。縱令博地凡夫・通身業力・亦可仗佛慈力・帶業往生。既往生已・即 福慧增崇。臨終則蒙佛接引・託質寶蓮。其有惑業已斷・則即登補處・速證 慈父。令其發菩提心 於善順者固能慈育・於惡逆者倍生憐愍。子若回心向親 喻如千年暗室・一燈即明。此實一代時教最妙之法・上聖下凡共由之路 0 。則以己信願・合佛誓願 喻如跛夫日行數里・若乘轉輪聖王輪寶・則頃刻之間 · 直同雲開月現 ·高預海會。惑不期斷而自斷 與佛無二。由迷背故 • 持佛名號 。性本不失・月屬固有。故得歷劫情塵・一念頓 。生佛相契・感應道交 ·以深信願 ・起惑造業・ · 真不期證而自證 · 求生西方 錮蔽本心 。現生則業障消滅 0 果能拳拳服膺・念 ·親必垂慈攝受 • 0 此之法門 不能彰顯 ・徧達四洲 0 倘 全 0

休 九重。 教東來 殊少顯化 兼通 本 行 大聖書名 明則匯禪教律 0 懷感 多難勝 **徧透九界之機宜・極暢如來之本懷。猗歟懿哉。** 宰輔 · 行解 無一法而不通・唯此法以是尚 如 · 廬山創開蓮社 牧伯 飛錫 則等 0 數 自永明後・率多明垂言教・切勸往生。 相應。專重淨土· 明則有楚石 0 舉其尤者 ・歸於一心・ 0 承遠 至於宰官居士 争先歸依 • 法照・少康 • • • 妙叶 元魏則有曇鸞 0 唱百和 四 作四料簡 普勸修持 • 明則鈔述 • 若劉遺民 蓮池 ・大行 ・無不率從。千五百餘年來・ 。宋則有永明・昭慶・四明 ・偏讚 • 蕅益 妙宗 。在昔之時・禪宗諸師・多事密修 0 陳隋 • 0 如上諸師 白居易 淨土。昭慶則血書華嚴 • 0 理極 清 則有智者 則有省庵 何可得而思議也。及至大 如死心新・真歇了・ 觀道 文彦博 ·悉皆道超 0 0 長蘆 唐則有道綽 • 夢東 • 楊無爲 則擬結 十地· 潛修顯化者 ・長蘆。永 莫不宗說 · 社結 蓮 • 德震 善 中 Ŧ 社 峰 導 日 淨

袁宏道

周夢顔

彭紹

升等

0

或結

社

以精修

0

或著論:

以敷宣

如

若賢 若緇若素 異世同音 • 極力弘闡 0 故得蓮風大振 ・普徧中外・ 滔滔然

回向往生。觀經五逆十惡・將墮阿鼻之時・若能十稱佛名・即得高預末品 如百川萬流之朝宗於海 0 良由華嚴法身大士・證齊諸佛之後・尚以十大願王 o

故得無機不被・無法不攝。 能出其外者 下不能普利羣生 0 誠所謂 0 由是恆沙如來・出廣長舌以讚揚 九界眾生離此法 如天普蓋 ・似地均擎。森羅萬象・無一不在其中 · 上不能圓成佛道 。諸宗尊宿 。十方諸佛捨此法 ·發金剛心

而流布。南五臺者・係觀音大士降伏毒龍・現比邱身所開道場。自隋至今千 三百餘年 ・其間高人軼事・以屢更滄桑・悉皆湮沒・無由而知。至明季時

大師在家時 有性天文理老人・隱居無門洞 • 即與夫人湯氏歸依座下 0 湘谷 沿馬 0 繼則依之披剃。不久老人復返長安 後因遊方至杭州 住於黃龍庵 0 蓮池 ۰

蓮池中興淨宗・其源實發乎此。理老若非出格高人・蓮池豈肯屈身座下・始

印光法師文鈔卷四 記 南五臺西林茅蓬記 終依止乎。事載雲棲法彙・蓮池及太素塔銘中。夫觀音大士・

輔弼彌陀

・度

脱眾生。此山又爲中興淨宗發源之地。其主其山・皆與眾生有大因緣。鶴年 居士高恆松者・出身江蘇・篤信佛乘。纔登仕版・即棄簪纓。備詢宗匠・效

善財之徧參。普禮名山・同紫柏之遊歷。至止此山・已經二三。於民國三年

專修淨業。 糾合秦僧 以期若存若亡・咸獲往生。後於禪悅之暇・遊於靈應攝身二臺之 ・修普同塔於大臺之下。俾十方禪侶・死有所歸。復建二靜室

因建茅篷二座・專修淨業。以遠宗廬山・近法雲棲。決志西歸・故曰西林 見其巖高峻・其地平敞。恍悟宿世曾住此處・遂名其巖曰大覺

□出家此山・曾侍大士香火。後以參叩知識・雲遊諸方。迄今三十餘年・道業 未成 。以故久寄海上・無顏復回故鄉。一 日居士自長安來・令將淨土法門

及此山此篷作一緣起。擬先刷印若干張・俾見聞者開發信心。繼則立石篷中 以垂永久。因喜不自勝・撮略述之。雖詞旨拙樸・無補法道・亦不暇顧云

書華嚴經訟過記代寬慧師作

象外 於毫端 菩提 多即一。全他即自。故云十世古今・始終不離於當念。無邊刹土・自他不隔 無不說此法門。 不過復其本體。於本體外・了無所增。但以智斷究竟・徹露本地風光。圓滿 而珠在衣裏・迷者不知。不得不於無可修中論修・無可證中論證 大矣哉華嚴經之爲教也。稱法界性・說常住法。依真如心・示即具體。理超 二位之次第・信解行證之淺深。所謂全性起修・全修在性。及至圓證妙覺 而恆沙法門・包括淨盡。無邊妙義・顯示無遺。全事即理。全修即性。全 ・道契寰中。 ·實無一法可得。因該果海 故得受持誦讀 十方菩薩修行・無不依此軌範。 寂照圓彰 ·罪山崩而福海洪深。書寫流通 ·能所雙泯 ・果徹因源者・此之謂也。 0 離凡聖之假名・絶生佛之稱謂 文雖八十一 迷雲散而慧日朗耀 卷・六十萬餘言 十方諸佛成道 。故有五十 然

八四八

對聖容 緣訟過 呵日 但以 盡敬 常・生安養以侍導師。豈不孤負自己一番苦功・與諸師贊襄之莫大恩德也耶 所希望・大不可言。如此草率・何以能上感三寶・下契自心。斷煩惑以證真 能不愧死 0 孤陋 汝取華嚴感應傳讀之・見德圓修德等古德書經之懿範 **懺除宿業。蒙寂山和尚** 宿生多幸・得入法門 少閱經教・未諳規程。雖常然香燈 ・汝發心寫經 雖拙! 寡聞 亦冀一 親聆圓音 機仍舊 愁 • 有過不知 聞命之下 切四眾・受持讀誦一切經典・ ·而恭謹篤至。一 • 庶慧 擬欲資之以懺宿業 。時歷二周寒暑 之罪過 痛如割心 0 ・諦閑法師・及諸善知識・提獎贊助・得遂其願 往業甚深 藉 0 部筆法 深恨最初不遇此老 ・心不契道 以消滅 ・隨書隨禮。而字體隨便・不甚端整 • • 已書六十餘卷。一 顯本有 • 悉皆竭誠盡敬・無或怠忽。 前後不同 而當人之福慧速得圓滿矣 0 擬欲書此不思議甚深大經 超凡入聖 • 0 0 因頓 與彼所獲之利益 恐閱者見怪 日有一 • 了生脫死 改前非 老宿見而 • 故述 竭 0 其 如 誠 0

重修普陀太子塔兼造荷華池欄杆碑記《了餘師作

南隅 時・住持普陀。至元統間・購太湖石・覓上妙工・造多寶佛塔一座・於寺東 道高一世・德感九重。五坐道場・宏闡宗乘。王公大臣・多從問道。於天歷 常啓・宗風不墜。允爲震旦佛國 存。故令四眾・建立塔像。企其瞻禮投誠・漸種善根。一覿聖容・永爲道種 之本。如來憫之・隨機說法。普令三根・隨分受益。又以法音有間 迷真起妄 示迹之勝地・歴朝祝嘏之道場。自五代梁貞明間開山・迄今千有餘年。普門 。以作返妄歸真・背塵合覺・消除惑業・復本心性之最勝因緣。普陀乃大士 切眾生・一念心性・與三世諸佛・無二無別。但以無始至今・從未悟故・ 其高五層 ・背覺合塵。反承此不生不滅常住佛性・而爲起惑造業 計九丈六尺。上三層四面· ·東南福地。當元季時 各雕佛菩薩 · 有孚中信禪師者 羅漢聖像 ·輪迴生死 ·塔像常 。慈容

宿承佛囑・宏護三寶。今太子塔・勢將崩倒。僧等愧無德能・無從設法 眾生福 性良來山 勢將崩倒 俗稱爲太子塔焉。迄今五百八十餘年・歲月經久。兼以大海之中・鹹霧颶風 烈日嚴霜・摧殘諸物・最易敗壞。故其塔頂已脫・聖像殘缺・石縫裂開 ・儼然如生。精工妙手・悅人心目。宣讓王嘗從師問道・發心施資 畑乎 。竊念前人建立・原爲國民植福。忍令破壞倒塌・以泯滅古迹・ 擬建道頭牌坊。吾友印光・偕餘與法雨住持了清・共謂之曰・公 。但以僧等財法俱貧 ·莫由措辦 。戊午六月・適值錫周居士陳公 o 願 故 與

難中止 春三月・隨即開工。俾多寶佛塔・又復從地湧出。普濟寺前・常見珍池欄楯 資・以增輝普陀・ 愚誠 不惜鈞力・爲之重新。或可置彼修此・以急先務。伊應之曰・吾願己發 仗彼福力・ 然既蒙見委・當努力代爲諸師 唱導四眾。一時名公偉人・悉發信心・協力贊襄。故於今 蒙前大總統黎公・前大總統馮公・今大總統徐公・各出淨 ・募緣倩工・勉負責任。因具疏詳述

。又開拓地基 ・創建塔院。築正室五楹・偏廈四間 .。凡所需用・悉皆具備

安一淨行頭陀・長時奉侍香火。定海縣知事馮公秉乾聞之・不勝歡喜・隨即

業者 出示保護 常遊珍池 。可謂宿具靈根・不忘付囑者也。從茲人普門者・親見多寶 。其功德利益 ·當與虛空同其壽量。 非筆舌所能形容也已 。修淨

功既成・乃述其緣起・勒之貞 珉・永垂不朽

觀音大士・ 普陀海岸道頭創建水泥牌坊重修迴瀾亭碑記 誓願洪深・慈悲廣大。於十方無盡世界・普現色身・隨機說法 代了 餘師作

諸大乘經・ 悉載其事 0 然即就此方應凡夫機 ・所示之迹・亦復多難勝數 • 妙

不可測 。況普應六道 ・及界外三乘之大機乎。若非圓證法身・何能有此大用

牌坊一座於海岸。蓋欲示人以苦海無邊 錫周居士陳性良・沐恩甚深・報恩心切。擬欲同人・咸深感想。因建水泥 ·回頭是岸。 生死海中・ 唯有大士可

印光法師文鈔卷四 記 修太子塔記 普陀建牌坊記

EIJ

爲恃怙

因略敍伊沐恩之事・勒之貞珉。企後之來哲・同生信心・同蒙覆庇

庶可即妄明真 (・消人我之幻執。識心達本・證寂照之佛性矣。錫周居土

夫人胡氏 賦性忠厚 ・宿有信心。禮佛誦經・寒暑疾病・修持不懈。年三十餘・長子不 。初唯講求儒道之旨・於如來大法・及三世因果之理・尙未深信

能言語 育・行善益力。不久復有娠・將及誕期 不能轉側 0 身瘦如柴・ 體熱如火。名醫束手· ・乃得大病。二十九日不進飲食 殆無生理。 一夕夫人 · 不

夢一老媼 ・手持數莖蓮華。謂曰・汝由宿業・膺此惡疾。幸植善根深・以故

爽快莫喻。因即 ·來安慰汝。隨以蓮華周身拂拭 強醒 • 通身流汗 0 ・曰拂汝業障・好生嘉兒。遂覺身 而熱退身安・顔色溫和 。直與好

心清涼

我從南海

等無有異 而兒體豐滿龐厚 0 次日即生一子・適爲三月三日上已嘉辰 · 與無病者所生無異 。今年此子已十歲矣。噫嘻異哉 經此燒熱飢餓二十

居士荷蒙大恩・直同生死肉骨。方知佛經所說菩薩不思議利生之事・真實

碑中。 竭誠至極 各各恭敬供養 亭・需費五萬有奇。雖亦廣乞名望大老・各出淨資・襄成盛舉。然塔之崇高 歲來山 徒爲大悲主憐憫悲傷・而無從救度耳。哀哉。由茲信向之心・十分懇至。去 力經營・以成就此功德莊嚴。信心宏願・吁・可敬矣。捐助善士・悉載塔院 ・池之莊嚴・坊亭之壯闊・鳩工選材・役夫無算。無一非居土慨輸巨款・獨 普現色身・度脱眾生也已。又觀音大士・乃過去古佛。以大悲心・垂形九 勢難中止。 應以何身得度者 茲特書此菩薩應化無量百千大海中一滴之相。令諸同人・生正信心 擬修牌坊。吾友印光以太子塔將頹·勸令置此修彼。然伊願心已發 ・何難斷惑證真・超凡入聖。將來亦可如菩薩豎窮三際・橫徧十方 故於今春・兩工並興 · 稱念名號 即現何身而爲說法 。豈但常蒙加被 0 兼建塔院 ・逢凶化吉・ 但以眾生機劣 ·及寺前池畔欄杆 遇難成祥已哉 ・無由得見本相 並重修涼 0 倘能

不虚。惜拘墟之士・以凡夫知見・肆口謗黷。適形其無知無識・坐井觀天

印光法師文鈔卷四

記

普陀建牌坊記

凡蒙祐者・多皆見爲老媼。蓋以隨順劣機・顯示婆心。若謂實屬女身・則于

菩薩上同下合之道・毫未夢見在。

無著老人創建常明庵緣起碑記代化宏師作

寂滅真宗・唯心本具。圓通妙道・非人莫宏。興梵刹以闢普門・布慈雲而注

法雨 立山・法名滿圓・別號無著。道光五年乙酉・葭月二十五日・示生於松江金 山顧氏。父即福本悟公。行年十四・父即出家。心欲隨之・以母在不果。及 。于法運垂秋之際・振將絕欲墜之宗・唯我先師無著老人其人焉 。師諱

陀・或居松江 嚴。徧參海眾 至弱冠・禮父祝髮。詣大崇福・受具足戒。以寇據南京・不便參方。遂住普 。時法雨寺・彫敝已極・住持虚席。本山尊宿信真和尙・率諸 晦迹韜光・無心應世。至同治庚午・掩關於伴山庵 日禮

・叩關請師。辭不獲已・遂允許之。壬申春進院。寺產素薄・香積不充

資糧 所賴緜佛法・翼國政・感人心者・唯此一法耳。汝輩當恪遵之・毋或廢弛 覺·以作因心。因該果海·果徹因源。即世相以達實相·以凡心而契佛心 浄土一法・三根普被 寒暑無間 庶可不負四恩・ 居是庵。決志西歸・念佛不輟。又令庵內二時課誦・二時念佛。永爲恆規 可觀矣。久之・意欲憩息・專修淨業 方檀信・布金恐後。不數年間・百廢具舉。雖未全復當日舊制・而大局已有 ・末世眾生・障深根鈍 破屋頹垣・荒涼滿目。師傷之・以興復爲己任。竭力經營・整理修葺。 取心性寂照圓融・横徧豎窮之義・欲人修因以克果也・光緒甲申春 。又化開等置田四十四畝・以助念佛諸師衣單之費・其詳列後。老人嘗 .。置稻田三百二十二畝。除撥無著公堂一百畝・餘者永爲常住念佛 均資三有。後之當家 ·利鈍全收 ・向上一著・不易湊泊。大悟尙難 ・上聖下凡・皆當修持 。 因築庵于寺西清涼岡之麓 ・ 若有廢此成規者 0 非我弟子 良由此法・全攝果 何況實證 額曰常明 0 即會同

唯

٥

. 退

四

印光法師文鈔卷四

記

創建常明庵記

0

八五六

0

法眷 臘四十六年・世壽六十五歲 立時擯黜 毋或容隱 。所度弟子數十人・能繼迹者・唯有化聞 ・以負我心。至己丑年臘月初 ・安然神逝 。宏等 僧

雖列門牆・未登閫奧。其所悟處・不得而知。不敢推高以濫聖・亦不敢就下 以屈賢。姑摭其言行大綱・以明此庵之緣起云 0 建、洪楊之亂、衰敗不堪、無著乃復重興耳按法雨寺、自明萬曆八年開山、前清兩次敕

砌普陀山仙人井功德碑記 代戒如作

井前鄰大海 間 之葛稚川等 覩夫慈容。 圓通大士・永劫常住此山。超塵仙人・不時安居斯地。雖像教未至・凡俗莫 • 始建道場 嚴寒則煥。質沈重而清澄 而應身所居・仙真恆瞻乎佛日。故秦之安期生・漢之梅子真 ・上覆土窟。入地丈餘・從下湧出 悉皆寄寓茲山・修真養道。所飲甘泉・名仙人井。及至梁貞明 0 則大士宏慈・由天章而廣被 ·味甘美而潤澤 。仙人古迹・隨佛法以流傳 。 極旱不減・大澇不增 。 信士飲之・多愈沈疴 ·酷暑 · 晉 其

閩粤吳楚之朝禮此山者・必瓶貯攜歸・以爲法藥。若非大悲法水・從菩薩大

杏村干居士・來山進香・飲水而甘。詢其名義・稱歎不已。遂愷然施資・命 慈悲心中流出。俾飲者近愈疾病・遠證菩提。其能靈驗遠著之若是耶。四明

衲 經理。用石砌井・兼鋪井道。上建一龕・中供大士・左奉龍王・右安仙人 欲後之取此水者・行清淨道・徹法源底。見觀音于當處・培佛種于將來

康莊。衹嘉其誠懇・略敍顛末。勒諸貞珉・以告來哲 醍醐入口・疾病離身。心地清涼・永無熱惱之逼迫。前程遠大・常登仁壽之

江蘇興化劉莊場貞節淨土院碑記

佛法者・九法界公共之法也。無一人不堪修・亦無一人不能修。以凡有心者

道 ・無不同具佛性。但以迷而未悟・反承此佛性功德之力・起惑造業・輪迴六 。經塵點劫 ・莫能出離・豈不大可哀哉。然以生佛同體之故・遂感如來出

印光法師文鈔卷四 記 仙人井記 貞節淨土院碑記

八五七

世 數。亦有居塵學道・即俗修真・親證法身・誕登道岸。如維摩居士・傅大士 嵋・天台雞足・所有名山聖道場地・每多一再巡禮。獨于終南觀音大士道場 是也耶 志慕清修 宗匠。冀其頓明自性・徹悟唯心。報答四恩・濟度羣品。高堂奉養・託之夫 年當弱冠 可得而勝數也 修必獲益也。故自法流東土・王臣士庶・閨閣英賢。不離塵勞・精修淨業 遂得親見佛性 龐居士等・全家修持・俱證聖果。此諸大士・為物作則。足知其人皆可修 數月 爲之倡明 及至椿萱凋謝 ・即慕真修。棄俗世之纏縛・事選佛之宏猷。于是徧歷叢林・諮參 歸 以故居士無失養之憂・高堂得底豫之樂 。由茲捨俗出家・力修定慧・斷惑證真・了生脫死者・ ・以修定省。而夫人某氏・賦性賢淑・ 鶴年居士高恆松者・江蘇興化人也。 • 斷惑證真 · 遂得無所顧慮。如天際野鶴·任意飛騰。 ・與夫感應道交・蒙佛接引 ٥ 克盡孝道。雖復于歸 宿植德本・ 若非宿願所結 · 帶業往生者 篤信: 由茲五臺峨 其能 何 佛乘 · 又何 可 朥 如 0

爲之稟縣出示。凡高氏子孫・及各界人士・不得干預。以此院係私業義幣所 院。以其令貞女節婦居之・專修淨業・求生淨土・而立名焉。鄉紳好義者 身無依。念其代己奉親之勞・憫其守節清修之志。因將本宅・改爲貞節淨土 妄遊行者・方可。否則概不許住。又于每年夏冬・兩佛誕日。延請通法女士 佛・決志往生。性情柔和・無諸乘戾。不事妝飾・不茹葷酒。斷絕俗親・不 楹 食之費。量入安人・庶無虧空。其修建之費・皆居士摯友之所佽助。正室三 建・與庵廟性質各別。原產若干畝・增置若干畝。歲所收租・以供院中人衣 0 講說旬日 |・以作佛殿。内供西方三聖坐像・俾諸人于中・朝暮禮誦・ 三四五佛而種善根也。民國十年・自雞足歸・回家祭掃。見夫人已老・孤 更有深契・恍悟宿世曾住此山。足見多生多劫・久修佛道。不于一佛二佛 兩旁廂房・悉爲安宿之所。其來住者・貞女節婦・皆無所擇。但須長齋念 庶修途宗旨・各各悉知。不至以了生死法 獲人 以備往生資糧 此則上

印光法師文鈔卷四

記

貞節淨土院碑記

ハ六〇

不過令其身有所託・不致飢寒。而飽食終日・無所用心。不誦經呪・不戒酒 宏下化・一舉兩得。即悲成敬・二田兼備。是以此議一成・而好義諸友・樂 法良・猗歟懿哉 晨昏懇到懺悔 肉。唯恤現生之志・不計沒後神識之歸于何所。居此院者・鎮日持佛名號 爲捐輸。如廣東簡照南 ・各隨心力・出資相助。以其事與恤嫠局相同・其利益則天地懸隔故也。彼 。豈但生有所託・不虚度日。兼令沒有所歸 。此法既興・後必有通法義士・行之于恤嫠局。庶可貞節英 ・簡玉階・潘達微 ・李柏農・黎乙真 ・永出輪迴 ·及滬上諸居士 ~。 意美

陳聖性貞女貞孝淨業記

賢・同預蓮池海會。其爲功德・無能名焉

真如法性・生佛體同。迷悟攸分・凡聖迥別。欲復本有之心性・須斷幻妄之 惑業。欲斷惑業・非嚴持淨戒・力修定慧不可。戒定慧三・力極功純。則妄

證聖 乎。若證四果・則生死根本永斷・超出六道輪迴之外。若發大悲心・入世度 上・七反人閒・方可斷盡思惑・以證四果。 惑徹底消滅・本心全體顯現矣。譬如磨鏡・垢去明存。明本鏡具・非從外來 死。其慈悲救護之心・至極無加矣。其修持之法・亦須嚴持淨戒・力修定慧 固不易以年月論也。初果聖人・欲了生死 見惑如斷四十里流・况思惑乎。見惑一斷・即證初果・預聖流。尚須七生天 ・特仗揩磨之緣・以顯發耳。雖然・仗自力修行・斷惑證真・頗不容易 而兼以生信發願・持佛名號・求生西方。信願真切・念力精純。現生亦可 于是如來特開一淨土法門・俾一 毫作不得主也。自力了生死・非宿根深厚者不能。末世眾生・何能企及 則乘願示生。非如具足惑業者・隨善惡業力所牽・升沈于六道之中・自 臨終直登上品 。則入菩薩位・ 切若聖若凡・上中下根 證不退地矣。 ·尚如是之難。况具足惑業之凡夫 雖云十四番生死· 縦根機陋劣・未能如是 · 同于現生了生脫 而天上壽長

印光法師文鈔卷四

記

陳聖性貞孝淨業記

印光法師文鈔卷四

記

陳聖性貞孝淨業記

但能至心念佛則心佛相契・感應道交・臨命終時・必蒙佛慈接引・帶業往生

。下至五逆十惡之人・臨終地獄相現。若心識不迷・有善知識教以念佛。其

人生大怖畏・生大愧悔。雖念數聲・即便命終。亦可仗佛慈力・接引往生 得往生 ・則永出輪迴・高預海會。漸次進修・必證佛果。仗自力了 生死

道之中・而莫之能出也。陳聖性貞女者・原籍安徽懷寧縣人也。父仲齡・業 商於揚州甘泉・遂家焉。母高氏。貞女生於清咸豐九年。姊妹三・長即張紹 如彼之難 血性漢子・決不肯令本具之真如佛性・背悟淨緣・隨迷染緣・長劫輪迴于六 0 仗佛力了生死 ・如此之易。凡有心者 ·皆能念佛 皆可往生。有

故・母欲爲之擇聘。貞女即痛哭流涕・誓願爲北宮之女嬰兒子・撤其環瑱以 三・長樹聲・前清江西候補知縣。次茂之・三茂如 春之母 ・貞女居仲・與其妹皆自幼茹素・不食葷腥。是蓋具有夙根者。 皆業鹺。貞女年及笄 其 弟

養其母・至老不嫁。其妹則以出家焚修為職志・貞女則以居家侍奉為職志也

母知其志不可奪・遂任之。 母有潔淨癖・其飲食衣履衾枕牀帳之屬 無不

意 。 日新又新。雖地板仰篷亦必一日一揩・三日一滌。故凡婢媼之任使・皆不稱 惟貞女則烹紉浣濯 ・能體親心。力役服勞・不容旁貸 0 暇則念經禮佛

I無虚 曠 0 縦佳節盛會 亦從不出門遊觀 0 其盡心孝養 篤修淨業 也如 此

非特恪遵女訓 法名也。及母去世·痛極終天 信佛日篤 ・曾來其家・喜其志道相同 · 實乃真奉佛法 。此後依弟而居 0 後復歸依三寶 ·遂不復歸 ・修持愈謹。近數年來・紹春 ・受菩薩優婆夷戒・聖性乃其 0 過年餘· 諸弟強迎歸 0 未

幾 • 自知不久住世。以諸弟 · 及弟婦 • 唯知 世禮 • 不解佛法 0 恐臨終彼等悲

戀 促紹 亂其正念 春與三弟至 • 致失利益 。命請具德僧爲薙髮作尼 0 遂至其妹之尼庵 • • 兼爲說戒。又令死必火化·俾 以期正念往生 0 未久・ 示微疾

諸尼 物不存・脱體無依方好。紹春許之。遂沐浴・著法服 及諸弟 同念佛相 莇 諸弟悲不自持 紹春力誡 勿亂正念 ·端坐念佛。紹春令 諸弟遂皆

印光法師文鈔卷四

記

陳聖性貞孝淨業記

八八

得往生 遠勝生時。其一生修持之力・于此發現。當必往生西方・親預海會。否則何 氣絕後面相轉加光華・足可爲證。因將淨土法門所以・及貞女貞孝淨業懿行 此則唯屬大乘。此十一事・若全若半。乃至一事・以深信願 菩提心 無量壽佛經・淨業正因有三。一孝養父母・奉事師長・慈心不殺・修十善業 今春紹春來普陀・禮大士・詳述其事。祈余作記・以發其潛德之幽光。余按觀 髪爲尼・以無幾日・兼欲顯彼一生守貞盡孝之懿德貞心・故仍以貞女稱焉 克有此瑞應耶。時在民國十年十二月十七日丑時。世壽六十有三。雖臨終剃 忍悲念佛。久之・氣絕。紹春仍令大眾一心念佛二小時。其面相轉加光華 此四種屬世善。二受持三歸・具足眾戒・不犯威儀・此三種屬戒善。三發 。况貞女且有多分・兼以平生專心念佛・豈得不生。其預知時至 ・深信因果・讀誦大乘・勸進行者・此四種屬慧善。前二大小隨人・ • 回向淨土 · 并 · 皆

略述大端。以冀閨閣英賢并一切善信・聞風興起。各守己分・兼修淨業

則父慈子孝・兄友弟恭・夫倡婦隨・主仁僕忠。愈修淨業・愈敦倫常。生益

得其令名・沒即託質淨土。視彼唯知世諦・不解佛法・業識茫茫・無本可據

無出期者・不可同年而語矣。凡見聞者・各宜勉旃 。徒具佛性・全體迷失。輪迴於六道之中・墮落于三塗之內。盡未來際・了

烏程周夢坡居士夫人誕期放生碑記

來・儒宗聖人・皆以世間倫常設教。於吾人本具佛性・及六道輪迴・升沈轉 業。恃己之強 惡業力・ 於六道之中・永無底止。雖則人天善道・校三途惡道・苦樂懸殊。然皆隨善 切眾生・一念心性・與三世諸佛・了無二致。但以迷而未悟・故長劫輪迴 常相輪轉。則善道不足恃・惡道誠可怖。豈可不培植善因・妄造惡 ・陵彼之弱。取水陸空行一切眾生・殺而食之乎。在昔佛教未

印光法師文鈔卷四 記 陳聖性貞孝淨業記 周夢坡放生碑記

與夫斷惑證真・超凡人聖之若理若事

·皆未發明·

故不禁殺。然其不忍

父母 之心・已彰明較著・ 殺牛・大夫無故不殺羊・士無故不殺犬豕・庶人無故不食珍。珍・即 言懿行・載諸史冊。亦企後人同修慈心。愍彼物類・同具佛性。由惡業因緣 哲士鴻儒 及至佛教東來・則一切眾生・皆有佛性。及迷之則生死輪迴・了無已時。悟 爲殘忍・遂以肉食爲家常茶飯。只圖悅口・不一省其物類之苦・可不哀哉 則其殺者固少 足知殺生一事 不射宿。孟子之見其生・不忍見其死。聞其聲不忍食其肉。禮之諸侯無故不 之則徹證涅槃・永劫常住之實理實事 未來諸佛 ·多皆仰遵佛訓 0 ・儒宗亦非不戒。但以教道從權・姑未永斷耳 無故不食肉 · 不但不敢殺而食之· 又思令其各得其所。 垂訓於世。如書之鳥獸魚鼈咸若。論語之釣而不綱 ・俯培己仁。 • 則其食肉者 `・究竟闡明。方知紜紜異類・皆是過去 或茹素而斷葷 • 年無幾日矣 或戒殺而放生 。後世教道衰替 由是聖君賢相 。夫有故而殺 肉也。 。其嘉

墮於畜道

。我今幸生人道・若不加憐恤

・恣意殺害。

難免來生後世・怨怨

相報 儀 欽仰 易得 德配張夫人・恪守家規 勒石家廟 令以其費・作濟貧救難・恤嫠育嬰・施衣施藥・種種善事。懿德令聞 人・賦性慈善・福壽雙全・自六十以來・每逢生日・必誡諸子・毋事舉觴 烏程夢坡居士周慶雲者·南潯望族也。樂善好施 彼待烹之輩 互爲高下・無有休息。除奢摩他・及佛出世・不可停寢 亦欲仰嗣徽音・出資五百圓・於杭州西溪秋雪庵・起放生會・以代祝壽之 而其子若孫 。如來出世・亦不易逢。敢不近法先賢・遠遵佛教 0 至七十九歲・特以五百緡錢・起放生會。 楞嚴經云・殺彼身命 0 以期本宗子孫并諸見者聞者 0 以祈消除宿業・培植善根 亦能先意承志 ・篤信佛乘・唯以利人濟物爲懷 ·或食其肉 ·以悅其親。居士又欲豎碑一通 ・同發善念・ 。永斷殺害之因 。經微塵劫 諸子仰體母慈・敬敍其事 ·世德相承 修長壽因 相食相誅 。今其夫人年周華甲 • 0 。 然奢摩他道・ 殊不 推吾惡死之心・拯 同證長壽之果哉 其祖母許太夫 0 0 猶如轉輪 而居士與其 企聞風興 鄉

印光法師文鈔卷四

記

周夢坡放生碑記

六八八

起・共挽劫運。因以其事・委光敍述。光自愧財法俱貧・無補世道。而一念

愚誠・唯欲世人同發慈心・共修淨業。生爲娑婆無負欠人・沒入極樂蓮池海

會。因忘其固陋・略述戒殺放生之所以・并周氏世德之大略云 0

循陔小築發隱記

孝之爲道・其大無外。一切諸善・無不彌綸。然有世出世閒・大小本迹之異。 後世。雖其大小不同・皆屬色身邊事 世閒之孝・服勞奉養以安其身・先意承志以悅其心・乃至立身行道以揚名于 無所裨益 永劫酬償不已者乎。出世閒之孝・其迹亦同世閒服勞奉養・以迄立身揚名 而其本則以如來大法・令親熏修。親在・則委曲勸諭・冀其吃素念佛・求 0 所謂徒徇其迹而不究其本。况乎殺生以養以祭・俾親之怨對固結 。 縱令大孝格天・究于親之心性生死

吃素則不造殺業·

兼滅宿殃

。念佛則潛通佛智

暗合道妙

信切願・求生西方。必至臨命終時・蒙佛接引・託質九蓮也。從茲超凡入聖

・了生脫死。永離娑婆之眾苦・常享極樂之諸樂。親沒・則代親篤修淨業・

增蓮品 至誠爲親回向。心果真切・親自蒙益。若未往生・可即往生。若已往生・高 。既能如是發心・則與四宏誓願相應・菩提覺道相契。豈獨親得蒙益

發起孝思乎。此其孝方爲究竟實義。非若世間只期有益于色身及現世・竟遺 ・而己之功德善根・蓮臺品第・當更高超殊勝矣。而况以身說法・普令同倫

僧三寶・孝順至道之法・孝名爲戒。又于殺盜淫各戒中・皆言應生慈悲心・ 棄其心性與未來而不論也。是知佛教・以孝爲本。故梵網經云・孝順父母師

無不從之受生・故六道眾生・皆是我父母。而殺而食者・即殺我父母。由是 孝順心。于不行放救戒中・則云一切男子是我父・一切女人是我母 ・我生生

言之・佛教之孝・徧及四生六道。前至無始・後盡未來・非只知一身一世之 可比也。知是而不戒殺放生・吃素念佛者・豈究竟至極無加之孝乎哉。杭垣

印光法師文鈔卷四 記 循陔小築發隱記

八六九

佛名。蓋以我此色身・即親之身。我既爲親念佛・親必蒙佛攝受也。其孝也 紫蔭張公・孝思無既 。親沒數十年・每一念及・尙復揮涕。因念親故・專念

維之賢 篤修淨業·廣行眾善。初則徧 請名賢·發揮祖母費太孺人·苦節撫孤 可謂兼世出世而兩全之也。而有其父必有其子。其令嗣馨谷・善體親心・ 。刻其文爲旌節錄。冀所以慰祖母之貞靈·而安父終身孺慕之孝思也 ·德鎮坤

繼則以父常時思慕·因築一室·羅植松竹·額曰循陔小築。中供祖母之像

築・徧求名賢題詠。一以彰其父之孝思・一以冀感發于同人。深合觀經孝順 四壁鋪張名賢題詠。以期其父常奉顏色・而致其如在之誠也。又以循陔小

父母 然則紫蔭公之父子·及諸眷屬。雖則尙居娑婆·實皆西方極樂世界中之諸 ・奉事師長・慈心不殺・修十善業之道。既有淨業正因・必獲往生實果

上善人也。世之欲孝其親者・可不以此爲法乎哉

佛頂山路旁造鐵欄杆碑記代文質和尚作

諸檀信 消災厲 梯山 東南 欄 但以旁無遮護 歷梯而登天。每至香期 圓通大士・誓願洪深。法界有情・等蒙攝受。一 居廛爲政之權 寺 · 普令來者 海補怛名山 基踞山巓・名曰佛頂。紆屈數里・路由頑石以砌地。 以福黎元 報 鋪 图 以石條 極之恩德 • • 登圓通場・ 行即俗修真之道 迴避猶覺惴惴 。因茲三寺鼎立 • 應迹有在。 0 即彼險道 0 由是歷朝欽敬 · 來往繹絡 行安隱道 無方故逐形隨類 0 • 變作康莊 。適來進香・睹此景象。遂發大心・ 大護法大椿祝公・ ・眾庵菉布。各宏祖道・ 。足履滑石・甚屬危險 • 0 得大無畏 舉世尊崇 0 雖 仍巍巍陡峻 施同體之慈悲 切處普門示現 0 宿植德本・ 無非欲祝同康 不勞每步看腳 共聞佛心 • 0 前住持· 盤桓千仞・人若 而復步步坦 篤信佛乘 0 以 有在故航 真智無方 公翼郅治 文正 編 豎 鐵 獲大總 惟慧濟 平 募 秉 海

印光法師文鈔卷四

記

佛頂山鐵欄杆記

持・了知佛階在箇中。 水盡。從茲入于佛慧・親見觀音。如斯功德・直與普門施無畏力・同體相用 由金繩路・逢左右原。自下地宛轉扶掖・一直至山窮

當必由斯頓超十地・圓滿三覺。豈止身心安泰・吉祥萃于厥躬・瓜瓞緜延

・餘慶覃于後裔而已哉

0

濟南淨居寺重興碑記

昏濁頓現 實際理地・了無生佛之名。修持門中・乃有凡聖之號。心體本寂・因煩惑而 0 隨緣不變・一心之體用無殊。然此心此理 。妄性原空・由覺照而真常獨存。是知不變隨緣・十界之升沈迥異 ・含生共具 。而徹悟徹證 ・唯佛

人。故我世尊・示生世間。成等正覺・隨機說法。大根則直示一真法界

令其無住生心・以迄斷惑證真。小器則詳談三世因果・令其趨吉避凶・而爲 入道方便 雖千機並育 ·法無定相 而萬派朝宗 咸歸覺海 舉凡格致誠

修齊治平之道·與儒教規程無異。至于明心見性真窮惑盡之事·則儒教發揮未 繼文正。每念末世人民・如盲無導。以爲省會之地・絕無十方叢林。則高僧 弛。幾多叢林・悉皆湮沒。縱有寺宇・盡成子孫。不但當地緇素・末由聞法 名區・文獻之邦。當唐宋法道盛時・固已梵剎相望。迄今世遠年深・人亡教 其能陰翼治道・顯淑民情。消禍亂于未萌・證本具之佛性故也。濟南爲齊魯 東魯西竺・實無二天。由是古之王臣・無不宏護。今之賢哲・悉皆研窮。以 及。以一則隨順世情・一則直示心體。若究其本・則靈山泗水・同居一地。 近歲之修持・種種勒諸心版。其救難濟貧・護法安僧之誠・直可以追給孤而 讀書明理・學道愛人・昔年之善政・一一載于口碑。戒殺放生・吃素念佛 何以拯世俗之沈溺 無緣莅止・正法莫由宏通。其三世因果之理・一心具造之道・或幾乎息。將 。兼以來往僧侶・無處安息。對鳧居士潘公守廉者・宿承佛囑・乘願再來 登斯民于覺岸乎哉。于民國七年·與濟寧普濟庵德馨退

道場。其寺建于北宋・現成荒邱。僅存佛殿三楹・亦復勢將傾頹。首事欲修 居相商 0 馨師令本庵方丈健慧・赴省覓地。見東關淨居寺故址十餘畝・可作

欣然奉送 苦無其力。適值慧師以募地開建叢林告。彼固素服潘公馨師慧師之德・遂 且稟縣立案・以爲證據 。潘公以古稀高年・遂走京師 0 祈國務總

往督飭 榆關田蘊山督軍・建節山左。篤信佛法・慨捐千元・極力提倡。并派代表・前 故得速觀厥成 。計修佛殿・天王殿各三楹。其周圍之祖堂 • 伽藍殿

潭共捐五千元。又隨緣樂助・約六千元。遂于九年春開工・至秋落成。時值

理翼卿靳公

•

爲之提倡

靳公即捐二千元

0

時潘公令嗣復

•

任財政總長

闔

方丈 念佛堂 -禪堂· 齋堂・大門 ・客堂・客廳 廚庫等 • 共五 十餘閒 o

雖無所謂危樓迴帶 • 閣道傍出之概。 亦可以行參禪念佛・宏法利生之道矣

至九月十九・爲佛像開光・成立道場・懸挂鐘板。其焚香禮佛者・肩摩踵接

時有孺子墮井 蒙佛救護 · 安臥家中之異 後有老人痼疾・ 夢人令飲井水

起息 此道場 異哉 普沛 門·乃一切諸法歸宗結頂之法。下手易而成功高 請兗州華嚴寺妙蓮和尙爲住持 十人・及挂單僧十人。後若有大慈善家・再捐巨款 養贍亦不能安居行道。潘公又復募金一萬二千元・存魯豐公司・按一分二釐 即愈之祥。至十年・濟寧大旱・ 三無差別 0 0 信心施主來寺念佛・或打佛七・以薦先靈・以祈福壽・則無拒。以淨土法 寺成之後 。每月得洋百四十四元・以作寺中火食・及諸凡應用。則可供常住僧二 。誠之所至・金石爲開。此固潘公馨師慧師之誠・發起諸人之誠・以成 ・瘟疫頓息。于是咸稱聖水・因建八角亭以覆之・ 而眾誠相感 。是心作佛 ·馨慧二師 ・故佛慈俯應・以有此不可思議等事。足徴心佛眾生 • 是心是佛 相繼歸西。 。寺中修持 而瘟疫盛行 0 感應道交 因請天目退居能 • 專主淨土。不傳戒・ ·有如影響 0 羣取此水・以飲以禱 ・用力少而得效速。 。則規模即可按資開擴矣 和老人・暫爲維持 特勒碑記其事。 0 然寺雖成立 不應酬經懺 0 爲如 則甘霖 噫嘻 僧 無

印光法師文鈔卷四

記

淨居寺記

普度眾生之無上妙道 ・實凡聖同登覺岸之特別法門。末世眾生・根機陋劣

0

修餘法門・難得實益。以一切法門・皆仗自力。唯茲淨土・全仗佛力。 仗自

下鈍根 力 · 須斷惑證真 ・亦可帶業往生。二法相校・其難易遲速 ・非最上利根・不能現生了脱。仗佛力・具真信切願 ·奚啻天淵。所以十方諸佛 総

能諦信 ·出廣長舌以讚揚 ·利益無盡 。施資芳名・具列碑陰。仗此功德・必得現生福壽增榮 。兩土聖賢・發金剛心而流布。撮舉大要・以告同人。 倘

常明庵萬年念佛會碑記

臨終彌陀接引矣

四德 即彼凡情・ 。于五 顯如來藏。以果地覺・爲因地心 濁熾盛之際 作作 生圓滿之宗者 0 唯茲念佛 導六趣以登九蓮・超三 法爲然也 0 昔立 界以享

老人 及徒輩 重興法雨 盡報投誠 • 十有餘年 期歸安養之所 0 既欲退居靜室 境界寂 靜 專修淨業 隔 絕塵囂 因築是庵 規 短嚴 肅 0 以爲己

方便 日爲始 同生佛土 有餘盈 歸此法界。以故吾祖立山老人・建立此庵・ 教無量法門中之最上宗要 詳談念佛一法 統二年・值了諦師當家。有居士陳樂之・顧壽彭等・來山進香・寄居是庵 見其肅肅庵規 0 將見常明道場・香火日盛。十方檀越・信心愈隆。同入佛會。同念佛名 其庵將此淨資 糾合同志數十人・人各輸洋若干圓・立一 非不貪世緣・甘受淡薄・篤志修持 · 至二十五日圓滿。 助常住之道糧 同成佛道 ·濟濟僧眾 事雖簡易 除建會費用外 0 功德利益 。誠恐歲久無稽 ・遠接匡廬之蓮社・近承雲棲之淨宗・ 0 • 其夜設放施食· 理極圓頓 切法門 0 盡數置產 何能名焉 ·恆沙妙義 。三根普被 • 用勒貞珉 ·求生淨土者 普濟孤魂 萬年念佛會。即于次年二月十九 用接後昆。 0 所收租課 其規矩等 • • 利鈍全收 無不從此法界流 。庶億萬斯年・無或廢弛 。永爲定例 彼等一聞・遂發大心 • · 不能住焉。前清宣 詳列于後 充續建之法費 0 爲如· 了諦師又爲 來 • 無不 無容改 代時 其 澧 0

印光法師文鈔卷四

記

常明庵念佛會記

普陀普濟寺化身塔記

令未離著者 常樂我淨・ 古人云。死生亦大矣・豈不痛哉 而爲說法 無有真實 徹底圓彰矣 屬幻妄。不但四大非有・兼復五蘊皆空。既知蘊空 隨業流 轉輪迴 轉 0 寂照圓融之本體。令其了知由無明故・遂有此身。即此色身・全 焚化之制・蓋由此設 用彼之身 。又恐或有執情固結 速得離著 了無已時 受生六道 ·以作證明。 0 0 0 生不知來處 已離著者 如來憫之・示以由惑起業 。凡屬僧徒・悉皆遵行。當唐宋法道盛時 。竊謂不知其由・雖痛何益。須知一切眾生 未能解脫 所謂應以灰身滅迹得度者・即現灰身滅迹 速證法身 · 死不知去處 0 俾捨報之後 0 兼使現前大眾 ・則真如法性實相妙理 0 由業感苦之因緣 由罪福因緣 · 用火焚化 • ·而爲 悟知此 0 庶 以及 升降 身

在家通人

・亦多遵行

不獨唯僧爲然也

普陀

爲觀音大士道場

普濟法

雨

印光法師文鈔卷四

信佛法 鐵函 滅四相 覺 厥由無明 可謂真實功德矣。塔甫成・適有往生者・不三句鐘・焚化淨盡。而骨灰悉存 工 料 窰。法甚拙樸。不但多費柴火・且致骨雜灰土。同生諸居士・宿根深厚・篤 發菩提心。回向淨土・覲光壽尊。聞法受記・證無生忍。乘大願輪・度諸 爲十方共住叢林・來往僧眾・實繁有徒。凡有亡者・悉用火化。而化身之 0 如來愍之・特設方便。 ・與前後兩寺・各造一 ・了無零落灰土中者。因茲大眾歡喜・祈勒石志之。銘曰・受身之始 · 頓空五蘊 。發菩提心 。迷本真如・妄生愛情。愛情既起・幻質斯託。 。生滅既滅・寂滅現前 • 行利濟事 俾彼存亡・俱離我見。 座。以其形若塔・故名爲塔。每塔費千有餘圓 0 遂仿外國之法・研究斟酌 。真如法性・復彼本然。離幻妄相 身既叵得 遂認爲我・永不能 ・必期合宜 • 我從何有 一。特備 圓

可愍。令彼一切・同生西方。咸于未來・作法中王

普陀法雨寺化身塔記

爲我 法情殷。以向來之化身窰・不甚適宜。 從前妄認四大爲自身相・六塵緣影爲自心相之非。則常樂我淨之真身・寂照 與佛同儔 甚矣・眾生之我執堅固而難破也。祇此色身・本地水火風四大所成・而妄執 四大假合之身爲非身矣。同生諸居士・ 不生執著 圓融之真心・自可全體顯現矣。又以身相聳然・根機鈍者・亦難了悟其妄 如鏡蒙塵 而不證得 如油入麪・永不能出。反將不居陰界・不屬凡聖之真我 。特因執著・莫能受用。可不哀哉。以故如來種種說法・令其了知 莫能照鑑 0 **迨其捨報之後** '。若離妄想・則一 0 故華嚴經云・一切眾生・ ・一經火化・ 切智 • 擬欲改良 宿有靈根 無師智 頓成烏有 皆具如來智慧 則得現前。是知眾生心性 ·殫精研究。 ・恪修淨行。利人心切・護 0 則存者亡者・皆可悉悟其 仿外國之法而 ・全體迷背 0 但因妄想執

變通之・與法雨普濟各造一座。其形類塔・名化身塔。所費計千餘圓・意美

真我 法良 · 反不顧問 ·功德無量 0 。銘曰・眾生迷背・非我計我。如蠶作繭・ 四大幻質 ·唯此是認 0 如來悲愍・種種開導 如蛾赴火。本有 0 兼令火化

是眾生・咸復本性。福慧圓足・續佛慧命。願此功德・普及一切。法界有情 土。獲無量壽・居諸補處。不違安養・徧入十方。普令迷徒・歸本家郷 俾全智照。 既知其妄・即識其真。得無礙智・見本有身。乘此智身・回向淨 曲曲

·俱登正覺。

鎭海李太夫人然燈照海記

惱無明 燈明・方能有見也。無柰眾生迷昧本性・背覺合塵。致此佛性常光・變作煩 一切眾生・具有佛性常光。舉凡明暗通塞遠近・悉皆徹照無遺。固不假日月 不但暗塞遠處不能見 0 即近在目前 若無日 | 月燈光 雖泰山 市不能

法雨寺化身塔記

開一仗佛慈力・往生西方之淨土法門。無論上中下根・但能具足真信切願念 之真如佛性。又恐根基稍劣・現生未能斷盡煩惑・再一出世・復成迷昧。遂 世尊愍之・爲說種種契理契機之法 見・况其他乎。 獨母儀閨壺・德鎮坤維。實堪表率郷閭・力護聖教。普陀懸峙大海・爲觀音 李太夫人者・雲書之母也。宿根深厚・現行精純。篤修淨業・廣行方便 佛名號者 俾常夜然之· 大士應化道場 如乘大火輪 親見觀音。太夫人亦爲佽助若干圓。繼念此燈 增長 、智識 ・則決定往生・萬不漏一。 · 于大海中 以破船行迷方之險。又建三楹佛堂 清光緒三十年甲辰歲 。其最高處・名曰佛頂 由是輪迴生死苦海 普拯沈溺 • • · 趙君馥疇 • 如盲無導・了無出期・可不哀哉。大覺 同登彼岸 實爲如來普度眾生之無上第一妙法 使其返妄歸真 · 登峯四望·海闊天空。誠堪開擴心懷 。有緣遇者 ・屠君景三・于此造 令凡來此妙高峯頂者 原屬佛光。不但令來往船 ・背塵合覺・以復其本具 • 幸何如之。 一燈塔 鎮 不不 0 猶 海

筏・不迷方向。兼復使四遠見者・憶念大士。欲供永年燈油・以淨業純熟・

之人・同種善根。遂假祝融之力・以撤去舊建佛堂。慧濟寺僧・復爲募建 即便西歸。因囑其子雲書爲之設法。癸亥春・山靈欲令規模廓大・兼使後來

票利息周年六釐・計銀三百圓。俟抽籤還本時・即將此銀・用置田產。以所 雲書遂以七年長期公債票五千圓・施于慧濟寺・指定專供燈塔燈油之費 。該

收租・充燈油費。 明于億萬斯年也。 佛頂常住・此燈不滅。而賢母孝子之心光・亦隨佛光常昭 彼世之追逐聲色・揮金如土・至於父母兄弟・皆不過問者

聞雲書之風 ・能不愧死。余故樂爲之記・蓋欲一切眾生・同以佛法之明燈

大士之良朋而已。 破除煩惱之昏暗。由茲共出生死苦海・同歸極樂家鄉。作爛陀之真子・爲

重修百丈大智懷海禪師塔院記

八八三

印光法師文鈔卷四

記

李夫人然燈記 修百丈大智塔院記

迪之法・超越常格。機用無方・善巧莫喻。即彼迷情・示本覺心。不離當念 自世尊拈華 形形色色 不但如來大教 山 八十四位知識 土二三諸祖 ・耳聾三日時。直如金像脫模・光明徧照。師子出窟・威猛 超凡入聖。如驚天霹靂·聞之則喪身失命。如甘露醍醐·嘗之則起死回生 大開選佛之場。以一法不立之洪鑪・鑄萬德本具之佛體。其自行化他也 咸歸本地風光。盡宇宙法法頭 。心心相印· 迦葉微笑 ・悉彰常住真心。且令山河大地・全顯法王妙體 而懷海禪師・實爲第一。當 0 正法眼藏・涅槃妙心・遂得永傳 固已騰輝竺震矣 頭 。 迨至南嶽讓下· 野鴨飛去・ ・親見當人自己。 鼻頭扭回 0 出馬 Ш 無敵 故得會下傑出 西天四七・ 。直教舉世間 祖 。遂于百丈 0 振威一 。其啓 東 喝

耀

迴脫根

塵

o

體露真常・不拘文字

。心性無染

本自圓成

但離妄念

即

預爲防範

o

殆稟佛律制

則律

教蓮圓修無閒

· 戒定慧一道齊行

0

其隨機說法

·了無轍迹。

而靈

光獨

如如佛一段・最爲親切。深慮法久弊生・嚴立清規・

相濟 人 身。若約實際理體而論・則凡聖生佛・因果修證・俱不可得。若據修持法門 寺當百丈創建後・即敕賜爲壽聖禪寺。憲宗元和九年・百丈示寂・壽六十六歲 而圓彰焉 而談・則如來上成佛道・眾生下墮阿鼻・皆不出因果之外。明理性不廢事修 律身也嚴・作務必先眾・或有阻之・則不食・故有一日不作・一日不食之訓 千一百餘年・ 穆宗長慶元年・敕諡大智禪師・塔曰大寶勝輪。塔距寺二里許・自唐迄今 則爲正知 其誠眾也摯 以期因時適宜耳。遂爲天下叢林金科玉律・而天下師表閣・由茲建焉。其 欲拯末世狂慧之墮落・不惜現身示報。實與百丈禪師・砧錘相成 。俾後之禪者・徹悟不涉因果之理・實行修因證果之事・以期究竟徹證 。此兩百丈之深心・學者不可瞞盰讀之也。其山屬江西奉新縣・其 。執理性廢棄事修・則成邪見。毫釐之差・佛獄之判。前百丈主 ・故有不昧因果一語・令彼悞道不落因果者・立脱野狐業報之 其法道不無興衰 賴有負荷法道之人・爲之住持 故得寺塔 ・煅淬

八八五

印光法師文鈔卷四

記

修百丈大智塔院記

0

常存・ 敗。 祖師塔院・破敗不堪。乃具啓募于諸方同衣・得洋若干圓。遂將塔殿獻殿 作清規序・ 自宋高僧傳 百丈立清規 愧不知禪・姑就百丈故事・及現事・而直言之。俾未來諸賢哲・有所考稽焉 以供塔院住僧道糧 揭底重修 ・永爲十方傳賢叢林。至十二年・先勤交與了然。二人係法門摯友也。同念 。又自世尊入滅以後・凡諸寺宇・莫不以佛爲主・而特立其殿于寺之正中 殆非偶然 民國八年・歳在己未・寺主自成師 宗風依舊。清末以來・屢罹兵災・加以荒歉。以致寺無高人・塔院頹 而院牆僧寮・悉令完好・共用洋若干圓。餘者贖回田地若干畝 遂踵其謬 0 ・凡祝釐祈禱佛誕等・皆于大殿誦經 塔院既修 以前立佛殿 。夫剝極則復 0 不思若無佛殿 ・欲發揮百丈道要・與寺塔與復之由 後樹法堂 ·否極則泰。先勤了然二師 • 訛作不立佛殿 ・不忍祖道湮沒・躬請先勤和尙住持 凡諸祝釐祈禱等 ·而朝暮課誦 唯樹法堂 · 當于何處施行 ・命光記之 ·先後住持百丈 ・更不待言 。而楊大年 光光 0

寺中并無一佛耶・抑供佛于偏殿耶。無一佛・則與外道無異。自居正位・供 首 及元明清 佛偏殿・以行祝釐祈禱等事・則與蔑國慢佛何殊。只此最極顯著之訛・自宋 以爲永垂定範 俾百丈禪師・大暢本懷于常寂光中・則幸甚幸甚 0 證義記改作不立餘殿・先樹法堂・亦不成話 ・年將近千・無人表正。俾百丈禪師・橫遭誣衊・豈不令人痛心疾 。故將事理略表於此・以期後賢知宋僧傳・及各藏清規序之訛 。此乃一時急先之說 · 豈可

重造小白嶺五佛鎭蟒塔功德碑記《羅

大覺世尊・ 令得度脫 。由迷背故・不但不能親得受用・反承此不生不滅常住佛性之力・起惑造業 輪迴六道・久經塵劫・莫能出離。因茲示生世閒・成等正覺・隨機說法 其有善根未熟 視諸眾生・猶如一子。以其一念心性・原與三世諸佛・無二無別 併未來世一 切眾生・皆亦已作得度因緣 所謂流

印光法師文鈔卷四

記

修百丈大智塔院記

小白嶺鎮蟒塔功德碑記

嚴云・五陰六入十二處十八界・皆如來藏妙真如性。三祖云・六塵不惡・還 之六塵境界・一一示其當體即空即假即中・令其轉迷爲悟・識心達本。故楞 塵當 分・阿闍世王・獨得八萬四千・供恆河中・設立劍輪・而爲守護。百年之後 佛因。由是天上人間・龍宮海藏・各分舍利・起塔供養。人閒一分・八國均 徳莊嚴之法身・爲八斛四斗之舍利・爲令眾生・禮拜供養 通經教・徧示未來。及其一 後法化傳通・悉皆次第出現・如育王五臺等塔是也。良以眾生在迷・不了六 布南洲・耶舎尊者・以手障日・五指放光・爲八萬四千道・令諸鬼神・各捧 舍利・役使鬼神・以七寶眾香爲泥・一日之中・造就八萬四千寶塔。將欲徧 塔・隨光而趨・至光盡處・即爲安置。凡佛法未至之處・皆置于地中。迨 有其曾孫・名爲阿育・統王閻浮 |體即是真如實相・因茲起惑造業・長劫沈淪 期事畢・即入涅槃・以大慈悲・化火自焚・碎萬 ·威德自在 ・承佛遺囑・振興佛法。取其 。 諸佛設教・不過就彼所迷 ·增長福田 一作成

世諸佛 體 令心開悟・兼有所依。所施之食・原屬有餡饅頭・以法力故・化爲無量・蟒 宗之始祖也。聞其妖異・即往度脱・先施以食・令身安樂・次爲說法受戒 五洩之子 蟒 明鄞縣東 皆建立塔廟于名山勝地・令見者聞者・同種善根・此震旦塔廟之來源也。四 佛種子・從茲漸漸增長・畢竟得成覺道。由是歷代聖君賢相・通方哲人・多 在于音聞 作崇肆毒 印光法師文鈔卷四 無不令人建立塔廟 悉變爲石 ・馬祖之孫・ ・小白嶺鎮蟒塔者・縣志・及天童寺志・皆云唐會昌初・其嶺有巨 ・行人患之。時天童住持・厥名藏奐 • 然其聞法獲益者·固不如見相獲益者之普徧常恆也。 記 徧 洵屬大士乘願示生・一生奇迹・ 布 山間 ・造佛形像 及與地中 0 以其一 今其遺迹 經觸目· · 滅後敕諡心鏡禪師 動人景仰 爲饅頭 八識田中· 實天童開 表白裏黑 以故三 已種成

堪識心達本・况如來金口所說之經・及真身舍利・併其形像乎哉。雖此方教

同正覺。東坡云・溪聲即是廣長舌・山色無非清淨身。如是則見色聞聲・皆

九〇

禪 聞 六楞實心・今作八楞空心・蓋擬如來眉間白毫 爲鎮蟒塔焉 及諸經呪・以期其蟒・仗佛慈力・速證法身・凡彼種類・皆不興作・以故名 法焚化・拾其餘骨・瘞于嶺岡・建塔其上。六楞七層・高十餘丈・中藏 自唐及今 形質酷肖。其蟒既受法食・又聞法要 ・莫不嗟嘆謂保存古迹・開墾福田者・何竟寂無其人耶 告成于十二年癸亥夏 亟欲重修 併募檀信 力不暇及 千有餘年 。又期人天鬼神・瞻禮供養者・植菩提之勝因・結成佛之遠緣 。今住持文質・急欲了此公案・乃與淨師・戮力同心・各出衣 ・未及動工・賷志西逝。繼席淨心・其志更切・以寺中工程甚 襄成勝事 風雨漂搖 • • 凡五易寒暑 由是緇素歡喜・隨力贊助 · 霜雪陵轢 遂得消除業障 ·故得復見寶塔 ・傾頽已半・ 。八楞中空・具足光明 。肇始于民國八年己未 • 脫離蟒身 從地涌出 勢將全倒 0 清末天童住持寄 。凡屬 0 //佛像 師 唯舊塔 ・眾生 即 依

・直下離苦得樂・近生人天・遠預聖流之義。于最上層・供五方五

築院牆 佛 富壽 在未來 薩像 者·于未來世·同證如來所證功德。中上二節·實以淨沙·用鎮其顛。其級七 竟圓彰。又經是如來法身舍利・像屬如來報化二身・冀瞻禮圍繞・供養讚歎 證本有法身常樂我淨四德實義 國基永固・治道遐昌・佛日增輝・法輪常轉。凡倡首經營・出資運力・併現 長時奉侍香火。 層・高十餘丈・巍巍然爲覺道之宏標・蕩蕩焉爲迷途之良導。塔之周圍 必須腳踏實地・遵修道品・漸次增進・斷惑證真・直至智斷究竟・方可徹 康寧 取毘盧法身・位居十界極頂・具足四智菩提。又示從凡夫地・冀證佛果 及大藏經目 ·見聞瞻禮 庶蕪穢不入 備 膺 共用銀圓五萬有奇 厥躬 · 併大乘經呪 ・竭誠盡敬・供養讚歎之人・同皆惑障冰釋・吉慶雲臨 · 而易爲守護 戒定慧道 。頂用銅鑄 • 悉具當念 以表一 ・功德芳名・另刻于石 0 塔之前面 體三寶・三德秘藏・不離當處 • 作瓠顱式 業盡情空 • 建屋數楹 ・底節中空・ ・見本來之面目 • 0 安一 以此功德 淨行頭 內貯佛菩 • 恭祝 陀 · 高 究 福

0

足智朗・證常住之法身・生作娑婆自在之人・沒入蓮池清淨之會。 可滿淨文二師造塔之本願・而亦不負出資檀信贊成之盛心也。因敍緣起・用 如是則 庶

金陵妙悟律院垂裕記

勒貞珉。

禪日密曰淨。律者佛身・教者佛語・禪者佛心。佛之所以爲佛・唯此三業 持之・則轉識成智・轉煩惱成菩提矣。又恐根器或劣・現生不能了脱・再 眾生果能依佛律教禪以修持·則眾生之三業·遂轉而爲諸佛之三業。三業既轉 機宜・說種種法・令其返妄歸真・背塵合覺。其法之大宗有五・曰律曰教曰 則究竟證悟・生則徹底迷失・致使升沈迥異 如來大法・以真如實相爲體。此體生佛皆具・在佛不增・在生不減・但以佛 則真如實相・自可親證矣。猶恐障深業重・不易成就・故以陀羅尼三密加 (・苦樂懸殊耳。如來愍之・隨順

受生・

難免迷失・則生死輪迴・窮劫莫出。由是特開信願念佛求生淨土一法

下凡得預聖流・此如來撫育一切九法界眾生之宏規也。然宗雖有五・道本 俾上自等覺菩薩・下及逆惡罪人・同于現生・往生四方。則上聖速成佛道

之歸宿・不念佛求生西方・則律教禪密・皆難究竟。以淨土法門・乃十方三 密淨之真益不得 否則單輪隻翼 貫・五宗圓具・方可隨機各宏一宗・便可上續如來慧命・下啓羣生昏矇 ·何能行遠飛空乎哉。律爲教禪密淨之基址 ・如修萬丈高樓・地基不堅固 ·則未成即壞。淨爲律教禪密 · 不持律 則教禪

未斷見思之凡夫乎哉 薩・尚復以十大願王・回向往生西方・以期圓滿佛果。况其餘一切聖賢 世諸佛・上成佛道・下化眾生之成始成終法門。所以華嚴證齊諸佛之等覺菩 。妙悟律院 ・向以持律念佛爲修持 0 住持安靜和尚 切切 與

敍述大意・以爲後來住此院之大眾誡。按此院・乃前朝古剎・清咸豐時・已 敗壞不堪。兵燹後 恐後人昧厥宗猷・則興此院之明禪老人・及己之一番苦心・便歸滅沒 ·只存破屋三間 明禪老人不惜心力・爲之興復 。又得安 诊祈 光

印光法師文鈔卷四

記

妙悟律院垂裕記

EIJ

八九四

等法器 知因果 其人格 淨業 敗而 意欲侵佔 静師之繼述 重也。刻論 0 此院 其報 經聲佛號・固與諸方叢林・了無有異也。當最初建立時・地痞輒來攪擾 不能有 0 難知 如是 |乃明安二師・及施主心力所成・安住其中・不肯修持・便與侵佔常住 • 0 便成下 每欲侵佔寺産・而不知其龍天懷瞋・冥冥之中・折福折壽 知道場地基 ・明老持之以忍・遂得消其戾氣。後猶佔去院右若干地 則生爲世間福田 因果・俗人尚輕・僧人更重。但俗有身家・其報易見・僧止一己 ·則成一淨業道場 。凡僧之住此院者・各須真爲生死・發菩提心・嚴持禁戒 ・售與他人・其人亦不能有 流 0 若 龍神守護 更破齋犯戒 • 沒入蓮池海會 。但以產業無多・不能普納海眾 · 佔者俱不吉祥 ·敗壞佛門· ・乃售與本院 0 倘或飽食終日 則成魔王眷屬 • 復得歸還原主耳 0 因開溝渠 • 無所用心 ·地獄種子矣 · 而朝暮課誦 ・不久則家 • 掘出· 所損實 0 愚人不 ・篤修 缽 則

無異

古德云

・十方一粒米・大如須彌山

・吃了不修道・披毛戴角還

身主其事・暗相偷竊・則一氣不來・直墮阿鼻地獄・上火徹下・ 下火徹上・ 經

欲振興僧眾之奮修心·欲消滅俗眾之侵佔念·冀彼俗則五福備膺·克昌厥後 百千劫・常受焚燒・莫由得出・豈不大可哀哉。安靜長老・痛念法弱魔強

道 僧則三學圓明・丕振宗風。故令作此垂裕之記・以期此院永興無替・常宏法 ・則法界眾生・同蒙利益矣

甲壽徑緣起碑記

四明多佳山・而太白爲最・天童選佛場・適居其中。自西晉惠帝永康元年

故名其山曰太白・名其寺曰天童。至唐而法璿心鏡等師・宏禪宗直指之道 義興祖師 ・在此結茅潛修・感太白星變爲童子・以供役使・從茲成大道場

愈加恢闊 。自後千三百年來・法道常興・宗風不墜・至今猶推爲禪宗首剎

蓋以負荷法道・代有其人故也。誠可謂得最勝之地・方可宏最勝之道・建非

印光法師文鈔卷四 記 妙悟律院垂裕記 甲毒徑碑記

八九六

心修築 雲者 胸開 常之事・ 起 遂來天童 折矣。而極目千里·確有登東登泰之致 上至悟心洞 由天童寺左轉里許・即爲玲瓏巖・其峰巒奇峭・如 日遊玲瓏巖 至善財洞 無不興遺 需銀 廓 • 宿根 ・似非人間世者。然路徑未闢・登陟殊艱・頗爲遺憾。夢坡居士周慶 ・託其友方君佩紳經理・淨心退居督工・以十 必須待非常之人・地靈人傑・ • 作諸佛事 深厚 |世脫塵之想。自此曲折而上 見其 飛 正・計一百五十丈有奇・需銀一千一百五十餘圓。又建石坊 來峰 ・現行清高・世德相承・熱心公益。於癸亥秋・壽值華甲 山境勝妙 乃名其徑與坊 0 • 拜經臺 以祈先亡祖禰 · 大暢所懷 • 觀音洞 ・同生西方・現在眷屬 兩適其會・殆有大因緣・非偶然也 • 0 • • 善財! 況乎遙觀大海・天水冥同 經大溪流 而路徑崎 涧 過大溪流 0 路幾二 削如畫・凡騷客遊人至此 嶇 ・小溪流 閱月告竣。 深拂興意 里 路傍有泉 • • · 至磐陀石。 固已經數次曲 俱增福壽 自玲瓏篷前 0 遂慨 亦名之 令人心 然發 0 再

圓

皆

[甲壽

0

佛法 具眼者當不以吾言爲謬也。 面目 建剎・是同是別。若道是別・則古今豈有二致・若道是同・則何得斥爲生滅 標於佛指處插曰 無常・稱爲甲壽・豈即能不生不滅耶。須知佛法・無所不在・何得離世間法 爲甲壽 日過隙 念阿彌陀佛 夫法無生滅・生滅在人・有具眼者・見此坊此徑・當必直下親見自己本來 以說佛法 。昔世尊至因地布髮掩泥處・指曰 其爲壽也・盡未來際・亦無有窮 ・留此遺迹・以伴名山・冀彼來者・同皆著眼。或謂世間諸法・生滅 0 竊謂甲者・首也・既云甲壽・當無有超出其上者。以人生百年 ・果知見此坊・行此徑者 求生西方 ·建梵剎竟 • 則仗佛慈力・速得親證。甲壽之義・如是如是 ・即時諸天・散華讚歎。且道建坊築路 ・則此坊此徑・即不生不滅無始無終之 • 0 此處宜建一 其或未然 且依經所說 梵刹・時賢于長者 · 生信發願 · 與插標 · 持

如

印光法師文鈔卷四

記

甲壽徑碑記

九江居士念佛林蓮社緣起碑記

宅・爲念佛林・其願力之勇毅宏深・實爲罕有。其宅四重・臨街一重・向租 借寓他庵・不但不能持久・而且地址偏僻・往來不便・遂於癸亥年・捨己住 舉行・以至徧周寰宇・豈區區爲此一處計乎。然宏揚佛法・道場爲本・ 此心・心同此理・倘能認真提倡・自可同聲相應・固無所論其古今難易也 重興蓮社・追彼芳蹤。雖知自他智慧淺薄・迷惑深厚・而不容已者・以人同 開念佛之先聲・了義居士・深知此法契理契機・遂於千餘年後・極力提倡 覺·下化眾生之成始成終無上要道。今特立以爲林者·緬維遠公東林結社 念佛一法・乃如來一代時教中之特別法門・實爲十方三世一切諸佛・上成正 因茲不辭勞瘁・策厲進行・不遺餘力・以冀遠近見者聞者・同皆興起・ 提倡 初則

米鋪

年得二百餘元

以供林中零用

。二重作招待

· 及會計之所

0

三重作·

殿 說法 時・十方恆河沙數諸佛 耨菩提・爲一切世間說此難信之法・是爲甚難。而普賢菩薩・令華藏海眾 歎釋迦世尊能爲甚難希有之事。世尊亦自謂我於五濁惡世・行此難事・得阿 道博地凡夫不能測度・即久證法身之菩薩・亦不能盡知。以故世尊說此法門 心本具之真如佛性也。原夫淨土法門・理極宏深・唯佛與佛・乃能究盡。勿 情而了佛性 力而爲培植・或造佛像・或置莊嚴・及諸供具・凡道場所應用者・罔不備焉 各有樓・以爲閱經坐禪之所。居士既發此心・同社之人・悉生景仰・各隨其 從茲修持講演・既得其所・將見善信源源而來・遠近各各相效 中供西方三聖接引像・以常時禮拜瞻仰・臨終自易於感通也。 ・歴代諸善知識宏揚・及了義居士捨宅提倡之一番大慈悲心・與自己即 ・備列捐款各人父母牌位・以期存則福增壽永・沒則直登蓮邦。且 挽劫運以致太平・生爲聖賢之徒・沒預蓮池海會。庶不負世尊 ・出廣長舌・同聲讚歎・普令眾生・同生信心 於以祛凡 四重爲淨 且深

印光法師文鈔卷四

記

念佛林碑記

印光法師文鈔卷四 記 念佛林碑記 秘魇的破中庵接引佛裝金記

同以十大願王・回向往生・非成始成終之要道・能如是乎。是故千經萬論

處處指歸・往聖前賢・人人趣向・如羣星之拱北・眾水之朝東也。念佛之人

能如是信・若不往生者・日月當逆行・天地當易位矣・有是理乎。願見聞

者・同皆勉旃。

五臺山秘魔巖中庵石窟接引佛裝金記

五臺・爲文殊菩薩・與萬菩薩・歷劫常住之聖道場地・華嚴經名爲清涼山

蓋即此凡聖同居之地・在菩薩分上論・即是常寂光淨土・圓離一切煩惑熱惱

建立。其巖高數十丈・其巖窟頗寬大高深・就中塑一接引佛像・高二丈餘 聞名者・無不生景仰冀慕之心・况身歷其境者乎。去寺不遠・曰中庵・傍巖 究竟清涼也。祕魔巖祕密寺・乃木杈和尚・以木杈直示祖師西來意處 。 凡

極其圓滿莊嚴 蓋欲來者同禮慈容・同念聖號 臨終同蒙接引往生西方耳

眾生機劣・見之爲像。以佛而論 業受苦之本。因茲多方引導・令其返本還元。求其下手易而成功高者・無如 徹之體 之發揮・以示來者。竊惟吾人一念心體・與佛無異・由迷而未悟・故其心相 思泰大師・未出家前 而語矣 信願念佛求生西方也。以眾生信願持名・感彌陀慈悲攝受・故無論上中下根 ・以了此願・共用銀二百餘圓。祈予略將生佛同異之致・彌陀普度之慈・爲 則天淵懸殊也。然相雖懸殊・體仍無異・如太虚空・虚明洞徹 由雲霧塵霾故 同得仗佛慈力・往生西方・校比仗自力斷盡煩惑・方了生死者・不可同年 而况此萬德莊嚴之妙像乎。蒲衣童子云・此山一草一木・皆具文殊智慧德 以故佛爲眾生現種種身・以作得度因緣。須知此像・即佛真身 仍復如故 便成晦塞昏濁之相 。是以諸佛憫眾生具此真如佛性・由迷背故・反爲起惑造 ·至此禮佛· ・則身土不二・理智一如・何一法非佛真身 發願爲佛裝金・後出家受具・遂募諸善信 。須知即此正晦塞昏濁之時 · 了無滯礙 其虚明洞 · 以

九〇二

相・豈此佛像不具如來智慧德相乎。但以眾生機劣・應以像身得度・特現像 身而爲說法耳。果能深信此理・不但此像即是真佛・而六道一切眾生・一一

法・證無生忍時・方知自己本來是佛 ·今始親證 0 彼以強陵弱 ・殺彼之身

皆是真佛。當憫其愚迷・多方開導・俾其同念佛名・同生佛國

·待其見佛聞

悦我之口・及互相競爭・殺人盈城盈野・不但不生痛傷・而且以爲得意者

其迷背罪過・無可爲喻・其將來受苦・何其有極・思之・誠可畏也。故謹以

此理爲全體是佛・ 而徹底迷背者告・冀其立即醒悟・勿負如來現身接引之慈

則國家幸甚・眾生幸甚

岳運生居士往生記

切眾生・皆有佛性・皆堪作佛・但由迷悖自性・以致輪迴生死・無有了期 如來欲令復本心性 隨順機宜 說種種法 0 然欲仗自修持力・ 於現生中

書・ 疾・初八日早起・念佛畢・囑步雲速備衣棺・吾將去矣。待衣棺備齊・乃沐 界・高預九蓮・何幸如之。從茲心心憶念・冀遂所懷。至今七月初・略示微 義・天性忠厚・無所適莫。歩雲於數年來・頗於佛法・生正信心・吃素念佛 做到真窮惑盡・以出輪迴而了生死者・末世實難多見。唯修淨土法門・ 用・幸有此仗佛慈力法門・俾我等少善根劣機眾生・於現生中・即得橫超三 法故也。岳運生居士者・歩雲之父也・名泰元・字運生・事親至孝・樂善好 諸菩薩祖師善知識 以諸惡莫作・眾善奉行・待至臨終・即得蒙佛接引・往生西方・則萬不漏 上中下根・老幼男女・但具真信切願・以至誠心・念佛名號・求生西方・兼 唯誠唯謹。因勸其父母・同皆吃素念佛・求生西方・并以顯淺易解之淨土 以仗佛慈力・獲此巨益・如乘輪船以渡海・非自己本事能然也。以故歷代 爲之解説・令其常看 ・悉皆極力提倡此法・以其是了生死之捷徑 。其父遂知自心本具佛性・但以惑業障蔽・不得受 ・成佛道之要 無論

九〇四

少甫若能由步雲而篤修淨業 浴著衣而臥・步雲戒其家人・切勿哭泣・令失正念・同聲念佛・以助往生。 子・而步雲感其帡幪・故亦視少甫如父。歩雲吃素之因緣・實由少甫而始 出。少甫公正廉明・清風高節・忠於國而孝於親・推其遺愛・故能視歩雲如 頗形拮据・向蒙其表叔茅少甫將軍・貼補所需・此次衣棺葬費・皆係少甫所 藉報劬勞之恩・以盡人子之分。又步雲以才小職卑・薪水無幾 爲往生・可決斷矣。步雲日與家人・靈前念佛・以冀蓮品增高 三小時・方始哭泣。而其父面帶笑容・室浮異香・三日入殮・相貌如生・其 又勸其父・隨聲心念・雖不聞聲・其口輒動・久之遂止・蓋已去矣・又復念 ・吃素念佛 以期生入聖賢之域・沒歸極樂之邦 · 仰事: • 無生速證 俯畜

汪含章夫人往生記

則相得益彰・兩全其美矣・因并記之・以爲世勸。

道之在人・如水之在地・無處不有・苟不加穿鑿之功・則其水決難發現 眾

哉奇哉・一切眾生・皆具如來智慧・但因妄想執著・不能證得・若離妄想 生心性・與佛無二・由無明錮蔽・致佛性功德・莫由顯現。故華嚴經云・奇

則 念佛求生淨土一 切智·自然智·即得現前 法・尤爲圓頓直捷 。如來一 ・以其以果地覺・爲因地心・故得因該果 代所說 ・皆爲對治妄想執著之法藥・ 而

海・果徹因源。自法流震旦・一切四眾・由念佛而往生西方・徹證本具佛性 以圓成覺道者・不知有幾千萬億也。汪含章夫人者・江易園居士之德配也

。而且居心仁慈 · 賦性淑賢 • ・其事父母・奉翁姑・相夫教子・律己持家・皆足爲 故於惠施貧乏・救放生命 • 每每行之。 此諸善舉

閨閣法

宿根深厚

悉由勤 |儉而得・使其好逸妄費・將有自顧不暇之慮・况能濟人利物乎哉。

民國八年 園多年職任教育・唯欲培植真正人才・不惜心力・爲之講授・積勞成疾・於 ・臥病不起・醫藥罔效・勢甚危險・有友人以息心念佛相勸 漸

印光法師文鈔卷四 記 汪含章夫人往生記

痊愈。既又徧閱佛經 ・方知佛爲大聖人・其教有不可思議之事・且悲昔之不

當痛苦時 夫人虔持佛號・兼誦彌陀普門大悲等經呪・決志求生西方。去歲十月有疾 知・幸今之得聞也。於是勸其父母・與其夫人・并及兒女・同修淨業。由是 輒發大願 • 願速往生・見佛聞法 ・證無生忍之後・乘佛慈力 □

清亮・屋牀壁間・皆金字經・光明照耀・汝曾見聞與否。又三日前・其姑夢 金光滿室・光中菩薩・不計其數・意謂其媳之病・當速痊愈。須知此皆淨業 入娑婆 度苦眾生・心極墾切 。月晦之夕 ・語侍疾者・ 樓上佛堂 木魚聲甚

純熟・ 將逝・遂如 色端嚴 淨境現前之象。至次日十一月朔末時・結跏趺坐・念佛而逝 了無死相 ㈜平時・故得跏趺而逝・如入禪定也。易園率其兒女・并諸道友 通身悉冷 • 頭頂循溫 。先時兩腿腫脹 ·不能動屈 0 逝後神 · 及至

至誠念佛 ・助其往生・過五句鐘・方始安置。設祭待客・概不動葷・村人欲 易園止之・ 令每日來一 一班人 ・念佛 期 約二句鐘 則免人

虚費 ・二則實益亡人・三則曲引諸 人 同種善根 • 四則冀開風氣 • 普播佛恩

則高升蓮品 陀法雨寺・并匯百圓・祈光相宜爲作佛事・以祈未往生則即得往生・已往生 實爲喪事最善新例 。光令念佛堂十六人・打一佛七・又爲開示念佛法門之利益 ・凡有信心者・各當依行焉 。 殯殮之後 · 易園以書寄普 ・與

易園居士之真誠 日 信 生西也未・願託夢見告 ・往樓上佛堂看。見佛堂中懸一大燈。光明四徹・遠逾電燈・開函見畫 • 諸師聞之・悉皆竭誠盡敬 ・以慰我心。是夜其子有朋 0 至三七日 ・夢信報紛至・乃取 其姑祝曰 媳逝多

小華 張 ・中有大紅蓮華・華有臺座・華下列小字兩行・不復記憶・周圍有眾多 華下之水・其色如銀 ・此日即法雨佛七圓滿之日也)。得此 数徴 • 可 知

決定往生。 夫眾生之心 • 與阿彌陀佛之心 · 覿體相同 • 若以信願憶念相感

朵蓮華 必致彌陀慈悲誓願攝受。 倘精進不退・則其華漸見廣大・待至其人臨終 故此間發心念佛求生西方・西方七寶池中・即生一 佛與聖眾 即執此

C C

華・接引往生。宋荊王夫人・篤修淨業・姬妾使侍・無不率行・有一姬妾 無疾化去・夫人夜夢亡妾・殷勤致謝。又引其西行・見一寶池・其量廣大・

其境遠遜。而有朋未到淨業純熟之時・故只見其畫・不能親見其境。以如是 化。有朋所夢・與此相仿・但汪夫人無荊王夫人之功夫・及化導之權力・故 教・及展轉相教以發心者。夫人醒已・悲喜交集・未幾・值誕生日 中一大華・光明殊勝・妾曰・此夫人生處也・其中周圍所有之華・皆蒙夫人 ・念佛立

因・感如是果・因不虚棄・果無浪得・於此益信。願見聞者・各共勉旃

徐母楊太夫人生西記

智愚賢否乎。其升沈六道・輪迴不息者・由迷之淺深・與業之善惡・以爲因 切眾生・皆有佛性・皆堪作佛・固無論天人修羅鬼畜地獄・况男女貴賤

而一念佛性 ・固未嘗因此或有增減也。以迷而不知・不但不得受用・反 念佛益精進・頗有瑞徴・恐不求一心・專希瑞相之愚人受病・故不錄。是秋 天津・欲長侍膝下・於民國十年・迎養至津・遂持長齋・受優婆夷戒。從茲 佛 閣典型・女流師範・方之古烈女母儀・賢仁・明智諸傳・殆無愧焉 柔善・明敏果決・事父母・事舅姑・相夫教子・持家處事・一一皆悉堪作閨 亦常見之。安徽石碌縣徐母楊太夫人者・徐居士國治之生母也。其性情孝慈 也 承此佛性功德之力・作起惑造業・因業感苦之本・豈不大可哀哉。如來愍之 同於現生・仗佛慈力・了生脫死・校彼專仗自力者・其難易遲速・天淵懸殊 無期矣。於是以大慈悲・特開一信願念佛求生西方法門・俾一切若凡若聖 縦有修持・不能現生即了生死・再一受生・多皆迷失・則盡未來際・解脫 |・以故自古迄今・緇素四眾・修此法門・往生西方者・不勝其多・即近時 令其返迷歸悟・斷惑證真・以迄親證本具佛性而後已。又以眾生無力斷惑 ・老而彌篤。其子三・日國華 ·國鈞 ・國治・各受職於政商二界。國治在 。幼即

印光法師文鈔卷四

記

楊太夫人生西記

國治 不輟 病・不許書信言及・恐遠道來省・致誤賑務・並屬國華國鈞勸募・以己私蓄 治不忍遠離・夫人責以大義・促令速去・以救災黎。國治在皖年餘・夫人有 牟尼佛・及在津所供之佛菩薩・何獨不見接引佛乎・國治曰・時至則見矣 廿一・命請僧來寓念佛 國治曰・ 。 又 曰 傾囊相助 安徽水旱奇災・省長電調國治襄辦賑務・以八年在京・辦有成績故也。 ・我寧茹素而死・不食肉而生也。至今春・病日篤・而神智清明・念佛 ・乃復迎養皖垣。以年已七十有四・精神衰頽 謂國治曰・余於世事・艱苦備嘗・故無戀慕・心中唯有念佛一事而已 仍復隨僧念佛 每一發熱 何日去最好・國治答以後天是齋日・最好 蒙大總統題頒匾額 · 痛苦異常 • 以助往生。令將己衣物・ • • 與慈惠徽章。 想到西方極樂世界・則頓覺清涼矣。二月 念佛僧福海師曰 + 盡行變賣 。 歴數時曰・余已見釋迦 ・親戚中有勸開齋者・夫 年賑務畢 夫人神志氣象如常 供養三寶 ·皖憲仍縶維 問 國

至廿三

一黎明

孫遺範 賑務 光彩 時 · 親爲更甚・而舉世不知・良可悲傷。國治法母慈仁奉佛・故長齋學佛・屢辦 輪迴於三途六道中・莫之能出。彼猶自謂爲盡孝・不知誤親往生之罪・校殺 而逝 人者・可謂宿根深厚・現行精純・又得其子國治・多方輔助・故令淨業成熟 氣馥郁 一二日內・尙不能去。至巳刻・國治請一接引佛供牀前・曰・阿彌陀佛來矣 夫人聞之・生大歡喜・起坐瞻視・高聲念南無阿彌陀佛數聲・即結印含笑 得遂往生之願。世之不念佛者不必論 號哭洗濯換衣等 ・頂猶微温・四肢柔軟・以數珠置手中・乃屈指握之。猗歟懿哉・若夫 0 ・悉皆竭盡心力。今夏來山・以夫人行狀見示・祈爲作記 國治與諸師 ・有友來弔・於門外即聞之・歎爲希有。三日入殮・面貌比生時更加 余以固陋冗忙辭 ・及眷屬 ·俾彼既生悲傷 後復函祈 · 猶高聲念佛三句鐘 ·又生瞋恨 因約略敍其平生 ・即志心念佛者・其子女多皆於將終 ・遂致打失正念・仍復永劫 ·始舉哀 而於末後事實 · 及沐浴換衣 ・以爲後世子 香

印光法師文鈔卷四

記

楊太夫人生西記

加詳悉・冀世之爲人母・爲人子者・咸取法焉

陸西林居士感應記 民國十五年孟秋

齋・常誦觀音經・大悲呪。咸豐十年・予年十四・值粵匪屢陷各城・從母胡 至第二卷救苦門・不禁有感於中。方知幼時難地獲生者・皆大士慈力加被也 今夏五月・以所印之觀世音菩薩本迹感應頌・寄蘇州西林居士陸壽慈。彼閱 觀音大士・恩周法界・隨類現身・尋聲救苦・多有深蒙加被・而不自知者 。遂略敍其事・函致于光云・予家太倉・少孤・賴祖母寡母教養。母持觀音

姓親戚住。至秋・賊大出・肆掠焚殺。一 予隨母逃向後園竹叢中・ 賊持矛後追・予母子急跳于河・適有樹根・且捉 日午餐 ·適賊至。祖母年高不能逃

君・命予鈔其呪文・由是記誦不忘・日念若干徧。及從母他徙・即依三圖毛

太君・挈吾家三口居鄉間伊宅・未幾城陷。予攜篋有大悲懺・從母之妣張太

急難 門品云 敢忘・猶不知經呪之感應也。今讀大士感應頌諸事迹・始知脫離鋒鏑・每遇 爲溝中胔 舍・時李相國統兵駐此 袁太君憐之・令宿其家。次日命其子伴予謁竹樓翁。翁固貧士・急公好義 十月· 有聲庠序・聊借行醫・以期餬口。一見甚歡慰・許爲設法・令多待幾日・遂 夫推予上岸・并擲所攜物於岸而去。日暮途窮・無可爲計・不禁痛哭。村媼 哨・若絕不見吾母子者・少選賊去・乃出。及今思之・猶不勝惴惴焉 以待・見賊向竹中亂戳一陣而去。聞背後人聲・回顧見數賊立河干・搖旗呼 居袁氏月餘 將絕糧 ・心念不空過 輒逢善人・皆由吾母持齋誦經 ・幸哉。感念從母・袁媼・及族祖之恩德・不啻生死肉骨・終身不 。及翁資籌安・送登海船・因到上海 貸錢千四百·雇船往璜涇訪族祖竹樓翁 能滅諸有苦 ·得由傭書以進。太平後遷居蘇州 ·於苦惱死厄 ·感菩薩大慈悲神力覆護之所致也。普 • 能爲作依怙 承親戚引至南門外翠微僧 。未至而日已暮 0 勉成家業 信然。 。次年 爱追 得免 船

印光法師文鈔卷四

記

西林居士感應記

述之・冀一 切善信至誠念菩薩名・及觀世音經・大悲神呪・自可逢凶化吉

遇難成祥 ・以及業消智朗・障盡福崇・生入聖賢之域・死登極樂之邦云。願

法師愍我愚誠・作感應記・附入文鈔・普令同人・咸生正信・共沐慈恩。夫 西林居士・宿植德本。現行淳淑・多年以來・長齋奉佛・修持淨業。年已八

力甚好 恩而不知者・蓋多多也。譬如杲日・普照萬國・盲人雖荷日光生成・以未曾 親見光相・遂謂爲無・則其負照臨之恩也大矣。愍世愚迷・錄以爲記 自幼屢蒙大士冥垂加被・故有今日・然猶未徹知其所以然。則世之受慈護之 精神強健・遇有公益・雖數里遠・皆悉步行・人力車等・概不肯乘 能寫小字。光四月至蘇・數來談敍・其謙卑自牧・爲現今所無 。 目 彼

鳥尤山寺新建藏經閣記 山在四川嘉定樂山縣

佛法大無不包・細無不舉・凡十方世界之大・一念心性之微・淑世善民之嘉

千餘卷 所違 窮 德著述・類多遺軼・入藏者乃百千分中之一二耳・而其多已至二千餘卷・况 謂 未入藏而舉世流通者・更難悉數也。巍巍義山・洋洋法海・隨人資稟而爲研 聲聞所著釋經宗經諸論 同得實益焉。綜舉如來一代教典・分爲三藏・藏者・深固幽遠・無窮無盡之 不可得 以及種種語錄傳記 。凡佛所說大小乘經・名爲經藏・凡佛所制大小乘律・名爲律藏・凡菩薩 莫不皆得見真空而徹法源 ・故古今首出庶物出類拔萃之人・莫不殫精修持・極力流通 雖聖人有所不知·豈凡情所能測度 自大法東來 ・凡屬宏揚法道之著述・皆續之於後・名爲續藏。 • 諸宗崛起 · 名爲論藏 以復其本具之佛性焉 ・代有高人・或著疏以釋經 • 此皆自佛國請梵本至此土翻譯者・約五 0 是以舉行其法・天地鬼神悉無 。烏尤山寺者・ 或宗經而造論 ·以期自他 西蜀著 然古

義廣

謨・超凡入聖之懿範・無不徹示原始要終所以然之極致。其道大理微・文深

・欲闡揚其旨趣・則罄海墨而莫窮其妙・若玄會其圓詮・則覓一字而了

九一六

名之勝地・觀音現化之道場也。自唐惠淨上人開山以來・歷千餘年・宗風不 異 費約三千數百圓 謂地靈則 墜 無或罄竭 藏仍復不減絲毫 長者・庫藏眾多・設使其子不知・則無從得其受用・殆與貧賤人子・了無有 而研究焉 命爲之記 其藏字小・不利老人・擬後有大施主・當入都請梵本大藏・以期普得讀誦 以爲專修淨業之所・又建此閣・用供所請頻伽書冊藏・以爲研究佛法之據 0 倘能 雖琳宮紺殿 八人傑乎 知之・則用以自奉・并以周濟一切・無不稱己所欲・而悉充足・ 。其爲法爲人之誠 所 。竊惟一大藏教・義理無盡・而法不自宏・宏之在人・ 願 ٥ • 稍遜往昔 皆遠近檀越感度師之德・而歡喜布施者 傳度大師 切四眾 以此寶藏 · 於此可見其概 • 同皆探此寶藏 · 而乘戒俱急 住持此山 是無盡藏 ・凡百廢墜・漸悉修理 取之不盡 ・竭誠禮誦・今昔固無二致 以自利利他 。其閣五楹兩層 ・用之不窮 則燈燈相 0 工 成 • 備極莊嚴 。既建彌陀殿 盡未來際 • 續 譬如大富 致書於光 ・非所 所 明 其 明

不絶。庶不負如來說經・諸祖宏法・度師建閣・檀信佽助之一番至意矣。凡

我同倫・各自勉旃

烏尤山普同塔記

脫死 處觀 眾生一念心性・與佛無二・由妄執故・遂成天淵懸殊・如來愍之。令修四念 爲然也。 庶解脱乎業累・以親證夫真常。是古之在家通人・多皆依此送終・不獨僧眾 有根機陋劣・現生未能如是者・待其死後・火化其身。俾彼了知五蘊本空 執即破 四大非有・一靈真性・徹底圓彰・既不屬於見聞覺知・亦無所謂我人眾壽 ・往生淨佛國土・修習菩薩行願・以期上成佛道 0 我執既破・法執亦亡・見思二惑因茲而斷・便可以超凡入聖・了生 以其既令亡者得其解脫 觀身不淨・二觀受是苦・三觀心無常・四觀法無我。此觀若熟・我 ・又令存者悟其本空・其利益殊非淺鮮 ・下化眾生而後已 既 其

化之後・設道德高超者・必有堅固不化之舍利。即無舍利・其燼餘之朽骨 其 事 居 · 既多・必有神超淨域 悉安置於普同塔中 麼 茲起三毒 存者修淨業 此普同塔之所由來也。嘉定烏尤寺・自唐惠淨大師開山・至今千有餘年 妄而迷覺 月既久 0 如蠅 既不屬根身・亦不屬識心 ·命光作記 其普同塔亦已坍塌破壞 附驥尾・亦可直達千里。亦如水歸大海・悉舍本名・同一鹹味矣 ・如蛾爭赴火。試觀念未生・我究居何所・卽令既生後・我究屬甚 認此妄想心・常受生死縛 以同生西方 ・以發揮其義意。爰爲頌曰・眾生受生死・皆由執有我 · 亦若生居叢林 業謝塵勞 ·又欲亡者得樂所以共入海會 ·以根無所知 。幸傳度大師 • 蓮開上品之華 • 參隨海眾 0 如來垂 · 識心因物移 一慈愍 ·住持其中· • 凡聖同居 • 佛授一生之記者 • 令觀我本空 0 用是募諸善信 • 眾 藉資 力振 生不了故 (熏陶 蓮宗 • 既知我空 。與之同 0 • 靈骨 以成 既令 · 歲 · 逐 • 因 0

諸法盡消融

。况復經火浴

四大悉分散

五蘊原無有

我從何處現

此證無生・真我方覿面・普願法界眾・同作如是見。

創建菩提精舍緣起碑記

乎 莫作・ 切願・雖罪業深重者・尙能出此三界・登彼九蓮・况戒善齊修・定慧均等者 慈力・親垂接引・往生西方也。固無論惑業之有無・功夫之淺深・但具真信 門・則以深信切願 得世福・及作未來得度之緣種而已。此係仗自力以了生死者之難也。淨土法 淨土法門者・十方三世一 可了生脱死・超凡入聖。若惑業未盡・則生死輪迴決定莫出・縱有修持 0 以如來所說一代時教・種種法門・皆須修持功深・親到業盡情空地位 此係全仗佛力・ 眾善奉行・以己信願・感佛慈悲・感應道交・故於臨命終時・即得蒙佛 ・持佛名號・求生西方。兼以敦篤倫常・恪盡己分・諸惡 兼仗自力以了生死者・故於一代時教法門之中・名爲特 切諸佛・上成佛道・下化眾生・成始成終之法門也 · 方

印光法師文鈔卷四

記

蓮社 該果海 別法門 倡 爲了生脱死之捷徑・超凡入聖之妙法故也。溯自大教東來・廬山遠公・創開 而天台・清涼 ・與僧俗一百二十三人・精修淨業・咸得往生。自後代有高 · 果徹因源 • 不得以通途仗自力法門並論也 。以故千經萬論 永明・大智等 • ・處處指歸・往聖前賢 其發揮闡揚 。良由以果地覺・爲因地心。 ・尤爲不遺餘力・由是蓮 ・人人趣向 人・爲之提 故得 0 以其 因 風

眾僧念佛聲 世道人心・愈趨愈下・凡懷憂世之心・欲爲救援者・莫不以歸心佛法 根 因果報應及戒殺護生・信願念佛・求生西方爲志事。 性行淳和 即欲與同志・隨分隨力修持此法。乃與丁甘仁・倪大椿・譚步韶 • • 直 以職任商業・未知佛法 同甘露灌頂 • 醍醐沃心 。去歲訪友至杭 ・慶快之忱 非言 傅裕齋居士・宿植德本 · 夜宿常寂光蘭若 可喻 o 因茲觸 ・嚴子 ・提倡 動宿 聞

徧及中外

因茲 出五 濁以預 海會者・

又何可以算數譬喻而得知其數哉

0

近來

良

孫良臣・傅裕經

・傅庭芳・沈晉鏞・金益如

林雙泉・陳載峯・莊海濤

李述初 ・吳祖昌・譚子臨・譚石卿・譚海秋・譚竹馨・ 羅稚雲·謝崇華

持・老來專心辦道之所・僉稱曰善。遂購地建築・不二年而工竣・因名之爲 田玉樹・傅夢弼・譚肇貴等商・擬於杭州西湖・建一精舍・以作現在隨力修

菩提精舍 旁供十八羅漢 0 其基地二畝六分七釐 ・以作念佛禮誦之所 · 共為兩進 。後閣五間三層 0 前爲大殿 • · 上層三間 五. 蕳 • 中供西方三 ・中供三

聖尊像・旁供二十四人祖先牌位・以顯會預蓮池・常侍彌陀・即得親證無量 光壽之體用・不生不滅之佛性。其前後次序・悉以當人之年齒爲準。兩旁及

修 士暫時憩息 因禮請真心辦道之戒僧七位・常年修持 。其宗旨大綱有五 • 本精舎・原爲社友各有職業 ・每日二時課誦・三時念佛・以 • 不能常住專 中層

・分裝房間

· 以作諸

人靜修之所。下爲客廳・旁作養心堂・以備高

人傑

爲諸社友乘暇來此修持之嚮導・衣單食用・通歸社友攤任。二本精舍・乃二

十四人公同建立 公同經管 · 將來繼管之權 ・每人只傳一房 須擇其性質與

印光法師文鈔卷四

記

菩提精舍緣起碑記

障冰消 功德 所礙 佛法相應者・其餘子孫・ 池之海會 家眷欲來瞻禮・固無不可・但須即日便去・決不許女眷住宿・以期無妨清修 社友靜修而設 人經懺佛事・即逢年節・亦不任人燒香・唯社友或有祈禱・或有追薦・則 息世譏嫌・俾菩提二字・得以光大而擴充之・則爲幸大矣。綜此僧俗修持 或致紛爭耳。三本精舍・原爲自修而設・與寺廟性質各別・不得應酬社外 以及與佛法相違之事 ・上祈各人歴代祖宗 四本精舎・以專修淨業清淨持戒爲主旨・葷酒不許入門・凡下棊打牌 ・五福雲集・生入聖賢之域・沒歸極樂之邦。又祈見者聞者 證本具之法身 ・其居住日期・隨己心意 • 概不過問・以免支派蕃衍 0 • 概禁止 又祈凡住此念佛諸師 現生父母 ・凡諸社友・各宜自勉 ・消除無始惡業・增長殊勝善根 ·唯不得攜帶女眷 · 及各社友 無處安居・及人各異見 • 0 五本精舍 及小孩等 • 與諸眷屬 · 各各效 ·預蓮 • 設或 原爲 無

共轉凡心・以成聖智・則禮讓興而兵戈永息・忠恕起而物我同觀。庶天

皆可以作佛之語・悉得其實證焉。此諸居士創建精舍・題名菩提之本心也・ 下太平・人民安樂・唐虞盛世之風・便可見於今日。而人皆可以爲堯舜・人

創建西方三聖殿功德碑記代華德師撰

因畧述之。

佛乘 深廣無量・雖天覆地載・莫能喻其萬一 佛人・歸于淨土・輔弼彌陀・度脫眾生・與樂拔苦・咸令究竟。三聖恩德 即生證三德涅槃。至若觀音勢至・二位大士・則現身塵剎・尋聲救苦 之誓願 爲弟子・莫闡宏猷。欲令闔院僧眾・專修淨業・擬創極樂世界・三聖寶殿 阿彌陀佛・乃法界眾生之無上慈父・險難惡道之第一導師・因中發四十八種 而資斧空乏・不克如願 ・果上獲超諸數量之光壽。端居蓮邦・分身徧十方剎海・普攝含識 仁慈居心 宏護爲事 ・幸有信士洪慶齋・仝室戈氏妙芳・夙植德本 率女王洪氏 ・縦粉身碎骨・何由報其涓埃 外孫王天賜 慨施多金 助成勝 衲 ·攝念 篤信 忝

事。故得金容舒輝・法輪常轉・功德利益・何可名言。唯願三聖垂慈・冥顯

加被 ・俾彼本施主・及諸助緣者・各各現世災障潛消・備膺五福・臨終形神

書緣起・用勒貞珉・俾後之安居修行者・知淨土法門之所以廣大・決志求生 俱妙・高登九蓮。先亡祖禰・咸升極樂之天・後代兒孫・悉入仁壽之域。因

聖道場之何由成立・福資檀越云爾

螺頭廟東照寺重修地母廟碑記

普載萬象・不生分別・普生萬物・以給人用・而且不矜其功・不望其報・地 之恩德・可謂廣大周徧博厚悠久而莫能名焉。聖人立法・凡法施于民・以死

勤事・以勞定國・以及禦大災・捍大患者・皆設祠祀之。况吾人畢世所依而

生之大地・可不特建殿宇・莊嚴儀像・常以香華燈燭供養 恆致如在之誠乎。此東照寺地母廟之所由建也。言地母者·即佛經所謂主 ・以少舒報恩之心

地神也。蓋以生長萬物・若母之養育兒女・故俗稱爲地母・實非專現女身者 按華嚴經世主妙嚴品・主地神有佛剎微塵數之多・雖有從他方世界來者

然只此大地・亦非一神所主・殆各有疆界耳。又凡屬神祇・皆有陞遷進退

傾覆・募諸善信・得洋若干元・住持慈寬・又助一半・遂得殿宇法相・悉皆 如世官僚・官署官名・則永不更改・其人則進退攝謝・了無一定 孔子・關帝・文昌之專屬一人也。董事葉昌雲・以地母廟建立已久・將欲 ٥ 非如倉頡

事 重新・將欲立石・祈敍大義。易曰・地勢坤・君子以厚德載物・人能居心行 有如大地・施恩不求報・受辱不懷瞋・ 但盡我之天職・不計人之順逆

平・得證圓通・將來尙復成無上道・教化九法界一切眾生・如天普蓋 如是之人・生人聖賢之域・沒登極樂之邦。 如持地菩薩・以平地故 ・心地遂 ·似地

均擎・無有一人・不在鈞陶化育之中。此觀象修道證心成佛之大利益・願諸

閱者・咸注意焉

印光法師文鈔卷四

記

東照寺地母廟記

今彩大師往生記

今彩大師往生記

今彩大師・俗姓方・江西雩都縣人。宿有善根・少即戒殺吃素。至三十後・

深厭五欲多苦・三界無安・遂出家於福建長汀縣報恩寺。具戒後・專志苦行 於贛州光孝寺執香燈・精潔虔恭・凡見之者・皆歎其誠。惜常住物 · 如護

都深山石室中・架松爲座・聚草作褥・種薯爲食・補納爲衣・其爲苦行・人

・時無虚棄・爲寺眾所欽敬。繼欲專修淨業

・徙寧

目珠・日以禮拜念誦爲事

所難堪・師恬然適意・以道爲樂。久之・有造訪者・施以銀錢・則卻之不受 若與敝衣粗食・則便受之。素性孤潔・不立徒眾・有重其德者・代爲收四

實皆未與同住。一徒名德緣・廟稍豐裕・念師清苦・再四哀懇・接回供

人

養

2。未幾 終日閉戶誦經念佛・除早午二餐外・魚磬之聲・朗朗不輟・數十年如一日 ・復往蓮花山・自以木板隔一小屋而居・寺眾尊其道行・聽伊自便

九三六

由是緇素信慕者眾· 每有誠心供養衣履瞡施・不容推卻者・ 隨即供佛供僧

爲彼作諸功德・隨身僅留十圓・以備命終焚化之費・其清苦自甘 ·解脫無

離 是爲要務 0 然須明因識果・修行世善 · 謹守禁戒 ・誦經念佛・內外如

・有如此者。凡造訪者・無論緇素・均示以娑婆惡濁・極樂清淨・急求

出

十四・十月初・示微疾 始終不變· 方有冀望 0 從無一言・涉及世閒福樂者 至初四日 斷飲食・念誦如常 0 民國七年戊午 夜深遂息 。初五侵 年七

晨 ・寺眾不見師起・叩之閲然不應・入室視之・已端坐化去。左手仍執引磬 如平昔念佛時・頭略低垂・面帶笑容・與生無異。寺眾觀之・讚歎不已

寶蓮 僉云 可以決定無疑矣。 ・師平日有若是之行履・故致斯時得如此之景象・其神超淨域 其徒德森・ 爲余言之・切念末世僧人 • 每多懈怠 · 質託

唯貪利養 ・不修道業・若師者・真可以爲末世楷・因筆以記之。

印光法師文鈔卷四

記

今彩大師往生記

趙尊仁居士往生記

日起七 通處 爲事 勞。一方之人・皆服其誠・彼以誠感・眾以誠應・凡所勸募・無不隨願圓成 日下午七句鐘・竟念佛坐逝。在會諸人・益加懇切念佛・助彼往生・過數小 入會念佛者・四十餘人。居士雖帶重病・其念佛益精進・若無病者・至初六 其作事果決率真 趙尊仁・法名培庚・如皋馬塘市人。年三十餘・素業商・ 民國十五年冬・身嬰篤疾・力疾提倡佛七・以祝世界太平・ ・凡有善舉・力能爲者・無不爲之。地方路燈・親自早收晚送・不以爲 置商業・專辦慈善公益事・極其認真 至初 八日圓滿 0 近數年來・得聞淨土法門・ ・請掘港西方寺範成師主七・其經濟皆善信所 ・由是倡辦濟生分會・及佛經流 深生信心・ 日以念佛求生西方 其性情淳篤無僞 訂于臘月初二 自送

時・

頂猶溫

形色與生無異

于以見彌陀願力・眾生心力・

兩皆不可思議

良以真如佛性・眾生本具・特仗因緣啓發耳。如種子已布于地・ 一經時雨

隨即發生萌芽。彼世之以本具佛性之力・日馳逐于貪瞋癡殺盜淫中・譬如以

隨意雨寶之摩尼珠・置于圊廁・則無所受用矣・可不哀哉。聞居士之風・能

不愧死

沙健庵居士往生記

始知佛爲大聖人・其教有不可思議之事・若出幽谷・得睹天日・不禁喜極而 無聊・常存超出此世界想。試取佛經讀之・見其義理精微奧妙・圓融超脫 朱之說 親・冀盡子職・不入仕途。初未知佛爲何如人・經具何如義・循襲乎韓歐程 其學重躬行・不尙詞章・其志務盡分・不慕榮寵・以故登太史第後・家居奉 沙健庵・名元炳・江蘇如皋人。其品行操持・文章道義・皆足以爲末世楷。 ・謂佛法爲聖道害・而于國于民・皆無所益也。逮辛亥國變後・悶極

ル三〇

持 · 小凡 醫均無效 益・迄至將終前 神交矣 道 法師莅如講彌陀經要解・親預法筵 致常爲六道輪迴中人・民國十二年癸亥・年周花甲・厭世之心益切・適諦閑 未見一粥飯僧 0 惜數十年拘墟之陋 明辨以晰・知居士學有根柢・志希聖賢・雖未相見・而彼此各皆心許爲 於是專修淨業 因令持文鈔以相贈。次年陳正有以所作斥喪中食肉飲酒論見示・據經引 同于 0 去夏聞光至滬 ・得無以修持力・轉重報後報・爲輕報現報・以了宿業乎。至臘 ,現生・仗佛慈力・ 又何所歉 與友談論 ·以期往生。次年崔益榮來山歸依 ・即欲來見・以病不能出門・ 。從茲潛心研究・受持讀誦 。至秋・左腋 • 引爲憾事 出此娑婆 。遂知淨土橫超法門・爲等覺大聖・逆惡 · 登彼極樂 0 然既生西方 患癰・繼以咳血・入冬益甚・中西 · 隨己根性 ・以冀親證本有佛性・不 未果・ ・與光言居士之學問修 親炙彌陀 **猶期異日來山** • 而得證入之 参隨海

逐臥

床不起

乃將生平著作

付門人項本源

黃文濬

略囑

咐家事

頗悔從前改廣福寺爲議會・ 遷移佛像・有贊成之過・命其子進・出三千金

綢緞 殮服 見地高超・言行相應・內外一如。據數年來之修持・及平素之信願・臨終之 頗有異香・大眾念佛益烈・逾二時頂猶溫・直至天明・始停佛聲・爲拭體著 病益殆・僧眾咸來助念・居士正念分明・聲默相隨。延至二十六・雖不聞聲 陀佛接引像・面對慈容・口念心憶・專精一致・概不提及餘事。二十四夜 我于罪。又令請僧助念 佛・即至臨終・亦復如是・不得預爲洗濯換衣・及哭泣等・殮以布衣・勿用 于東門廣慧庵・改建佛殿・以贖前愆。又令家中眷屬・日夜輪班・在牀前念 口恆翕張。午後氣益促・家人及僧眾念佛聲益悽緊・至酉時・遂溘然而逝 ·舉哀 。喪中無論祀神待客・勿用酒肉・吾嘗作論斥世・汝等切勿隨順惡俗・陷 其子能奉命無違・可謂真孝 ・必期仗佛慈力・往生西方。于牀前設香案 。噫・若居士者・可謂宿根深厚 ·供阿彌

景象・殆中品上生者乎。以孝養父母・行世仁慈・具真信願・攝心淨念故也

。然一得往生・當必地登不退・忍證無生・漸次修習・以至圓滿菩提而後已

・又何歉憾乎哉。茲撮取其徒項本源・其子進・並吾徒崔益榮所述而記之・

以期後之輯往生傳・及隱士事迹者・有所本云

沈翊仙居士脫難記

生信歸依 皆堪作佛 佛視一切眾生・猶如一子・愛無偏黨・常欲度脫。以一切眾生・皆有佛性・ ・依教修持・以迄斷惑證真・了生脫死也。故楞嚴經云・十方如來 ・故雖絕無信心之一闡提輩・亦無一念棄捨之心。機緣若到・自可

歴生不相違遠。若眾生心・憶佛念佛・現前當來・必定見佛・去佛不遠・如 憐念眾生・如母憶子・若子逃逝・雖憶何爲・子若憶母・如母憶時・母子

染香人・身有香氣。法華經云・若有無量百千萬億眾生・受諸苦惱・聞是觀

世音菩薩· 心稱名 觀世音菩薩即時觀其音聲・皆得解脫。又云 · 是觀世 自力斷惑證真豎出者・其難易天淵懸殊也。冬初歸家・特闢靜室・供佛・及 普照萬邦・彼戴盆者・莫見光相・可不哀哉。後得印光文鈔・乃知淨土法門 向・反從而毀謗之・致令無緣大慈・同體大悲・莫由親受。喻如杲日當空・ 唯彼一人・得全身命。方知佛慈廣大・感應無差・柰芸芸眾生・不但不生信 經・但默念阿彌陀佛・及觀世音菩薩聖號而已。八月贛戰失利・全軍覆沒 光明法會・遂入會隨喜・讀金光明最勝王經・覺義理精妙・願常受持。因請 使彼此閒隔・莫蒙覆被。倘背塵合覺・一心稱名・自然感應道交・垂慈加被 音菩薩・于怖畏急難之中・能施無畏・是故此娑婆世界・皆號之爲施無畏者 。良由眾生之心・與佛菩薩之心・覿體無異・但以眾生迷昧・背覺合塵・致 部・日誦一卷・十日一周・周而復始。夏閒從軍贛地・軍事紛繁・不能誦 雖遇險難・亦得無虞也。安徽沈翊仙居士・向不知佛・丙寅春・金陵起金 爲一切若凡若聖・現生即得了生脫死之道。仗佛慈力・横超三界・校彼仗

印光法師文鈔卷四

記

沈翊仙居士脫難記

印光法師文鈔卷四

記

觀音聖像・晨夕禮念・以期消除宿業・增長善根・生爲三業清淨之人・沒登

九品寶蓮之位。以書致光・祈爲作記・因將佛菩薩平等大慈大悲・愍念眾生 及眾生向背不同・致有得受覆被與否之義・書以贈之。以冀無信心者・即

存誠・眾善奉行・諸惡莫作・生爲聖賢之徒侶・沒入如來之封疆。倘人各如 生正信 ・有信心者・益加修持。務必敦篤倫常・恪盡己分・克己復禮・閑邪

是・則爭競消滅・禮讓興行・天下太平・人民安樂矣・何幸如之。願見聞者

咸諦信而力行焉

永春重修東關橋觀音靈感記

觀世音菩薩・誓願宏深・慈悲廣大・徧周塵剎・隨類現身・尋聲救苦・度脫

眾生。由是凡通衢要道・多建廟宇・以期往來之人・親睹聖像 庶可咸蒙慈覆耳 福建永春 古稱桃源 山川秀麗 民俗淳朴 ・生恭敬心 邑東十里

浪去矣 不之顧 鄉民遂奉菩薩于附近廟中 捐重修。至民國甲寅 去。急開門・則了無有人・見水勢洶湧・橋搖蕩有聲・若將仆者。風雨撲面 人李元賢之父繼如公・經商星洲 適值半夜 同種善根 具載縣志 忽聞叩門聲甚厲・大呼速往橋上捧菩薩出・遂驚醒・而叩聲益厲・連呼速 0 印光法師文鈔卷四 • 其人言・ 馳往橋亭・ 0 。邑人崇奉佛教・于橋正中建亭・供觀世音菩薩聖像 清光緒三十四年・ 風雨洪暴・橋頭一店主陳某・年五十餘・頗好善信佛・已熟寐矣 初亦不知何以能奮勇如此 捧菩薩出 ・ 甫離橋 ・橋始告成・迨至丙辰・又遇風災・橋亭與梁木毀焉 而世道荒亂 歲在戊申 ・家道頗豐・熱心公益・乃與星洲僑友・倡 • ·聞崩裂聲 洪水爲災 橋事無過問者 · 殆有神助者然。 則橋正 • 橋全毀滅 0 元賢之母黃太夫人 一中一段 噫 0 • 當將毀時 令來往者 ・異矣 ・已隨波

0 邑 地名東關・與泉州南安毘連

·有溪橫其閒

・寬若干丈。宋時即建石橋・以利

行人。然水甚衝激・遇大風雨・橋輒傾圮・每數十年・或百年・橋必重修

莊嚴・語之曰・唯汝能爲我重修此橋・并以祀我・可速爲之・以福汝子孫。 往廟燒香・經過其地・惄焉傷之・意欲重修。夜夢菩薩・現金色身・璀璨

由是觀之・足見菩薩唯以利益眾生爲念・而一見聖像・即種將來成佛之善根 故特示修橋・而兼令供奉聖像也。太夫人遂馳書諭賢・備款復修。乃舉邑

邑人之善根者甚鉅·遂函祈光作。語云·非是父不生是子·又云·欲知其父視 僉欲立碑于亭・一以彰菩薩之靈迹・一以啓後人之熱心。元賢以此事有關于 亭・由是因緣・香火益盛。在昔董事某君・近至星洲・言及菩薩之靈・邑人 人某某董其事 至癸亥二月工竣・當地人士・爲懸匾聯頌之。仍奉菩薩于橋

其子・此橋初由繼如公倡修・次由黃太夫人重修・元賢恭承父志・恪奉母命 。世之欲蒙菩薩加被・冀其滅災障而增福壽者・當于篤行孝友・利人利物中 不惜鉅款 ・以期悅親心而利邑人・其心固與菩薩普度眾生之心・有相契焉

求之・則求無不得矣

雜著

潮陽佛教分會演說一代了清師作

現滅 我大覺世尊釋迦牟尼佛・塵點劫前・早成正覺。爲度眾生・數數示生・頻頻 明星出時 五年 陟馬・逾城而去・直至深山・修出世道。又欲示彼外道皆非正法・故復遊歷 周行七步 飯王宮 右手攀枝欲取 。且據此番出世・在周昭王二十六年甲寅・示生於中天竺迦毘羅衞國淨 徧訪諸仙。後乃獨坐觀心・日食一麻一麥・苦行六年・於臘月初八日 。其母摩耶夫人・於四月八日入毘嵐尼園游觀 。 ⊟ • 舉目 • 世尊即於右脇誕生。 天上天下・唯我獨尊 觀 豁然大悟 歎曰 随即一手指天・一 。 至年十九・ 於二月八日夜半時 奇哉奇哉 ·見無憂樹華盛開 手指地· 切眾生 目顧 具有. 如來智 四方 • 乘乾 以

慧德相 但以妄想執著・不能證得。 若離妄想・一切智 ・自然智 • 無礙智

十九年 未悟 即得現前 ・因茲始悟也。事在穆王二年癸未。從茲隨順機宜・度脫眾生 談經三百餘會 。須知世尊出家遊歷苦行悟道 。 偏 圓頓漸 ・大小權實 ·皆爲後世修行者作一榜樣 ・觀機逗教・令其得益 。非先實 說法 0 至 穆 四

王五

十二年壬申二月十五日·

以一

切眾生・

根已熟者

·皆證道

果

•

其未熟者

・作金

皆亦已作得度因緣

0

期事畢・

復示涅槃。以定慧所生丈六之法身

剛不壞八斛之舍利。散布天上人間・起塔供養。普令眾生・同種善根 0 至漢

明帝永平七年甲子・帝夢金人・項有圓光・飛來殿廷。旦問羣臣・是何祥 0 太 史傅毅對 日 • 西域有 神 • 號之爲佛 0 陛下所夢 • 其必是乎 0 帝遂遣博 瑞

館於鴻臚寺 騰・竺法蘭 ・二尊者 後建伽藍 賷佛經像 · 因以白馬馱經 ・欲化此方・遂祈 ・假館鴻臚之故・因名之曰白馬寺 同來 。至十年始達洛陽

王遵

中

郎將秦景

郎

中蔡愔等一十八人・往求

佛法

0

至月氏

國

值迦葉摩

摩騰涌 齊梁 僅在北 忌妒 運 北 麗 寺 於白馬寺南門外 乃屬 帝問摩騰 重 方 小 佛 • • 東方 世諸佛・悉生於此 略衰 陳隋 法 日 o 身虚 至十 方 寺 本 • 安僧 萬 不 ・當土自 · 大覺世尊 • • • 0 三國 ·四年 空 讓 南 暹 曆 則蒸蒸日上 羅 方猶 以 前 • • 三寺安尼 來 初有康僧會者 現諸神變 朝 • ・築臺置經・ • 安 |稱中國 正 盛 0 月 又復 明 南 0 朝諸 至宋而法門氣象 何 0 • 0 邊方國土・或數百 H 蔚 耳 以 至唐而律教禪淨性 緬 o 0 然此時 旬 不 即 興 帝 • 0 時 以火取驗 朝正之次 五嶽諸山道 • • • 始宏化吳地 蒙古諸國 迨 奉 字 中 至有清 佛 • 官士庶道士妃嬪等千餘人出家 國 東西尚未大通 猶 0 (・表請: 騰 殷 • 0 道經悉燬 士・以新來佛法 不亞唐時 0 0 相諸 年・ 佛法肇始於漢 唯嘉靖崇信道教 崇重尤隆 0 • 至晉而徧及全國 較試 迦 毘羅 法 或千餘 · 往來者少。 ၁ 0 • 0 帝允許之。 元 無不具備 佛像及經 衞 世 年 以蒙古入承大統 或 祖 · 擴張: ·帝極崇重 • • 乃大 聲教漸被 • 皇帝 四 • • 0 佛法流 - 五代之時 於晉 兼流 悉皆放光 至十五 千世界之中 0 帝 不 餘年 觀 即 布 • 0 0 及宋 遂懷 此 於高 建十 日 布 • 法 崇 0 •

印光法師文鈔卷四

雜著

佛教會演說

o

o

0

九四〇

真之誣謗 不法之舉 中 轉 從乾隆以後・法道日微。加以髮匪回匪・屠戮僧侶,焚燬寺宇・法輪幾乎停 浩赤族・己亦被弑・嗣帝即位・復大興之。周武廢教後・元嵩貶死・不五年 冬之凍閉堅固・正成就其春夏之發生暢茂耳。杲日當空・隻手焉遮 致耳。溯自法流中國・歷代帝王・無不崇奉。唯三武滅佛・而隨即更興。譬 仰遵佛制 0 0 裨販 反汙己身。三武者魏太武・周武帝・唐武宗也。先皆深信佛法 從茲哲人日希・典型日墜。鄙敗無賴之徒・由不試僧之故・多皆混入其 魏武信崔浩之蠱惑 如 0 0 來 毀滅未久・而主者助者・皆罹極殃。魏武廢教後・不五六年・ 雖事出無知妄作 ・罷除試僧度牒・令其隨意出家。在當時高人林立・實爲有益 • 造種種業。致令見淺之流・紛紛謗議・竟有逐僧毀寺等種 · 周武聽衞元嵩之讒譖 ・總因僧界無人 • 解行俱缺 。唐武信李德裕 · 不能以法化人之所 • 及道 。仰面 士趙 極意修 崔 種 睡

而

身感惡疾

編體

糜爛

。死未三年・隋文受禪

復大興之。

唐武廢教後

餘年 應・亦儒教之聖謨。但未深明其致・故人多暗昧不了耳。由漢至今・千八百 永劫沈淪。貽誚將來・以爲殷鑑。書曰・惠迪吉・從逆凶・惟影響。因果報 時之勢力・滅眾生之慧眼・斷人天之坦路・掘地獄之深坑。宜其即目交報 覺。了幻妄之惑業・復本有之心性。尙感恩報德護持流通之不暇・豈可任 佛乃三界大師・四生慈父。聖中之聖・天中之天。教人以返妄歸真・背塵合 父子被金廣去。金封徽宗爲昏德侯・欽宗爲重昏侯。二宗皆死於五國城。夫 禁中・帝焚香乞哀。僧伽振錫登城・水即頓涸。隨敕復佛舊制。不六七年・ 京城大水・直同湖海。君臣惶懼・敕靈素止水・愈止愈漲。忽僧伽大聖現靈 佛爲大覺金仙・稱僧爲德士・著道士衣・凡作法事・居道士後。下詔不久・ 及一年・歸真被誅・德裕竄死・武宗服道士金丹・疽發背死・宣宗復大興之 。宋之徽宗・初亦甚信佛法。後聽道士林靈素之妖妄・遂改佛像爲道相・稱 自天子以至於庶人・依佛法而明心見性・了生脫死者・如恆河沙。迄

印光法師文鈔卷四

九四二

每作文排斥、至憲宗元和十四年、諫迎佛骨、貶之潮州、因與大顛往還、乃少生信向耳州楊氏子、參南嶽石頭希遷禪師、大悟、遂嗣其法、住潮州蠶山、刺史韓退之初不信佛 況外護有人・ 古爲師 乃千餘年來宏法勝地。曹溪一 今民國啓運・各界名人・ ・入佛法之勝道場地。今法運雖衰 ・見賢思齊 內修無障 0 精進勇猛 。豈可不自奮勉 皆知佛教爲世出世間道之源本 脈·流布中外。潮陽靈山· ・力修淨業 ·勝地猶昔。我僧界諸同衣 以挽既倒之狂瀾 。庶不至宗風掃地 ·保護贊助 實大顛禪師 續將絕之慧命 • 貽辱法門 、攝闢佛之 · 各宜以 0 我廣 通師 : 諱 而

潮陽佛教分會演說二

冀報佛恩於萬一哉

言名義者 今日緇素雲集 名爲潮陽佛教分會 ・嘉會宏開 0 其名義宗旨 。而義則佛者· ·事業利益 覺也。 自覺覺他 畢意如 何 覺行 請略]圓滿 陳之

名之爲佛。 即指娑婆教主本師釋迦牟尼佛而言 非過去現在未來十方一切諸

教修觀 佛教 佛也。教者・聖人被下之言・上之所施・下之所效也。佛視一切眾生本覺妙 性・與己無異 務祈專念彌陀 耳。事業者・教育幼僧・習學經典。策勵先進・篤修淨業。若是在家居士 教而不可。今茲 因將眾生本具・ 。宗旨者・整理法門・保護僧産・俾僧俗各體忠恕慈悲・以永享乎共和幸福 。令其於不覺心・起始覺智。修德有功・性德方顯。真窮妄盡・徹證本覺 大藏教・皆詮斯義。佛諸弟子・永爲典型。此教之所由來也。會者・聚也 合也。欲上求佛道 。上輔國政・下化同胞。然則此會・亦法王嘉會・及法施之會之流類也 斷惑證真 0 · 求生西方。利益者 自己親證之理・隨彼根性・作偏圓頓漸大小權實等種種異說 但以迷染因緣・遂成不覺。幻起煩惱惑業・枉受生死苦果 一會 則超凡入聖 ・非聚合六度萬行而無由。欲下利眾生・非聚合三宗四 ・乃聚合僧俗兩界諸大徳・ 0 醫家治病 持佛禁戒・自行化他・則俗美人和。依 緩則培本· 同心戮力・維持法門・ 急則治標 振興

九四 24

衣果能人人恪守清規 乃法門標病。以其急故・因以保護僧產爲首・若論正本清源之道・我同 · 篤修淨業 ・道行若立乎己身・德化自感於同人 彼常

0

謀侵奪排斥者・將反而恭敬供養之不暇矣・何用乎保護爲 。倘佛會雖立・行

爲仍舊。善人則厭而惡之・惡人則必以佛會無益爲口實・而更加侵奪排斥 縱欲保護・亦無從措手矣。孟子謂夫人必自侮而後人侮之・家必自毀而後.

毀之・國必自伐而後人伐之者・此之謂也。凡我同衣・各宜勉旃 則外侮自息矣 0 內護得法

潮陽佛教分會演說三

照 諸佛菩薩 如 膏 雨普潤 · 於諸眾生等作利益·無有偏黨。如天普蓋 0 了無憎愛分別之心。然由眾生向背不同 如地普載 • 致令損益天 0 如日月普 地懸

譬如人處天地之間 ·以不善攝生故 或因嚴寒酷暑而致病 或因墮坑落

亦蒙其照。時雨等澍・小草縦難沖霄・亦遂其生。光潤是一 塹以亡身。只宜歸咎自己・豈可怨尤天地。又如日月當空・盲人雖不覩光・ ・由目壞根小之所致也。其慈悲誓願・以己功德回向眾生・冥熏加被。與垂 ·而得益各別者

悟諸 • 深感佛恩 ・而悲其聞法修持之晩也。當今之世・去堯舜禹湯文武三 四

藏・何由得悉知親見也哉。今以顯而易見之一事言之・諸有智者・自當以一

形六道・和光同事・種種方便利益眾生之不思議事。若非徹證自心・徧閱大

千年。 遷・人畜互變之故。雖剛強難化・了無信心之鉅惡元凶・其心亦被此法折伏 其世道人心·遠不能與古相比。然由知六道輪迴 ・隨業升沈・天獄迭

以所愛之臣妾及與百姓・殺而殉葬・動至數十數百而不以爲非・反以爲榮者 。縦草菅人命・心猶隱伏一懼因畏果影子・遂不至十分暴惡。如列國諸侯 不猶此善於彼乎 。夫文王澤及枯骨 • 不數百年而殺人殉葬之風 ・徧於天下

·尚不能挽其頹 風 自佛法東來之後・ 生死輪迴 · 因果報

印光法師文鈔卷四

雜著

佛教會演說三

九四六

葬而全民生。吾恐勸之者徒勞・行之者益熾也。而況後儒唯知治道・不了自 應之理・大明於世。勿論諸侯・即南面稱朕・亦不敢行。縱有行者・亦斷不 敢以多爲榮也。 倘無此法 ・唯以正心誠意之說 ・令其推忠恕而篤胞與・息殉

心。欲排佛法・強立門庭。皆謂一死永滅・無復後世。若非如來生死輪迴

因果報應之理・浹洽人心。則後世人民・其得正命而善終者 ·蓋亦鮮矣 が斯

凡情・又何能測度其利益於萬一也耶

蓋佛法中最極淺近之法・尚可勝殘去殺

0

而況至極深遠之圓頓大法

其世智

潮陽佛教分會演說四

眾生者・未悟之佛。

其苦樂受用・天地懸殊者 ·由稱性順修 ·背性逆修之所致也。其理甚深

佛者・已悟之眾生。其心性本體・平等一如・

無二無別

。欲不費詞 姑以喻明 0 諸佛致極修徳・徹證性徳 0 譬如大圓寶鏡

印光法師文鈔卷四 雜著 佛教會演說四

0

滿菩提 復如是 從外來 致 復現 磨 明 迷性德 相 復空洞虛豁 斯 暎。 其體是銅 0 0 0 • 從茲不肯廢 盡來際以安住寂光 0 眾生之心 大而 雖 日 ·毫無修德。 0 三塵垢 如 歸 非從磨得 漸斷煩惑 無所得 是 天地 0 • 了無一 知有光明・日事揩磨。施功不已・塵盡光發。高臺卓豎 淨 盡 棄 • 但復本有 • 小而 亦復如是 • 0 0 • 然不 譬如寶鏡蒙塵・不但毫無光明・即銅體亦被鏽遮・ 漸增智慧・迨至功圓行滿・則斷無可斷 自然遇形斯暎 日事 神通智慧 物 塵毛・ • 0 指磨 常享法樂 磨則亦無由而得也。眾生背塵合覺 諸佛之心 别 0 森羅 無新 若知即此銅體 • 0 功德相好 初則略露 得 萬象 • 0 • 照天照地 度九界以出離生死 亦復如是 若 · 炳然齊現 銅質 唯 與彼 任性德 不 矣 現之廢鏡 • 0 次則 十方三世一 斷盡煩惱 0 然此 0 不起修德 漸發光明 正當萬象齊現之時 光明 • • 感業 具有照天照地之光 同證涅槃 切諸: • ·返妄歸真 • 鏡本自 證無 • 0 倘能 佛 則 圓彰智慧德 盡 可證 。眾生全 未 具 了 極 · 有形 無異 而不 來際 力 • 0 • 亦 非 儘 圓 而

不能豁破無明・頓復性體・以直趣妙覺果海。豈可不圓發三心・篤修淨業 常受生死輪迴之苦・永無復本還元之日矣。吾輩既爲佛子・當行佛行。縱

滅・游泳佛國・上求佛道・下化眾生乎。倘不自奮勉・高推聖境・自處凡愚 以期斷煩惑於此身・託心識於蓮邦 ・爲彌陀之弟子・作大士之良朋 · 安住寂

畏半生修持之勤勞・甘永劫沈淪之酸楚。迷衣珠而弗珍・登寶山而空歸

以具無量功德智慧神通相好之妙真如性・枉受無量生死輪迴煩惱業果之幻妄

極苦 稱爲可憐愍者。凡我同倫・各宜努力 豈非喪 心病狂 ·惡升樂墜 0 生作行肉走屍・死與草木同腐。三世諸佛

味精能挽劫運說

生種 飲食于人・ 種穀 關係甚大。得之則生・弗得則死。故曰食爲民天。然天地既爲人 種種菜 種種果。 養人之物 ・亦良多矣 0 而以口腹之故 取水陸

敢信 吳君所製味精醬精 從殺生食 矣。此品其質醇厚・絕無葷物。願吃素之人・放心用之。光初聞其說・尙不 取麥麩・洗出麵筋・醞釀多日・製成醬精味精・以資飲食之味・其意亦良厚 世人習慣肉食 悦口之故・于未來世・受彼殺戮乎哉。願雲禪師云。千百年來碗裏羹・怨深 食之・能不懷怨結恨 空行諸物・殺而食之・以圖一時之悅口。絕不計及彼等與吾・同稟靈明之性 近有化學大家 似海恨難平。欲知世上刀兵劫・但聽屠門夜半聲。詳味斯言。可以悟矣。奈 同賦 。一日・林滌庵夫婦・同來皈依。因與說食肉結果之慘・天災人禍・多 血肉之驅 段肉而起 ··吳蘊初君。有心世道 ・勸其吃素・縱有惻隱之心・亦不易從 ・同知疼痛苦樂・同知貪生怕死。但以力弗能敵 奈世人多以口舌滋味所関・故難消滅其根本也。 甚鮮美 以圖報于未來世乎。試一思之·能不惴惴 若著少許于食中 ·欲挽殺劫 即粗糲亦等珍羞矣 ·特專精研究食味 ・以無滋味以佐食故 0 ·被我殺而 彼遂言 忍以一時 一事 乃

印光法師文鈔卷四

九五〇

印光法師文鈔卷四

雜著

偕江味農居士・并二三友人・同往其廠・看其製法。深佩吳君一番苦心。以

惟恐不傷人・函人惟恐傷人。巫匠亦然・故術不可不慎也・竊謂吳君此品 此品一行・不但救護物命・且能令同人解怨釋結・俾與一 于天地之間 [・以各盡天年・其利益大矣。孟子曰・矢人豈不仁于函人哉・矢人 切物類 ・同得共生

世世生生・不遭殺劫。明哲君子・當不以光言爲迂腐也。 成何物 藝也而進乎道矣。出此以行世・求利也而實含利人利物・救國救民之深益矣 其功偉哉。慈受深禪師云・飲食于人日月長・精粗隨分塞飢瘡 ・不用將心細校量。况有此品以輔之・宜一切人各各吃素・以保我身 。下喉三寸

岳步雲爲親所設佛堂說

瞋癡 眾生一念心性・與佛無殊。由迷背故・不得受用。反承此佛性功德力・起貪 造殺盜淫 。以致輪迴三途六道・了無已時・ 可不哀哉 阿彌陀佛

印光法師文鈔卷四 雜著 岳步雲設佛堂說

必有聞風相繼而興起者

得親歡心。亦可謂善于事親・諭親于道矣。詩云・孝子不匱・永錫爾類。當 皆長時念佛矣。又以公事羈絆・不能常修定省。因請雙親至省・租屋而居 超凡・了生脱死。校彼仗自力修戒定慧・直至惑業淨盡・方了生死者・其難 加被 往劫中・發四十八種大願。有一願云・若有眾生・稱我名號・求生我國。乃 以便承侍 年老喪明 易奚啻天淵之別。岳歩雲居士・信心真切・而且至孝出于天性。其父運生・ 願 至十念・若不生者・不取正覺。是知佛念眾生・如母憶子。眾生若能生信發 持佛名號 ・業障消滅・諸緣順適。臨終蒙佛接引・帶業往生極樂世界。從茲入聖 。特設一佛堂・以作父母修持之所。而己與妻子・相侍念佛・以祈 。步雲志心念佛・又勸其父念佛・遂得雙目復明。由是其父母・各 ・求生西方・如子憶母。自然上契佛心・感應道交。現生蒙佛

普勸愛惜物命同用淸明素皀以減殺業說

得惡果者 人歷劫以及現生之惡業所感召耳。斷無有無因而得果者・亦斷無有作善業而 甚矣近世天災人禍之頻數・而人民死亡之多且慘也。豈天道之不仁哉・實吾 不曾殺生・而日日食肉・即日日殺生。以非殺決無有肉故・以屠者獵者漁者 無差爽也。而諸惡業中・唯殺最重。普天之下・殆無不造殺業之人。即畢生 能曠觀多劫多生・則凡所受之善惡果報・一一皆如響之應聲・影之隨形 皆爲供給食肉者之所需・而代爲之殺。然則食肉吃素一關・實爲吾人升沈 不罹意外災禍者・當以戒殺吃素・爲挽回天災人禍之第一妙法。以一切眾 天下治亂之本・非細故也。其有自愛其身・兼愛普天人民・欲令長壽安樂 。但以凡夫知見・不能了知宿世因緣・似乎亦有不當得而得者。若

生一念心性・與佛無異・與吾人亦無異

(。 但以宿世惡業・墮于異類

。固當生

餘慶 之報復乎。故書曰・作善降之百祥・作不善降之百殃。易曰・積善之家必有 必有別種因緣相抵・實皆不出往來報復之外。天之賞罰・亦復如是・而况人 潦・ 身命・以取悅我口腹乎。由其殺業固結・以致發生刀兵之人禍・ 既具此頂天履地之質・理宜參贊化育・令彼鳥獸魚鼈・各得其所。何忍殺彼 立噬其人而後已 與物之被殺情境相同 大憐憫・何可恣行殺食乎。無如世人狃于習俗・每以殺生食肉爲樂。而不念 送年禮然・我以禮往 彼被殺之物・其痛苦怨恨爲如何也。以強陵弱・視爲固然。而刀兵一 以惡言相加 飢饉疾疫 積不善之家必有餘殃 ・以力不能敵故耳 · 風吹地震 |。人何不於此苦境・試為設一回想。物我同皆貪生怕死 ・人以禮來 。焚汝屋廬・奸汝婦女・掠汝錢財・殺汝身命・ ・海嘯河溢等天災・各各相繼而降作也。 。天道好還 ・生之被殺・亦以力不能敵 0 断無往而不來・來而 無往不復 。欲免惡果 不往者。即或有之· 0 使其能敵 ・先斷惡因 與夫水火旱 **猶如世人** 起· 則 尚不敢 ・必當 · 我

印光法師文鈔卷四

雜著

勸愛惜物命說

五四

無不提倡戒殺放生 欲得善果・先植善因。此天理人情之至誼也。是以現今有心世道人心之人・ 過愆·與用此素皂·現在及將來之利益。 億也。今當開辦之始・周君以余向提倡戒殺放生・因果報應等事理・以期挽 做葷皂者・通皆改作素皂。其所減殺生命・并中外計之・每年當不止百千萬 當用・即一切人亦應當用 來之慈悲・行減殺之方便。特發明一種素質清明皂。其助光滑者・乃椰子油 油豬油・助其光滑。其用甚廣・則其所殺亦復甚多。近有周文明居士・本如 天人民・同享安樂・同得解脱也。肥皂之用・徧及中外。而其質料・係以牛 救天災人禍 天意。將見雨順風調・時和年豐。俗美人良・刀兵不作。還彼大同之世・以 其皂去垢 0 · 不讓葷皂 故祈余發揮特爲減殺之誠 ・吃素念佛。以闡明生死輪迴因果報應等事理・而冀其普 。而洗衣浴身・永離腥羶濁氣 。以唯益無損 ・誰不應用也。尙期此皂大行後・ 以冀人人戒殺 。 遂忘其固陋・乃為述其殺生食肉之 。不獨吃素念佛之人應 ·戶戶吃齋 ・庶可挽回 彼

樂我天真。何幸如之。倘不以此爲老僧常談而忽略之·則爲天下國家之大幸

息災衛生豫說

也。

之地 預逃 粉身碎骨者・何可勝數 復加土匪四起・搶掠劫盜 劫之慘 民・同享太平之福・而渾無功迹之可以讚述・民生其間 凡事豫則立・不豫則廢。以故古聖賢皆致治于未亂・保邦于未危・使普天人 又加飛艇時臨 **礟聲如雷・子彈如雨** 亦被擄掠 振古未聞 及兵所經過之區 ・妻離子散・孤露漂零・籲天呼地・亦無救援 ・地雷密佈・殺人之法・無奇不有・其兵民之隨礟雷彈雨而 ・加以水旱瘟蝗・風吹地震・種種天災・民已不堪其苦 0 其淫掠之慘 ・無法防禦・無處控告。又復同室操戈・大起戰爭 而適當戰場之民・ 其屋廬什物・ 破一開・死亡無數・况復多磁・鎮日常開多日乎 不忍見聞 0 何天既生烝民 ·何幸如之。近世兵 盡成烏有・若非 。而附近戰場 而不與烝

息災衞生豫說

九五六

于殺業 之饞心想 同一 之奉父母以盡孝・祀祖宗以追遠・祭神祇以祈福・燕賓客以暢懷。凡屬冠昏 捕 殺曰盜曰淫。盜淫二業·愚頑爲勢所制 畏因・ 無門・唯人自召 民之幸福 喪祭・無不以肉爲禮・若不用肉・似乎蔑理悖德・無顏對人。而不計及彼等 以當受惡果時・仍復彼此戕賊・互相讐害故也。世人造業・大端有三 形骸 或以 諸凡遂意也。 眾生畏果・畏因則不造惡業・自無惡果・畏果則既受惡果・又造惡因 • 対財求 則舉世之人・ ・反與烝民以殃禍・是誠何心哉。須知惠吉逆凶・ 不關緊要之空場面 同一靈性· 取彼水陸飛行一切諸物 非自孽決不至感天孽・種是因決不能逃是報。經云 此無他· 無論智愚賢否・絕少不犯。 同一 避凶而趨吉 以世教所拘 ・令彼諸物 · 同一好生而惡死 ・種種割烹・以悅我口而養我身 ・賢智以義自繩・猶復不至太甚 相習成風・不加深察而致然也。唯 · 受斬截割烹之苦 以貪口腹滋味故 0 理無或爽 何忍以唯屬妄起 • 以冀我身安心 或以智 菩薩 禍 。兼 。 至 福

我如來·洞明三世因果·六道輪迴之事理·故令一切眾生·勿作殺業。以一切 言一切男子一切女人者・總該六道一切眾生・非單指人道而言也。故下即曰 生無不從之受生・故六道眾生・皆是我父母・而殺而食者・即殺食我父母 眾生・皆有佛性・皆是吾人過去父母眷屬・皆于未來當成佛道。故梵網經云 之法。倘能于物尚不忍殺・冀其得所・決不戕賊人民・令其受諸苦楚・以至 來以大慈悲・欲諸眾生・皆得安樂・度脫生死・以故特爲說此預爲自救救他 中取之而食 死亡也。且勿謂人畜互變・因果循環 不曾作父母兄弟男女眷屬・乃至朋友親愛侍使。易生而受鳥獸等身・云何于 ・我生生無不從之受生・故六道眾生・皆是我父母・若作此想・救濟尙不暇 何敢殺乎。入楞伽經云・一切眾生・從無始來・在生死中・輪迴不息・靡 若佛子・以慈心故・行放生業・一切男子是我父・一切女人是我母・我生 0 菩薩觀諸眾生・同于己身・念肉皆從有命中來・云何而食 ・誰其親見。須知佛以妄語爲戒・必不 如

印光法師文鈔卷四

雜著

息災衞生豫說

五八

・即有見者・皆不加詳察・而忽略過去・以致同陷于不知因果萬丈深坑・故受 自妄語以欺人。世間中人以上者・尚不肯妄語以喪其品行・况佛爲三界大師 體帖古今聖賢昌明仁民愛物之心・及與如來普視一切眾生猶如一子之道。同 殺而食之・是何異投火坑以求清涼・飲鴆酒以求長壽也。所作之因・與所冀 秋傳・及二十二史中・善惡報應・及生死輪迴之事迹甚多・惜世人多未之見 遵如來慈濟眾生・一視同仁之道・用陳預息天災人禍之法。倘能放開眼界 難免瘟疫流行。不慧愍我同倫・遭此慘劫・思欲息其後患・因不揣庸愚・爰 之果相反・何可得乎。今年水災旱災・將徧全國。又經數處大戰・米貴如珠 此同分所感之慘報也。一切人民・無不欲安樂長壽・家門清泰・而日取諸物 ・四生慈父・豈有自立法而自違法之理乎。是知佛言・毫無疑義。况此方春 民不聊生・幸稍寧靖・而元氣一時難復・怨魂尚未得所・由彼戾氣所結

皆戒殺護生・吃素念佛・力敦倫常・各盡己分・諸惡莫作・眾善奉行・自行

化他・以祈徧界同風。人心既迴・天和自至・將見雨順風調・民康物阜・慈

善行而干戈永息・禮義興而強暴不作。如是・則雖在叔季之世・不異羲皇上

大毒・人若食此魚蝦・必受疫癘之災。所以大戰之後・每有大疫・皆由貪圖 人矣・何樂如之。倘人各秉此迴天之心力・亦未始非辦不到者。又當戰場地 口腹而致。况此種既曾食人屍質・人又何忍復食此種・若食・則與食人相去 ・屍骸分崩・多填溝壑・其屍質被魚蝦所食・以挾怨恨兼腐爛之屍質・必有

各以自愛而愛物・俾物我同安樂生育于高天厚地之閒・則幸甚幸甚 何遠。不慧既無道力・又無財力・爰以空言・聊表愚誠。伏乞賜閱諸君・各

因果爲儒釋聖教之根本說

或以爲佛氏之言・則多方破斥・或以爲淺近之義・而弁髦置之。任己世智辯 因果報應者・世出世間聖人・平治天下・度脱眾生之大權也・而世人不察・

印光法師文鈔卷四

雜著

息災衛生豫說

因果爲儒釋根本說

聰・長溺邪見濁港・凡所論議・皆非聖賢根本修己治人之道。致令善無以勸 耳。至洪範之五福六極・若不推其前生之因・專歸于王政・則成無稽之談 哀也已。夫因果報應之言論事實・見于經史者甚多。在書則曰惠迪吉・從逆 物・遊魂爲變・是故知鬼神之情狀・非因果報應・生死輪迴之說乎。至于春 積不善之家・必有餘殃。于繫辭傳則曰・原始要終・故知死生之說・精氣爲 將謂王者威制令其暴惡乎。孔子贊易・于文言則曰・積善之家・必有餘慶 是豈禹與箕子所以教萬世之心哉。且五福之壽・康寧・攸好德・考終命・六 凶 極之凶短折 或可人與・餘多宿因所感。而惡者・乃面貌醜惡 惡無以懲・其弊遂至競爭名利勢位・以至殺人盈野盈城而不止也。噫・可 ・惟影響・作善降之百祥・作不善降之百殃・此猶可謂只論現世・及子孫 ・疾・憂・惡・弱・豈王者能操其權而使之然乎。就中惟富與貧 ・非暴惡也・ 訓作 -剛過

秋左傳

・及二十二史中・善惡報應生死輪迴之事

則多不勝書・二十二史感

福無門 足・徹證自心 動念・所言所行・無非六度萬行・利人濟物之道・及其積極功純 是以君子聿修厥德・素位而行・上不怨天・下不尤人。是故經云・菩薩畏因 今生作者是。了此・則苦樂吉凶・皆自己罪福所感・非從天降・亦非人與 惟其宿世之功過不同・以致今生之享受各異・所謂永言配命・自求多福 世因果・則天之畀于人者・便不公平・而作善者爲徒勞・作惡者爲得計矣 湯文武周孔・及歴代作史者・皆爲惑世誣民之罪人矣・有是理乎哉。若無三 應錄二卷・乃存十一于百千耳。是知儒者不信因果報應生死輪迴之事理・不 但有悖佛經 眾生畏果。畏因則以戒定慧・制伏其心・俾貪瞋癡念・無從而起・其居心 則無非殺盜淫耳。然盜淫二業・上智以義自繩・下愚爲勢所制・尚不至太 ・惟人自召耳。 · 實爲逆天命而侮聖人之言 ·以圓成佛道 故佛經云 。眾生不知果由因招・念念起貪瞋癡 ・欲知前世因・今生受者是・欲知來世果 。否則六經便非儒者之書・而堯舜禹 發而爲事 則福慧兩 禍

印光法師文鈔卷四

雜著

因果爲儒釋根本說

六二

安樂。又欲子孫世守成規・祈余發揮因果至理・俾有所遵循・亦可謂知本矣 來愍諸眾生・令其愛惜物命・切勿食肉 爲刀兵水旱疾疫等災・業果已熟・莫由逃避・ 眾生・宰割烹炮・以悅我口腹・養我身體・兼之以奉父母・祭祖宗・祀鬼神 甚。而殺生食肉 年刀兵之慘 而已哉。同郷幼農王居士・宿植德本・篤信佛乘・賦性廉潔・法楊震之四知 。夫天下不治・由于家庭無善教・致有天姿者・習爲狂妄・無天姿者・狎于 修持嚴明・效曾子之三省・無論居官居家・唯以仁民愛物爲志事。痛念近 燕賓客 生死輪迴 ・唯取我樂・不思彼苦・與世之人・悉皆如是。殺業積久・則發而 ・欲爲根本解決・遂與夫人・俱持長齋。且又極力提倡因果報應 戒殺護生・吃素念佛・以期殺業息而天下太平・ ・謂爲固然・由是或以智捕・或以財求・取彼水陸空行一切 ・其仁民之心・至深且遠・豈獨愛物 縱生畏懼· 了無所益 仁風行而 。是以如

愚頑・二者皆非國家社會之福。是知教子爲治平之本・

而教女尤爲切要・以

今日之賢女・異日即爲人之賢妻賢母・人能得賢母之教育・賢妻之輔助・豈 有不成賢人乎哉・故曰教子女爲天下太平之根本也。

普勸戒殺吃素挽回劫運說

成弱肉強食之暴行耶。夫愛物者方能仁民・仁民者必須愛物・倘於異類之物 況佛經常言・一 切眾生・皆有佛性・皆堪作佛・皆於無量劫來・彼此互爲父母兄 甚矣・世人習爲殘忍・事事以殺生爲禮・而不知其非也。夫一切眾生・與我 以期攄我之誠・悅我之心・不念彼等受諸極苦・及負宿世互爲親屬之大恩也 或奉養父母・或宴會賓朋・或爲悅我口腹・資我身體・一一悉以殺諸物命 弟妻子眷屬。何得我欲報恩報德・祈福祈壽・或祭天地神祇・以及祖宗昭穆 同生於天地之間・同賦血肉之身・同稟知覺之性・同知趨吉避凶・貪生怕死。而 。且天地以好生爲德・儒者以胞與爲懷・何竟不生惻隱愛物之仁心・以致習

印光法師文鈔卷四

雜著

九六四

形・ 於祭天地聖人・豈無黍稷蔬果・以將其誠 城盈野・不唯不生憐憫・反以爲悅樂快意・良以殺習一長・仁心便喪矣。至 天地之間・受其覆載・固宜積德行仁・以補天地化育之缺。若論報恩・縱粉 羊豕等・各陳於架・悉係完全之體・但刳其臟腑而已・其汙濁之氣・慘悽之 廟・春秋二祭・各省府州縣・俱殺牛羊豕等以祭・謂爲報恩酬德 度天地之心・又以水陸神祇待天地・其誣衊瀆汙於天地也甚矣。至於文武聖 人・清淨香潔・豈復歆饗此汙濁臭穢之氣味乎。是殆以己貪圖口腹之心・測 身碎骨・亦不能報其萬一・豈腥臊臭穢之牛羊豕等肉・便能報乎。况天帝天 。清光緒元年・陝西省城文廟・秋祭之先一日・予因往禮謁。大成殿內・牛 尚不忍戕·決不致反忍戕乎同類之人民。若以戕物爲故常·則必至殺人盈 以敬聖人之事 刺目棘鼻・不忍見聞。時予年甫志學・尙效韓歐闢佛・不禁浩歎 而褻瀆聖人・竟至如此其極 · 何得特取於殺物命乎 試令彼致祭之人・居此殿中 :。吾人生於 ·崇聖重道 () 謂 何

過宿 ・俾彼熟睹其形・熟聞其氣・彼必力拒不肯。豈祖述堯舜・憲章文武・

門外東邊・係殺牛之所・見一大鍋・內中之水・汙穢不堪・乃洗牛之水也・ 萬世師表 ・百代儒宗之大聖人・反甘此臭穢不堪之物・而歆饗之乎。及至戟

思之・即欲發嘔。嗟乎・何汙濁如此・而爲敬聖之禮乎。夫黍稷非馨・明德

唯馨 令數萬生靈 ・何不以黍稷蔬果致誠。而天下二千餘縣・每年二次・瀆汙文武二聖 ・同登死地・實爲侮聖戕生之大者。 何無尊敬聖人 · 愛惜物命之

大人・出而永革舊例・特立新章・俾二聖之靈・不受此種熏汙・數萬生命 不爲胙肉・以充致祭者之食料耶。聖人以仁民愛物爲懷・豈願由汙衊自己・

能淫 而令數萬生靈・同登死地乎。關帝在世則精忠貫日月・浩氣塞天地・富貴不 · 貧賤不能移 關帝特運神力 · 威武不能屈 ・創建寺宇・又求授戒・以爲菩提之本・兼願擁護佛法 ・沒後神王玉泉山・隋文帝時・智者大師至

玉關 故天下叢林・皆謂之爲伽藍菩薩・ 而與韋馱菩薩 並鎮山門

玉泉

印光法師文鈔卷四

雜著

戒殺吃素說

乎。 千餘年來・護國護民・尊登帝位・豈竟甘此汙穢不堪之生牛羊豕等・以之爲 及諸載籍 輪迴之事理・尚有可原。今人畜循環・報應昭著・其事迹散見於二十四史・ 以陷吾親於生生世世被殺・以償受吾孝養之怨債乎。使不知三世因果・六道 輪迴於六道三途・不爲作福・令其超昇・已失爲人後者之道・何可恣意殺生 復大失敬祖之道・以殺行敬・是爲大逆。況祖宗既非斷惑證真之聖人・當必 今爲盡我追遠之誠・令彼物類・悉受殺身臠割之慘。不但失吾惻隱之仁・亦 宜以黍稷蔬果致敬・何可特殺・及買之屠者乎。古人祭先・尚求仁者之粟・ 之大人・起而革除此侮聖戕物之陋習・不禁馨香頂祝之。若夫祭祀祖宗・固 美而歆饗之乎。即世間至極下劣之貪饞輩・亦不至甘此臭穢・而謂關帝甘之 以作落井下石之事乎。至於奉養父母 何竟視文武二聖・卑劣一至此極也・嗚乎哀哉。當必有明至理・行實敬 猶復固執陋習・不肯改革・ 必期於吾與吾親・同受此報 ・蔬食豈無甘旨之味・而必須肉食 · 其人謂

喪心病狂 以砒 霜鴆毒 奉 親 • 期享長 【壽安樂乎 • 哀 哉 。諸史中甚多三世因果: 多 **六道輪迴等事 欲略知大概** 道輪迴等事迹

示作異類。當看欲海 現相一段文、自知其概。願諸觀者、同生正信。當看觀世音菩薩本迹感應頌卷一、第三十頁、物類 。及殺之以後、方知聖人示現、冀人不敢殺食諸物、以期彼此同得解脫也。其事甚多、不能備書回狂、第四十三四五三頁、形滅神存類之六問答、自可略知。又佛菩薩欲人戒殺放生、以大慈悲 所云宴會賓朋・原爲暢敍衷懷 ・疏通 情

素 能下咽矣 以彼之肉 何可 以殺生慘事 0 列我之筵 世人娶妻生子 • • 佐此清筵乎 以作賓客歡娛之助 • 原爲繼續祖脈 0 彼物與吾及吾友 乎 • 是爲最吉祥 0 試 思其前後因 ・非有殺父之怨 事 • 若 果 用 肉 • 縱 食 食 • 亦不 何得 則 区

清夜自思・安乎否耶。又人每遇祝壽娶妻生子等吉事 • 或無意中· 談及

孰甚焉

0

我欲夫妻偕老・子孫蕃衍

•

令彼物類

•

或受離羣之悲・或受刀砧之

割烹炮 死喪等字 以至嚼 主人便不歡悅 食 而反以爲樂 • 設有破壞器具等事 • 爲禮 • 爲吉慶 便謂不祥 • 是誠 何心 o 哉 何 殺諸生命 • 乃習 慣 而 弗

•

思耳 0 若論自奉 • 更不宜殺 • 當思吾生世間 有 何 功德 • 及於民物 有 何 福

及於祖宗父母。今承祖宗父母之蔭 印光法師文鈔卷四 雜著 戒殺吃素說 席豐履厚・ 不極力爲善 以崇吾祖

九六八

宗父母之福。而復恣意殺生食肉・豈但不利於己・亦將累及祖宗父母矣。而 今略引證據・庶知自愛者・力斷此嗜好也。萬善先資云・孕婦食兔・子則缺 絶少此患。凡欲解脱怨業・攝衞身體者・不可不知也。或曰・三牲五鼎・借 殺時恨心所結・故食肉之人・多生瘡病・瘟疫流行・每多傳染・吃素之人・ 資於內者 密化成物類之氣質・則爲大不孝。曾見治刎頸未斷氣管者・活割烏雞肉 脣。食雀 況稟父母之遺體・日以物類資益・久之・則氣質隨之而變・是爲大可畏者 於傷處 ・子多難産 皆氣質隨物類之氣質轉變所致。以吾父母所遺之氣質・由食肉故・使潛移 ・好之・則彼處仍長雞毛。貼於外者・當處仍是畜質・盡平生食肉而 ・子則雀目。食蟹・子多横生。食鼈・子則項短頭縮 ・可不惕然驚懼 。食田雞・子多喑啞。大戴禮云・食肉勇敢而悍・食穀智慧而巧 ·以保存我所稟父母之遺體乎哉。況肉皆含毒 。食鰻魚鳅鱔 ·.' 貼 以 0

物攄誠

· 若如汝說

・則古聖賢所立之法皆非乎。答曰・聖賢隨俗尙而立法

等 · 其舊矣 慣而 取血 閒卵化濕胎・隨力強弱・遞相吞噉。以人食羊・羊死爲人・人死爲羊・如是 託生此等物中・以受人殺食耳 蚣 悉使牝牡雌雄各異其所・則不十餘年・將永斷其種矣。况虎豹豺狼・蛇蠍蜈 滿世界矣・將如之何。答曰・世人所食者・皆是人令滋生・彼豬羊雞鴨等 傷天地好生之德・以喪吾心不忍之仁。况借物攄誠・何不取黍稷蔬果・而必 初非究竟實義。今既知人畜輪迴之事實・固當捨權從實・何可執權廢實 ・人皆不食・何自古至今・竟未徧滿世界乎。須知食肉者多・ 人設法以令其多生 肉汙穢之物乎。將謂天地孔關・甘此穢物・厭彼清饈乎。此無他 不知其非耳 · 故不詳述 · 死死生生 · 互來相噉 0 至於祭祖養親・宴賓自奉・俱可一返觀而悉知其非 0 或又曰・若如汝說・通不殺生食肉 。實則多半都是貪圖口腹 。故楞嚴經云 。梵網經云・若佛子・以慈心故・行放 ・貪愛同滋・貪不能止・則諸世 • 不惜物命者 • 必至畜生蕃衍 • 則豬羊雞鴨 隨業受報 ・以習 悉改 · 以 徧

印光法師文鈔卷四

雜著

戒殺吃素說

吹地震 來 生業・一切男子是我父・一切女人是我母・我生生無不從之受生・故六道眾 錄 使 生・皆是我父母・而殺而食者・即殺我父母。楞伽經云・一切眾生・從無始 不知有幾萬萬兆・由殺生食肉者之惡心・與受殺諸物等之恨心・結爲兵劫 不悟・則成如來所名可憐憫者。須知兵劫・皆由殺生而起・世閒一日所殺 何貴乎預三才之數・爲萬物之靈乎。忍令具可以爲堯舜・可以作佛之心性・ 。吾人值此時代・再不發一自憫憫他・自傷傷他之心・以期挽回劫運・則亦 |餘年來・中外戰爭・罹死亡者・有數萬萬。而况天災屢降・水旱瘟疫・風 在生死中・輪迴不息・靡不曾作父母兄弟・男女眷屬・乃至朋友親愛侍 觀佛所說・可知殺生食肉・其禍甚深・人畜循環・互相殺食・尚復執迷 易生而受鳥獸等身・云何於中取之而食 · 海嘯河溢 土匪盜賊・諸種災難・層見疊出・穀米昂貴・民不聊生 。 大乘經中・ 如此說者 多難具

而長劫沈淪於互相殺食之業海中・莫之能出

可不哀哉

馮平齋宜人事實發隱

懿範 爲齊家治國之本・又常謂治國平天下之權・女人家操得一大半・蓋謂此也 賢妻也。良以妻能陰相其夫・母能胎教子女。况初生數年・日在母側。親炙 止至善。窮則獨善其身・達則兼善天下。即天姿平常者・亦堪循規蹈矩・作 以天姿高者・若有賢母以鈞陶之・賢妻以輔翼之。自可意誠心正・明明德 任・太姒嗣徽音之説・可以知矣。由是言之・世少賢人・由于世少賢母・與 以輔助文王之道。如兩燈互照・愈見光明。兩手互洗・方得清淨。觀思齋太 寡妻・至于兄弟・以御于家邦。然此但約文王邊說。若論太姒之德・固亦可 其道德・况其下焉者乎。以故太任有胎教・致文王生有聖德。故詩讚其刑于 人生世間・善惡各須輔助・方克有成。雖天縱之聖・尚須賢母賢妻・以輔助 ·常承訓誨 。其性情不知不覺爲之轉變・有不期然而然者。余常謂教女

印光法師文鈔卷四

雜著

馮平齋宜人事實發隱

九七二

之・教女一 夢・不以盡倫守分教女・使日唯從事于妝飾・此外則一無所講。異日爲人妻 守分良民。斷不至越理犯分・爲非作奸・以忝所生・而爲世害也。惜世人夢 齋居士之德配也。生有異性・幼嫻姆訓。在家孝父母・已嫁孝舅姑。而且篤 多被不知教本之教員所誤。從茲不以盡倫守分・宜室宜家・相夫教子爲事。 信佛法・修持唯謹。包君初尙不以爲然・久之則與之俱化・而長齋念佛矣 各各皆欲操政權・作長官。越分計慮・習爲狂妄・亦可慨也。安得有長民者 天下之權・女人家操得一大半・乃真語實語也。近世學風大開・女子入學 ・爲人母・不但不能相夫教子・以成善士・或反相之教之以成惡人。由是言 極力提倡・令其在家庭中培植。俾修齊治平之效・出于不知不覺・了無形 則何幸如之。以是之故・余于馮宜人事實・重有感焉。宜人者・包培 事 ・重于教子多多矣。而余所謂教女爲齊家治國之本・及治國平

以包君具聰明特達之資・又日與端莊靜默・守分盡倫之宜人相處

修浄土之種種懿行・皆堪風世。至其將終前三日・切戒厚葬・命用薄棺布衣 所入・不知來歷者・尙慮其或有錯因果處。必正色勸戒・詳問來歷・以期無 不動哭聲。 痛情狀。又請通法女友・常爲開導。比邱六人・相續助念。直至次日入殮 現諸痛苦・ 由殺起。用以送葬・是以罪業相加。于親愛之道・大相乖戾。臨終一二日 負于心而後已。又每戒其子・勿入政界。猶恐或有難免・故又曰・政界中錢 0 0 以爲真者既去・何可爲此幻驅・濫費金錢・暴殄天物乎。况絲綢之原・皆 其事親相夫・持家教子之芳蹤。與夫戒殺放生・周急濟困 唯日日辦事 又得包君深知要義・ 蓋有潛移密化于不知不覺中。包君固明哲君子· 故使神識不生愛戀・得遂往生之願。 頗覺難堪 ・應得薪俸・可以領受。否則悉屬非分・終須償還・不可不慎 。卒得見佛光明 乃教家人悉爲助念。絕不提及訣別等事 · 結印而逝。蓋由宿根深厚 則包君成就宜人之淨業者 一清如水。宦遊時于有 • · 亦不略露哀 力懺宿業 • 現行淳淑 篤

印光法師文鈔卷四

雜著

七匹

包君之善知識・包君亦宜人之善知識。所謂善與善遇・相得益彰。若宜人者 可謂至矣。法華經云・善知識者・是大因緣・所以化導・令得見佛。宜人固 ・可爲當世婦女之師。而包君于其臨終助念・及諸舉動・實足爲修淨業者之

家人・與其子若孫之軌範也。余故表而出之・以爲愛親者勸。餘詳事實中・

康母往生紀念冊發隱爲康寄遙作此不備書。

獄未空・誓不成佛之願。梵網戒經・以孝順爲至道之法。不但令其孝順父母 諸六道眾生・皆是過去父母・未來諸佛。故地藏有眾生度盡・方證菩提・地 父母之恩・畢世莫酬。孝之爲道・其大無外。如來大教・以孝爲本。菩薩視

師僧三寶・且令其于一切眾生・生慈悲心・孝順心・方便救護・戒殺放生。

以一切眾生・皆我宿世之父母兄弟妻子眷屬故。由是言之・佛教之孝・前溯 後盡未來・無不彌綸而包括之。故蓮池云・親得離塵垢・子道方成就

寬泛不貼・實爲儒釋正本清源之道。倘康子與閱此冊者・各加勉勖 父母之遺體。勿令一言一動・一起心動念・稍違正理・以失孝道。語雖似乎 行。必須克己復禮・閑邪存誠。知過必改・見義必爲。明因識果・戒殺放生 事耳。康母之德・具見于挽誄志銘・故不復贅。吾欲康子以孝親之心・善守 宜何如主敬慎獨・躬行實踐・以期無忝所生也。至于名人之挽誄志銘・乃末 出此不肖之子孫耶。以是知立身行道・即爲表彰父母祖宗之德。爲人子者 未見大海之瞽論也。爲人子者・父母之德・固宜表彰。其表彰之法・注重躬 人不肖・人必疑其父母祖宗雖有懿德・或復兼有隱惡。否則懿德之門・何爲 以爲潛修已久・故有如是之令嗣。否則縱父母祖宗有懿德・人所共知。因其 是者・人縦不知其父母之德・而以景仰其人之德・并景仰其父母祖宗之德 。諸惡莫作・眾善奉行。生信發願・持佛名號。自行化他・同生淨土。能如 彼恃現生服勞奉養之孝・以誹謗佛教爲不孝者・乃固執己井蛙之見・作此 ・則天下

國家之大幸也。豈特康母有光榮哉

江母郭太夫人西歸事略發隱

聖母 人者・蓋以太姜太任太姒三聖女・各能相夫教子・以開八百年之王業者・用 太夫人西歸事略・知居士之資于母者獨厚 習氣 莊謙遜・有古人風。其修持誠懇嚴密・唯期實益。凡談玄說妙・好高務勝之 惡則惡 猶隨俗隨教而移。而上智下愚・其人甚少。則芸芸生民・習於善則善・習於 孔子曰・性相近也・習相遠也。又曰・惟上智與下愚不移。夫以孟子之賢 ・概無有焉。※ 雖欽其天性淳篤・億其家庭鈞陶・必有大過人處。及見 從事胎教 。其不被善惡之所移者・殆百千萬億分中之一二耳。味農江居士・端 ・蓋鈞陶于稟質之初・而必期其習與性成也。 。 是知世有賢母· 方有賢人。 世以太太稱女 古昔

稱其人焉

。 光 常謂治國平天下之權·女人家操得一大半。又嘗謂教女爲齊家

治國之本者・蓋指克盡婦道・相夫教子而言也。無如今之女流・多皆不守本 善。夫何至上無道揆・下無法守・弊竇百出・民不聊生乎哉。懿哉江母・初 生同分惡業所感・實由家庭失教所致。以故有天姿者・習爲狂妄 不成此一 分。妄欲攬政權・做大事・不知從家庭培植。正所謂聚萬國九州之鐵・也鑄 咸以此道成就其親。親在則婉爲勸諭・令其諸惡莫作・眾善奉行・信願念佛 往生西方 研佛學 以孝翁姑・嚴教育・誦經念佛・以化其子。而味農居士・又特擴充母訓 ・狎于頑民。使各得賢母以鈞陶之・則人人皆可爲善士。窮則獨善・達則兼 求生西方。親沒則竭誠盡敬・一心念佛・以祈蓮品高升・無生速證而後已 箇大錯。 能以淨土利益・預爲勸諭 。可謂篤于事親・了無遺憾 以故世道人心・愈趨愈下。天災人禍・頻頻見告。 。殆至臨終 。然猶不以爲足 ・多方助念。俾得承佛慈力 ・又欲世之孝子慈孫 無天姿者 雖屬眾 7.精

此

一西歸事略之隱義也

·故特爲發明云

九七八

陳了常優婆夷往生事迹兼佛性發隱

殊也。若能詳察三因佛性之義・則無疑不破・無人不欲修習矣。三因者・正 塵合覺・眾生則背覺合塵。佛性雖同・而迷悟迥異。故致苦樂升沈・天淵懸 癡・造殺盜淫。由惑造業・因業受苦。反令正因佛性・爲起惑造業受苦之本 由一念無明・障蔽心源。不知六塵境界・當體本空・認爲實有・以致起貪瞋 所發生之正智。以或由知識・或由經教・得聞正因佛性之義・而得了悟 迷背・諸佛究竟圓證。迷證雖異・性常平等。 二了因佛性 ・此即正因佛性 因了因緣因也。 正因佛性· 即吾人即心本具之妙性· 諸佛所證真常之法身 切眾生・皆有佛性。而佛與眾生・心行受用絕不相同者・何也。以佛則背 從茲了悟・遂欲反妄歸真・冀復本性也。三緣因佛性・緣即助緣。既得了 此則在凡不減・ 在聖不增。 處生死而不染・ 居涅槃而不淨。 眾 生 徹底 。 知

穀中芽 莫作 芽 悟 凡入聖・了生脱死之第一要道也。使眾生不具佛性・縱令修習種種善法・亦 爲眾生保證云 覺。法門雖多・戒定慧三・攝無不盡。故楞嚴經云・攝心爲戒・因戒生定 迴生死・莫之能出。如來于是廣設方便・隨機啓迪。冀其返妄歸真・背塵合 竟親證而後已。請以喻明。正因佛性・如礦中金・如木中火・如鏡中光・如 因定發慧・是則名爲三無漏學。而三者之中・唯戒最要 眾生受佛戒・ 切眾生皆是佛 永無發生之日 即須修習種種善法・以期消除惑業 眾善奉行 。雖復本具・若不了知 ・我是已成佛・汝是未成佛 即入諸佛位。位同大覺已・真是諸佛子。是持戒一法・乃超 0 其行與佛近 而即欲度脫 。是知雖有正因 ・及加烹煉鑽研磨礱種植雨澤等緣。則金火光 · 其心必不至與佛相遠也 。眾生由不了悟・不肯修習善法 ・若無緣了・ ・增長福慧・必令所悟本具之理・究 0 若能如是信 不能得其受用 0 0 • 戒品已具足 故如來于 以能持戒 • 0 以致長劫輪 此所 梵網 ·則諸惡 。 又云 以 佛 經 視

印光法師文鈔卷四

雜著

陳了常往生事跡發隱

非易事 無成佛之理。如石不具金・冰不具火・甎不具光・砂不具芽。縱令烹煉鑽研 慈善・篤信佛法・錫周初不知佛法・長子天壽・頗聰明・十四歲殤・意謂我 真信切願 之樂・自己甘受其幻妄之苦也哉。然約通途教道・在凡夫地・欲了生死・大 孰肯以性具之菩提涅槃・妄作煩惱生死。獨讓諸佛・及三乘聖人・受其真常 磨礱種植雨澤等緣・一一經于累劫・亦無金火光芽等發生之事。若知此義 居心行事 優婆夷了常者・ 此法愈當機・善知識提倡愈切。而真實修持・得遂往生之證驗・時或見之 。若約信願念佛求生淨土之特別法門・則即于現生・悉得了脫。果具 ・無大過愆・何得有此。遂于因果報應・生死輪迴之事 ・萬中決不漏一。末世眾生・唯此一法・堪爲恃怙。以故法運愈晚 安徽無爲縣陳錫周了圓居士之繼配夫人也。姓胡氏・賦性 • 概謂爲無

夫人知其執不可破・輒密默修持・不令彼知。未久・夫人有娠

將臨產期

忽得大病。二十九日・不能言語飲食轉側。體熱如火・身瘦如柴。名醫束

有善根・是故我從南海・來安慰汝。隨以蓮華・從頭至足拂之。云拂去業障 手・絕無生望。一夕・夢老母持一把長幹蓮華・云汝以宿業・得此惡病。幸

好生嘉兒。頓覺身心清涼・即驚醒起牀・便成好人。次日生子・龐厚豐滿

世因果之理事・真實不虚。從茲夫婦各吃素念佛・努力修持。于救濟貧苦患 與健婦所生無異。取名天民・今己十五歲矣。錫周由是方知佛慈廣大・三

戒。去年春・夫人欲來普陀見光・因先朝九華。歸至滬・適奉直兵禍將作 夫人函祈歸依・因名了常。九年 難・齋僧修廟 ・施善書・捨棺材 ・夫妻兒女五人・同于北京法源寺・受菩薩 ・悉隨己力爲之。錫周歸依光・法名了圓

得以不見粥飯庸僧爲憾乎。以深受驚嚇・故身體瘦弱・久不復原。錫周祈光 開示・光令作退步想・作已死想・遂得大愈。今春復病瘦弱・不思飲食。于 遂未果來・每引以爲憾。光慰之曰・至心念佛・則日與彌陀聖眾相對越・何

八二

此兆于我則幸・于君則不幸。以己一歸西・內顧無人故。然念佛之人・不貪 拜・供獻香華。歸即移牀向西側臥・唯專念佛・概不提及訣別等事 盡則速生西方耳。從此身心適悅・了無病苦。至四月初・復覺不適。知歸期將 生・不怕死。因請僧四位・誦經禮懺念佛廿八日。以祈壽未盡則速愈・壽已 世間愛情 頂尙溫煖 室有異香 去。全家 佛聲不斷・夫人但默隨之。初六午前・令備浴具。浴已・著新衣・往佛堂禮 至・一心念佛 二月廿八日・正念佛間 見佛來・欲起禮拜・因扶起令坐・作合掌低頭狀。云尚有三千佛・念完即 0 破壞正念。唯仗多人佛聲 全家俱不現悲哀相・又念佛二小時 同僧俗三十餘人・俱大聲念・夫人遂高聲念佛而逝。面帶笑容 四肢柔軟・香氣猶存 ・以求速生・ ·見兩童子執長旛 初五 '。 噫 ·全家都爲念佛。又請師僧換班續念 ・夫人可謂宿有善根 成就淨心。故得感應道交・蒙佛接引 ・上書西方接引四字。謂錫周曰 ・方爲安置 。次日午時 現值善緣 。至亥時 。不現 入殮 晝夜

離此苦域・登彼樂邦。何幸如之。臨終一關・最爲要緊。世有愚人・于父

母眷屬臨終時・輒爲悲痛哭泣・洗身換衣。只圖世人好看・不計貽害亡人。

界。臨終助念・譬如怯夫上山・自力不足。幸有前牽後推・左右扶掖之力 不念佛者・且置勿論。即志切往生・臨終遇此眷屬・多皆破壞正念・仍留此

便可登峯造極。臨終正念昭彰・被魔眷愛情搬動等破壞者・譬如勇士上山

而退。此之得失 自力充足。而親友知識・各以己物・令其擔負。擔負過多・力竭身疲・望崖 ・雖由他起・實屬自己往昔劫中・成全破壞人之善惡業力所

念之隱義・并夫人事實之大略。以期修淨業者・知所取法焉。 神識得所・不在世情場面好看・庶可無虞矣。茲因訃至・故發其佛性・及助 致。凡修淨業者 ・當成全人之正念・及預爲眷屬・示其利害。俾各知所重在

大慈悲室發隱

陳了常往生事跡發隱 大慈悲室發隱

印光法師文鈔卷四

雜著

空爲座 如來座 辱心是 名室・其三法宏經之實・爲有與否。曰・此義當以六即論之。若論究竟圓證 此名。如來于法華會上・令宏經之善男子善女人・入如來室・著如來衣・坐 之德配・心三爲广二居士之生母也。夫大慈悲・乃如來之室・夫人何得竊取 大慈悲室者・王母朱夫人之臥室也。王母朱夫人者・浙江山陰處士王君楚辰 。隨釋之曰・如來室者・一切眾生中大慈悲心是。如來衣者・柔和忍 處此爲說法 如來座者・ 0 一切法空是。復頌曰・大慈悲爲室・柔和忍辱衣 然既入此室・決無不著衣坐座之理。夫人既以大慈悲 ・諸法

頗富 字・各爲立會以提倡之。戚族待以舉火者十數家・族子弟之資以就學者甚眾 觀行・以期證入相似分證者。請略陳之。夫人年二十六・方歸王君 ・則唯佛一人。若論理即・則一切眾生・無不即心本具。夫人殆由名字而起 ・篤信佛法・性好施捨。獨力建一廟兩進・以奉觀世音及天醫神 ・天醫冥消眾病也。又且施茶施藥施燈施衣・歲以爲常 。王君家 放生惜 蓋欲大

以故家道中落。此雖王君所爲·實爲夫人陰相以成。使夫人無大慈悲心·

柔和忍辱心・及不知一切法空之實義・當早爲掣肘阻止・否則拌命以爭・何

至竟令家道零落・半生居貧守困乎。又夫人于于歸後・即蔬食 ・永斷腥葷 o

除。日則紡織縫紉・夜則禮佛誦經・竟歲不出外戶。沈默寡言・親戚過訪 凡麻油香果等亦不食 。唯飲白水。 衣唯粗布・ 綾羅裘葛 ・脂粉簪釧 • 概悉屏

十有五年・王君卒・心三爲广皆幼 太姜太任太姒以譽女人・稱爲太太・固多慚德。若夫人者・則無愧怍焉 。夫人上奉老姑 ・下撫幼子 備歷艱辛 越 寒溫之外・輒談因果報應等事理。事舅姑以孝・相夫以德・教子有法。世以

若忘昔富者 。及子堪就學・則盡賣于歸衣飾・以備束脩。爲心三聘婦婁氏

未娶而喪明 。親族咸勸退婚・夫人絕不見聽。卒娶之・且囑心三善視之・毋

見惡焉。夫人初則默誦心經・日有定數。孀居後・則一心念佛・以期出此娑 生彼極樂耳 印光法師文鈔卷四 0 宣統元年 雜著 大慈悲室發隱 年六十矣。 三月間 姑沒 。夫人親理喪葬

九八六

可必矣 勞致疾。四十餘日・形容枯瘦・而神氣極清 美衣是務。豈肯食蔬衣布・甘受淡薄・ 切法空 冀生蓮邦 十餘年・刻苦清修・永斷女習・恪守閨範。二十年來・一心念佛深厭五濁 業正因。此十一事・有其一種・以深信願・回向往生・皆得如願。况夫人三 具足眾戒・不犯威儀。與發菩提心・深信因果・讀誦大乘・勸進行者・爲淨 沒後兩手柔輭如生時。噫・平昔志願如彼・臨終安靜如此。 云・哀莫大于心死。汝能體此意・則吾心安矣。夫人居常念佛皆默念。屆時 棺・曰・吾後日午後當逝矣。因誡之曰・願汝等進德修業・勉爲完人。莊子 極安舒。心三問所見・曰・毋擾吾正念。囑點燈籠于室門・遂安坐而逝 ・無柔和忍辱心・及大慈悲心。則于于歸之初・當日事妝飾 。觀經以孝養父母・奉事師長 。臨終子問・尙恐見擾。則不生淨土・將何生乎。設使夫人不 ・慈心不殺・修十善業。及受持三歸 如深山之老頭陀乎。若夫施捨落家 。臨終前二日・囑心三爲广備衣 其往生西方・斷 · 唯美食 知

行之不悔・猶不爲難。聘婦喪明・眾勸退婚・堅持不聽・更加憐愍。是皆大慈 壼母儀・女流師範者乎。余賦性剛直・學識膚淺・以故活埋海島・期其藏拙 教・弛而不張。不有發大慈悲心・以身爲法者以鎮之・則將伊于胡底。古云 以作慈悲忍辱之證。噫・若夫人者・可謂兩間之完人矣。當今之世・宜家之 此實屬頂門一鍼・除非頑皮・當即知痛。而雙手柔輭・用表提攜貧病之德・ 悲室之門・隨即坐逝。其心中固已將母子恩愛・及世間名譽・擺脫淨盡。然 法爲樂也。及末後預知時至・子問所見・尚以無擾正念是誡。令懸燈于大慈 否則人我等相・横于胸中。決不能視人猶己・視富貴如浮雲・安貧守困・以 悲柔和忍辱之發現處。人皆以爲難・而夫人了不爲難者・以知一切法空故。 其必定絕交 免愆。而心三居土・謬以知識見視・致書請教。因不避忌諱・痛下鍼錐。億 以言教者訟・以身教者從。夫人之于儒于佛・俱堪爲法 ·豈知反爲佩服 知其家庭 必有善教 乃以其母之懿德貞心 0 始乘 願而 特爲 閨

印光法師文鈔卷四

雜著

九八八

未能表彰爲憾。遂詳書其心行修持・祈余敍述・故爲發其隱義。以期世之爲 父母及婦女者・知所取法。各各善教其女・以期異日相夫教子。使有天姿者 ・皆爲善身覺世之賢士。無天姿者・亦爲循規蹈矩之良民。則庶幾乎天下太

馬母姚夫人往生事實發隱

平・人民安樂矣。曷勝禱祝

摩詰・此土傅大士・龐居士・全家皆悉徹悟自性・親證無生・去來自在・得 世閒眷屬・各有因緣・菩薩乘願・眾生隨業・善惡各以類聚・種性了無或爽 ・孝經所謂欲知其父視其子・易傳所謂方以類聚・物以羣分也。以故西天維

馬通白居士・乃現今之文學大家・著述甚富。初亦漸染韓歐程朱之見・不但 大解脱也。近來各界名人・眼界大開・悉皆尊崇佛法・密事修持。安徽桐城

不知佛爲何如人・且不知自己一念心性・當體與佛了無有二也。及至晚年

無信向 三女・ 剛經 學識日晉・見地日高 何異。李木公素不信佛・聞通白說此因緣・全家歸依三寶 則合掌坐脫矣。噫嘻異哉 壻方時簡 好人然。且曰・我於金剛經所說道理・悉皆悟到。便欲現大人相・說無生法 身心安樂・及至經歇 乃令其夫送之德國醫院 何身得度者 冀一切見聞之人・同種善根・詭言家中褊隘・欲往醫院將養。以通白與其 ・兼持佛號・以期圓離四相・徹證一心・即於此生・迥出五濁也。其第 名君幹・頗聰明・通文理・ ٥ 後得病甚苦 同寓京師 即現何身而爲說法 ・方知佛爲大聖人・其教有不可思議之事。從茲日誦 ・租屋共住・故不能過於寬敞幽雅 ・復覺苦痛・通白遂徹夜爲念。忽起坐・止令勿念・若 • 不能忍受 • 擇極超勝之屋安置之。令其夫與醫院侍人各去 ・此與龐女靈照・紿其父離座・彼即據座以坐脫者 ・通白憫之・對彼念金剛經 有古烈女風・通白甚愛之。 詎不信歟 而其夫時簡 也。 。普門品所謂應以 通白見其志決 經此現相 0 然於 彼 聞經聲 佛法 絕 彼 金

九八九

印光法師文鈔卷四

雜著

姚夫人往生事實發隱

九九〇

生事實 拘墟 秋初 所見・不異經所云也。家人環侍念佛・有飲泣者・夫人責之・謂若等何得 爛 胸鬲 深厭無常 姑疾革 克勤克儉 0 0 按狀 平日 囑孝達誦彌陀經・孝達誦至佛土種種莊嚴處・曰如此境界・歷歷在前・吾 伏枕作禮拜狀 ・氣不通暢・囑其女君瑋・及姪婦孫孝達・代爲誦經。孝達即怙庭之妻 ・示微疾・飲食漸減・而晨昏禮拜持誦無少閒。至八月初四・始臥牀 ・行狀中反湮沒之・其罪過實非淺鮮。今蒙通白之姪怙庭・以其叔母往 以淨業互相勉勖 ・夫人姓姚氏・諱澤潤・幼受庭訓・深嫺婦道・事父母舅姑唯謹 ・并其子根偉哀啓見示・知通白與其妻其女・皆有大來歷・非偶然者 • 刲股和藥・籲天以禱 ・遂專修淨業・以期出娑婆・生彼極樂。年逾古稀・猶然強健。今 故得無虞 0 又見觀音伸手下垂・己則仰握菩薩手・連稱菩薩名不已 。教子女有法度 ·故常侍相爲輔助也。 。家固清貧・通白教授生徒 · 爲鄉里所稱 至初九夜・夫人見諸佛金光燦 0 數十年來 夫人代持家政 ·歷經世變 "。 其

表現耳 之例 往生淨土之果。彼世之不盡己分・以敦孝慈・妄欲冀附於仗佛慈力帶業往生 浄業・又與同志互相勉勖・乃所謂至誠心・深心・回向發願心・與發菩提心 若鏡・頂上熱氣外溢・相距尺許・即覺熏蒸・蓋其淨業純熟・身心清淨之所 以及相夫教子等・即觀經所謂孝養父母・行世仁慈也。而其深厭無常 如此以累吾也。至初十午刻・脣尙微動・久之遂逝。面色黃潤・眉額閒朗明 勸進行者之義・皆兼而有之。既有三世諸佛淨業正因之因・決感仗佛慈力 雖佛力法力不可思議・由自己心地不正・與三世諸佛淨業正因相反 。夫欲學佛法・先須力敦倫常・恪盡己分・觀夫人之孝事父母舅姑 ・專修

曹雲蓀了義居士捨宅爲念佛林發隱

斷難獲永離眾苦常受諸樂之果矣。修淨業者・尙鑑之哉

佛法廣大如法界・究竟如虚空。理本自心・雖博地凡夫毫無所歉 印光法師文鈔卷四 雜著 姚夫人往生事實發隱 曹雲蓀捨宅爲念佛林發隱 九九一 · 道出常情

多至數百 菩提心・ 和盤托出・永作居士念佛林。其意唯欲自他同修淨業・同於現生・往生西方 母・心心相續・決定仗佛慈力・往生西方・了生脱死・超凡入聖 及一切遠近善信・見者聞者・同皆發起・以致徧周寰宇 然人同此心・心同此理・既經發揮其奧・誰不願得其益・ 非十方諸佛莫能盡知 功勳殊勝・雖博地凡夫・具足惑業・但能生信發願・持佛名號・如子憶 利自利他之道・唯不住相布施福德・可等十虚。了義居士・既聞淨士法 修最殊勝行 ・悉具信願・篤修淨業。居士喜不自勝・即將自己素所住之舍宅 ·又欲法界有情 ٥ 刻論契理契機之法 ·等蒙利益 唯信願念佛求生西方・最爲第 於是殫精竭力 ·永久勿替也。 由是善信預會 0 提倡 由茲發大 讚 與 揚

碑林中 不立證據 非徒揚居士之盛德・實欲發見聞之熱心。又以不慧・久修此宗 後或湮沒・致居士一番利人之心・或成斷滅・因爲報縣立案・

求世閒名譽

· 及人天福報者

•

固已天淵懸殊焉

0

同社諸

人

•

感此盛情

竊恐

勒

特開一 未斷 惑以了生死 於三途六道 特致書・命爲序引・以冀閱者・聞風興起・展轉傳揚・豎盡未來・橫徧十方 宿根深厚者 不慧承斯盛情 極 下焉者・又何待言・此自力了生死之難也。如來懸知末世眾生・無力斷惑 圓滿菩提 0 其中之難易遲速・略爲敷宣 庶如來一切眾生皆具佛性・皆當作佛之言 信願念佛求生西方法門・俾彼法身大士・與具縛凡夫・及五逆十惡之 則依舊輪迴。况從生至生・何能自保・倘一 同 則何幸如之。 ·證無生以成佛道耳 ·莫之能出之感傷也。 現生即 於現生 • 謹將一切法門・ 可斷盡見思・超出三界。進學菩薩上求下化之道・ 往 其或根機稍劣・縱令禪定力深 生西方 。 庶自度己力而修 與淨土法門・依之修行・ 。但眾生根機不一・致所得利益各別 既生西方 如來一代所說 ・悉皆詣實・不致循有遺憾矣 則了生脫死 隨福迷· • 不致有法不契機 切法門・無非爲眾生斷煩 • 以了生死 則直墮三途矣 徹悟自心 超 凡入聖 • • 長輪 證 而 0 各隨 其 有 以期 。 其 無生 見思 迴

己資・而爲悟證・其慈悲撫育之心・雖天地父母・不能喻其萬一。以此法門 九九四

・仗己信願念佛之力・感佛慈悲攝受之力・感應道交・故得不斷煩惑・帶業

往生・校彼專仗自力者・其難易不可同年而語矣。念佛之人・若知此義・自 能死盡偷心・專修此法・不致好高務勝・隨經教知識語言所轉・捨此別修諸 普願見聞・悉皆諦信

裘焯庭先生與其夫人雙壽序發隱

餘法門也。

與草木同腐 綱維之功能德用・故得此嘉名。彼不自振拔・甘爲下愚・生爲行肉走尸・死 同此理・人皆可以爲堯舜・人皆可以作佛。由其具贊天地之化育・振乾坤之 人在天地之閒・藐乎小爾・何以與天地並稱・謂之爲三才。以人同此心・心 並生有害于社會國家・死受苦于三途惡道者・乃不慎所習而致

非本具之天真佛性有異也。故孔子曰·性相近也·習相遠也。夫所謂贊天

嗣 地之化育・振乾坤之綱維者・非專指有位者而言・雖匹夫匹婦・各能優爲 淳謹而靖謐 親戚朋友・羣相觀感・而潛移默化于不知不覺中。是故一鄉有善士・則一鄉 果能誠意正心・自修其身・以明其明徳・其誠中達外・必致家人與鄰里鄉黨 齊國之敵兵立退・此殆匹夫匹婦贊化育・振綱維之一端耳。孟子謂窮則 • 如漢陳寔婉訓梁上君子・其郷之盜賊絕迹・魯義姑欲存其兄之

夫有責 焯庭夫婦・人皆知其有盛德熱心・能以至誠無私心・孝親敬兄・撫育諸姪・ 周給貧窮 篤宗族 已極・只期自私自利・置道德仁義于不顧・幾于無可救藥。然天下不治・匹 獨善其身・達則兼善天下・蓋指其多分而言焉。當今之世・世道人心・陷溺 尙何天災人禍之有。是知闡明因果・善教兒女・爲天下太平之根本。如裘 ・倘人各興起・負此責任・各各守分安命・知因識果・孝親敬兄・敦 嚴教子女・俾成良善。十數年閒・世皆賢人・賢賢互益・必召天和 振興學校・深信佛法・及與因果・濟度幽魂・救護生命・爲一鄉

印光法師文鈔卷四

雜著

裘焯庭與其夫人壽序發隱

印光法師文鈔卷四

ハ九六

之標榜・作同人之模範・致使子女媳孫・同皆賢孝・家道興隆・麟趾呈祥 建安養堂・爲二親修淨之所・實得祝壽之大體。待百年後・往生西方・證無 凡入聖・從中下手易而成功高者・唯信願念佛求生西方爲第一。其子愫楹 我所能・亦非我所宜・故推本而發其隱義以言之。須知吾人之壽・原自無始 贊助。竊思先生夫人之德・序文具標・若徒作華麗之文・以爲讚頌・不但非 人將屆七旬・同人欲爲祝其期頤・敬錄其實行・用佐壽筵・又祈不慧・隨喜 利利他之教之所習·兼資受生以來·得賢父母鈞陶化育之所致也。先生與夫 而不知此德此心・固從無量劫來・稟佛諸惡莫作・眾善奉行・一視同仁・自 便局促短小・不堪言狀。如來愍之・為說斷惑證真之法・令其返本還元・超 ・由其真如妙性・爲煩惱惑業所蔽・故致隨業升沈于六道輪迴中・其壽

量壽・方爲孝子尊親之究竟實義・方副同人頌德祝壽之景仰誠心也。嫘澄、

號

孫母林夫人事實發隱

相遠也。了此・而不返迷歸悟・背塵合覺・以慎所修習者・未之有也。其返 莫由出離也。由是觀之・十法界皆由今昔修習而得・故孔子曰性相近也・習 墮修羅 則爲人・ 常恆・如如不動。此性最可尊貴・故眾生雖迷之及極・如來絕無一念棄捨之 増・在生不減 生之所修所習· 吾人一念心性・與三世諸佛・了無有異・其智愚苦樂天淵懸殊者・以宿世今 應觀法界性 多方教化・冀其復彼本性也。一切惟心造者・乃指修習順逆而言・順修 ·畜生 爲天 ・處生死而不垢・證涅槃而不淨・亙古亙今・不遷不變・湛寂 · 爲聲聞 餓鬼 有善惡順逆之所致也。華嚴經云・若人欲了知・三世一切佛 一切惟心造。言法界性者・即生佛同具之妙真如性・在佛不 ・地獄・極之則永墮阿鼻地獄 ・縁覺・菩薩 ・極之則圓成佛道・安住寂光。 經塵點劫 ·受諸極苦 逆修則

篤信佛法・修持淨業・自少至老・無或廢替。况身稟女質・既難遠參高人・ 賢・其孝親敬夫・教子持家・周給貧乏・救護生命・皆足爲女流師範。而且 者・唯淨土法門爲然也。孫母林夫人者・慶澤之生母也。宿植德本・稟性淑 迷歸悟・背塵合覺之道・固非一端・求其下手易而成功高 · 用力少而得效速

夫人歸孫君時・貧不自給・操勞苦作・過於傭保。中年以後・家漸富裕・有 子五人・孫十餘人・僕婢甚多・宜享逸樂・其操勞苦作・不改舊度。衣止粗 而家住玉田·絕少宏法上士·而畢生孜孜修持者·乃多劫之熏修所致也。溯昔

之・而冀其依行焉。平時每以因果報應誡子孫・常曰・利人實爲利己・害人 布・不服綾羅・洗澣補綴・尙不忍棄。見人之飢寒・不異身受・必施金推食 其心方安・人有求祈・必令忻悅而去。昆蟲螻蟻・誡勿傷害・ 亦令設法驅去·絕不肯令其受傷也。蓋欲子孫世守勤儉仁慈之道 即蛇蝎毒物 ·以身率

甚於害己・凡居心行事發言・皆須歸於慈善一邊而後已。汝等若能如是・則

爲無忝所生・否則縱令富貴至極・亦屬污辱祖宗之大怨家也。故其子孫・多 示爲蝶・此豈真蝶乎哉。慶澤述其母之心行大略・祈余發揮以爲世勸。噫 人盛德淨心所感・以表其離此娑婆・生彼極樂之祥・但以世人根機陋劣・特 得有蝶· 直至靈柩安妥・方始飛出・向西而去。夫時當臘月・况在北方苦寒之地・何 紙撕破。適有二蝶大如掌・從窗櫺入・黃質雜黑白章・采絢非常・繞尸而飛 遂歿・適得具歛・雖曰年高八十有八・不可不預・然其心地安詳・不隨境亂 皆篤厚敬謹・不染時風。尤可異者・去冬兵災起時・慶澤奉母遠避于親眷家 人子揚親之德·固爲分所應爾。然揚親之德·而不修德慎行·則更甚于誣親 於此可見。當夫人臨終時・慶澤率其家人・同聲念佛・忽若發狂・遂將窗 當其去時・心慮惶恐・夫人以裝老衣之篋命攜之・亦不言其所以。至臘月 家人驅之・竟不能去・歷大半日・殯殮已畢・舁入他院・蝶亦隨棺飛翔 當時本家與親眷七十餘人・同皆驚異・謂爲不經見聞之瑞。蓋以夫

印光法師文鈔卷四

雜著

林夫人事實發隱

000

法論 未見敍述父母之德・而天下後世・無不尊其父爲聖父・母爲聖母・欲表彰親 德者・不可不知。世孝如此・可謂極矣・而於親之靈識・無大裨益。若以佛 以惡・故孝經以立身行道・揚名於後世・以顯父母・爲孝之終。如孔孟等 ・親在則諭親於道・俾其返迷歸悟・背塵合覺・信願念佛・求生西方。

往生・已往生則高升蓮品・此固如來普度眾生・令復本具佛性之要道 親沒則志誠念佛・爲親回向・設祭待客・概不用葷・庶可令親未往生則即得

欲報親恩而揚親德者・當終身奉行而廣爲化導・其利益唯佛能知・非語言文 字所能形容也已。

崔母孫夫人往生傳發隱

聖人誠明之道・如來真常之法・匹夫匹婦・皆堪與知與能・以人同此心・心 同此理・凡聖雖異・心體無殊。故曰惟聖罔念作狂・惟狂克念作聖・人皆可

持經呪 深・宗說兼通・解行相應者・多有生死不了・仍復受生。何崔母以五六年工 輪迴于三途六道之中・豈不大可哀哉。或曰 眉丈夫・多才多藝・ 正念往生 生・皆足爲閨壼儀型・女流師範・非宿有善根・豈能如是耶。而且篤信佛法 情沈默淳厚・其行事勤儉寬和・其孝親相夫・持家教子・濟貧恤困・戒殺護 之苦。而佛視六道眾生・悉同一子・况生信發願・虔持佛號・具行世善・兼 以爲堯舜・人皆可以作佛。一切眾生・皆有佛性・由迷背故・枉受生死輪迴 極樂者乎 虔受歸戒・年逾七十・精修淨業・其子祥鴻 竟得往生 • 志誠回向・以祈往生・有不感應道交・蒙佛接引・離此娑婆 ・可謂女中丈夫・火裏蓮華 崔母孫夫人者・注川處士之德配 了生死耶 自命非凡者・及乎臨終 有何證據 • 不辜佛化・不負己靈者矣 而知其決定往生耶 ・每見載籍・畢世修持・定慧力 • 祥鳩祥鵾祥鴻之生母也。 則業識茫茫・無本可據 ・多方輔助・故得豫知時至 。 答 曰 0 彼世之鬚 子未知了 依舊 生彼 其 性

敬 母五六年來・日夕繫念者乎。言證據者・臨終不起愛戀・密默念佛・豎手示 佛・或至十聲・或止數聲・直下命終・亦得仗佛慈力・往生下下品中・况崔 况崔母之將及全備者乎。又五逆十惡眾生・臨終地獄相現・有善知識教令念 修十善業 譬如渡海・一由自浮・一由乘舟・到岸雖同・其難易安危・奚啻天淵懸殊也 自力・非見思淨盡。無由出離生死・仗佛力・若信願真切・即可帶業往生 生死有自力佛力之所以也。一切法門・皆仗自力・淨土法門・全仗佛力。仗 觀無量壽佛經・示三種淨業正因・一者孝養父母・奉事師長・慈心不殺 讀誦大乘・勸進行者。此十一事・或有一二・加以信願念佛・悉得往生・ ・端坐而逝・即此數端 。二者受持三歸・具足眾戒・不犯威儀。三者發菩提心・深信因果 ・便是往生之相・况沒後全身已冷・頂門猶熱・及 0

至入殮・面貌如生・徴于經論・謂頂聖眼天生之說・其往生又何疑焉。或曰

此境師未親見・安知非其子之飾詞乎。答曰・飾詞世固有之・乃不知因果

者之所為。祥鴻欲令同人同生信心・同修淨業・同生西方・冀其母高陞蓮品

。斷不敢犯大妄語・俾其母與己・同獲未得謂得・未證謂證・以凡濫聖之至

慈悲鏡發隱

極重罪也。

可不哀哉。然殺劫之慘・人所共感・而殺生食肉之慘・人所共樂・實則不異 因・殺劫乃食肉之果・而果復造因・因復感果・展轉互殺互食・了無已時・ 近世殺劫之慘・振古未聞・推究其由・皆因食肉之所醸成・是食肉爲殺劫之

於自殺自食・及自殺食其父母兄弟妻子眷屬也。故入楞伽經云・一 切眾生・

州諸善士・欲挽殺劫・特立大同放生會。放生云者・欲感發眾人之慈悲心・ 愛侍使 從無始來・在生死中・輪迴不息・靡不曾作父母兄弟男女眷屬・乃至朋友親 ・易生而受鳥獸等身・云何於中取之而食・食肉之過・可勝言哉。泉

印光法師文鈔卷四 雜著 孫夫人往生傳發隠 慈悲鏡發隱

也。 食 命・實爲預護自身・若大家同抱此志・何難感召天和。倘放者自放・食者自 從茲不忍食肉耳。既不食肉・則現在不造殺業・將來不受殺報・雖曰愛惜物 生而方可乎 肉亦不敢・况徒爲口腹乎。至於敬神祭先・奉親宴客・豈素食便不可・必殺 助之。願食肉者・將生作己想・將己作生想・想之久久・即以威逼・令其食 共持殺戒・咸事素食・庶可挽回劫運・共享太平・因爲畧陳食肉之過以 故特撮取古人淺顯勸戒語言・名慈悲鏡 則所放有限・所食無窮・消放者個人之殺業則可・消眾同分之殺業則未 ・布之郷邑・以期見聞 同發慈

唐氏先塋附青蓮尼塔發隱

人皆可以爲堯舜・人皆可以作佛・以人同此心・心同此理故也。其不能者・

非真不能也。

禮云・飲食男女・人之大

皆卑劣自居・不自奮發・乃不爲耳

梵行 墳。夫鄒恭人・當此之時・年齒甚盛・居貧守節爲夫撫育其子女・家計不充 鄒恭人詳究由來 前池中 欲存焉・死亡貧苦・人之大惡存焉 年・光緒改元・唐駝之父恂之公棄世。駝母鄒恭人・羅掘數十千・ 者・以易其大欲存者。故孔子曰・志士仁人・無求生以害仁・有殺身以成仁 屍浮於池・二公仰其懿德清操・待夜深・出其屍・稟葬於庵之基。越十有六 乃當日大成庵基 余於大成庵青蓮尼・深有感焉 孟子曰・生亦我所欲也・義亦我所欲也・二者不可得兼・捨生而取義者也 賴勤針崙・兼爲人浣濯衣服以度日 · 爲遠近善信所欽敬 。及賊至・則庵村悉成焦土。越數日・有汪邵二公・潛歸探視・見尼 不唯不以爲嫌 。村人欲賣地・偷將尼骨埋于所購之墳地内・堆一 。清咸豐十年· · 且頗生敬仰 0 按尼係武進西郊某姓婦 。然有志於爲堯舜作佛者・則不以大惡存 。時駝兄光盛年十一 賊陷常州 0 每祭掃 • 尼著袈裟禮佛 ·率駝兄弟 ・駝僅五歲・妹甫 • 青年祝髮 購其葬所 小塚 兼祭尼 投入庵 精修

印光法師文鈔卷四

雜著

唐氏先塋附青蓮尼塔發隱

))) (

駝曰・ 有遷徙・及與斷絕・欲爲久遠之計・非求世人保護不可。有以不合宜諫者 邵二公・冒險而偷葬・吾母率吾兄弟・年年致祭。若置之不理・不但有愧於 墳而不得 德。其處境・雖與青蓮尼異・其懿德貞心・固與青蓮尼無或軒輊也。至光緒 三歳・零丁孤苦・不堪言狀。鄒恭人勉力支持・以養以教・令駝兄弟成人成 志行可想 二十八年・鄒恭人棄世・遂與恂之公合葬焉。而駝兄弟服職外方・二十餘年 汪邵二公・且大得罪於吾母・我等何可抱此遺憾。乃擇吉移葬於其父母之塋 ・現尙知此尼之德・故有保護之念・若不設法・後難免夷墓暴骨之慘。况汪 未共祭掃 又爲建 此尼乃佛門真修行僧・生爲遠近所景仰 。問其地主・云以不便耕種・乃移于桑田中矣。駝與其兄光盛議 特遷遺骨葬我父母塋內 石塔・大書大成庵青蓮尼師之塔 。迨民國十年・駝兄辭官歸里・駝亦由滬回常 ・唯願世人共相保護之。駝之意・子孫或 。題其後曰・尼服袈裟殉難 賊欲來・而服袈裟以自溺 · 相偕祭掃 求尼

與古之仁人義士相去何遠。况吾母素所欽佩・俾吾兄弟致祭・今葬我父母塋 內・如請高僧於家供養・有何不可。又此尼具此懿德清操・或已超凡入聖

使吾父母常得親近・當可蒙其慈力・即得高超三界・託質九蓮・以故吾宗吾

成仁捨生取義之大節・以期不負己靈・不玷佛化・爲人天之標榜・弭末俗之 母之意而樂爲之。孟子以富貴不能淫・貧賤不能移・威武不能屈者・爲大丈 頽風・非所謂女中大丈夫乎。宜其唐駝爲之建塔・又持衣鉤・徧求名人爲之 夫。若此尼者・初捨飲食男女之大欲存者・長齋奉佛・精修梵行。沒立殺身

唐孝子祠校發隱

題讚・以期發潛德之幽光・維世道於弗墜耳・爰爲發其隱義云

٥

孟子曰・人皆可以爲堯舜・又曰・堯舜之道・孝弟而已矣。有子謂君子務本 本立而道生・孝弟也者・其爲仁之本歟。夫爲堯舜爲仁・不外乎敦行孝弟 印光法師文鈔卷四 雜著 唐氏先筌附青蓮尼塔發隱 唐孝子祠校發隱

00八

亂俗・徒污天地與人類耳。形雖爲人・實則禽獸之不如・以禽獸不知禮教 憐眾生・是誠何心哉。無他・皆由家教未至・與自己不自振奮而致然也。近 與之并稱者・以其能贊天地之化育・繼聖賢之志事也。否則機械變詐・敗常 欲挽頽風・以先曾祖唐孝子安邦公事・雖經表彰・載之邑乘・未立專祠・知 直欲人與禽獸・了無有異而後已。有心世道人心者・各懷憂懼 皆所不學。 來歐風漸至・一班新學派・厭故喜新・趨之若騖。凡歐人爲國爲眾之好處 必墮三途惡道・人亦何苦以能爲堯舜爲仁之資・甘心永作畜生餓鬼地獄之可 人知禮教・知禮教而悖之・斯居禽獸之下矣。是人也・生既爲衣冠禽獸・死 爲萬物之靈・而與天地并稱爲三才耳。且天地至廣至大・人得以七尺之驅・ 初非有奇特玄妙・艱難困苦・欲爲而不能者。人固各當自勉・以期不負獨 其蔑禮亂倫處・則變本加厲。竟至廢經廢倫仇孝等 。武進唐駝 · 無所不至

・遂設祠勒碑以表彰之。又於其中・立一小學・名爲唐孝子祠校。

建塔表彰其懿德清操焉。夫鄒恭人當夫逝時・年齒甚盛・居貧守節・教養二 鄒恭人・日勤針裕及與人浣衣・賴以度生・以養以教・俾駝兄弟皆成人成德 辦。誠可謂敦本重倫尙德慕義之士・駝其賢乎哉。 賢之志事之道・亦可以隨分而得。 禮義廉恥等。則爲人之道得・爲堯舜爲仁之道亦得・而贊天地之化育 則服勞奉養以安其親・次則立身行道以榮其親。既能孝矣・必能篤修弟忠信 當地貧子弟讀書其中。冀其顧名思義・效法前人・敦本重倫・以盡己分。初 棄世・時駝兄光盛十一歲・妹始三歲・家徒壁立・零丁孤苦・不堪言狀。母 ・足見唐氏之多賢人也。雖然・駝之賢有自來矣。按駝生五歲・父恂之公即 地主移葬他處・駝兄弟感母慈・兼恐後或夷滅・遂復移置其父母塋內・且 不唯不以爲嫌 且 |爲其夫買墓地 ・且深生景仰・歲時祭掃・必令二子致祭於尼。及恭人逝後 ・成契後・村人移大成庵青蓮尼骨於其地中 駝之意・蓋如此 其族姪允中・亦隨力勸助 ・以故不辭辛苦・鬻字以 0 鄒恭人詢知 繼 聖

印光法師文鈔卷四

雜著

唐孝子祠校發隱

印光法師文鈔卷四

雜著

子・欽敬以身殉法之尼・其殆魏慈母魯義姑之流。懿德貞心・堪爲世範。故

起。孝經云・夫孝・天之經也・地之義也・民之行也。由是言之・一言一行 爲發其隱義・俾安邦公之孝行・與鄒恭人之潛德悉彰・庶見者聞者・咸皆興 教郷里之貧子弟・冀爲挽回世道人心之據。可謂篤於事親・克盡子道矣。因 感駝年逾五十・不減孺慕・欲廣孝思・以報母恩・爰立此祠・設校於中・以

・有不合道・皆爲不孝。故曰・孝弟爲仁之本・堯舜之道・孝弟而已矣。凡

爲人子者・可不深長思而亟自勉焉。

廣東高州佛學研究會緣起代何劍首作

佛法大無不包・細無不舉。不但依之可以斷惑證真・了生脫死。即格致誠正

聖人所說・但止令人盡分。唯上智之人・方能恪遵。若在中下根性・則便漠 修齊治平・明明德・止至善之道・若能會通佛法・則事半而功倍。以世間

我粤東。傳佛心者・莫不宗之。固知粤雖邊鄙・于如來大法・有大因緣 是禪宗大興・雖在家二眾・多有徹悟本有・明心見性者。歷宋元明・法道 界大師・四生慈父・聖中之聖・天中之天。由是聖君賢相・通人達士・莫不 然置之。佛則詳示因果報應・生死輪迴・及一切眾生・皆具佛性・皆可成佛 溯自東漢 依教修習·護持流通。以一切諸法·以心爲本。唯有佛法·究竟發明故也。 等事理。俾上智者必期于證本有·下愚者亦不敢肆意縱情·以膺未來之苦。 人始沾佛化 三途惡報 五戒十善 勢必改惡遷善・希聖希賢・雖在暗室屋漏之中・常如面對佛天。如來以三歸 數百年來・法道流通・高人林立。載諸傳記 ・大教西來。近二百年・止在北方。至三國康僧會・感化孫權 ·常享人天快樂。最淺者尚能如是 普攝在家男女 0 至晉而徧及全國·及高麗日本等。 0 能修五戒十善・便可勝殘去殺 · 况其最深者乎。故知如來爲三 至唐而各宗悉備 何可勝數 。而曹溪法脈 · 反澆復淳 ·堪比 。永離 曲曲 西天 南南

印光法師文鈔卷四

雜著

廣東高州佛學研究會緣起

觸 沒・後昆無聞。以致鄙敗無賴之徒・多皆混入法門。在家儒士・非具超格之 型日墜 式微之兆 罷除試僧 年譜疏・知粤民沐大師之恩者深矣。迨至有清・崇重尤隆。世祖仰遵佛制 四出・百姓塗炭。制臺不能設法者・憨山以一席話取消之。讀憨山年譜・及 以己意 知見者・莫不以佛法爲贅疣・謂其無益于人國。而如來格致誠正・修齊治平 及斷惑證真 明季垂末・勃然 蔚興 且能令彼一切哲學科學政治法律・悉獲實益。于是凡有志于親見本來面 肆其謗黷 國家不事提倡 知佛法爲世間唯一無二之道 ・及與度牒・令其隨意出家 實基乎此 · 了生脱死之大經大法 0 遂至毀寺逐僧者 0 自後百有餘年 • 僧侶頹于奮發 。憨山以宏法遭讒 • 。 在當時高人林立 ・ 頗爲有益 ・以不研究 。不但不與一 • 相繼 尚復蔚然。嘉道以來 0 加以咸同之際・兵災縣聯 而 ・謫戍粤東・中興曹溪 起 · 誰得而 0 切哲學科學政治法律相抵 近數年來 知 • • 0 哲人日希 各界人士・ 新學派出 0 。時搉使 前修 m 佛 眼 妄 典 既 法

出家在家・等皆夢夢。同人等發起佛學研究會・并佛經流通處。俾有志于己 孔齊出・亦末如之何也已矣。天下不治・匹夫有責。吾高佛法・凋殘已久。 使喪身失命。決不肯舍悟淨緣・取迷染緣。以致永劫輪迴・莫之能出也。是 升沈苦樂・天地懸殊。而本有心性・在凡不減・在聖不增。倘諦了此義。雖 皆可成佛爲訓・決難收效。以吾人一念心性・不變隨緣・隨緣不變。隨悟淨緣 心・陷溺已至極點。若不以因果報應・生死輪迴。及一切眾生・皆具佛性 目・及挽回世道人心者・莫不研究佛法・受三歸以正三業・奉五戒而修十善 知因果報應・生死輪迴等法。乃標本同治・凡聖共由之大道。世出世間聖人 于是各處皆設佛學研究會・佛經流通處。剝極則復・否極則泰。今之世道人 。吃素念佛·戒殺放生。昔之嗤爲愚夫愚婦之所爲者·今則偉人名士悉爲之。 ・則證三乘・及佛法界。隨迷染緣・則成人天・及四惡趣法界。雖十法界之 平治天下・度脱眾生之大權也。當今之世・若舍此法・雖堯舜禹湯文武周

脱死。淺則見淺・亦可改過遷善・希聖希賢。挽回世道人心・促進人羣道德 立立人・自利利他者・隨己天姿而爲修持。深則見深・何難斷惑證真・了生

・固與政治宗教各範圍・不相干渉・不相背戾也。區區之忱・祈垂洞察

上海佛學編輯社緣起

心性者・十法界一切聖凡・墮獄生天・證真成佛之根本也。因果者・世出世 一切聖賢・平治天下・度脱眾生之大權也。然此心性・人各自具。真常寂照

・妙莫能名。祗因迷而未悟・不但不得受用・反承此心性之力・起惑造業・

由業墮苦。展轉沈迷・輪迴六道。盡未來際・了無出期。致我釋迦牟尼世尊 特垂哀愍・興無緣慈・運同體悲。不離寂光・示生世間 。精修梵行・成等

正覺。于是歎曰・奇哉奇哉・一切眾生・皆具如來智慧德相・但因妄想執著 而不證得。若離妄想・則一切智・自然智・無礙智・即得現前。由是隨機

噫・世尊之恩・可謂極矣。雖天地覆載・亦難喻其少分焉。迨至眾生機盡 菩薩・如觀音勢至・文殊普賢等・俱會一處・親炙彌陀・以漸證夫道果耳 既未斷惑 如來應息 本有之天真・圓成無上之覺道乎。十法界・一一不出因果之外・欲離苦得樂 知體常不變・由迷逆悟順・相用天殊。其誰不欲捨迷染緣・隨悟淨緣。復還 之妙真如性 或密・或性或相。必期于徹悟此在凡不減・在聖不增・終日隨緣・終日不變 說法・令得度脫。但由機器差別・故致法無定相。或漸或頓・或權或實・或顯 0 超凡入聖者・固宜慎所擇也。又慮眾生業重障深・縱種善根・得生人天 俾具縛凡夫・于現生中・即得出此娑婆 由厚薄不同 必致造業 而大悲利生· 悉得徹證而後已 ·而成六凡法界。隨悟淨緣 0 終無有盡 墮惡道・苦無了期 。以此心性 由是諸大弟子 ・生彼極樂・與住行向地・及等覺 • • 因淺深各異 體雖不變 。 于是以大悲心· 分布舍利 用常隨緣 · 而成四聖法界 特開淨土法 結集經藏 0 隨迷染綠 既既 0

一〇一五

印光法師文鈔卷四

雜著

佛學編輯社緣起

0 六

往生 司其職 俾徧界以流通・冀普沾乎法潤 以期 雲門・法眼 布高麗・日本・緬甸・安南・西藏・蒙古諸國。自茲以後・蒸蒸日上。至唐 在北方流通 珠 而諸宗悉備 三・決難分屬 實則是諸宗究竟之歸宿。以故將墮阿鼻者・得預末品。證齊諸佛者・尙期 致孫權極生信仰。遂修寺建塔・以宏法化。 千珠悉攝 0 門深 如來在世・千機並育 **猶六根之互相爲用** 入 ・以宏宗 ・可謂極盛。天台・賢首・慈恩・以宏教。臨濟 。至孫吳赤烏四年 。約其專主・且立此名。唯淨土一法・始則爲凡夫入道之方便 諸 珠 法咸通耳 參而不雜 。南山 ・萬派朝宗。佛滅度後・宏法大士・各宏一法 ・則嚴淨毗尼。蓮宗・則修專淨土。 0 0 良以教爲佛語 譬如帝網千珠 • 。及至東漢・大教始來。但由風氣未開 康僧會尊者 離 而 不分。 泥迹者謂 • · 珠珠各不相混 ・宗爲佛心・律爲佛行。心語行 此法被南方之始也。至晉而徧 特開化建業 切法 。蒙如來舍利降臨 ·曹洞 0 法法各別 而 如各部之分 珠徧 · 潙 故唯 仰 入千

清末之時 力振興。由是在家高人・以未嘗研究故・謬襲韓歐故套・遂致一敗塗地。至 同來・兵火聯緜・飢饉荐臻。高人日希・庸人日多。國家不暇提倡・僧侶無 令其諦了十法界因果事理 在衣裏・了不覺知。懷寶循乞・枉受窮困。以如來心・作眾生業。以解脫法 藏妙真如性也。由是言之・無一法非佛法・亦無一人非佛也。無奈眾生・珠 是真是本・是心是性也。 所有一切陰入處界大等 會者則一切法・法法圓通。如城四門・隨近者入。門雖不同・入則無異 而明而清 知此意・豈但諸佛諸祖所說甚深諦理・為歸真達本明心見性之法。即盡世間 受輪 逈苦。可不哀哉。以故宏法大士・不憚艱辛・種種方便・而爲開導 ・足一千年・ 大開學界。天姿高者・遂皆翻閱佛經 聲教弗替。 • 以故楞嚴以五陰六入十二處十八界七大・皆爲如 ・徹悟即心自性・以迄究竟圓證也。由唐而宋而元 一一皆是歸真達本・明心見性之法。又復一一皆即 雖不及唐時之盛 始知道本在是・遂皆息心 · 猶可稱伯仲之倫 自咸 。 若

_ C 八

氣大開。舉凡政軍學商各界偉人・多皆研究佛法・吃素念佛。顧聯承・趙雲 以研究焉。及至民國啓運・法制維新。奉教自由・載于憲法。十餘年來・風

社。凡屬發明心性之論・彰顯因果之說。戒殺放生之利益・念佛往生之感通 韶等諸居士・欲令同人・悉沾法利。擬于上海北京路長康里・設一佛學編輯 與夫深經奧論之解釋・高人懿士之修持。取便編輯・月出一冊・以餉當世

淳・永享太平。將見徹悟唯心・親見佛性。離三界之苦因苦果・證一乘之樂 莫作・眾善奉行。主敬存誠・洗心滌慮。不但天災人禍・從茲消滅。俗美風 庶不知佛法者 · 因茲而知 。稍知佛法者 • 展轉入勝。 果能依佛言教 · 諸惡

常齋會題詞并緣起

因樂果。庶不負此即心本具之真如妙性也已。

眾生心性・與佛同儔 由善惡業・報分人畜。人有智識・畜無技術 恃強陵 印光法師文鈔卷四雜著 常齊會題詞并緣起

劫互償 弱・遂殺而食。成家之子・不借重債・况殺彼身・但圖口快。怨恨固結・歷 ・試一思及・中心痛傷。爰集同人・共立此會・凡百應酬・概用素菜

0 特立規約 并述緣起· 普願見聞 · 各篤胞與 0

原夫水陸空行一切眾生・無一不知疼痛苦樂・無一不知貪生怕死・而且無

種善根・修持浄業・斷惑證真・圓成佛道。但以宿世惡業・墮於異類。固宜 不是吾人無量劫來之父母兄弟姊妹妻子朋友親戚。又復無一不能於未來世深

俾彼一 深生憐憫以護持之・令彼各得其所 切 ·悉充口腹 。彼等力雖不敵・心固銜結。故致生生世世 。何可以強陵弱・或以智取・或以錢取 ·展轉互殺

爲一時之口腹·殺身命於多劫。校比自殺·酷烈萬倍。何苦爲此招殃禍事

0

沽酒共飲。一日・無肉不能成歡・當去買肉。一曰・爾我肉也・何須更求 何愚迷至於此極。在昔魯國有二勇士·彼此互聞而未相見。一旦相遇

其人以爲所見甚高 遂袒衣相割 彼此互食 0 又復割彼之肉 轉 以奉彼。意

 \overline{C}

之・欲令世人・同持殺戒・各秉蔬食。無論祝壽祈福冠婚喪祭宴賓會友等事 道人心愈趨愈下。由是天災人禍・相繼而興 薄福。世俗相襲・恬不知非。以故如來於梵網・楞嚴・楞伽・等諸大乘經 烈。由無慧目・不知後報。反爲得意・用自矜誇。斥素食者・以爲迷信・及以 氣揚揚・以爲吾人之交・情意真摰 永息爭競之風 此效法 朋友親戚・止息殺業・增長善根・非止獨爲水陸空行一切物類計也。又期彼 極陳殺生食肉之禍・可謂拔本塞源之真慈大悲也。近世殺劫之慘・千古未聞 其愚。世人因食肉故・造諸殺業。遂至累劫 ・俱用素筵。一以全吾惻隱之心。一以冀吾所尊奉之神祇・并吾之祖宗父母 0 况復水火疾疫風吹地震旱潦等災・不時見告。總因殺業以爲緣起 ・達之鄉國・及與天下。將見俗美風淳 則鳥獸魚鼈咸若 。庶人與天地並立爲三 。相割相食・遂至於死。凡見聞者 。如立鏡前・不能逃影 ・展轉互殺。校彼勇士・更爲酷 ·民康物阜 ・稱爲三才。 0 共樂大同之化 。 同 與乾爲 致令世 皆歎

大父・坤爲大母・民吾同胞・物吾與也之義・不至徒有空言・毫無實義矣

樂清柳市募建淨土堂綠起

于人天及三途惡道耳。既善惡同一磨滅・何不任意所爲・以期身心快樂乎。 苦・不求出離。雖有本具佛性・由其迷背 不知三世因果善惡報應。以爲人死神識即滅・有何靈魂 是有心世道者· 劫・莫由解脱・可不哀哉。况今世道人心・陷溺已極・殺劫之慘・振古未聞 由是逆天悖理・損人利己。以及殺害生命・取悅口腹之事・熾然競作・無所 盲引盲眾 三界無安・猶如火宅。眾苦充滿・甚可怖畏。眾生愚癡・常住其中。縱受極 加以新學潮流・撥無因果。聖賢道義・斥爲迂腐。任己臆見・而爲提倡 ・相牽入火。致令天災人禍・相繼降作。蚩蚩蒸民・誠堪憐憫。于 奮發大志・欲爲救援。以爲此等業果・皆由唯知自私自利 ・反作起惑造業之本。以致經塵點 · 隨罪福因緣 ・受生

印光法師文鈔卷四

雜著

常齋會題詞并緣起

柳市淨土堂緣起

有力大人・各各贊襄・ 苦之達道 天下・度脱眾生之大權。而念佛一行・實十方三世諸佛・普令眾生・現生出 欲募諸四方。包又舞居士祈光作疏。竊謂因果一法・乃世出世間聖人・平治 諸善士景仰不已· 大心緇素 生西方極樂世界·乃生死苦海之慈航也。欲挽劫運·捨此末由。以故各處諸 是知我佛所說三世因果・生死輪迴之事理・乃無明長夜之慧日也。而念佛求 顧忌。使知三世因果・當即恐其受報・而不敢稍萌此念・况實行其事乎哉 居士・于虹橋建一 。捨此則邪見無由滅・實益無由得也。契理契機・利益難思 ・悉皆汲汲然提倡佛學・以冀天下太平・人民安樂也。樂清胡天僕 淨土堂。于八月十五日開講・萬眾歡欣・歎所未有 擬在當市・亦建一所・以期普霑法潤 俾佛堂成而講會長開 ・人心轉而劫運頓息 。除首人任捐外 ٥ 庶勝殘去 。懇祈 0 柳 擬 市

殺

視同仁之象・復見于今。其功德利益・當與十方虛空同其壽量

非筆

舌所能形容也已

伏以如來知見・蘊於眾生心中。不因佛說・ 誰能自悟。釋尊一代所說諸經

唯有法華暢譚此義。舉手低頭・皆成佛道。治世語言・悉順正法。示衣裏之

明珠・出火宅之險難。孤露乞兒・作長者之真子。無明厚地・得法性之甘泉 。即眾生心・示如來藏。若不講演・誰得而知。恭維淨公大法師・宿受佛囑

作如來使。常宏大教・普利羣倫。以大智慧・發大辯才。直教頑石點頭

未獲一晤。緣慳障厚

。固知座下悲運同體・慈起無緣。故敢冒昧懇求・ 愧何如之。 茲者 敝寺主人

唯祈默然允許。將見昔日靈山一會・各各同瞻。此際觀音普門・人人得入矣 伏祈慈悲・則法門幸甚・眾生幸甚。臨啓・無任懇禱冀望之至。

擬於來年夏月・講演法華

天華墜地

。晚久仰德風

印光法師文鈔卷四 雜著

請淨權法師講法華經啓

0 <u>E</u>

請淨權法師講彌陀疏鈔啟 代法雨住持作

囑・乘願再來。開如來之知見・續台衡之薪傳。諦觀圓融・禪淨一致。導三 伏以圓覺妙心 ・有情各具。修持剋證・其孰知宜。恭維淨公大法師・宿受佛

乘同登九品・引五性共證唯心。嘅久仰高風・殊少親近。愧爲法雨守門庭

絕無智力宏覺道。詳察現世時宜・唯淨土最爲當機。擬講彌陀疏鈔・非我公

莫慰眾望 。懇祈不違本誓・俯徇下情。待至明年七月・飛錫荒山。好令百千

允許。臨啓・無任激切冀望之至。 彰之疏・悉得大明。豈但荒山之深幸・法門之深幸而已哉。唯願慈悲・默然 四眾・棲心秘藏。以懸河之妙辯・暢如來之本懷。俾無問自說之經・理事雙

寧波功德林蔬食處開辦廣告

印光法師文鈔卷四 雜著 寧波功德林開辦廣告

相沿 健而難老・以富有滋補之力。此雖衞生之常談・實爲盡性之至論。因俗習以 昏・發速而衰早・最易肇疾病之端。蔬係清潔之品・食之則氣清而智朗・長 結故。故凡瘟疫流行・蔬食者絶少傳染。又肉乃穢濁之物・食之則血濁而神 前・欲不改頭換面・受彼展轉殺食 之誼。以期不負人與天地並名三才・以參贊天地之化育。俾民物各得其所 無異矣 可爲悅我口腹・以殺彼身驅乎。須知水陸飛潛諸物・同吾靈明覺知之心。但 以同受覆載・同樂天年而後已。倘其不體天地好生之德・恣縱自己饕餮之念 以宿業深重 。以我之強・陵彼之弱。食彼之肉・充我之腹。必至一旦宿福已盡・殺業現 切眾生・皆有佛性。皆是過去父母・未來諸佛。設法救護・尙恐不及。何 致積迷而不返。須知仁民者必能愛物 。吾人承宿福力・幸生人道・心有智慮。正宜敦天父地母・民胞物與 ・致使形體殊異・口不能言。觀其求食避死情狀・自可悟其與 ・其可得乎。况肉食有毒・以殺時恨心所 殘物者決難仁民 以習性使然

食肉所致 葷腥・方爲稱理實義。近世殺劫之慘・實爲千古未聞。若詳推其根源・皆由 無後。恣食肉者・如來記其必償。祈勿徒云遠庖・此係隨俗權說。固宜永斷 筵。宴賓會友・悉資蔬食。以代庖之微業・作救劫之大權。專以利生爲志 後塵・以樹寧地之先聲。創辦本林・提倡素餐 閑法師 此邦道尹黃公· 無失惧 或來本林以就食 絕非唯利是圖。于是聘請名工・製造珍品。以備邦人士冠昏喪祭宴會需用 凡殘忍饕餮者 是以聖王治世・鳥獸魚鼈咸若。明道教民・黏竿彈弓盡廢。試思從古至今 ·開如· 。憂世之士・各欲拔本塞源。申江開辦功德林・固已先豎赤幟矣 懇祈官商善信 鎮使王公・知事姜公・及張讓三公・吳東山公等諸鄉紳 了餘等諸沙門。同憫近世殺劫 • 家門多絕 或送貴宅以供用 同發戒殺護生之心・共行斷葷茹素之事 。仁愛慈濟者・子孫必昌。 。多少厚薄 。 俾邦人士冠昏喪祭・ 便用素 · 擬植仁壽幸福 · 俱可隨意 始作俑者· 。凡有專顧 0 特步申江之 孔子斷其 俾慈風 · 決

從茲普扇・庶殺劫自此消滅。將見時和年豐・民康物阜。永無天災人禍・長 享安樂太平矣。此固道尹諸公發起本林之深心・而晨夕焚香念佛以懇禱者。

尙冀各處效法・故爲敍述緣起。

啟建水陸壽筵小參代友人

膺洪範之五福 離塵囂之市井・直詣圓通之道場。力辭親朋祝獻之儀・大啓法界聖凡之會。 維無遮勝會齋主・定聖秦太太・宿根深厚・賦性淑賢・篤信佛法・歸依三寶 以自己之誠心・感三寶之慈力。必得夫與己身・業障潛消・諸緣盡吉。現生 徒自作歸計・ 只此一念菩提心・即是常住無量壽・普令法界諸眾生・性修功德皆成就。恭 即俗修真 · 垂母儀于閨壼 ・臨終登九蓮之上品・子榮孫貴 意欣求極樂・每欲普度羣萌。茲值六旬初度・婺煥中天。遠 ・隨緣體道・作師範于女流。常時厭離娑婆 ·奕世長發其祥 道泰時康 非

印光法師文鈔卷四

闔國咸有其慶。豈徒令當齋正薦・王氏秦氏・祖禰先亡・同生淨土。所願十 利利他之事。只因佛由心具・故願壽與人同。咦・性具福壽妙難詮・奚啻如 方法界・四生六道・一切含識・共證真常。本儒者己立立人之心・行菩薩自

海與如山・窮盡三際無生滅・迥超思議兩重關

對靈小參 代撰

常・激發令親出世之心・以成世間莫大之孝 綸 維當齋正薦某某居士・宿具靈根・篤信佛法・聰慧明達・溫良恭儉。孝順出 于天性・仁慈及于庶物。推因計果・以心驗福。當享上壽膺高爵・以大展經 三界原來無別法・唯是一心之所作・識得諸法皆由心・何難超凡而證覺。恭 何甫弱冠便夭折・而即捐身世。想必愛親情切・欲得同生淨土 翼報親恩・兼警同倫・現身說法・善巧無喻。無如令親愛子之心 。所謂即不孝以爲大孝 · 由無常 故現無

而證真常。

印光法師文鈔卷四雜著 對靈小參

皆廢南詢

登覺岸。咦・近水樓臺先得月・向陽花木早逢春・自從徧吉導歸後・海眾悉 真・得本圓通。然後仗佛慈力・乘本願輪・徧法界以普現色身・俾迷流以同 之力・速離五濁。從茲承侍如來・參隨海眾。聞法受記・開佛知見 心而妄起。心若不生・業便消滅・業盡情空・返本還元。譬如雲散長空・天 魂。以此功德・俾汝未生則即得往生・已生則高增品位。茲者欲汝解第一義 不生不滅。此理悟之雖易・證之實難。須發信願之心・求生西方・定仗彌陀 日頓現乎本體・水歸大海・江河莫比夫洪深。徧十方而無欠無餘・盡三際而 母未生以前 故不能直下了脱・倘凡情以頓息・又何難徹底承當。相因業以幻生・業由 登上品蓮・見彌陀于自心・證無生于當念。特設香齋・兼示法要。須知父 更加真切。恐汝淨業未熟・未能往生・故來圓通道場・建無礙會・普濟孤 原無男女之相・四大分散之後・唯有靈知之心。由幻業以相纏 。斷惑證

啟建水陸對靈小參代友人

于市廛 念・入聖超凡 眷屬・欲崇追薦之儀・大啓無遮之會。須知心佛眾生・三無差別・由迷悟之 合慈悲。壽臨知命・便拋幻驅・事堪痛心・故援金臂。茲者孝男某某・併諸 危・心獨揭一輪之明月。兼以篤信佛法・崇重三寶・雖未專修定慧 維無遮勝會當齋正薦琴濤邵先生・宿植德本・素著景行。讀書明理 娑婆原是苦封疆・生死輪迴實可傷・拔斷愛根歸西去・歷劫熱惱頓清涼。恭 此則自能息認影之狂心・起反照之正智。方知頭本不失・佛自圓成。不離此 宜發信願之深心・求生淨土・定蒙光壽之慈父・導歸蓮邦。從茲神超清泰 ・致升沈以碩異。當念昔標清風明月之懿範・原承法身般若之威神。了 ・學道愛人・助政治于官府。通商裕國・人咸佩兩袖之清風 。永辭虚妄之幻苦・恆享真常之法樂。 然理可頓悟 ·事難即 · 垂典型 實能上 濟難扶 圓

業謝塵勞・蓮開上品之華・佛授一 生之記。然後乘本願輪・迴入娑婆・逆

順隱顯・度脫眾生。普令法界有情・共證常住佛性。俾此明理愛人之心・清

風明月之操・豎窮三際・横徧十方。庶可謂不孤佛化・不負己靈・超羣拔萃 真大丈夫者矣。 咦 冰水豈有兩種濕・生佛原同一覺心。但能返觀觀自性

·即獲本具無價珍。

定海張總戎薦親對靈小參代撰

簪纓永繼。作股肱于元首・為國家之爪牙。茲者法會宏開・用申超薦。急須 人· 生前積善修德 了知在生積德・即今受薦之心。性本如如・不遷不變・常寂常照・離念離名 ・居仁由義。故致身後餘慶長發・奕葉相承・德範恆新

一念真如性・光明徧大千。悟迷雖有異・本體總天然。恭維誥封某某張老大

印光法師文鈔卷四 雜著 水陸對靈小參 張總戎薦親對靈小參

圓滿

無量功德

具足無邊妙用。

凡不能令其減損

·聖不能令其增益

非色

非空・歷十界而無異・不生不滅・盡三際而常然。所謂靈光獨耀・迥脫根塵

悲願力・往生西方極樂世界。果若圓發三心・直下即登九品・華開見佛 無生忍 如是會得・自然親見天真佛性・直趣無上菩提。如或未能・須仗阿彌陀佛大 體露真常・不拘文字。心性無染・本自圓成・但離妄念・即如如佛。若能 方知前來升沈六道・積善修德・乃至即今親臨法會 • 聞法受薦

西方路・直下歸家莫問程。自是不歸歸便得・故鄉風月有誰爭。

從本以來・原自清淨無有染汙・原自具足河沙功德

。咦·一條蕩蕩

念心性

祭盛寅懷文代了餘師作

維年月日 之生兮不生・綠會而生。維公之滅兮不滅・緣盡而滅。若徹悟夫自心兮・生 ・方外友了餘・謹以香茗蔬肴之儀・致祭于寅懷盛公之靈曰・維公

滅不殊虚空楔。縱未明乎本有兮・去來何異水中月。幸夙因之深厚兮・稟性

來報必在諸天宮殿・王公閥閱。雖暫享人天之幻福兮・難免花殘而月缺。祈 真誠。歎佛緣之稍疏兮・惜未聞淨土橫超之秘訣。論現因之明廉而公正兮・

兮常享五清・庶可不負與餘久交兮・亦堪慰餘末後告公之誠實說。尚饗 以世福迴向極樂淨域兮・必蒙彌陀慈父垂金色臂以迎接。從茲永辭五濁惡世

祭韓山曦居士文居士品行端方爲商界中冠

贊襄 界侍願王。須知天福兮易盡・淨土之樂兮・窮未來際了無央。尚祈圓發三心 相兮・主人翁原自露堂堂。若推因以驗果兮。不在天宮享天福・定在極樂世 使彼奢者儉・懦者強・凶惡者遷善・放蕩者息狂。 維公之心兮・忠厚慈祥。維公之行兮・廉潔端方。居廛爲政兮・德風被處 直登上品 。溯昔八十四年前兮・本不曾生。即今現在兮・又豈有亡。去來雖無定 庶可徹證本有兮・永爲苦海沈溺眾生作舟航 篤信佛乘兮・ 0 尚 饗 多方宏護而

胡嘉科祭祖母文代撰

嗚呼・維吾祖母兮・母德堪師・每一思及兮・輒生傷悲。爲女流之懿範・作 兮・決定感應道交・蒙佛接引・往生西方七寶池。五逆十惡・臨終地獄相現 兮・得遇如來普度眾生之文詞。方知吾人一念心性兮・真與諸佛無二無別 豈料予之不才・德不加修・學無所成・俯仰天地・愧莫能支。幸因遊學泛覽 閨閫之善導兮・實效法乎周之三太・虞之二妃。撫育不肖孫之周摯兮・如天 之適宜。以若能生信發願・以至誠心・念南無阿彌陀佛・求生西方極樂世界 兮・實于本性不減一毫釐。修持法門無量無邊兮・俱不若仗佛慈力橫超三界 亙古亙今不轉移。但以迷悖・逐境生貪・起惑造業・致受果報・于三途六道 覆地載而無遺。 冀予學成德立・出而爲國家作輔弼・處而爲郷里作儀型兮・

念佛數聲・即蒙接引得預下品下生兮・况吾祖母之懿德善行兩相資

緬維

禹爲大聖・不免鯀之神識・入于羽淵・化爲黃熊兮・不禁悲喜交集・如狂如

癡·是以西方有大聖人兮·發之于至聖先師魯仲尼·伏願吾祖母諦信而勿疑

兮・直下即可蒙佛慈。又祈與吾祖父・并及歷代祖妣兮・同發怖生死苦・感 佛慈悲之心・依此修持。庶可相率同預蓮池海會・親炙彌陀・承事眾聖兮

因茲徹悟本具佛性・以迄圓證夫無上大菩提。尚饗

阿彌陀佛像讚

悲哉眾生・無所恃怙。孤露竛竮・如逃逝子。縱聞佛法・依教修行・自力劣 弱 難破無明 0 猗歟世尊・慈悲心切。四十八願・三根等攝。普令眾生 信

願持名。仗佛慈力・帶業往生。以果地覺・爲因地心。感應道交・如磁吸鍼

如來恩德・窮劫莫讚。唯冀含識・悉副佛願

印光法師文鈔卷四

0

觀世音菩薩本迹感應頌卷首像讚

耀 莫由相感・如水昏動・月影不顯。咎在于水・非月不照・若得澄靜・即現光 身・徧情無情 猗歟大士・誓願難宣・悲運同體・慈起無緣。尋聲救苦・隨類逐形・普現色 誠心・感應道交。如清涼月・麗彼中天・影現羣水・一無所偏。若或無信・ 有所求・ 無根者・不荷生成。入道之要・信爲第一・欲蒙慈濟 。無心之心・合生佛心・眾生迷背・無從受恩。因遇災難・并所懇叨・一發 亦如陽春 禮拜供養 。若有眾生・遇諸苦難・一稱其名・立見救援。富壽兒女・凡 ·普生諸芽 ·隨願悉酬 ・遇根枯者・朽腐更加。甘霖普澍 。何以稱名・便獲感通・由菩薩心・久證真空 ·非信莫得 · 草木同榮 緬維菩薩 · 唯

兩足。

雖住寂光・悲願無央・復現菩薩・

輔弼法王。十法界身・無身不現・

7·福慧

何能

!如此・爲有遠本・故致爾爾。遠本維何・圓證三覺・名正法明

三際豎窮・十方横徧。菩薩功德・難盡讚揚・垂示梗概・作長夜光。特祈江

西・居士止淨。徧閱藏典・撰爲讚頌。恭摹聖像・徧界流布・普令含識・同

瘋僧像讚

蒙覆護

彼陷溺已深固・雖承指示不問津。致令神歸阿鼻獄。鐵像千古跪岳墳 奸檜受賄誤國民・故勞我師特掃秦。一 柄掃帚撐天地・幾句法語鎮乾坤。惜

淨土問答并序

教禪宗。如時雨之潤物・若大海之納川 大矣哉淨土法門之爲教也。是心作佛・是心是佛・直指人心者・當遜其奇特 。十念一念・即登不退・歴劫修證者・當仰其高風。普被上中下根・統攝律 。偏圓頓漸一切法•無不從此法界流

觀世音菩薩本迹感應頌卷首像讚

菩提。九界眾生離此法・上不能圓成佛道。十方諸佛捨此法・下不能普利羣 大小權實一 切行 無不還歸此法界。不斷惑業 ·得預補處 。即此一 生・ 證大

生。是以華嚴海眾・盡遵十大願王。法華一稱・悉證諸法實相。如斯大力用 上之大教也 諸佛共宣揚 0 不植德本 。若此極發揮 • 歷劫難逢 • 諸祖皆如是 0 幸得聞熏· 0 誠可謂一代時教之極譚 勉力修習 0 恐彼無知狂徒 • 乘無

問 ・念佛法門・ 愚尙能修 。律教禪宗・智猶難曉。何謂此法統彼諸法。答・欲

謂爲淺近

故此依教讚述

· 令其奉行耳

知此義・須深明佛力自力大小優劣・則一切疑惑・泮然冰釋矣。夫佛與眾生 心性雖同 若論力用天地懸殊 。良由眾生具足無量煩惱惡業 功德智慧

不能 不同 尙 難 顯 致 出離 現 使 力用 佛則具足無量功德智慧 0 念佛法門・全仗佛力又兼自力・了脱生死 勝劣迥異 ٥ 律教禪宗 • 煩惱惡業 ・皆仗自力了脱生死 淨盡無餘 0 所以盡此一生・便 0 佛與眾 所以久經長劫 生 迷悟

爲臣 教理 登不退。 通身能 學問既成 杰 煉 修行功深 百千萬億也。此是自力。學問才能 須歷劫進修 再 • 0 至、迴向公里與淨土校 若 無可 依舊不 • 非 依教修行 耐 奉行君命 問 升 得 • 0 往生、正與託質皇、奚啻日劫相倍、 登科入仕。 ·始可 斷惑證真 到 出苦輪 少爲足 ・自力佛力・其義云何 0 於羣臣中 下場頭 0 0 鞠躬 '圓滿佛果。 修行功深 0 • 直待惑業淨盡 便是著魔發狂 0 • え 温 瘁 由其有大才能・所 只可稱臣 不過 • 一宮、爲皇太子、讀者須善會其意 位居第 如是 • • 譬如· 輔治 斷惑證真 · 不 。若學問才能 庶民 國家 • • 0 • 0 -敢作君 若比· 方可 縱 願 , 意 **警**深明教理 使 • 垂 • 0 生而 方 前海 太子 然此相位· 以從小漸升・ 出 理 出 離 明 淨 聰慧 生死 。 答 生 功 皇宮、爲皇太子、臣決定不敢作君、 土法依葬 • • 死 稍不充足 貴賤天淵 深 • 依教修行 • • o • • 1、得華嚴華嚴末後一 若教 大不容易 讀書學文・多年辛苦 亦頗 律教禪宗 尙 去佛 直至宰相。官居極品 **短不明** 斷惑 • 政一經、遂得如大海之一著、等覺菩薩、尚以,、修餘法門、亦可成1、臣欲作君、除非野 • 則不 何況皇帝 地甚 0 位 0 0 半生 能 最初須深明 倘 大懸遠 • 有 則盲修瞎 如是者有 勤 絲 0 毫未 勞 畢 世 横十 佛生 更 o

印光法師文鈔卷四

雜著

淨土問答并序

印

光法師文鈔卷四

萬呑 第二、 信願: 道交 如太子初生・ 之。念佛法門· 生皇宮・一出母胎・貴壓羣臣・此是王力。迨其長大・學問才能・一一充足 速。所以文殊普賢 方・見佛聞法 能信願持名・求生淨土。臨命終時・決定蒙佛親垂接引・往生西方。既生西 惑未斷盡・不出生死苦海者甚眾也。念佛法門・縱不明教理・未斷惑業。但 便能承紹大統・平治天下。一切臣宰・皆聽詔諭。此則王力自力・兼而有 持名 猗默大哉 如太虚之 故得如是 ・是自力能感於佛 貴 ・悟無生忍。即此一生・定補佛位。 総職譬雖出生死・尚未成佛 亦復如是 壓羣臣 。又若深明教理 · 華藏海眾 既往生已・惑業自斷 。未斷惑業 0 誓願攝受 • 馬鳴龍樹・諸宗祖師・皆願往生也。 • 斷惑證真 • 仗佛慈力・往生西方 ·垂慈接引 0 學問不充・不能如是者甚眾 則往生品位 · 定補佛位 • 此是佛力・又兼自力 是佛力能應於我 更高 **婚如太子長大** • 便出生死 • 圓 成佛道 譬如託 0 感應 0 譬 謂 猶 更

承紹大統・平治天下也。又已斷惑業・

如馬鳴龍樹諸宗祖師

已登補處・如

文殊普賢華藏海眾・皆願往生者。猶如昔鎮邊鄙・不堪承紹。今居東宮・不

難頓斷 久登極也。祈盡捨舊習・於此法門・極生信願・專精修習。則無盡煩惱・不 無量法門・自然證入。其圓成無上佛道・度脫無邊眾生・若操左券

爲在家弟子略說三歸五戒十善義

而取故物矣。尚勉之哉・尚勉之哉

出。大覺世尊愍而哀之。示生世間 惡莫作・眾善奉行。三業既淨・然後可以遵修道品・令其背塵合覺・轉凡成 之孤子・猶喪家之窮人。總由煩惱惡業・感斯生死苦果。盲無慧目・不能自 悲哉眾生・從無始來・輪迴六道・流轉四生。無救無歸・無依無託。若失父 。令持五戒・爲斷惡修善之源。令行十善・爲清淨身口意三業之根。從茲諸 ・爲其說法。令受三歸・爲翻邪歸正之本

聖

斷貪瞋癡煩惱之根本・成戒定慧菩提之大道。故爲說四諦・十二因緣

印光法師文鈔卷四

求生淨土法門。使其不費多力・即生成辦。噫・世尊之恩・可謂極矣。雖父 六度・三十七助道品等無量法門。又欲令速出生死・頓成佛道。故爲說念佛

遠數千里來・欲以我爲師 母不足譬・天地不足喻矣。 不慧 受恩實深・報恩無由。今汝等謬聽人言・不 。然我自揣無德 ・再四推卻・汝等猶不應允。今不

得已・ 品等 土法門・略釋其義 ・非汝等智力所知・故略而不書。汝等若能依教奉行・便是以佛爲師・ 將如來出世說法度生之意・略與汝等言之。并將三歸五戒十善・及淨 。使汝等有所取法 · 有所遵守。 其四諦・乃至三十七助道

何況 不慧。若不依教奉行・則尙負 不慧之恩・何況佛恩 一歸者 反、取其反染成淨之義、

歸依佛。二歸依法。三歸依僧

歸者歸投。 依者依託。如人墮海 忽有船來・即便趣向・是歸投義 。上船安

坐・是依託義。生死爲海・三寶爲船。眾生歸依・即登彼岸。既歸依佛・以

佛爲師。 從今日起 ・乃至命終 ・不得歸依天魔外道 ・邪鬼邪神。既歸依法

既皈依僧・以僧爲師。從於今日・至命終時・不得皈依外道徒眾 以法爲師。從今日起・乃至命終・不得歸依外道典籍。法門、典籍、即經書也、以法爲師。從今日起・乃至命終・不得歸依外道典籍。法、即佛經、及修行種種

五戒者

一不殺生。二不偷盜。三不邪淫。四不妄語。五不飲酒。

生・輪迴六道。隨善惡業・升降超沈。我與彼等・於多劫中・互爲父母・互 好生惡死・物我同然。我既愛生・物豈願死。由是思之・生可殺乎。一切眾

爲子女。當思拯拔・何忍殺乎。一切眾生・皆有佛性・於未來世・皆當成佛

有了期。由是思之・何敢殺乎。然殺生之由・起於食肉。若知如上所說因緣 我若墮落・尙望拔濟。又既造殺業・必墮惡道。酬償宿債・展轉互殺・無

印光法師文鈔卷四

印光法師文鈔卷四

經廣說戒殺放生功德利益・俗人不能得讀。當觀安士先生萬善先資 穢。腥臊臭穢・美從何來。常作不淨觀・食之當發嘔矣。又生謂人及禽獸 蛆蟲魚蝦・蚊蝱蚤蝨・凡有命者皆是。不可謂大者不可殺・小者可殺也。佛 自不敢食肉矣。又愚人謂肉爲美・不知本是精血所成。內盛屎尿・外雜糞 · 可以知

其梗概矣

之・非大聖大賢・皆所難免。何也・以公濟私・尅人益己・以勢取財・用計 謀物・忌人富貴・願人貧賤。陽取爲善之名・遇諸善事・心不認真 不偷盜者・即是見得思義・不與不取也。 不擇嚴師・誤人子弟。施醫藥・不辨真假・誤人性命。凡見急難・漠不 此事知廉恥者・便能不犯。然細論 。如設義

關緊要 速救 。緩慢浮游 。如斯之類・皆名偷盜。以汝等身居善堂・故摘其利弊而略言之。 ·或致誤事 。但取塞責了事・糜費他人錢財 。於自心中・不

不邪淫者・俗人男女居室・生男育女・上關風化・下關祭祀・夫婦行淫・

印光法師文鈔卷四 雜著 三歸五戒十善義

億劫 淫者 獄・永無出期。今之修行而不知佛法教理者・比比皆是。當痛戒之・切要切 有爲無等 時失足・何況愚人。若立志修持・須先明利害・及對治方法。則如見毒蛇 不妄語者 當看安士先生欲海回狂・可以知其梗概矣。

禹、謂犯之禍害 如遇怨賊。恐畏怖懼・欲心自息矣。對治方法・廣載佛經・俗人無緣觀覽 其所禁。但當相敬如賓・爲承宗祀。不可以爲快樂・徇欲忘身。雖是己妻 貪樂亦犯・但其罪輕微 。 自未得道・謂爲得道。 名大妄語・其罪極重。 命終之後・決定直墮阿鼻地 以上四事 不能出離。 是以人身行畜生事 • 凡是心口不相應・欲欺哄於人者皆是。又若自未斷惑・謂爲斷惑 言而有信 不論出家在家 一切眾生・從淫欲生。所以此戒難持易犯。縱是賢達・或 ・不虚妄發也。若見言不見・不見言見・以虛爲實・以 。若非己妻・苟合交通・即名邪淫・其罪極重 。報終命盡 受戒不受戒 ·先墮地嶽餓鬼 ·犯之皆有罪過 ·後生畜生道中 0 以體性是惡故 一。行邪 0 千萬

也。然不受戒人・一層罪過。受戒之人・兩層罪過。於作惡事罪上・又加

犯戒罪故。若持而不犯・功德無量無邊。切須勉之

制而斷之。凡修行者・皆不許飲。并及葱韭薤蒜也、小蒜・五種葷菜・氣味臭 不飲酒者・酒能迷亂人心・壞智慧種。飲之令人顛倒昏狂・妄作非爲・故佛

受戒者・飲之食之・皆無罪過。受戒飲食 層罪過。即是犯佛戒罪 。佛已

・體不清潔。熟食發淫・生噉增恚。凡修行人・皆不許食。然此一事

未

穢

禁制・汝又去犯・故有罪也。五、此方但四、

十善者

口・八不慳貪。九不瞋恚。十不邪見 不殺生。二不偷盜。三不邪淫。四不妄言。五不綺語。六不兩舌。七不惡

此中前三名身業。中四名口業。後三名意業。業者・事也。若持而不犯・則

入道 人物等。邪見者・不信爲善得福・作惡得罪。言無因果・無有後世。輕侮聖 恐汝等不能體察 自己之財・不肯施人・名之爲慳。他人之財・但欲歸我・名之爲貪 綺麗・談説淫欲・導人邪念等。兩舌者・謂向彼說此・向此說彼・挑唆是非 爲十善。若犯而不持・則爲十惡。十惡分上中下・感地獄餓鬼畜生三惡道身 言・毀佛經教等。然此十善・總該一切。若能遵行・無惡不斷・無善不修 傷人父母・名大惡口。將來當受畜生果報。既受佛戒・切莫犯此。慳貪者 無疑・絲毫不錯也。殺盜淫妄・已於五戒中說。綺語者・謂無益浮詞 。十善分上中下・感天人阿修羅三善道身。善因感善果・惡因感惡果。 恨怒也。見人有得・愁憂憤怒。見人有失・悅樂慶快。及逞勢逞氣・欺侮 鬩構兩頭等。惡口者・謂言語麤惡・如刀如劍・發人隱惡・不避忌諱。又 斷葷 吃素 ・今略舉其一二。當孝順父母 持戒念佛 三歸五戒十善義 求生西方・了脱生死。父母若信・善莫大焉 ・無違無逆。委曲宛轉・勸令 。瞋恚者 決定 華妙

印光法師文鈔卷四

雜著

〇四八

如決不依從・亦勿強逼・以失孝道。 但於佛前・代父母懺悔罪過・斯可矣

意憍慣・致成匪類。於鄰里鄉黨・當和睦忍讓・爲說善惡因果・使其改過遷 於兄弟則盡友・於夫婦則盡敬。於子女則極力教訓 於朋友則盡信・於僕使當慈愛。於公事則盡心竭力・同於私事。凡見親 ·使其爲良爲善 。切勿任

若以此風 識 遇父言慈・遇子言孝。若做生意 化其一鄉一邑· 便能消禍亂於未萌 ・當以本求利・不可以假貨哄騙於人 致刑罰於無用 0 可謂在野盡 0

忠・居家爲政矣。

示某比邱尼 番代友人作

光陰迅速・時序更遷 切眾生說人命無常 0 榮華不久。急尋歸路 刹那刹那・一念不住。此殆造物出廣長舌・ ・免受沈淪之無上妙法耳 普爲爾我 o 汝既

厭棄世榮・發心出家 必須努力勤修 切莫因循度日 出息雖存・入息難保

於胸 片雪耳 無常・四觀法無我。此觀若成・則戀身恃勢之習・消滅無餘・不異洪鑪之化 悟妙性。如來爲治此病・令修四念處觀。一觀身不淨・二觀受是苦・三觀心 則唯矜容儀・常懷妬忌。不知縱是天姿國色・依舊糞袋革囊。既戀幻形・何 侈爲心。 生。回觀世間富貴・奚啻陽燄空華・直同囹圄毒海耳。然欲生淨土・先治染 念茲在茲。念極功純・感應道交。臨命終時・必克果願。既生淨土・頓悟無 。不求此世來生・人天王等福樂。唯願報終命盡・蒙佛接引往生。朝斯夕斯 力持彌陀之聖號。 息不來・即屬後世。當念形質雖稟五漏・心性原具三德。痛洗積劫之女 佛經屢言 0 汝以富貴女人出家・凡憍奢豔冶習氣・必須徹底拋棄・不使一 尙不能謙光接物・卑以自牧。又何能息慮忘緣・虛心求道乎。女人 將來方有出苦分在 ・富貴難學道・女人亦難學道。良以富貴之人・憍慢成性 觀此娑婆・濁惡甚於圊廁。信彼極樂・即我本有家鄉 現今法弱魔強 良師善友最不易得 直須上友 毫蘊 * 奢

印光法師文鈔卷四

雜著

古人・以古爲師。比邱尼傳・善女人傳・淨土十要・淨土聖賢錄・當熟讀之 。庶取法有地・墮魔無由矣。近來僧尼 ・多不如法。不可濫收徒眾 ·壞亂佛

萬丈火坑・親爲如來弟子矣。勖哉勖哉・勿忘我語。 法・實爲至要。當恪守清規・力修淨業。生爲坤範・死預蓮池。庶不負跳出

戒堂小食榜

色即空。同淨名之香飯・惑稍方消。乃華嚴之金剛・劫壞不壞。汝等若能了 前・特設小食・以點汝心・令得安隱。當知此食・體即禪悅。無生無滅・即 誠禮懺。堂外諸師・及諸護法・唯恐汝等身心疲勞・道業難以成辦。于午食 知三輪體空・六塵即覺 三德圓融之體・因戒以彰。四大幻成之身・依食而住。趣證菩提・須全戒度 。精修道品・必賴食輪。汝等既發無上道心・欲得三聚淨戒。竭盡心力・投 |。則一念不生・十界消殞。食法心境・| 一 平 等

空合空・似水投水。消與不壞・打成一段。方可稱爲持淨戒人・是則名曰能 報恩者。否則粒米如山・何能消受。則將來之披毛戴角還・大有日在。汝等

務各勉旃。

幽冥戒牒 用、別處當作專聲救苦、

獄鬼畜。凡有心者・皆令受持。良以一切眾生・皆具如來智慧德相。但以妄 從劫至劫 心體本淨・因迷妄而煩惑斯生。世界原清・由幻業而濁惡頓現・一迷永迷・ 想執著・不能證得。若離妄想・一切智・自然智・即得現前。由此三聚淨戒 輪迴。大覺世尊・愍而哀之。示成正覺・爲制戒法。上自三乘十地・下及地 貪染成性・豈了六塵即覺。懷無價之寶珠・枉膺困苦。具常住之佛性 直下止惡防非・ 。沈淪于生死之域・汨沒于塵勞之中。觀照未起・焉知五蘊皆空。 反妄歸真 。 垢盡光呈・ 塵破經出 即業識心・ 成如來 ·甘受

幽冥戒牒

復常住之真心・不遷不變。證寂滅之法性 • 無減無增 。入諸佛位

萬 藏 苦以得樂 亡生蓮信士某某 王子。盡來際以度脫眾生・俾自他以齊成覺道 矣。爰有一四天下・ ・使即凡以成聖。慈恩浩蕩・法利汪洋。雖天地父母・渺不能 ・伏爲某某 南贍部洲・中華民國 · 生于某年月日時 0 • • 省府縣界居住 懿哉世尊・以戒度生。令離 享年幾十幾歲 • 0 奉 于年月日時 佛修因薦 爲法 **嘀其**

忽爾 神逝 痛念身捐塵世・ 神遊幽冥 。未了 二 心 · 難出六道 0 欲仗佛 力

教主地藏菩薩 法 導神識以往生極樂。故來本寺・乞說戒以先淨根身。由是恭秉佛敕・建壇作 奉請娑婆教主釋迦世尊・極樂導師阿彌陀佛・佛說梵網菩薩戒經・幽 現坐道場觀音大士・十方三世無盡三寶 • 臨壇證盟 垂慈加

令歸依三寶 然後爲說三聚淨戒 · 反邪歸正 0 令其身口意業 次令懺悔業障 • 清淨根身 有所依憑 0 從茲斷惡修善・自利利 次令發四宏誓 上求下

被

俾無作妙善戒法

・從彼頂門・流入身心

•

成就法器

紹隆佛廷

種

因茲先

共入彌陀願海。可謂最上佛子・真大丈夫矣。作法既竟・用給牒文。仗此功 圓應羣機・現隨類逐形之身。徧就諸緣・闡即心自性之法。普令法界眾生 界。三心圓發・十念稱名。定蒙彌陀親接・聖眾偕迎。一彈指頃・即生彼國 惡・觸緣障道。極樂清淨・睹境明心。以此受戒無上功德・回向往生極樂世 他。若能自強不息・何難破五住而出二死・滿四宏而證三德矣。須知娑婆濁 託質蓮胎・永離眾苦。聞法受記・頓證無生。然後乘本願輪・迴入娑婆

一下陳生 寄居普陀化雨學堂、其父爲本堂教習、

徳・即生浄土。

才・其事甚大・其任甚重・其關係甚非淺鮮。良由英才得其教育・則可以繼 孟子以君子三樂·過于王天下。其三則曰得天下英才而教育之。可見教育英 開來學· 治國安邦・淑世善民 。失其教育· 上焉者則無所範圍 不能

示陳生

高乘駟馬車。又曰・三尺龍泉萬卷書・老天生我意何如。山東宰相山西將 讀人閒萬卷書。雨露難滋枯根草・風雷但化有鱗魚。相如不憤題橋志・焉得 教育英才之樂。唯願天下英才皆得教育・同享此樂之心・未嘗一日忘也。子 子之列・而不自知也。不慧少不努力・老無所成。上負父師教育之心・下失 超羣拔萃・作一碌碌庸人。下焉者則朋奸比匪・爲非作惡・或陷身于亂臣賊 彼丈夫兮我丈夫。古人此二詩・其勸勵英才之心・可謂親切懇到至極無加矣 雙之士矣。詩曰・年少青春似過駒・窗前事業竟何如。欲爲天下無雙士・須 好游・虚度時光。致令拂雲干霄之材・反等拱把尋尺之料矣。昨所說詩 相貌出眾・聰明過人。若肯發憤爲學・將來必定大有成就・不可度量。恐以 子未能記憶・今錄以示子。庶可助其發憤爲學之心・以作頂天履地・舉世無 恐

祈熟讀而深思之・則幸甚幸甚

示淨土法門及對治瞋恚等義

淺近小乘・總因未閱大乘經論 尙得往生。況諸惡莫作・眾善奉行之善人乎。況受持三歸・具足眾戒之佛弟 法門。但具真信切願・持佛名號。雖五逆十惡・將墮阿鼻地獄之極重罪人 來憫念眾生自力了脫之難・于是特開一信願念佛・求生西方極樂世界之淨土 種不一・皆爲成熟眾生善根・令其究竟成佛耳。然斷惑證真・了生脫死・豈 根性不等・以故如來曲順機宜・爲說一切大小權實・偏圓頓漸等法。法雖種 子乎。淨土法門・三根普被。正接上上根器・旁引中下之流。愚人每每闢爲 易言哉。若非宿種今熟・及法身示現二種人。縱有修持・亦非即生・及一生 如來出世・原爲令諸眾生・斷惑證真・了生脫死・直下成佛而已。但以眾生 一生所能頓了。根機鈍者・則久經長劫・尚難了脱・以其唯仗自力故也。 未親具眼通人・以己顛倒執著之心 ·測度如 如

來原始要終之道。如盲覩日・如聾聽雷。彼固不見不聞・宜其妄相評論也

殊普賢等菩薩・能究竟擔荷。彼見愚夫愚婦・皆能念佛・便目之爲淺近小乘 須知信願念佛一法・乃如來普度眾生・徹底悲心之所宣說。唯觀音勢至・文

是何異見小星懸空而小天・小蟲行陸而小地耶。若于此法・能生信向・即

蒙佛接引者乎。其攝心念佛・并隨分修持・隨緣化導等法。及禪宗淨宗

習氣愈發者

當于平時・ 修行之要・在于對治煩惱習氣。習氣少一分・即工夫進一分。有修行愈力 之所以然・佛力自力之大小難易・詳示印光文鈔中。祈息心詳閱・則自知之 是多劫深種善根。若能以深信願持佛名號。都攝六根·淨念相繼 此不備書 成如 來藏 預為隄防。則遇境逢緣・自可不發。倘平時識得我此身心・全 。乃只知依事相修持・不知反照回光克除己心中之妄情所致也 。如染香人・身有香氣。現在與佛氣分相接 ·臨終有不感應道 。則即凡夫

身他身 惱之事 屬幻妄 心意煩燥 諸凡如意 半功倍・利益難思。瞋者 淨 小 眾生慈悲觀 見境而心起愛樂之謂。欲界眾生・皆由淫欲而生、淫欲由愛而生。若能將自 五停心觀 便利 唯取自己快意 0 以清淨心・念佛名號 。求一 此 臭同死屍 從外至內 ·需使有人。稍一 · 而爲對治 重則肝目受傷 乃根本上最切要之解決方法也 ・多散眾生數息觀・愚癡眾生因緣觀・多障眾生念佛觀。貪者 我之實體實性・了不可得。既無有我・何有因境因人・而生煩 · 不顧他人傷心 • • **汙如** 0 一諦觀 心、令心安住、不隨境轉也、 所謂多貪眾生不淨觀五停心者、以此五法、調停其 所謂多貪眾生不淨觀 通順 • 0 0 違忤 見境而心起忿憎之謂。富貴之人・每多瞋恚。以 須令心中常有 如甘受和 。則但見垢汗涕唾· 0 誰于此物 0 ・即生瞋怒。輕則惡言橫加・重則鞭杖直撲 又瞋心 ・如白受采。以因地心・ 。如不能諦了我空 • 起 團太和元氣 而生貪愛 · 于人無益 髪毛爪齒・骨肉膿 。貪愛既息 則 · 于己有損 疾病消 ·當依如來所 契果地覺 • 則心地 滅 Щ • 0 多順 輕亦 福 0 事 大

印光法師文鈔卷四

雜著

對治瞋恚等義

〇五八

林。 成就我無上菩提道想。觀華嚴十回向品自知。又吾人一念心性 了・尚望彼來度脫。豈但小不如意・不生瞋恚。即喪身失命・亦只生歡喜・ 皆是過去父母 大。華嚴經云・一念瞋心起・百萬障門開。古德云・瞋是心中火・能燒功德 尙知其因。乃求沙門・爲說歸戒。即脫蟒身・生于天上。是知瞋習・其害最 倦 增崇矣。昔阿耆達王・ 不生瞋恨。所以菩薩捨頭目髓腦時・皆于求者・作善知識想・作恩人想・作 只因迷背本心 **豈以小不如意** · 致拂墮其面 欲學菩提道・忍辱護瞋心。如來令多瞋眾生作慈悲觀者・以一 倘能知我心原是佛心 ・未來諸佛 堅執我見 ・便懷憤怒乎。既是未來諸佛・ 。心生瞋恨· 生奉佛・堅持五戒。臨終因侍人持拂驅蠅・久之昏 0 。既是過去父母・則當念宿世生育恩德 則一 佛心空無所有 隨即命終 切諸緣 。因此一念・遂受蟒身。以宿福力 ·皆爲對待 **猶如虛空** 當必廣度眾生。倘我生死不 0 如射侯既立 · 森羅萬象 ·與佛無二。 則眾. 切眾生 愧莫能 無不包 矢咸 酬

印光法師文鈔卷四 雜著 對治瞋恚等義

括。亦如大海・百川眾流・無不納受。如天普蓋・似地均擎・不以蓋擎自爲 是以佛說 身變虎。當其業力猛厲・尙能變其形體。況死後生前・識隨業牽之轉變乎。 爲畜。不知業由心造・形隨心轉。古有極毒之人・現身變蛇。極暴之人・現 世人于善惡境緣・不知皆是宿業所招・現行所感。妄謂無有因果報應・及前 來尙能順受・況小不如意・便生瞋恚乎哉。愚癡者・非謂全無知識也。乃指 何前生・及與後世。 母之氣而生・未生之前・本無有物 生後世等。一切眾生・無有慧目。不是執斷・便是執常。執斷者・謂人受父 其德。我若因小拂逆・便生瞋恚。豈非自小其量・自喪其德。雖具佛心理體 若于平時 其起心動念・全屬凡情用事。認妄爲真・將奴作主。如是思之・甚可慚愧 十二因緣 ・常作是想。則心量廣大・無所不容。物我同觀・不見彼此 此方拘墟之儒・多作此説。 乃貫三世而論 。及其已死 ٥ 前因必感後果· 執常者・謂人常爲人・畜常 則形既朽滅 後果必有前因 ·魂亦飄散 。 善 惑 。有 逆

之報 死循環 也。貪瞋癡三 世閒常理 夫人・又欲維持世道。則居心固當如菩薩深慈大悲・ 了自心・及已證法身之菩薩・則如所云。以物我同觀・生死一如故也。若凡 有已證法身之菩薩人。又有以維持世道爲主者・有以唯了自心爲主者。若唯 有惡人・ 淨土著述 三。此三得力・彼三自滅矣。數息一觀・可不必用。以當念佛時・攝耳諦聽 其攝心與數息相似・其力用與數息天殊也。念佛一 禍福之臨。 欲來害己 無有窮極 自知 或行捍禦而攝伏之・ ・爲生死根本。信願行三・爲了生死妙法。欲捨彼三・須修此 0 乃屬自作自受・非自天降・ 問 ・將不與計校・任彼殺戮乎。 ・欲復本心以了生死者・捨信願念佛・求生西方・不可得 · 若如所云 或以仁慈而感化之。 ·即喪身失命 天不過因其所爲而主之耳 亦只生歡喜 答・凡修行人・有凡夫人・ 觀・但看印光文鈔 事 無所不容 非一 概 • 不 • 0 生順恨 其心斷斷不 處事猶須依 0 · 及 生

可有

毒患而結怨恨耳

前文所示・乃令人設此假想

以消滅瞋恚習氣

此

若熟・瞋習自滅。縱遇實能害身之境・亦能心地坦然・作大布施。仗此功德 ・即生淨土。校彼互相殺戮・長劫償報者・豈不天地懸隔耶

昭文古會殺生致祭辯訛 即安徽黟縣祭昭明太子之會

風・而不知其爲造大惡業。謂爲祭神・神其食之乎。況既名爲神・必秉聰明 其原由于貪饞之愚夫・特借祭神之名・大殺特殺・以期悅己口腹。遂相習成 令無數生命·同受刀砧之苦。是尙得謂之爲聰明正直·賞善罰惡之正神乎 正直之德。當以作善作惡・爲降福降殃之准。豈殺生祭我・即作惡者亦降福 地以好生爲德・神爲天地主宰諸事・豈其心與天地相反・而爲己一享其祭・ 小戸・亦必殺雞殺鴨・以期神常保護・令其福壽增延・諸凡如意也。不知天 會祭神。富家大戶・必殺大生以祭。一以冀得多福・一以彰其富有。即貧家 世俗迷惑・以惡爲善・以造業爲修福者・多多也。其最慘目傷心者・莫過于做

印光法師文鈔卷四

雜著

異・何以稱其爲聰明正直之神乎 慶也。彼受殺之生・多多皆是宿世殺生祭神冀己食肉之人・以償當日殺生之 不知其非 貪圖肉食之神 語言・載梁書・及廣弘明集・併居士傳・豈有生而如此持戒仁慈・死而即爲 別立慧義殿・招引名僧講論玄奥 篤信佛法 子乎。按太子姓蕭・名統・字德施・梁武帝長子也。生而聰睿・仁恕恭儉 不依道德仁義之事。況深入佛法・徹悟自性・受佛大戒・畢世蔬食之昭明太 只知食肉爲美 。太子所悟所證・超過武帝奚啻十倍。實爲古今居士中不多見之人。其事迹 不殺生祭我・即作善者亦降禍乎。若是則其神之心行・與市井無賴小人無 ・力修淨業。徧覽眾經 譬如蛆蟲食糞・意謂天仙亦當貪此美味・而常欲奉之以冀錫其福 。人若殺生以祭・即便降福・否則即便降禍之理乎。良以世人 遂以自己貪圖臭穢腥臊之見 。夫武帝尙且多年蔬食・ ・深達諦理。受菩薩戒・居常蔬食。于宮內 。 既爲聰明正直之神 · 決不爲此妖魔鬼怪 ・謂神亦如是・從茲彼此相 祭先則以麪爲犧牲 效

報者。而一班愚人·一聞殺生祭神·便歡喜踊躍·以爲作福。而不知將來變作 此等生命・被人殺時・有口不能言・無法得免脫矣。況以深入佛法・受佛大

天悖理 戒・畢生蔬食之出格高人・平白誣以貪圖肉食・且殺無數生命以祭之。其逆 **誣聖衊賢之罪** ・愈當生生世世・永爲此等被殺之物・豈不大可哀哉

回劫運。庶得一切含生・悉皆優游生長・各盡天年于天地之閒也。因敍其所 安徽黟縣盧智睿居士。憫彼本鄉殺生祭神之慘・深恐無知愚人・由殺生故 將來自受其報。祈予發明真理・以開導之。俾明理之君子・共扇慈風・挽

利益唯佛能知・祈深思之。 之非既知・則殺生祭先養親宴客自奉之非・可以不言而喻矣。若能嘉納・其 以·冀彼深知其非而力改之。以作天下太平·人民安樂之基址云。殺生祭神

世界佛教居士林新林落成頌

真如佛性・含識共有・柰因不知・迷頭狂走。故我世尊・示生世閒・普令眾

印光法師文鈔卷四

雜著

居士林落成頌

募刻華嚴經普回向頌

兼佛力・現生了脱・實爲第一。大哉法門・徹上徹下・等覺逆惡・同趨並駕 生・各悟性天。由機不一・致教不同・爰開律教・禪密淨宗。餘悉自力・淨

生者・多難具云。近來世運・愈趨愈壞・欲挽狂瀾・非佛莫賴 。諸大居士

法流東土・肇啓廬山・千數百年・徧界宏傳。出家四眾・在家四民・獲往

· 繩其祖

武。光本庸僧・無力宏法・仰茲芳蹤・心甚悅洽。攄我愚誠・是祝是頌・横 編豎窮・則傚無竟。 極力提倡・特創新林・矗之滬上。諸宗咸宏・注重淨土・法法圓通

募刻華嚴經普回向頌

證法 大哉華嚴經・爲諸經之王。法門與功德・二俱不可量。 預此法會者・唯法身菩薩。二乘雖在座・不見亦不聞。何況諸凡夫・ 如來成正覺 · 直說所

相符 信願念佛者・決定登九蓮。此經功德力、猶如摩尼珠。隨意雨眾寶・悉與願 特法・凡聖俱遵行。圓攝于等覺・及六道羣萌。末世人根鈍・斷惑甚爲難 而得預聞熏。佛以大慈悲・攝淺于最深。末後歸宗處・令覲彌陀尊。唯此奇 助刻諸善信 ・各各願不同 薦親與祈福 無不獲感通 。求子即得子

0

•

日出 求壽即得壽 願諸施資者・所願皆具得。迨至捨報日・同生極樂國。面見阿彌陀・蒙佛親 ・諸事藉以成。縱求世間福・終作出世因。如病遇仙丹・直下便成真 。宿障咸消滅 ・所作皆如意。譬如陽春到・草木悉發榮。亦如杲

受記 。 法 忍 證 無 生 ・ 作 佛 所 作 事 0 欲詮功德力・歴劫難讚揚 0 有能信受者

同證無量光

題憨山大師六詠手卷 契真係李國松法名

憨山大師 大權示現。宏法功深・忌者誣陷 謫戍廣州 以禦禍亂 幸有大

印光法師文鈔卷四

雜著

〇六六

高文憲。沒後肉身・不壞不變。粤贛相爭・歸曹溪畔。六祖七祖・彰諸時諺 吏・另目相看。宏法曹溪 ・慧命續斷。相機說法・ 巨弊消散。護國安民・功

者多・時或出現。六詠妙偈・筆法遒健。文義超妙・愈讀愈煥。三百餘年 增輝佛日・爲法城壍。著述宏博・日月光燦。大藏流通・惜只少半。遺佚

佛子契真・得諸滬店。欲表鴻猷・特作手卷。祈光題詞

以彰法

範 遂爲略述大綱・以期後哲聞見

幸無殘欠。

題心佛閣 於文字語言之外觀之、則幸、至於聲韻法律、非吾所知 認江消蘇 们息、邪正混g 默錢養元居士 甚、 亂、因漫爲三歌、冀彼抉膜除翳、邪正分明、理事、以心佛閣等三目求題、然初未謀而、誠恐執理廢 即事

融、

耳錯

生佛平等只此心・迷悟不同致升沈 0 欲復本具真如性· 須事 圓證大覺尊 虔

誠禮敬罪業滅・懇切憶念福慧深。一 朝惑盡常光現・照徹天地與古今

題明心見性之齋

惑淨盡波澄海・真常顯露日麗天。識心達本能如此・不負當人字養元 宴晦清齋竭力參・參透父母未生前。四大五蘊俱脱落・六根七情咸消蠲 。煩

題仙佛合宗處

未熟 或律儀・畢竟總爲者一著。若能當念離能所・月朗中天水歸壑。倘或根鈍機 界諸眾生・迷背此心同演若。隨機廣演眾法門・多方解黏而去縛。或禪或教 謂三教是一家・一家尊卑實彰灼。縱同箇人一身驅・豈可混亂頭與腳 生佛平等心・百千異道未徹覺。我佛釋迦大覺尊・圓證此心獨超卓 仙佛殊宗作麼合・一唯究心一固殼。長生到底有終盡・無生畢竟無滅沒。若 當以淨土爲依託。如來徹底大悲心・深恐中下永輪落 說此不可思議 ·。復愍法 。須知

印光法師文鈔卷四

法・直同阿伽陀妙藥。生信發願持佛名・唯求臨終生極樂。如子憶母無閒斷 圓明五眼絕翳膜。承佛慈力已願輪・迴入娑婆度五濁。普令無盡諸含識・復 若謂吾言不足聽・一任升天并化鶴。君看世間有智人・誰用摩尼彈黃雀 削。況復如來最上乘·何能解了生恭恪。妄以己意巧誣謗·盲引盲眾赴火鑊 是博博即約 本心源俱成佛。此是超格大丈夫・自利利他真作略。一法普攝一切法 劫若種真善根・決不負此一絡索。把手相牽行不得・肯否憑君自斟酌 無適莫。仙佛合宗一部書・邪人毀佛妄穿鑿。曲引佛法證丹法・鴆毒甘露貯 言教人學。試觀天覺護法論・批判直截詞理廓。豈是儒者偏伎佛 ・感應道交難測度。蒙佛接引得往生・永謝生死苦海惡。見佛聞法悟無生・ 一鉢。慧命魔經亦如是・閱之令人正眼矐。斯等尚非老子徒・道德體統全剝 安得常有大力人・ 。佛法廣大無邊際・世閒毫善皆包括。唯有長生鍊丹法 普爲斯世振木鐸 。令出邪途歸覺路・各各身心得解脫 ·唯善是崇 ·絕無 ・約即 往

爲梨園會首某上堂

真。棄背本有・枉受輪迴。諸佛菩薩愍之・以不思議如幻三昧遊戲神通・示 家。須知吾人現前一念見聞覺知之性·與彼十方三世一切諸佛常住寂滅之性 無定相・遇緣即宗 君臣佐使迭更。而主人翁本來面目・毫無改變。惜乎眾生當場即迷・以幻爲 出頭沒忽升忽墜之苦荼。鏡花水月・了無實相。不異當場演劇・生旦淨丑 昧。認六道業報之身·爲自己本命元辰。仗亙古亙今不遷不變之佛性 而暫升人天。隨惡業而永墮三途。鑊湯鑪炭・驢胎馬腹。萬苦備膺・一 三界原來一戲場・諸人及早返家鄉。莫待鑼鼓齊休歇・歸路不知枉著忙。 ・無二無別。但以迷心逐境・背覺合塵。致使輪迴六道・了無出期。由善業 與彼同事 0 應機說法 仙僧杆木隨身・ 唱還鄉之曲 不妨逢場作戲。應彼來機·令其就路還 · 指歸元之路 令其悉皆了境明 受頭 靈永 法

印光法師文鈔卷四

0110

心·背塵合覺。親見本來面目·徹證真常佛性。又恐劣機 安坐。永離眾苦・但受諸樂矣。雖然・因齋慶讚一句・作麼生道。卓杖云 一受生・難免仍舊汨沒。遂即大開方便・令其往生西方。則出離戲場・歸家 ·未能頓出塵勞 咦 若

大雲月刊出版祝詞

逢齋若會吃飯人・堪現神通遊戲身

炎炎火宅・其燄甚熾・川以邪說・助其威労。撥無因果・各謀自利・同室操 戈・了無顧忌。悲哉同胞・無所覆庇・雖欲出離・不知去處。爰有開士・特 眾生・皆宿父母 發宏誓・提倡佛法・以行救濟 因果循環 ·備明其理 。各宜扶持· 一・示利人者・正屬利己 如兄如弟・爭競消滅 0 譬如大雲・降注大雨・使彼烈燄・直下頓止 。俾知自心 禮讓興起 • 與佛同體 進修淨業 切

普扇蓮風・生人聖域・沒登佛封。唯冀此報・徧界流通・庶幾所祝

適得

東瀛佛教會來山歡迎詞

蓮。法雖無量・此五攝盡・求其穩妥・唯淨最勝。以果地覺・爲因地心・因 果該徹・妙無等倫。由是經論・無不宏贊・荷法道者・普令刻辦。大法東來 特垂慈愍・開淨土門・普施救拯。無論上聖・及與下凡・悉令現生・登九品 情空・方獲實益。根機利者・現生即得・若或鈍劣・歷劫莫克。由是如來 門可入・就路還家・庶省心力。瓶盤釵釧・原是一金・百千法門・不離自心 如來大法・彌綸法界・三乘六凡・罔不攸賴。在佛本意・普令成佛・由機不 。證自心者・名曰成佛・得無所得・圓滿三覺。然此諸法・皆須自力・業盡 一・對病發藥。大小權實・偏圓頓漸・宗教律密・各適其便。如城四門・門 律教禪密・徧界宏傳。淨土一宗・肇始廬山

印光法師文鈔卷四

・近二千年・

・迄至于今・蔚乎

球稱雄。去年佛會・邀此觀光・接待優盛・餽贈輝煌。今茲來山・愧無珍物 述・多爲保存・俾彼各國・求法得門。因是之故・人才益充・封疆雖小・全 此後來學・不勝屈指。三教五宗・東林南山・金剛秘密・悉由此傳。古德著 有瀆嘉賓 。日本一國・雖在東偏・山水鍾毓・代有高賢。溯自東晉・法傳彼土・ 莫攄私臆 0 幸有新書・名觀音頌・聊表衷曲 ·以爲餽贈 大士

慈恩・徧周法界・淺草一事・曷勝感戴。唯願諸公・悉本佛慈・輔君宏法

唯仁是施。凡屬國民・一體同觀・勿分畛域・稍有私偏。人既沐恩・天自眷

德・降祥獲福・永久弗忒。富者贈財・仁者贈言・愧無二實・但貢空談。注 重勢利 ・歴劫相刑・注重道義 ・菩提斯成。空談不空・法道流通・各國則傚

令名無窮

李母黃太夫人墓誌銘

小學・開章即明胎教。而文武周公孔孟・皆資賢母而爲成德達才作聖之本。 義・及與因果・敦本重倫・躬行不渝。則所生子女・習見習聞・如水入器・ 語云・天下不治・匹夫有責。以天下乃合眾一家而成・使家家夫婦・皆知道 紡織以持家 務。年廿六・歸李公繼如。如公少孤・家貧・伶仃孑立。夫人樂天知命・勤 億其家庭教育・必有大過人者・今寄其母氏行述・祈爲作墓誌銘・方知所見 施・不令于此致力・而令參政服官。是何異執刀于刃・能不立見截手乎。李 是知女子相夫教子之權・實不亞于男子行政治民之道。而世之昧者・倒行逆 資于母者・比父爲多。以胎時稟氣・幼時觀感・有不期然而然者。故朱子著 不謬。按述・夫人姓黃氏・永春水磨鄉人。幼嫺姆訓・性仁孝慈和・深諳世 如金就型・其性情自成賢善。必不至暴戾恣睢・以惡爲能也。然人之賢否・ 元賢身居商界・有儒者風・篤信佛法・敦行孝友・樂善好施・印送善書。光 俾如公安心經營・不懷內顧之憂・以成業起家。每數年一歸

夫婦相敬如賓。初無子・遂育義子元春・視之若己出。後生元賢・及女琴嬢 之所致也。清光緒末・如公歸而築室・地方土痞・知其富而欲噉也・遂訟於 ・一視同仁・了無所謂親疏也。及二子成立・家頗豐裕・夫人勤儉溫和猶昔 如公顧而樂之・謂二子曰・吾家之得有今日・皆汝母克勤克儉・戰兢以持

恤寡 土痞懼眾怒之難犯也・遂寢其事・可以知夫人之德之才之識矣。及如公沒 官。凡鳩工庀材・度支會計・皆夫人親經理之。由夫人平時救難濟貧 ₹・修橋補路・振興公益・爲郷里所感佩。于是凡善人君子・咸欲救援 ·
矜孤

夫人即持齋念佛・課諸孫讀書。琴嬢早寡・家貧・迎養於家・諭以守節撫孤 及誦經念佛等大義・母女相輔修持以爲常。晚年・孫曾繞膝・元賢又能繼

一二。邑之東關橋・爲一邑要道・毀於風災・值世道荒亂・無過問者。夫人 錢・以期遇貧窮者而周濟之・其樂善好施・出于天性。所辦善舉甚多・ 其父業・夫人益兢兢焉戒滿持謙・不許家人驕奢・及以殺生。凡出・必攜金 · 姑舉

以世少賢人・由于世少賢母。有賢女・則有賢妻賢母矣。有賢妻賢母・而 下之權・女人家操得一大半。又曰・教子爲治平之本・而教女更爲切要。蓋 克盡母道・無忝所生矣。使世之爲母者皆如夫人・何至同室操戈・互相誅戮 五。茲于十六年月日・與繼如公合葬于本邑之大鵬山。子二・女一・孫八・ 申時・沒于星洲寓所。距生于咸豐九年己未・十月初二日戍時・享壽六十有 義務者 平糶・及與學校。嘗恐二子不喻其意・謂曰・吾豈不願家富・而屢以鉅款作 匾聯頌美焉。元賢經商星洲・民國十年・以地方不靖・奉母南渡。星洲華僑 經其地・惄焉傷之・立命元賢剋期修復・費鉅金不少吝。橋成・邑人士爲懸 女孫五・曾孫五。噫・若夫人者・可謂鎮坤維而輔乾綱・師女流而型閨閫 俾國運危岌・民不聊生・兼致種種天災・常常見告乎。吾常曰・治國平天 擬辦華僑醫院・夫人捐萬金爲倡・後以費鉅未果・夫人命移其款以辦本邑 ・乃爲汝等卻禍而積德耳・當善體吾意。至十二年癸亥・五月十九日

印光法師文鈔卷四

雜著

李母黄太夫人墓誌銘

印光法師文鈔卷四

雜著

其夫與子之不爲賢人者・蓋亦鮮矣。其有欲挽世道而正人心者・當致力於此

焉。銘曰・猗歟李母・賦性淑賢・仁孝慈和・本自先天。相夫教子・各適其

橋利人・鉅費不吝・醫院未立・款移周窘。知富招禍・熱心義務・積德貽謀 宜・福由德大・禍以仁離。救急濟貧・矜孤恤寡・凡有義舉・無不喜捨。造 ・永久弗替。篤信佛法 ・修持唯謹・母女同心・儀型閨閫 。資此功德 求生

感世競爭・益景懿範・爰書大端・以爲世鑑 浄土・佛以誠感・得蒙迎取 。維茲賢母・女中之英・母咸如是・世自太平

潘對鳧居士望七大慶頌

休・ 導維勤・念茲劫運・非此莫援。壽高望七・健愈耆年・心心彌陀・常住不遷 猗歟居士・乘大願輪・示此濁世・現宰官身 修持益奥 。推恩貧困 ·普施資糧 ・特興淨居・復古道場 。小試鳴琴・仁風載道・及乎退 。戒殺放生・勸

。爲如來使・輔弼法王・普引同人・共登樂邦

王欣甫居士懿行頌

期懿範・儀型後昆 驗。睹公之像・讀公行狀・實爲斯世・最上榜樣。爰取大義・述爲頌文・以 閱歷愈深 須繁詞・實理實情・俱得其宜。上官倚重・下民感戴・有清末葉・循聲無再 閻・俗轉淳淑。居官行政・唯務利民・所治七邑・羣頌至仁。凡所折獄・不 於穆王公・宿植德本・賦性純篤・制行唯謹。孝以奉親・慈心睦族・化被閭 事・足徴素心。知命賦歸・企盡孝養・興學敦本・爲世模仿。及至晚年・ 但以率真・不事攀援・致令職分・終止縣官。期盡天職・無意名聞・只此 ・篤修淨業・冀出苦輪。迨及臨終・果符宿願・得生西方・頂煖可

王欣甫頌

王母蔣太夫人西歸頌

善・母儀是賴。長子名震・孝慈第一・凡有善舉・悉皆輔弼。昔見其子・即 緬維王母・懿德堪欽・慈祥愷悌・郷國悉聞。上法二妃・及與三太・子孫賢 而逝・隨佛西行。蓮登九品・地證不退・留此懿範・永錫爾類 知其母・以無是母・焉有是子。篤修世善・深信佛乘・母子同心・念佛求生 年逾八旬・身心強健・憶佛念佛・不雜不亂。及至臨終・正念分明・吉祥

蘊空張夫人西歸頌 本名蘊宣

捨・俱有分程。即俗修真・居塵學道・圓發三心・專持佛號。精誠既至 五蘊宣時・當體即空・了此意義・惑業消融。賦性仁愛・民物是矜・慈悲喜 ・蒙佛接引 忍界横超 顧命子媳・勖以常念・自利利他・于此可見 · 感

王母楊太夫人懿行頌居士云、夫人前生、殆參禪悟而未證者、王母楊太夫人懿行頌雲南王九齡之母、性情靜定不執著、一

任緣 于淨土・殊失鉅益。子既深信・代親修持・當承佛慈・託質蓮池。一登淨域 善・厚徳法坤。其貌如山・其性若石・決疑斷計・人莫測識。雖未讀書・心 眾生心性・與佛同儔・迷悟向背・各有其由。懿哉王母・宿根甚深・孝友慈 與道契・偶形言說・咸屬要義。苦樂好惡・險夷順逆・平等一視・鎮靜之力 徹證唯心・庶可乘願・普度羣倫。 察果驗因・宿事禪門・悟而未證・此語頗真。大眾受苦・我豈獨樂・升沈 ·的是禪著 苦、我豈獨樂、我但升沈任緣而已、 **唯知自力•不知佛力** 九齡勸母念佛求生西方、母云、大眾受 **唯知自力•不知佛力**

致

龔圓常夫人寫經瑞應頌

蔣張楊三夫人頌 寫經瑞應頌

印光法師文鈔卷四

雜著

蒯若木居士夫人龔圓常・長齋奉佛・修持唯謹。民國五年・特刺臂血

寫彌陀 日夜半時 ・地藏・大悲・往生等經呪・ 臥而未寐・ 忽見腳際牀外 以祈消除宿業 現一 圓光・其大如盤・ ·臨終往生。 明逾電光 至圓滿

檢所寫血經・以爲此事可以開發信心・因繪圖徵文・特寄一分于光・乃 經一小時多方隱。既見此瑞・益加精進・過數年・念佛而逝。若木適

爲頌

所嫻 情刀・刺出臂中血・即使凡夫血・全作善逝説。凡聖原不二・經血渾無別 由其契真智 知命故能爾 卓哉龔夫人・ 事親奉舅姑 · 性光遂露洩 。及至聞佛法 宿植大善根・志欲振坤維・示生在名門。賦性孝友慈 · 內名無閒言 。性光圓且常・何得小而促・須知具無明 · 致力反聞聞 0 相夫教子女・一一悉合禮 · 欲證圓常實·書經續圓音。提起 · 困亨無戚欣 · 莫能全 ·姆訓素 無

體觀 仗此修持力・ 回向生淨土 臨終蒙佛接 託質寶蓮裏 見佛證無生

修普賢行願・智斷究竟時・性光方全現。蒯君惜世人・多多未覺悟・藉此瑞

金剛經勸持發隱

應圖・引入如來地。

佛 受生死輪迴之苦眾生耶。金剛經者 極・永墮阿鼻・受諸極苦・其根身器界・固已天淵懸殊・而心之本體・悉皆 界・隨迷染緣・則成六凡法界。縱悟淨至極・圓滿菩提・安住寂光・迷染至 十法界凡聖生佛・雖則高下不同・苦樂迥異。而其心之本體・咸皆寂照常恆 皆有佛性者 了無增損于其閒也。果知此義・誰肯以可以作佛・具足法樂之心・枉令永作 ・不生不滅・靈明精妙・無變無遷。所謂人同此心・心同此理・一切眾生・ 悉依此心而得建立。良以體雖不變・用常隨緣・隨悟淨緣 ・此也。須知此心・不涉因果修證凡聖生佛・而因果修證凡聖生 切諸佛 徹證即心自性之妙法・ ·則成四聖法 切

想執著 眾生・究竟超凡入聖之捷徑也。故曰一切諸佛・及諸佛阿耨多羅三藐三菩提 故內不見我爲能度・則無我相・外不見人及眾生爲所度・則無人及眾生相 來智慧・約理名無餘涅槃・名雖異而體原一耳。由其心住實相・不住幻相 既經指示 法・皆從此經出。華嚴經云・奇哉奇哉・一切眾生・皆具如來智慧・但以妄 中不見所得之無餘涅槃 以此經・屢以住法著相爲戒・以住法著相・縱有修習・總不出妄想執著之外 發心度脱一切眾生・令入無餘涅槃・而滅度之・而復不見一眾生得滅度者 既全體在妄想執著中・又何由令如來智慧徹底顯現耶。以故令發菩提心者 以無餘涅槃・眾生心本自具・但以迷真逐妄・遂成煩惱業苦・初非有失 ・而不證得・若離妄想・則一切智・ ·則返妄歸真 所以不住色聲香味觸法而行布施等也。 ・則無壽者相。四相既無・三輪體空・故得萬行雲興 ・即煩惱業苦・復成無餘涅槃・今豈有得。約智名如 無師智· 布施 無礙智·則得現前。是 ・爲六度萬行之首 0

舉其首而例其餘・佛語善巧・不須繁詞。如是則波騰行海・雲布慈天・不

矜不伐・行所無事・則上契如來果覺・下契即心自性・故得受持四三二一句

者・其功德等彼十方虚空也。世人不知在離相無住處著眼・遂謂此經破相

相也。須知佛法真利益・必由不著無住而得・欲不著無住・非竭誠盡敬不可 不知此經・乃示人廣行六度萬行・上求下化・興無緣慈・運同體悲之無上妙

喜誠敬之心・乃請汪鴻藻居士楷書・刊印流通・并附功德頌于後・以期受持 ・竭誠盡敬・乃修習佛法成始成終之要道也。真達大師・欲令受持者咸發歡

者・悉得前人所得焉

觀世音菩薩三十二應發隱

作菩薩・而復于十方法界・普現色身・尋聲救苦・度脱眾生。十法界身 觀世音菩薩・誓願宏深・慈悲廣大・雖已成等正覺・而復示作菩薩。雖則示 印光法師文鈔卷四 雜著 金剛經勸持發隱 觀世音菩薩三十二應發隱 一〇八三

一〇八四

邱 女・十五身而已。于八部中・天已前列・此則不計・則有龍・夜叉・乾闥婆 大將軍・毘沙門・等六身而已。人則 應身者・于十法界之四聖法界中・略舉佛・辟支佛・與緣 緣・復問遊此世界方便說法之事・佛遂略說三十二應身・以明其概。三十二 身不現・令彼一切稱名致敬之眾生・現在離所受之幻苦・將來得成佛之真樂 。于此娑婆世界・因緣最爲甚深 、故不說、「于六凡法界中・天則略舉梵王・帝釋・自在天・大自在天・天菩薩乃其本位于六凡法界中・天則略舉梵王・帝釋・自在天・大自在天・天 比邱尼・優婆塞・優婆夷 ・長者・居士・宰官・婆羅門婦女・童男 。故普門品無盡意菩薩 小王・長者・居士・宰官 既聞觀音得名之因 聲聞・等三法界身 ·婆羅門 童 比

以例其餘

・若詳說者・

數豈有盡

菩薩興無緣慈

運同體悲

獄一

法界耳

· 但是語略

・非菩薩不于此處現身救苦也。須知三十二應・不過

種

阿修羅・迦樓羅・緊那羅・摩睺羅伽・又有執金剛神。此八種身・修羅

係修羅法界・餘則或屬于天・或屬于畜・或屬于鬼・六凡法界

唯

少地

令成 出資 佛聞法 者・同得現生慧朗福崇・優入聖賢之域・臨終情空業盡・直登極樂之邦・見 師・本願居士等・不求人天福報・但願倡者・助者・及現在未來之瞻禮供養 番禺高塘珠岡寺・宗禪大師・念菩薩恩徳・廣大周摯・因修一閣・以奉聖像 山所謂疾疫世而現爲藥草・饑饉時而化作稻粱・足徵菩薩慈悲之心矣。廣州 若夫山河城池 機應現・神變無方・能以意會・則妙義全彰。若拘拘然執迹而論・則失菩薩 不動真際・現諸威儀・了無計慮・無適不當・如一月普印千江・千江悉現全 月・一 中供觀音本像・兩旁供三十二應像。而本願居士等三十二人・各隨己力 以助 ・後同生三十三天・倡首者爲帝釋・輔助者作四方八天之天王。宗禪大 春普育萬卉·萬卉各具春光之妙矣。然菩薩所現·尚不止唯有情身 ・其功德不可思議。竊念過去劫中・一女人修佛塔・三十二人相助 證無生忍 ・樓臺屋宇 ・回入娑婆・度脱眾生而已 ・橋梁道路・樹林禾稼 。又祈雨順風調 ・隨彼機緣・亦皆示現 民康物阜 。 怡

印光法師文鈔卷四

雜著

觀世音菩薩三十二應發隱

印光法師文鈔卷四 雜著

禮讓興而風俗淳美。爰爲發其隱義云

兵戈息而天下太平・

嘉言錄題詞

數年 雖聖有不知・韓歐焉足師。因茲皈依佛・剃髮而披緇・自諒宿業深・宗教非 唯一了無再。 浄土大法門・其大無有外・如天以普覆・似地以普載。等覺欲成佛・尚復作 依賴・逆惡將墮獄・十念登蓮界。普被九界機・咸皆勤頂戴・暢佛度生心 時復深長思·古今眾聖賢·豈皆無所知。彼既悉尊奉·我何敢毀訾 我以宿業力・曾作一 闡提 ・效法韓歐等・其愚莫能醫 。幸得病

或謬見問・所答亦以此・不敢稍越分。海鹽徐蔚如・以其切而近・再三于京 所宜。唯有仗佛力・或可副所期・專心修淨業・庶得預蓮池。近十餘年來・人 滬・ 爲之付排印 。語言雖樸質・人皆不見慍・遺迹而究益・多有生正信 圓

淨李居士・ 宿根深復深 ·注釋諸經論 闡明如來心。 繼以費精神 衰病每相

印光法師文鈔卷四 雜著 嘉言錄題詞 罪福報應經題詞

類以編紅 侵・捨博而守約・立志追東林。又欲利初機・作修持規箴・節錄文鈔語・分 。并自出淨資・印施諸有緣・冀使一 切人・勉力希聖賢 。敦倫而盡

終佛來接・有若月印川 分・各完己性天・眾善悉奉行 。直下往西方・永出生死淵・見佛悟無生・漸致福慧 • 諸惡盡銷蠲 0 信願勤念佛・求登九品蓮 臨

各自審焉・若未超等覺・且預回向員 圓。因請爲著語・以期廣流傳・俚言入雅目・徒招誚且憐。赧顏貢愚誠・祈 0

佛說輪轉五道罪福報應經集解題詞

明所以・因背覺故・輪轉不已。欲得止息 滿・出離莫得。五道輪轉・了無止期・有如車輪・上下旋移。佛出世閒 眾生本性 、我情空 ・爰無生滅・由迷背故・輪轉永劫。三界無安 見思惑盡 · 方于三界 永離生釁 ・須識因果・力修定慧・滅除人我 然此事 理 ・猶如火宅・眾苦充 雖 極勝妙 唯 · 發

謂善說 瀾 俗轉淳樸・唯道是尚。王君功德・實難思議・印施利益・永久弗替。共挽狂 經·詳釋其義·如聚眾盲 掌紋 驅 佛已彰顯 弱肉強食 持佛號・即生事辦。此經略說・五道輪轉・罪福 上根・方可親到 人樣。 知生死苦・欲了生死・當修淨土。王君約之・具大悲心・推闡理事・若指 0 依正道流 世尊大慈・特爲安慮・爰開淨土・普令得度 。在近世中・疏解佛經 知因在我・自慎所行 恐諸閱者 • ・三途固惡・人天亦險。 競爭人我 ・庶幾同倫 。儻或鈍劣・莫道現生・或千萬生・亦難有成。罪福報應 未悟此義 0 致使斯民 一令其明視 ・其樂悠悠。 ・改惡遷善・冀獲休徴。息競爭風・敦行仁讓 ·如此明達 爱爲指明 ・如墮水火・益熱益深 以由有福 。亦如明鏡 但釋經義 ・實莫與京。憫世沈迷・撥無因果 令知出路 ・多爲禍基 ·普照萬象 |報應・因果俱闡。由讀 。若生深信 · 未詮淨業 · 所得善報 其何 來所說 · 形分妍媸 · 及發切願 引而 以可 不發 0 • 爲惡前 特宏此 切教: • 像無 此 · 是 虔 經

0 如

Щ

見思不盡・生死莫免。唯有淨土・專仗佛力・如子幼稚・賴母撫育。如度

且有溺憂 大海・須仗舟船・直登彼岸・身心坦然。若味此義・欲自浮泅・不但吃力 |。奉勸閱者・深信因果・回此精力・求生淨土。敦行孝友 ・恪盡己

分・以身率物・感化遠近。諸惡莫作・眾善奉行・克己復禮・閑邪存誠。能 如是者・名真佛子・生預聖流・沒生佛土。佛法廣大・普蔭人天・唯茲淨土

輪轉 攝機周全。等覺大聖・逆惡小凡・平等攝受・令登九蓮。知娑婆界・五道 知極樂國 ・九品安坦。 善緣悉備 ・惡緣悉殄・除非癡人 ・誰不自勉 0

親炙彌陀・ 參隨海眾・忍證無生・位鄰極聖。欲復本性・唯此爲要・捨此別

泥金繪像普門品頌

修・無人能到

0

大哉觀世音 印光法師文鈔卷四 徹證法界藏 雜著 罪福報應經題詞 乘大悲願力・ 泥金繪像普門品頌 普現諸色相 0 尋聲以救苦 一〇八九 隨感而

一〇九〇

蜨卿 徧應・如月到中天・萬川悉印映。良由眾生心・與菩薩無二・因其背覺故 分義。由是諸眾生・得有所怙恃・如天地覆載・如父母撫育。昔有一善士 無盡意菩薩・以名敬致徴。世尊遂略說・現身救苦事・大地舉一塵・略示少 起念・念于菩薩名・遂于當念中・蒙救離災刑。世尊在靈鷲・廣宣法華經 遂致成隔異。既遇諸災難・仰冀垂救援・即此一念心・便契真覺源。以故 欲廣菩薩慈・泥金書普門・兼繪救苦儀。年代已久遠・幸得常保守・故致吳 乃忘其固陋・略表諸因緣・庶幾見聞者・登第一 親獲謹承受。欲啓世正信·因祈爲著語 · 願令法界眾 義天 · 同證實相理

南五臺山圓光寺觀音菩薩示迹之記城七十里

示迹之記・文詞典雅・敍事精詳。惜於菩薩不思議無作妙力・殊欠發

揮。量不揣固陋・勉述一讚・以冠於首。俾事理交融・體用咸彰。生

見賢思齊。以觀音之心爲心・以觀音之事爲事。庶可亦爲未來世之觀

之所以能感・聖之所以能應・俱在斯焉。以企後之覽者・發菩提心・

世音耳・雖文不雅馴・而其意義有可取焉。讚曰

觀音大士・於無量劫・久成佛道。爲度眾生・不離寂光・現菩薩身。 又復普應羣機・垂形六道。以三十二應・十四無畏・四不思議無作妙 尋聲救苦・度脫羣萌 應以何身得度者・即現何身而爲說法 直

南五臺觀音示迹記

印光法師文鈔卷四 附錄 南五臺觀音示迹記

彰自性 同月印千江 知 無盡法界・無量眾生・ 0 悲運 • 春育萬卉。雖則了無計慮 同體 ·慈起無緣 咸在菩薩寂照心中。故得雲布慈門・波騰悲海 。即眾生之念以爲心・盡法界之境以爲量 ・而復毫不差殊。良由徹證唯心・ 0 圓 有 是

感即赴 無願不從也。此下乃示迹之記無聖量和南謹述

隋時仁壽中・此山有毒龍焉。以業通力・變形爲羽人。攜丹藥貨於長安・詐 騰 於不思議境 大山巖穴 非人所 ·龍蛇所居 制 強以文字紀述事迹者。冀千載之下・方來君子・啓深信耳 0 若非應身大士・ 0 歲久成袄 孰能 ・肆其凶嬖。吞齧不已・禍及生民 救濟 0 巍巍 乎妙智神力 • 其容思議 0 變怪昇 0 o 然

稱仙術・以欺愚俗・謂此藥之靈・服者立昇於天。嗚呼・無知之民・輕信此 · 凡服 此藥而昇天者・不知其幾何 。又安知墮彼羽人之穴・以充口腹耳 0

於墨頂 而 方之民 以妙智力 · 尙迷而 不悟 伏彼袄通 0 唯我大士 0 以清淨風 • 以悲願力 除其熱惱 • 現比 慈念所及 邱 身 0 結 草爲庵 毒氣

止

靈貺達於朝廷 龍獲清涼・安居巖穴。民被其德・各保其生。昔之怪異・不復見矣。由此 。以其於國有功 • 於民有惠 0 建寺峰頂 ·而酬酢之。大士以慈

風法雨 忽示無常 網以歸真・棄簪纓而入道。大士嘗居磐石 ・寂然而止。如聽法音・久而方散。嗚呼・建寺之明年・六月十九日・大士 普濟含靈 ・恬然入滅。異香滿室・愁霧蔽空。鳥獸哀鳴・山林變色。於是寺 0 慧日淨輝 • 破諸冥暗 ・山猿野獸・馴繞座隅。百鳥聚林 0 於是搢紳嚮慕 • 素俗欽風 0 割愛

之間 眾聞於朝廷 峰之上現金橋 化爲銀界 0 中使降香 ・橋上列諸天眾・各豎幢旛・及雨金華・紛紛而不至於地。最 0 忽聞空中簫鼓響 • 奉敕膊贈 • • 山岳搖 以崇冥福 0 瑞雲奔飛・ 。茶毘之際 異香馥郁 • 天地晦冥 0 忽於東 0 斯須

後於南臺上・百寶燦爛・廣莫能知・衝天無際。影中隱隱現自在端嚴之相 0

慈容偉麗 悲喜交集莫不涕泣瞻依 纓絡銖衣。天風飄飄 ·煥然對目。爾時緇白之眾 稱名致敬 始 知觀音大士示迹也 ・千百餘人・咸 0 清氣異

印光法師文鈔卷四 附錄 南五臺觀音示跡記

印光法師文鈔卷四

經於累月。左僕射高公・具奏其事。皇上覽表・嘉歎久之。收骨起塔

僧設供・大崇法化。至唐大曆六年・改號爲南五臺山聖壽寺焉。五代之世・ 御書牌額・錫號爲觀音臺寺。撥賜山林田土・方廣百里。每歳時降御香。度

兵火連緜・諸臺殿宇・並遭焚毀。雖有殘僧壞屋・尚與木石共處矣。至宋太 奏天廷 平興國三年夏・前後六次・現五色圓相 敕賜金額 ・爲五臺山圓光之寺 ・由是增修寶殿・繪塑真儀 ・祥雲等瑞。主僧懷偉具申府尹・ 0 烟霞與

慈輝所燭・石孕祥雲。法雨所霑・水成甘露。臺南數百步・有石泉焉。注之 金碧爭輝 ・鐸韻共松風演妙。諸臺屋宇・上下一新。嗣續住持・香燈不絕

或時亢旱・迎請者相繼於道途。感應如期・州郡已彰於簡牘 懷生蒙祐 方池・色味甘潔。能除熱惱・能潤焦枯。舒之則沙界滂沱・卷之則石池澄湛

草木霑恩 0 自昔迄今・聲華不泯 。噫・大聖以悲願力・福被一方 。而一方之

民 ·亦不忘於慈祐 每遇清明之月・及夏季忌辰。不遠百里・陟嶮登危・皆

以淨心踵足而至者・何啻百千萬耶。扶老攜幼・闐溢道路・相繼月餘。各以 香花音樂・繒蓋幢旛資生之具・持以供養。於是頭面頂禮・致敬致恭睹相瞻

忍 · **養** 非文。倘遇賢士・改而正諸・不亦宜乎。太白山釋普明謹撰元至元七年庚午 億其歲月經久・靈迹湮沒 旋繞讚歎。莫不洗罪蒙福 0 • 持諸殘碑 弭障霑恩 。豈徒爲奔走跋涉而已哉。寺僧法 屬爲斯記 0 普明固辭弗獲 甚愧

念佛三味摸象記 學叢報檢錯數句故錄原文念佛三味摸象記 了餘師原稿略爲筆削以佛

正月十五日都院主僧釋澄淵立石

師・講彌陀疏鈔于關傍。予遂效匡衡鑿壁故事・于關壁開一小寶。不離當處・ 歳在丙午・予掩關于慈谿之寶慶寺 0 謝絕世緣 修習淨業。值寺主延諦閑法

常參講筵。從茲念佛・愈覺親切。佛號一舉・妄念全消。透體清涼・中懷悅

直同甘露灌頂 印光法師文鈔卷四 ・醍醐沃心。 附錄 南五臺観音示跡記 其爲樂也・ 念佛三昧摸象記 莫能喻焉 0 日 有客詣關而問

曰・念佛一法・吾已修持二十餘年。于生信發願修行・非不真切。而業深障

證方了。 如 人飲水・冷煖自知 。我既未證・焉能宣說。客固請不已。 予日

生所敢冀。其能得之法・與所得之相・師其爲我言之。予曰・三昧境相

唯

重・終未能到一心不亂境界。窺吾根性・祇合帶業往生。雖念佛三昧・非此

若論其法 必須當念佛時 即念返觀 。專注一境· 毋使外馳 。念念照顧 心源

觀・念外無觀。全觀即念・觀外無念。觀念雖同水乳・尚未鞫到根源。須向 ・心心契合佛體 0 返念自念 ・返觀自觀 。即念即觀 • 即觀即念 。務使全念即

力極功純 者一念南無阿彌陀佛上・重重體究・切切提撕。越究越切・愈提愈親。及至 體露真常 豁然和念脫落 不拘文字。心性無染 ・證入無念無不念境界。所謂靈光獨耀 · 本自圓成 0 但離 妄念 • 即 如 如 佛者 **迎脫根塵** 此

天徹露 也 親見本來・本無所見。無見是真見・有見即隨塵 工夫至此 ・念佛法得 0 感應道交・正好著力。其相如 到此則山色溪聲 雲散長空・青

咸是第一 一義諦 0 鴉鳴鵲噪・無非最上真乘。活潑潑應諸法・而不住一法

若雪覆千山 **猶皓月之西落** 光皎皎照諸境・而了無一 • 海吞萬派 • 清淨寂滅 0 物。 唯是一 0 即照即寂 語其用 色 了無異味 ・如旭日之東升・圓明朗照。語其體 • 即寂即照。 0 無罣無礙 雙存雙泯 • 自在自如 ·絕待圓融 0 論 0 醬 其

利益 人・方知家裏事。語于門外漢・遭謗定無疑。又問・人于日用・普應諸綠 ・現在則未離娑婆・常預海會。 臨終則一登上品・頓證佛乘。唯有家裏

不出 何能觸目菩提・頭頭是道乎。答・心生則種種法生・心滅則種種法滅 二心 一心融通萬境 0 若了心體本空・ 何妨該羅萬象 0 須知萬象如幻 。萬境

何罣礙 生滅唯是一心 。不見華嚴事事無礙法界。所謂一一塵中一切剎・一一心中一切心 0 諸緣無縛 本自解脱 。六塵不惡 還同正覺 0 心境 如 有 0

•

一一心塵復互周・重重無盡無障礙。以故器界毛塵・雲臺寶網。咸宣性海

悉演真乘 印光法師文鈔卷四 豎窮三際 附錄 横徧十方。 念佛三昧摸象記 覓一毛頭許不是道者・ 亦不可得 則法法

〇九八

頭頭 絶百非・絶待圓融・何可得而思議也哉。上來所說・如盲摸象。雖未 無非大寂滅場。心心念念·悉契薩婆若海 0 唯心妙境· 唯境妙心 離

離象・恐非全象。筆以記之・以質諸親見之者。

掠人之美見誚也、釋印光記列于附錄科中、庶閱者不至以

勸

燬淫書說

因維 爲揚

筆張 削瑞

、俾文義順暢、居士欲廣流傳、勸附入文鈔、遂曾居士、重刻格言聯璧、令光校訂、以原文質略

略殊標難

三代而下・世多邪說 。而邪說之最足以害人心世道者・莫如淫詞小說爲甚

蓋聖賢經傳·唯恐不能覺天下之愚迷。而淫詞小說·唯恐不能喪斯民之廉恥

佳妙 以故 但 繼 以聰明子弟 小說出而淫風熾・淫詞興而貞德衰 則情隨文轉 ・靈敏婦女・ 不能自持 。遂致竟以希聖希賢宜家宜國之身 覩此書 。然誰無羞惡之心・豈肯作禽獸之 悉爲所惑 0 初則豔其詞章 · 甘作鑽 以爲

事

穴踰牆偷香竊玉之事 而絕無顧惜者・皆此等邪書之所蠱惑也。 其毒人也

之百祥矣 心安泰 必期于世閒永無此書・人民各敦彝倫而後已。將見佛天雲護・災障冰消。身 行焚燬。有力則獨任其資・無力則勸眾共舉。又祈輾轉化導・俾人各景從 有心世道仁人君子。凡見此等人・務必勸令改業。凡見此等書及板・務必盡 亂賊之魁。當爲國法所必誅・天律所不赦也。 劫・莫由出離。可不哀哉。凡作此書・及販賣此書者・其罪甚于叛逆之首・ 家而殺身・辱先而絕後。及其死也・尚使神識墮于地獄・受諸極苦。久經長 烈于蜜餞砒霜。其陷人也・慘于雪覆坑坎。令人滅理而亂倫・折福而損壽・破 采取而舉行焉。 戒煙神方 等、加則不靈、 家門迪吉 特將收藏小說四害· 。富壽康寧· 格四 伯言聯壁、四害十法、見 現身獲箕疇之五福 並焚燬淫書十法・詳列于後。企有心世道者 奉勸當權諸名公偉人 0 勛徽爵位 · 後裔納伊訓 · 及一切

戒煙神方

印光法師文鈔卷四

附錄

勸燬淫書說

〇九九

辦・有利無弊。務望有志戒吸鴉片諸君・從速照服。百發百中・萬勿輕忽。 鴉片流毒・受其害者・不知凡幾矣。有志同胞・每欲戒而苦無良方。近來市 上所售戒煙丸藥多參以嗎啡毒質。雖可抵癮・受害尤甚。今此神方・簡便易

甘草八兩 川貝母四兩 杜仲四兩

右藥三味・用清水六斤。熬至一半・將藥用布去渣。加人好紅糖一斤成膏 每次服三錢 ·溫水沖下

0

。第七八九天・一兩藥加煙六分。第十十一十二天・一兩藥加煙四分。第十 (服法)初三天・每藥膏一兩・加入煙一錢。第四五六天・一兩藥加煙八分

八日後・每兩藥加煙一分・再服七日 三十四十五天・一兩藥加煙二分。第十六十七十八天・一兩藥加煙一分。十 。以後不須加煙·服完此膏 其瘾自斷

精神 並無難受・及一切毛病。真奇方也。斷瘾後 至禱至禱 。正戒煙服藥時・忌食酸味 ・切忌再吸。愛惜光陰・保養

京師 時機。誠末法中應病良藥也。戊午春・以歷年搜訪所得之文二十二篇・印於 我師者。續佛慧命・於是乎在。師之文・蓋無一語無來歷。深入顯出・妙契 多。自然病愈 世罕知者。甲寅歲 印光法師・法名聖量・別號常慚・陝之郃陽人。駐錫普陀法雨寺之藏經樓 斷瘾。不但不生毛病・而且精神強健。極靈極效 又以錄存各稿三十八篇 ・合掌歡喜・歎未曾有。大法陵夷・於今爲極。不圖當世尚有具正知正見如 〔防法〕倘戒煙期内・發生別種毛病。每兩藥膏・照期多加煙一分・不可過 原跋 ・是爲初編 ·萬無一 。旋謁師於普陀・獲稿頗夥・並承知友錄稿見寄。己未秋 ・高鶴年居士攫師文稿數篇 失 ·印爲續篇 。此方治好多人。有每日吸二三兩煙者・均服一 。是年冬・ 銜恤南歸 · 印入佛學叢報 0 南中緇素索閱是書 0 爾受而讀之 料

印光法師文鈔卷四

附錄

戒煙神方

原跋

者尤眾・爰商之商務印書館・重付排印・以廣流通。復經張君雲雷・廣爲徵集

兩編・按類編次。詳爲校勘・較前兩次所印尤完善矣。書成・謹記其緣起如 并爾續搜之稿・共增三十四篇。由周孟由・朱赤萌・黃幼希三君。合初續

普勸發心印造經像文附

是。庚申仲冬·浙西徐文霨敬識

弘一釋演音示網 弘實尤惜陰演譯

印造經像之功德

眾生沈淪於苦海・必賴慈航救濟・而後度脫有期。佛法化導於世閒・全仗經 像住持・而後燈傳無盡。以是之故。凡能發心・對於佛經佛像 或刻或寫

或雕或塑 。或裝金・或繪畫 。如是種種印造等法。或竭盡己心・ 獨力營辦

或自力不足・廣勸眾人。或將他人之已印造者・爲之流通・爲之供養。或見

常算數計 他人之方印造者・爲之贊助・爲之歡喜。其人功德・皆至廣至大・不可以尋 0 何以故。佛力無邊・善拔諸苦。眾生無量・聞法爲難 。今作此印

不可思議。故其功德之廣大・亦復不可思議也。敬本諸經所說・略舉十大利 造功德者 開通法橋・宏揚大化 。徧施寶筏 ・普濟有緣。其心量之廣大・ 實

益。謹用淺文・詮次如左。

子。 一從前所作種種罪過・輕者立即消滅・重者亦得轉輕。 身口意・爲作惡機關。清夜自檢 ・此生所犯者已多不可計 貪瞋癡・爲造孽種 。若合多生所

動贖罪心機・誓願流通聖經・莊嚴佛像。罪惡冰山・一 犯者言之・所造罪業・多於寒地之冰山 ·能勿駭懼 0 雖然・罪性本空・苟一 遇慧日・有不消滅於

無形者乎。

常得吉神擁護 印光法師文鈔卷四 附錄 切瘟疫水火寇盜刀兵牢獄之災・悉皆不受 印造經像文附 人閒種種

惡報 便易行之印造經像之殊勝功德上做去・其感動吉神・ 無往而非多生惡業所感。一念之善・力可回天。修行善業・ 而蒙護衞 ·此中 而從最方 -實有相

之捧案 苦因。所以如來說法・常有無數天神・恭敬擁護。阿難集經・四大天王・爲 互獲益之關係。蓋神道天道・自佛法言之・均爲夙業所驅・未脫長劫輪轉之 。印造經像・爲諸天龍神・非常歡喜之事 0 以此功德 • 而感吉神·

爲擁護

終此報身

離諸災厄・宜也・非幸也

功德 破除我執・爲救苦雪難第一工程。印造經像・普益人閒・爲不可思議之法施 妒詐欺誣陷掠奪殘殺等種種構怨行為・莫不起因於自私自利之一念。佛法以 三夙生怨對 · 所及至廣 咸蒙法益・而得解脱 。法雨一滴・熄滅多生怨對之瞋火而有餘。化讐而爲恩・轉 ・永免尋讐報復之苦。 人閒一切爭持嫉

四夜叉惡鬼·不能侵犯。毒蛇餓虎 不能爲害 慳貪醜行 爲墮落鬼道之

禍而

爲

福

其權何嘗不操之自我也

爾逍遙 六至心奉法 則暗受加被而通利。諸障雪消・心安神怡。潤及色身・有斷然者 藪・身爲苦本也。佛法善滅諸苦本。彼印造經像者・ 危孰甚焉 疑悶懊怨痛苦中。 世多眾 五心得安慰・日無險事・夜無惡夢。顏色光澤・氣力充盛・所作吉利。 胥化坦途矣 深因。瞋火無明・爲降作毒蟲之徵兆。結怨多生・尋讐百劫。惡緣未熟・任 修士惕之・ 所見獨真 ・十之七八・在驚憂疑悶懊怨痛苦中。吾人一生・十之七八・在驚憂 。時會已來・憑誰解救。鬼魅相侵・虎蛇見逼。 0 況乎慾心難麼・有如深谷 事機 雖無希求。自然衣食豐足・家庭和睦・福壽縣長 印造經像 蓋爲我計者・我以外各各皆立於敵對之地位 至 豫行懺罪 急起直追做去 0 於是縱有惡緣 0 無事自擾・不風亦波 0 無顧慮 無希求 或以親沾法味而開明·或 悉皆消釋 孽由自作・ 發心至真切 0 此所以形爲罪 0 0 倘臨險地 孤與眾抗 o 事非偶然 至人行事

塵

印光法師文鈔卷四

附錄

用

-〇 六

細・皆不虚棄・皆有無量勝果。譬之粒穀播於肥地・一傳化百・五傳而後得 而始行善・發心不真切・結果即微薄・可決言焉。雖然・一念之善・一文之 存嫉妬心・造誹謗語 力至肫摯・自然成就至超卓。印造經像之事・以如是肫切懇摯・至誠格天・ 七所言所行・人天歡喜。任到何方・常爲多眾傾誠愛戴・恭敬禮拜。 百萬兆。作宏法功德者・烏可無此大計・無此決心哉 至心奉法之人爲之。雖不計功德・而所得功德・實無限量。即僅就其人所得 一部分之世閒福言之・自然一一具足 。揚人惡事・暴人短處・稱快一時者。歿後沈淪百劫 ・而無少欠缺。苟或有人・心存希望・ 0 夙生

之念。或淨三業・作寫經畫像功德。或捨多金・作印經造像功德。所得勝福

現在一切受大眾歡敬之人・原從夙生宏法功德中來

往後一切

不可稱量

。任作何事・都無結果。而宏揚佛法之人・善因夙植。存報恩之心・充利羣

慘苦萬狀・備受一切惡報。一旦出生人閒・因緣惡劣。任至何地・動遭厭惡

令大眾歡敬之人・實從現今宏法功德中出。植荊得刺・栽蓮得藕。一一後果

·胥由自藝也。

以虔作流布佛經 報。惟有佛法・善解諸縛。苦海無邊・回頭即岸。罪山萬仞・息念便空。是 垢重・怨憤易發。妬忌心深・情欲熾盛者・沈淪重罪畢受後・還得多生女身 解囊者 多生惡疾殘廢報。夙生貪欲無厭・止知剝人以肥己・慳吝鄙嗇・不肯周急而 曾操製造凶器火器毒藥等權・助成他人凶殺之業者・沈淪重罪畢受後・還得 蠢愚無知報。夙生爲貪口腹・恣殺牲禽・以及曾爲漁夫屠夫・獵戶庖丁・與 生吝於教導·以及肆口謗法·肆意毀謗有德之人者·沈淪重罪畢受後·還得多生 八愚者轉智・病者轉健・困者轉亨。爲婦女者・報謝之日・捷轉男身。 。巧言令色・掩飾行欺。逐境攀援・容量淺窄。因循怠惰・倚賴性成。煩惱 ・沈淪重罪畢受後・還得多生貧窮困厄報。夙生知見狹劣・心存諂: 莊嚴佛像之無上功德者。過去積罪 ・自然逐漸剷除 。未來 曲 夙

印光法師文鈔卷四

附錄

印造經像文附

勝福 **穩教圓滿成就**

九永離惡道・受生善道 ٥ 相貌端正・天資超越・福祿殊勝 切含靈・舍

餓鬼・以及畜生。墮三惡道・萬劫沈淪。難得易失・如此人身。作十善業 身受身・往返六道・如車轉輪。千生萬劫・常在夢境。作善不已・罪畢斯昇 。驕縱忘本・種墮落因。作惡多端・福削壽傾。百千萬倍・惡報堪驚。地獄

心。正念無作 修五戒行 。 生人天道・ 夙福非輕 · 離垢超塵 。是故印造經像 。諸佛如來・悲憫同深。 ・上契佛心 0 僅此微願 廣爲說法 · 已種福因 • 首重攝

。自是厥後・做再來人。諸福圓具・出類超羣

十能爲一切眾生・種植善根。以眾生心・作大福田・獲無量勝果。所生之處

常得見佛聞法 難於攝化 0 佛言此輩人眾 。直至三慧宏開・六通親證・速得成佛 0 因遣目連往 全城 佛世有一城人眾 人眾

諸弟子問佛因緣 佛言目連往劫 與目連有緣 曾爲樵夫 日入山伐木・驚起 果皆傾

向化

方三世諸佛如來・有大因緣。諸佛願海勝功德・一一攝於我心中。我願與佛 中 與我有緣。一一眾生至靈妙之心地・皆可作爲自他兼利之無上福田。我既於 曾發一普度之念・故與有緣。種因於多劫之前・一旦機緣成熟・而收此不可 印造經像 方三世諸佛如來之無上法寶・作爲脫胎換骨・轉凡成聖之種子。吾身即與十 果成熟時期之妙莊嚴品・亦無不可。且吾人能先行潔治自己之心田・接受十 思議之勝果。由此觀之・吾人生生所經過之時代・在在所接觸之萬類・一一皆 無數亂蜂。其勢洶洶・欲來相犯。目連戒勿行凶・且慰之曰・汝等皆有佛性 無差別・諸佛慈願互相攝。因該果海・果徹因源。無邊勝福・即締造於此日 一一眾生心田中・散播福德種子。一一眾生・皆與我有大緣。一一眾生心田 他年我若成道・當來度汝等。今此城人眾・乃當日羣蜂之後身也。因目連 所結無量大數之福果。雖謂此無量大數生生不已之福果・即爲播因者道 ・宏法利生之一真心中矣。 普願現在未來一切有緣 善覓福田

印光法師文鈔卷四

附錄

印造經像文附

結勝緣。勿任妙用現前之大好光陰・如滔滔逝水之在眼前足底飛過也。

印造經像之機會

印造經像者之所得功德・已略如上述。但何時何處・足以適用此種植福之舉

特爲研究・以便力行。今謹約述如次

從業報中來。 祝壽 生本無生・無生而生。法身壽算・本來無有限量。其現在幻驅 姑 乃

報盡便休 凡自己家中・或長者・或儕輩・ ·無異曇花 一現・何壽之足云。今爲隨順俗情故

且開此祝壽方便門

•

切勿殺生宴客・浪擲金錢・妄造怨業。亦勿貪戀無足重輕之虛譽・徵文徵 或自身・舉行祝典時

於掃除 詩・接收過情之稱許。作此虛文・對眾即爲欺飾・問心適足慚汗。以故莫善 一切俗尙・而從事於印造經像。無力則寫經畫像、仰以報四重恩 · 俯以濟

三途苦 既能獲無量福慶 ·又可留永久記念。 此種勝舉 尊者居士 ・尤宜悉

心提倡・留良榜樣與多眾看。若親戚朋友家・舉行慶祝時・亦勸准此行之・

爲造勝福。雙方所得功德・不可稱量。

交煎・諸怨環逼。聞法而覺醒者・方慚愧痛苦之不暇・又何喜之足云。夫妻 二賀喜 一念妄動・而起慾愛。於本空中・幻出色身。終此天年・但見百苦

父子・無非夙債牽纏。安富尊榮・盡是生理境界。是以覺王眼底・在在可悲 。 今爲多方汲引故・ 姑且開此賀喜方便門。 凡男娶女嫁時・生兒育女時

職位昇遷時・新屋落成時・公司行號開張時・凡百營業獲利時・以及其他一

功德。其戚友之表情道賀者・宜豫向聲明所定意旨・俾知所遵循 切世俗所認爲歡喜之事。事而在己・應省下歡喜錢財・作此刻經造像之殊勝 。羣以宏法

宏遠・可以斷言。事在戚友・亦宜迎機利導・免作無謂之舉。省下金錢・作 範圍內事・爲多眾示範。由知識階級・開此風氣。轉移俗尚・響應至捷而至

印光法師文鈔卷四

附錄

此自他兼益之圖

至。災字從水從火・示其來勢猛烈・有一發而不易收拾之概。災殃之種別 三免災 天災人禍 無代蔑有。災分大小・胥由一切眾生別業同業・感召而

若刀兵・若瘟疫・若饑饉・若牢獄。若洪水爲患・田廬淹沒。若大地震裂

之結果 城邑爲陷。此外如燬滅一切所有之風災火災·以及其他猝不及防之一切悲慘 不可一日緩。今爲饒益一切有情故 皆得以災禍之名目括之。觸目而驚心·思患而豫防 ·特別開此免災方便門。 0 講求避免之方 無論 山居水

居平壤居 所有種種因境而生之特異災厄。以及刀兵寇盜・疫癘火患牢獄

祈禱免禍。或爲並世而生之一切眾生・發大慈悲心・代爲祈禱免禍。或爲過 與多生怨對・尋讎報復之一切禍災。或爲父母師長・及諸眷屬・與諸戚友

現未來四生六道中一切眾生・發大菩提心・代爲祈禱免禍

憫念眾生故 三界災厄 惟佛威神力善能消除故 矢誠宏法之人・與諸

之勝舉

當

以流通佛經·

莊嚴佛像

・爲第一

美舉

0

是何爲者・

以十方三世諸

。其最實際最有效

佛慈悲救拔之深心宏願·默相感通故。

四祈求 心境亦然。 動若不休・止水皆化波濤 不變隨緣 · 真如當體成生滅 。靜而不擾・波濤悉爲止水。水相如此 。隨緣不變・生滅當體即真如 一迷

則夢想顛倒 ·觸處障礙。一 悟則究竟涅槃・當下清涼。不動道場中・本來一

病之求速愈。家宅之求平安。怨讎之求解釋 爲自己·及六親眷屬之憂年壽短促者求延壽。爲子嗣艱難者求誕育。以迄疾 切具足・又何欠缺馳求之有。今爲多眾勸進故・特別開此祈求方便門。 0 營業之求順遂 0 切作爲之求 凡

如意 切法界眾生回心向善・離諸魔難。 佛道不相應故、均在屏除之例、但有傷道德之行爲、及職業、與 以至一 求國內平和 切聞法之人・求增長智慧。求證念 0 求世界平和 0 求現在未來

佛三昧。求臨終時無諸苦厄・心不顛倒・往生極樂。皆宜作此寫經印經造像

畫像功德。至誠祈禱・終能一一滿其所願。

五 懺悔 省庵法師勸發菩提心文有云 我釋迦如來 最初發心 爲我等故

印光法師文鈔卷四

附錄

印造經像文附

— — 29

之路者 贖前愆 自問 菩薩戒本經箋要。梵網經合注。出家戒律不備錄。夫然後了知一切過咎所在 藏諸法典參求。 我尙沈淪。今得人身・佛已滅度。何罪而竟生末法・何障而不見金身。撫躬 人道・佛以方便・令種善根。世世生生・隨逐於我・心無暫捨。佛初出世・ 癡・不知信受。我墮地獄 行菩薩道 對於自己前此曾作諸不善事・深自追悔。而欲以懺悔開滅罪之門・闢自新 爲末世眾生 能不惶悚無地。今爲消除罪障故・特別開此懺悔方便門 0 當以流通佛經・莊嚴佛像 前此所作諸不善業 0 經無量劫 在家弟子。宜讀十善業道經。在家律要廣集 度脫生死苦海 ・備受諸苦。我造業時・ ・佛復悲痛・欲代我苦而我業重・不能救拔 · 可以立即消滅 • 最重要最切用之一方法 ·爲最有效。作此功德時 0 佛則哀憐・方便教化 若代爲他人懺悔者 。欲修戒行 。優婆塞戒經 至誠懺悔 ۰ 亦適用此 修持戒行 0 • 當向律 。我生 而我愚 以

方法

便門。 覺·人人皆有一親恩未報之大事因緣在。今求淺近易行故·特別開此薦拔方 尚滯留於六道中受苦無量者· 咸得仗我不可思議之願力· 方便脫離生死苦海 歿・尙有不與驅體俱歿者在。是何物・曰靈性是。此靈性者・捨身受身・被 於父母養育之恩·酬報無從·而抱無限之悲痛者也。然而吾父吾母·驅體雖 道故・視六道眾生皆父母・作六道眾生未度盡時・誓不成佛想。無論先覺後 思議之願力・脫離生死苦海・爲第一要圖。並使我百劫千生之生身父母・現 方成就。是以善報親恩者・當虔修出世法。使我今生之生身父母・仗我不可 期。吁嗟乎・三界火宅・豈得留戀。善哉蓮池大師有云・ 夙業所驅・重處偏墮・自難作主。循環往復・三途六趣。從劫至劫・了無出 六 薦 拔 為第一要圖。以念多生父母深恩故・作徹底酬報想。以念多生父母沈淪六 凡值父母喪亡・或亡後七七記念。一週年記念。以至數週年・無數 樹欲靜而風不息 · 子能養而親不在 此普天下爲子女者・ 親得離塵垢 ·子道 對

功德。其祖父母・及外祖父母・與其他一切平輩幼輩・亦宜作此功德・以資 冥福。若親戚朋友喪亡之時・亦宜以此類宏法功德・代卻一切無益之禮數。 週年記念。或死期・或誕辰・或冥壽・作諸記念。皆宜舉行印造經像之殊勝

其所獲功德 ·至無限量 0

以上所述・不過僅就大概言之。此外植福機會・不勝枚舉。欲悉其詳・

一切經典自知。

印造經像之方法

寫經 凡大藏經中諸經・及諸律論。以至古今來一切大德之著作。長篇短

段・集聯題頌・皆可恭敬書寫。或與通達佛法之人商量・酌定一切・尤爲妥 善。若自己不能寫者・可以託人爲之。若自己能寫・則以自寫爲是。書法雖

不必如何精美・但須工整・不可苟且潦草。普陀山印光法師云・寫經・宜如

進士寫策・一筆不容苟簡。其體必須依正式體。又謂古人寫一字・禮三拜

繞三市・稱十二聲佛名。慈訓慇懃・感人至深。敬錄之・爲作寫經功德者勸。

二畫像 凡佛菩薩像・皆可繪畫。或大或小・或坐或立。或墨畫・或著色・

均 好 長於作畫・長於畫人物。而又熟覽內典者・尤易得法。如於畫學毫無

根柢。下筆之宜忌・漫無把握者。勿輕易爲此・致惹褻慢而招過咎

資贊助 三刻經印經 指請現成經典・贈送有緣・以廣流布・而宏勸化。或於他人勸募之時・出 · 作見聞隨喜功德 或刻木版・或排印・或石印・均可酌量行之。或出資向流通處 。悉可種植善根 ・獲大利益。有光紙・落墨不可用

0 若貪賤用之・所得功德 較用本國紙・當減十倍。不可不知

版 於製版刷印。 四刻像印像 均佳 或倩名手・鐫刻堅質木板。或勒石・或製銅版・鋅版・及玻璃 得名畫家畫就之佛菩薩像・求其流傳久遠・廣行攝化者・莫善

印光法師文鈔卷四 附錄

印造經像文附

發願文之程式

此種發願文・應附書於經像之後。格式甚多・不勝具述・今略舉六例如下。

某年月日・弟子某・敬寫某經若干部。以此功德・願我震旦

國中

以及世界各國 0 風調雨順・物阜時雍。災難消除・干戈永息。共沐佛化 同

證菩提 此祝 特願 備辭 一格式而已、健可隨意活變

一寫經

紙。願我身體安康・資生具足。現世永離衰惱・臨終往生西方。並願此功德 二畫像 某年月日 ・弟子某・ 敬捨微貲 ・請畫師某・ 恭畫某佛某菩薩像若干

迴向法界眾生。同度迷津·齊成佛道

昔人寫經祝壽之例 三刻經 某年月日 0 敬刻某經・並印送若干部。以廣弘願 某居士宜之名稱幾旬生辰。弟子某某等 亦祈難老 咸以戚好 0 伏唯 竊援

三寶證知

四印經 某年月日・第幾男某誕生。弟子某敬施資印送某經若干部・以結法

緣 並願法界無子眾生・皆得誕生福德智慧之男・紹隆家業。弘宣佛法・普

利有情 0 緜衍相承 • 盡未來際

五刻像 干紙。惟願我等罪障消除・福慧增長。早證念佛三昧・共生極樂蓮邦・普度眾 某年月日・弟子某某等。捨資合刊某佛像・ 或某菩薩像・並印送若

生・同圓種智

六印像 仗此功德 ・爲母某氏・ 某年月日・弟子某・敬施資印送某佛像・或某菩薩像若干紙。伏願 隨改他名稱若爲他人者 可 懺某罪某罪 0 諸如此罪 願悉消除 或

不可除・願皆代受。令現前病苦・速得安痊。若大限難逃・竟登安養。仰乞

三寶・證明攝受。

價兩元 如欲廣覽願文格式者・可請閱靈峯宗論。此書係揚州東鄉磚橋法藏寺刻版 印光法師文鈔卷四 上海有正書局 附錄 ·及上海北泥城橋北京路佛經流通處 印造經像文附 北京臥佛寺佛

卷・全載願文。如能熟讀此願文・不僅能通願文之格式・並能貫通佛法之精 經流通處・以及他處著名之佛經流通處・皆有寄售。價約二元左右。此書首

義。奉勸有志之士·其毋忽焉。又發願雖爲自己之事·必須附以普及眾生等

語。如是・則願力普徧・功德更大矣。

寫時畫時之注意

中求。有一分恭敬・則消一分罪業・增一分福慧。又印光法師文鈔中・有竭 局排印增廣本。各埠分局皆有·可就近請之。 誠方獲實益論・言此事最爲詳明・宜請閱之。印光法師文鈔・係上海中華書 寫經畫像之時・宜斷葷酒。沐浴・著淨衣。拂拭几案・焚香禮佛・然後落筆 。如是乃能獲勝功德・得大利益。故印光法師云・欲得佛法實益・須向恭敬

結論

光彩愈煥發 阻・不校不餒。此一團宏揚大法之真誠・如純粹之黃金然。愈經烈火煅煉 就之經像等 觀以上所說寫畫刻印佛經佛像・有如是等勝妙作用 上所述・種種消災救難・種福獲益之事。開導大眾・不厭不倦。雖遇無知謗 喜踴躍 以至誠懇切之心・其功德亦無量也。 刻經像等事。即資用不充者・亦可自己抄寫映畫。及量己力所及・請已經印 而終無感化之機乎。又樂成人美 。以是・吾人應隨時隨力・依此方法・歡喜奉行。其家境富裕者・可以任刊 ・出至誠心・廣大心。隨時隨處 。精誠所至・天地鬼神・皆將感格。何況無知之人・天良同具 ・轉施他人・以結善緣而增福德。雖施經一部・施像 獎人爲善之道 · 向人宣說流布佛經 又無論男女老幼・得見此文。而能歡 盡人可行。不論 ·及如是等種種應用方法 ·莊嚴佛像 一紙 何時 。倘出 何處 如

讚歎之語・以溫慰之・策進之。使當人向善之心愈堅壯・餘人慕善之心咸熱 隨見隨聞 ・有人偶爾發心・作宏法功德不問已作現作將作・一一出吾歡喜

烈。此不費分文之無上功德・盡人可爲。此普勸發心印造經像文・傳達之處 暴自棄・自誤誤人之言也。如來舌相・薄淨廣長・能覆面輪。此希有之福德 無論見者聞者・皆得方便爲之。彼盛倡手無斧柯・爲之柰何之說者・乃自

利導 • 方便善巧。勤作讚歎隨喜功德之人・善於運用其廣長舌相。誰謂不可

舌相・實從萬劫千生讚歎隨喜之功德中來。至誠宏法之人・隨時隨處・迎機

以此勝妙功德・革除眾生罪業之相・而獲福無量哉

閱覽佛學經書翻動時減少罪過之注意啊

印縱橫 學人閱覽尋常書本・每於翻動頁角時・往往用指甲掠劃。以致紙質傷損・指 殊失尊重保護之道 此種惡習・施之於尋常有益身心之書籍・已有

習・施之佛學經藉・乃大不敬・急宜切戒。旁觀者能善言勸導・使之悔改・ 罪過。何況佛學經書・爲超出生死苦海之寶筏。天神地祇・咸皆恭敬擁護 無上寶典。閱者宜加意保存愛惜・期其傳之久遠。救拔多眾・ 累人・尤爲損德・所當切戒 而可任意褻慢・不加愛護哉 頁翻動之時・當用指肚從旁輕輕掀起。不可鹵莽・宜加慎重。其始雖覺未慣 無可逃。況乎有病之人・口津沾書。易使後來展誦之人・得傳染之病。以己 及紙角純白之色・易致污染。又以污穢口液・抹於佛經之上。褻瀆之罪・實 功德甚大。 物質日劣。近時所出之紙・亦遠不如前 久之自能得心應手也。 能加外護 又有以指尖蘸口中津液・黏紙翻掀。雖紙質未必損傷・然墨色 或紙或巾 又臨開卷時・案頭塵垢・先須揩抹乾淨。經籍面 。竊謂佛書流通世間 。且末世眾生・福量漸薄。享用各物 均佳 。若常常劃翻 ・爲養人慧命・度人出苦之 · 紙易破裂 普利有緣 ·得之彌艱 0 以此積

印光法師文鈔卷四

附錄

印造經像文附

印造經文發明

晉宋齊梁唐代閒・高僧求法離長安。去人成百歸無十・後者安知前者難 唐義淨三藏法師西域取經詩聞法之幸

附錄安士全書印造經文發明

路碧天唯冷結・砂河遮日力疲殫。後賢如未諳斯旨・往往將經容易看

遠

至難聞者佛法 雖有嘉肴・弗食不知其美。雖有至道・弗學不知其善。天下最易失者人身 。如來不出世・則天上人閒 ·皆如長夜。不特庸流局於所見

厥初生民 即儒者亦囿於所聞。仰首觀天・以爲止此日月・而不知有微塵之剎土。以爲 無對矣・不知輪回六道・尚等凡夫。身死之後・以爲形滅神消矣・不知一 ・始於盤古・不知曠劫以來・閱歷無邊劫數。天帝天仙・以爲至尊 點

靈光

生生不昧。父母眷屬・身歿之後・遂謂無可如何

豈知得此法門

縦經千生萬劫・自有酬償之道。善士轗軻・惡人得志・即謂天道難憑・豈知 宿業所招・纖毫未爽。大矣哉・如來之教典・真所謂渡海之慈航・幽途之寶

蓋。四大天王・皆捧持高座之四足也。豈世閒之書籍・可彷彿其萬一乎。印 炬・嬰兒之乳母・而凶歲之稻粱也。宜阿難結集之時・梵王帝釋・皆執持旛

附錄證通法師西資社同誓文

之造之・其容已乎。

恭覩大藏七經・純談淨土・依正莊嚴・功德勝妙。返觀此處三惡八難・多不 佛法門 善聚。生老病死・壽命短促。自力修行・難進易退。先聖憫我等故・立此念 彌陀佛・菩薩海眾。願運洪慈・俯察微志。某等惟念宿福深厚・生處中華。 維隆興元年・歲次癸未・四月八日。釋師友・洎闔會大眾・歸命極樂世界阿 深談易往 激勸求生。古今聖賢 ・宏此道者・ 其書山積 湖海緇素

印光法師文鈔卷四

附錄

印造經文發明

西資社同誓文

印光法師文鈔卷四

我等尙慮性習不同・世務縈絆。口談極樂・意戀娑婆。理事不明・行願有闕 發・不約而同。秉志有歸・僉心西境。既念念不忘・期終此報・決取往生 仰願慈尊・舒紫金手・撫摩我頂。啓紅蓮舌・密授我記。庶我此生已去・諸 惡不作・眾善奉行。不值邪師・不失正念。命終之日・無病無苦・身心悅樂 。旦祈云同・夕歸攸隔。於是謹涓吉日・聚會投誠。稽首梵容・立茲宏誓。 隨從如來・同歸安養。蓮華早開・悟無生忍。游歷十方界 結此社者・代不乏人。十方眾生・往彼國者・多如駛雨。我等是以亮情天 ·奉事諸佛身

濟拔苦眾生・同成無上道。虛空有盡・我願無窮。若見若聞・俱霑利樂

流通有益於世道人心之經書法

全施流通 或附印少份或代爲校字或代爲募勸或歡喜讚歎堅人施心亦有莫大之功德在 (慨捐巨款刷印多部完全施送不取分文功德甚大此事惟有力者能之若無力者

三祈福流通

皆名爲施亦名半施雖曰半施苟施出至誠歡然爲此不矜不怯善願滿足功德殊勝或助紙價或助印資或助裝訂或送登廣告或助運送隨便發心以己微願助成勝舉

一半施流通

求速愈許願印施惟至誠可以動天地此願甫發靈應立見求名求利求子求壽苟能隨力印施所願必遂苟因親病而

四懺罪流通 須及早悔罪即以流通經典爲贖罪之方毅然力行夙障自消人非聖寶誰能無過但天道禍淫不罪悔過之人人須知過且

五報恩流通 印送經典可資冥福可盡孝思深望舉世子女之抱恨終天者悉力以閩之子女受父母深恩乃樹欲靜而風不息力能養而親不在其悲痛爲何如但

六憫殤流通 | 浪擲金錢於無謂之舉不如印送經典以助超拔凡爲賢父兄者正宜開此風氣| 無緣無怨不成父子緣盡便離怨消即去穎異之子早歲夭殤者所在都有與其|

七吉慶流通 誕等事當戒殺生以免造孽刊經典以綿福澤遇成名獲利開業建造就職升遷婚嫁育子壽

八饋送流通 | 願海內賢達示範當來收移風易俗之效於不動聲色之間| 賀禮贐禮贊禮等往來表情須用敬物可竟以經書代之普

九宣講流通 失學之人同沾法益使先聖大化普及齊民出廣長舌發無礙辯亦先覺者應盡之天職 逢朔望或星期休息日在家則集家人在鄉則集里人就各人程度引經據典方便宣說

十函牘流通 度各人弱點規勸而裨益之並於函尾開列有益於其人之經籍若干種作其人持躬涉世準繩朋輩尺素往還減除無益虛文時引先哲立身處世金言互相勸勗盡他山攻錯之誠就各人程

繕寫流通 \ 心維世道厥功甚巨能寫全篇或全部付梓行世其功德更無量 ₁ 善寫之士凡遇求書法者必選經書中至言法言寫之藉以正人

十二翻印流通 仁摩義免至蕩檢踰閑空天下之牢獄弭百年之巨劫胥於是乎基之裨益人心世道之經典例無版權大宜集資翻印以廣流布使舉世瀚

十三貿易流通 舉行勝會之場或負販至各大都會之中方便讀者不惟造福兼可益資書坊刷印善書以及寒士販賣善書取流動消行法推廣貿易或發兌於

十四旅行流通 士若一路迎機開發或攜流通經典之傳單沿途散布爲羣爲法兩多裨益年來輪船火車交通日便千里之遠旦暮可達旅行既便旅客日多抱道之

十五廣告流通 法爲流通大法之助能隨時研究廣告學以宏流布則收效必宏大質買商能利用廣告則貿易日昌宏法之士大宜採用此新式宣傳

十六公閱流通 以上十六種流通法依據先賢定則參酌時代情勢擬之 根柢學者雖不能謂有罪卻不能云無過宏揚大法廣行化導莫善於各地方設立公閱經書處得經典而束之高閣者有罪過閒置案頭不能公之大眾者有罪過樂爲多眾宣說缺乏無礙辯

徹悟禪師念佛伽陀教義百偈第一至第十

佛求生西方爲主。其所發揮・實爲近代所罕見・今錄其教義百偈・以爲修 徹悟禪師 ・深通教義・徹悟宗乘。晚年歸心淨士・自行化他・一以信願念

淨業者作一善導。釋印光識

異方便・普攝羣機・旁通一綫。一句彌陀・開往生門・是多福德・非少善根 少・木耳偏多。一句彌陀・大意分明・蛇生弓影・薬出金瓶。一句彌陀・名 句彌陀・我佛心要・豎徹五時・橫該八教。一句彌陀・意旨如何・知音者

心・入無生忍。一句彌陀・證三不退・祇此一生・便補佛位。一句彌陀・滿 十大願・豈得普賢・錯教了辦。一句彌陀・白牛駕勁・其疾如風・行步平正 句彌陀 ·臨終佛現 ・四辯親宣・六方共讚。一句彌陀・成佛標準・以念佛

徹悟禪師念佛伽陀教義百偈 ^{第十二} 至二十五

來。一句彌陀・入王三昧・似地均擎・如天普蓋。一句彌陀・得大總持・轉 開般若門・十虚萬法 枝・像含古鏡。一句彌陀・清淨實相・絕議絕思・難名難狀。一句彌陀・圓 無上・雲不與齊。 融法界・覿體全真・交羅無礙。一句彌陀・大圓智鏡・身土影含・重重掩映 一切物・使十二時。一句彌陀・性本自空・星皆拱北・水盡朝東。一句彌陀 法界緣起・淨業正因・菩提種子。一句彌陀・如鏡照鏡 一句彌陀・空如來藏・萬法未形・一真絕相。一句彌陀・圓滿菩提 句彌陀・如來藏心・水外無浪・器原是金。一句彌陀・妙真如性・春在華 一句彌陀・大般涅槃・一輪明月・萬里空寒。一句彌陀 ・一口平吞。一句彌陀・華屋門開・從者裏入・快隨我 ・宛轉互含・重疊 ・天更

交映

徹悟禪師念佛伽陀教義百偈 第二十六至四十

他萬像 不會 大藏論 彩・絕待幽靈。一句彌陀・一大藏律・瞥爾淨心・戒波羅蜜。一句彌陀・一 四句 弩。一句彌陀・明明是有・四辯八音・婆心苦口。一句彌陀・的的是無・鎔 無可譬喻・古鏡當臺・水銀墮地。一句彌陀・老婆心苦・運萬斛舟・發千鈞 句彌陀・似空合空・了無痕縫・卻有西東。一句彌陀・一大藏經・縱橫文 非有非無· 句彌陀・渾全大藏・戒定慧光・流出無量。一句彌陀・繩本是麻・柰何 ・翻疑作蛇。一句彌陀・罕聞罕睹・影現鏡林・響宣天鼓。一句彌陀 ・當念心開・慧光如噴。一句彌陀・一藏秘密・發本神通・具大威力 ・入我洪鑪。一句彌陀・亦無亦有・夢裏山川・鏡中華柳。一句彌陀 捺著便轉・水上壺盧。一句彌陀・第一義諦・尚超百非 · 豈落

徹悟禪師念佛伽陀教義百偈 第四十一至五十五

此一生・作箇閒漢。一句彌陀・只恁麼念・百八輪珠・綫斷重換。一句彌陀 Ů 凡・融通世界。一句彌陀・有功者賞・王膳盈前・髻珠在掌。一句彌陀・里 要在信深・蓮芽九品・抽自此心。一句彌陀・要在願切・寸心欲焚・雙目流 不及・吾末如何。一句彌陀・歸元捷徑・緊要資糧・唯信願行。一句彌陀・ 仁爲美・居卜來歸・枯樁非鬼。一句彌陀・非難非易・九品蓮華・一生心力 。一句彌陀・就路還家・可惜癡人・棄金擔麻。一句彌陀・横出娑婆・汝信 句彌陀・妙圓三諦・最清涼池・大猛火聚。一句彌陀・得大自在・轉變聖 一句彌陀・要在行專・單提一念・斬斷萬緣。一句彌陀・誓成片段 · 拌

則巧。

・不急不緩・心口一如・歷歷而轉。一句彌陀・愈多愈好・如人學射・久習

徹悟禪師念佛伽陀教義百偈 第五十六至七十

干。 土莊嚴、更非他物。一句彌陀・無爲大法・日用單提・劍離寶匣。一句彌陀 寶所・不住化城。 身頂戴・人命無常・光陰不再。一句彌陀・如救頭然・盡十分力・ 泥・價廉工省。一句彌陀・類如鑽火・木煖煙生・暫停不可。一句彌陀・全 頓入此門・ 句彌陀 無漏真僧・雪山藥樹・險道明鐙。一句彌陀・滿檀那度 句彌陀・妙圓止觀・寂寂惺惺・無雜無閒。一 句彌陀 攝心密持・ 金翅擘海 ・驀直念過・一踏到底・香象渡河。一句彌陀・無相心佛・國 __ 句彌陀 ·直取龍吞。一 如人飲水・冷煖自知 ・如水清珠・紛紜雜念・不斷自無 句彌陀 ·塵緣自斷 句彌陀・ 句彌陀 師子遊行 譬猶掘井・就下近 · 險路砥平 裂破慳囊 0 句彌: 期上品蓮 · 驚散野 掀翻 直抵 陀

寶聚

徹悟禪師念佛伽陀教義百偈第七十二 至八十五

陀・滅除定業・赫日輕霜・洪鑪片雪。一句彌陀・能空苦報・世根界身・即 八字打開・普同供養。一句彌陀・斷諸煩惱・全佛全心・一了百了。一句彌 識田。一句彌陀・宏通敢惰・入大悲室・坐法空座。一句彌陀・無盡寶藏・ 露。一句彌陀・想寂思專・未離忍土・已坐寶蓮。一句彌陀・一朵寶蓮・唯 滿禪那度・現諸威儀・藏甚枯樹。一句彌陀・滿般若度・境寂心空・雲開月 相空・無生忍悟。一句彌陀・滿毘梨度。不染纖塵・直踏玄路。一句彌陀 心之妙・法爾如然。一句彌陀・一朵寶蓮・凡情不信・亦宜其然。一 ・一朵寶蓮・決定不信・真箇可憐。一句彌陀・一朵寶蓮・直饒不信・已染 句彌陀・滿尸 羅度・都攝六根・圓淨三聚。一句彌陀 ・滿羼提度・二我 句彌陀

粗而

妙

徹悟禪師念佛伽陀教義百偈第八十六至一百

結 。 一 諸惡趣・萬德洪名・那容思議。一句彌陀・機逗人天・參差三輩・掩映九蓮 仰・法喜均沾。一句彌陀・報未報恩・裂纏綿網・入解脫門 康化佛・善導光明。一句彌陀・有教無類・雄俊入冥・惟恭滅罪。一句彌陀 列祖奉行 普賢・大人境界。一句彌陀・微妙難思・唯佛與佛・乃能知之。一 是無上禪・一生事辦・曠劫功圓。一句彌陀・理非易會・百偈俄成・三尊 句彌陀・ 句彌陀・化兼小聖・回狹劣心・向無上乘。一句彌陀・超然無礙・文殊 句彌陀 ·馬鳴造論 圓轉三障・即惑業苦・成祕密藏。一句彌陀・ 利大象龍 ・龍樹往生。一句彌陀 ・永明禪伯・智者教宗。一 因緣時節·異香常聞 句彌陀 解難解冤・慈光共 感應非輕 。一句彌 句彌陀 蓮社 陀 少 空 創

加被

普為現在印送受持以及永遠展轉流布增廣文鈔者回向頌曰

刊布 數。 入聖域・沒往西方。先亡祖妣・歷劫怨親・俱蒙佛慈・獲本妙心。兵戈永息 陝垣堪悲・圍解求救 有發揮・地塵海滴・微乎其微。自諒陋劣・非佛莫度・亦有同志・唯此是務 密・普遍包涵。十方諸佛・盡劫宣揚・妙義奇勛・尙難周詳。況我凡庸・偶 淨土法門・是法界藏。機理雙契・最為無上。等覺大聖・逆惡小凡 。由是故有・種種蕪語・聊攄愚誠・豈宏淨土。因諸居士・爲利初機・數次 禮讓與行・人民安樂・天下太平。四恩總報・三有齊資・法界衆生・同證 願出資人・及讀誦者・消除業障・增崇福祉。家門清吉・身心安康 ・冀有所依。有葉德廣・出資三千・擬作印費・期廣流傳。八月長圍 ・盡數濟饑。又有善士・隨意捐助・三五千部 。倘 · 律教禪 可湊 ・生

菩提

民國十六年丁卯夏曆二月十九日古莘常慚愧僧釋印光謹撰

一三六

啟信雜說附記

僧云 滂沱 宿怨不能解 我與彼前生定規有怨。 飢民所打 挖兩勺腦肉 其人意謂不與我煮・遂執斧・ 飢民突來・喊肚飢・要吃飯・僧云・我飯已吃過・無有餘者・其人要更急 清光緒二三年・北方數省大旱。有蔚州僧蓮某者・于村外小廟中住・有山東 村中凡有官事・以撞鐘爲號令・遂通來廟中・見其僧仍臥被打之處。血流 。而從屋至鐘前。來去皆流有血迹。按之猶有氣。因扶起喚醒 · 我爲汝另煮點 ・遂去數十人四路追之・其人被執・願爲償命・拉至廟中 。倒于煤中而去。其僧昏迷。不知人事。遂到鐘前。急撞數十下 更結新怨 ・其僧日課六萬佛號 彼今打我 。我吃不起此虧 用背向頭一 。諸君又難爲他。 0 打・僧遂跌倒・其人以挖煤鐵勺 我尙有一千錢。與他令去。 。口雖許煮・欲將此一串珠搯完 豈不是令我白受打 云 其僧之 僧曰 。不但 被 0

矣哉・光緒十三年・光與其師弟蓮如・由紅螺山朝五臺・回至其僧廟中 頂遂長合。而且仍復如平人之堅硬。但全頂無一毛・而周圍俱有傷痕・亦異 · 時

全書西歸直指卷三啓信雜說最末一則—人間勝事無如念佛—之印祖附記) 爲光言之·附之于此·以爲啓信之助。民國十一年·釋印光記。 (錄自安士 已六十餘矣・面目奕奕有光。一望即知其爲有道之士也。蓮如師指其頂・而

普為印施壽康寶鑑及展轉流通讚揚勸閱諸善士回向頌

者・莫過淫欲。是以君子・持身如玉・閑邪存誠・夙夜兢惕。如是制心・欲 切事業・以身爲本・身若受虧・事俱消隕。傷身之事・種種不一・最酷烈

念不起・何況邪淫・蔑倫越理。世有愚夫・不知此義・每致縱欲・不遵禮制 同倫・共樂性天。不慧有感・增訂流傳・高懸殷鑑・以拯青年。徳廣居士 。貪暫時樂・受長劫苦・減算折福・尙其小耳。以故前賢・敬輯此編・冀諸

捐洋千六・印送各界・期登壽域。又有善士・隨緣附印・欲令此編・徧布遠

嗣賢善・長發其祥。凡出資者・及讚助人・災障消滅・福壽孔殷。先亡祖禰 近。願諸閱者・擴充此心・展轉流布・普令見聞。庶可同倫・悉獲壽康・子

超生淨土・後嗣子孫・吉慶無已。世運日隆・風俗日美・先賢懿範・人各

民國十六年丁卯孟夏古莘常慚愧僧釋印光謹撰(錄自台中市瑞成書局民國四 繼武。爰書俚語・用表芹忱・祈發大慈・自利利人。

十三年版壽康寶鑑第八三頁)



智生鑑 印卷

死

紫不學 自忘道成此之 字 釋印光書八十 則念 道念

可以作佛 人皆可以為夷婦人

府印金

卢白

佛旣 自勉力修持 **大大我亦** 爾敢不

神年八十

但願嘉衛衛人成念佛 只緣淨 土 足及 君家

— 四 四

× ×

請 迎勿 止 翻擅 販 結 印改鲁 决 流内 ¥

通容

普為 輾 轉流通 願 出資及 113 者 此 讀誦 <u>.0</u> 功 á 偈 尝 德 持 回

上 花 嚴 報 佛 四 淨 重 風 土

À

劃

撥

帳

有 濟 見 三 迩 聞 者 苦

下

岩 此 發 菩 提 報 身 ئ،

網法

址師

÷

www.amtb.cn

悉 同 盡 岁 极 樂 团

×

*

*

*

¥

×

×

×

This book is for free distribution. It is not for sale. Printed in Taiwan.

傳

真

÷

(〇二)ニセ

〇 三

九

五

— 产

雷

話

÷

(〇二)ニセ

五

四

セ

_

セハ

段

三四

號

五樓

公元二〇一〇年十月 法 師文鈔(下冊) 恭印貳仟册

版 者 ŧ 華藏淨宗弘化基金會

地 出 址 ÷ 台北市大安區信義路 四

號 名 ŧ 五〇〇七一七 二五

E - m a i l ÷ ÷ hwadzan@hwadzan.tw www.amtb.tw 財團法人華藏淨宗弘化基金會

(請法寶專用)

www.hwadzan.tw www.chinkung.org

的 者 ÷ 和裕出版社 (〇六)二四 五四〇二三一七

承



財團法人華藏淨宗私化基金會 Corporate Body of Hwa Dzan Pure Land Teachings Propagation Foundation

本會一切法寶·克賣結緣,禁止販售,請勿擅改內容,歡迎翻印流通。
This book is for free distribution. It is not for sale.
Printed in Taiwan